

固安文獻志二十卷
賈廷琳修 徐世昌纂
民國十七年鉛印本
八冊

原件收藏

湖北省圖書館

原件書號

地 19

原件狀況

原件完好

本部書共攝制 2 卷

2:1 卷首~卷18

2:2 卷19~卷20

版權所有 不准復印


本部书开始

本片卷含： 卷首~卷18


耆舊事彙 卷一

固安文獻志

朱益藩署檢



文十一
212.13
60.30



固安文獻志

新會梁啓超署檢



徐內總統川際

賀培新敬題



民國十六年冬十一
月固安公署印行

賀培新敬題


國原君先生川儔



固安高棗坡先生小像



固安曹硯齋先生小像



固安楊淑皋先生小像




固安王安喻齋先生小像



固安賈冠英先生小像




固安賈瑞孫君小像



國安文獻志序

國安文獻志：玉篇卷之五



志按：著于卷五，先而集二十卷

其餘積稿尚多，外付以次續梓

焉，免為未為，實之，又或乞并

之方志文辭之業亦難於史也
其寸分其寸分其寸分其寸分
而其後未可也其也其也其也
復可也其也其也其也其也其也
其體例上至繁目錄亦強為類

其要亦之以法其體而為其變
其獨得國史方志義例雖有
廣狹而其體亦用其也其也其也
其取材於方志其也其也其也
其也其也其也其也其也其也

孔子作春秋取百二十國之實
書之太史公書乃以春秋諸
侯史記為百二十國及春秋
城諸侯史記及春秋方志也
戰國以子夏著世國世史秦阮

子夏著春秋建國孫惟皇帝
史記為世國世史因之史記
錄乃世國世史世人之謀為
一姓世國世史世人之謀為
世國世史世人之謀為

湖陽方志之能其傳於世者論
安志寧郡志建康志猶與松
檉為良其取法建寧昭岳各
川者刻海物志亦是其考之
化通海國交百年或為十年

輒以續海之末治為故子之
制善者存其書多根籍善
著者出於俗儒牧伯之可以為
證何者百不一見其言者損
否邦亦也何時省志惟二年氏

湖北志黃氏畿輔志何孫也
夏陸稼書書靈壽志魯通甫題
何志記述翔身身法學子考編
之然上臨安公郡法志海垂
可之也班陳范相去殆遠

主之學擊南先生以一代人文宗
區數海學矣二有撰海內風土記
乃以司馬氏班氏之才孫孫編
致搜文二事之然身一而亦區三
如如物中察松坡縣志書志以

未嘗不慨過之者君玉詩稱
坡為學先生再傳弟子博極
羣書之元心前為何國安文粹
後墜因致之訪求物中六生石故
法故供慮中披覽謹觀以來

法史百氏稱良難記苟亦文粹
有徵靡不釋記而藝文類聚
初學記諸類書可致撰文考二
攝撰其遺積十餘載而成是編
其功力免獨深於著書體例中

書是筆者又獨之何所其也
富者昔之於一方文藝者亦伴
也君玉為國定先生之家子
以先生之文為先生之方志也
可為陸不必為海內記相疑

二必遠近也代遠方志之上
免和言文藝志先聖之固
安其志之果出於亦為而
傳之其津律也撰其書



余外舅 貴筑李濬舟先生清同
治中官永定河道十年不遷而功
德在民其民至今思之先室李夫
人生於固安縣之道署且長烏恒
為余道固安事每欲偕余一訪其
幼所鈞遊處人事庶卒虛風約

而夫人已長逝矣

賈君玉先生纂文獻志以初刻校本見示讀竟起懷舊之蓄念烏其書取材豐而數在方志中獨翻新體不朽之業也戊辰秋梁啓超



固安文獻志敘

我固安土厚水深風俗醇樸士生其間者率多篤行君子不汲汲於辭章之末又各尊所聞各行所知無標榜聲華之習故昔先正之流風餘韻往往以故廬莫訪遺箸無存不數傳已胥歸澌滅者士論惜之而過激者又謂士先器識後文藝以張壯武之治聞博物學爲國華疏亮之士猶恨其兒女情多風雲氣少則多文不如少文且有文不如無文之爲愈矣是又不然惟文與獻風化攸關杞宋無徵宣尼致慨自有載籍以來大而瀛寰中而郡國小而鄉縣披輿圖攷禮俗未有不以人物爲中堅者也我邑舊志囿於見聞所載人物自魏晉以訖明清寥落似晨

星明滅如朝露蓋蒐集之人少而漏略之事多士風之醇樸在此士習之簡陋亦在此吾同邑友賈君君玉竊有憾焉曩年因事來京嘗就商於余慨然以網羅散失拾補闕遺爲己任時前邑宰當塗徐性初大令方擬開局縣署召集紳衿重修新志特邀余董其事余首薦君玉爲總纂徐君然其說即躬訪君玉招飲暢談定議剋期舉辦會直皖軍事起戎馬倥傯我縣適當其衝徐君旋以勞瘁卒于官修志事遂寢君玉於是就館津門余畱滯京師亦以教讀爲謀食計在苒六七年前事已忽然若忘矣客歲秒君玉忽馳書來以固安文獻志藁若干卷見示謂數年間館課之暇見典籍之有關鄉邦故事者輒從事纂輯積久

編成十許册名曰文獻志其地理河流古蹟藝文金石各門亦將繼續排纂今因同人集資擬先以此編付印特請余爲敘以行之並深自謙抑比之左太冲之以三都示玄晏烏庠玄宴重望余曷敢承第披覽全編不禁深嘆君玉用心之勤立志之篤如編中所載魏之劉驃騎唐之燕國公漢陽王五代之曹給事明清間之賈正卿等諸先正皆古今人物之卓卓者乃舊志從未道及君玉獨一一爲之詳徵博考補入編中又其於楊太僕之殿試策得之則喜極欲狂於蘇中丞之寒郵集不得則引爲大憾其敬恭桑梓闡發潛幽之意爲何如其誠且摯也烏庠君玉亦篤行君子厚重簡默未肯輕爲標榜者今竟於吾鄉之佚

聞墜典搜采不遺餘力而吾鄉文獻遂胥託君玉而存是君玉即吾鄉莫大之文獻矣炳燭數明獲覩此作償我夙願何幸如之况新志全編轉瞬歲事以六七年前擬集衆力分纂合編之鉅製君玉乃一旦以獨力成之是尤非具特殊之器識深得尊聞行知之達愜者不及此烏虜志即史也吾國正史自晉唐以來皆開局編纂而卒推馬班陳范爲獨有千古者亦正以衆力所爲不若獨力所爲之精且粹爾君玉勉乎哉麟角鳳毛獲覩已快而大文炳蔚仍望全豹之早窺也謹此引喙尙希終奏敢洗下里巴人之耳卒聽陽春白雪之音戊辰春二月笠園絜麥高潤生敘

固安文獻志序

固安亦畿南一都會川原沃衍風俗樸厚自張壯武而後代有聞人予於民國十六年秋杪來攝縣篆適值兵事俶擾鄰氛不靖之時拊循安集之不遑更無暇問及文事矣縣儒賈君君玉寄示所著固安文獻志稿採輯古今書籍都一二千種考逸鈎沈門分類別昔人事蹟已經湮沒及紀載錯誤者概行搜補訂正積十餘寒暑始得脫稿當此舉世競尙新文化國學淪喪之時君玉獨能於鄉邦文獻網羅於業經放失之餘孜孜矻矻鏗而不舍非所謂篤古自信守道不渝之君子人歟客冬擬議釀資付印今將次第工訖予喜固安之遺聞軼事得託茲編以再

傳並嘉君玉用力之勤且摯也爰弁數言於簡端以誌不朽云
中華民國十七年春三月固安縣知事豐寧謝桐森序

固安文獻志序

吾縣志明以前不可考雖有存目其書無徵故斷自鄉先哲蘇
右都志皋胤修於嘉靖四十三年甲子嗣後迭經修補由康熙
五十三年甲午迄咸豐五年乙卯一百四十餘年至今又七十
餘年文獻放失久矣有明一代吾縣人才稱極盛清康熙後稍
稍衰歎嘉道咸同幾無人焉豈盛極之後難爲繼歟或河流變
遷地勢隨之移轉堪輿形法之說果有徵歟抑天運循環盈虛
消長盛衰倚伏之理固如是歟舊志訛誤遺漏沿襲已久李警
院天翼其名附見金史循吏傳事蹟具元遺山中州集甚明舊
志列入隱逸今祀鄉賢祠稱元逸民李天翼舛已成豐志以于

襄勤爲于清端且曲加註解謬戾更屬顯然居嘗考舊志明代人物事實覈以明史及陳氏鶴明紀夏氏燮明通鑑間有舛牾輒擬鉤稽考訂劄記用備遺忘民國三年甲寅入贛後簿書鞅掌奔走匡廬庾嶺間舊業閣置十五年秋季旋里歲行一周蟄伏鄉閭寇警俶擾訖未安居今春同學友賈君君玉寄示所撰固安文獻志數冊函懇商訂一再往復君玉用心之勤篤荒落如予何能有所貢獻竊喜吾縣數百年後文獻之遺軼者錯誤者經君玉多方釐正搜補網羅墜失如珠之還如劍之合日重暉而絲就緒也非學識充裕博稽詳考而又歷以歲月烏能訂正昔人積久之闕失乎哉光緒三十一年冬予與君玉同研席

於保陽毛方伯署中時時過從譚菴三十三年夏京邸分袂今二十又二年矣滄桑世變如奕碁然學說遷流日新月異君玉獨於舉世波靡之時留意鄉邦文獻用力幾二十年不憚勞動輾轉假借鈔撮審察始克成書其勤劬可謂至矣民國十四年秋友人議續修縣志因循未果今君玉此編先出將來修志得爲藍本寧非快事予猶望君玉卒成之以竟全功庶幾吾縣志乘垂諸永久可無疏陋之虞邇來近畿縣志先後增修者如文安霸縣房山獻縣皆次第刊行君玉之文獻志適於今春付印天下事固有因一時風會所趨而功成業舉者著書亦然宋理學清考據當其盛時述作蔚起何止汗牛馬充棟宇耶君玉其

勉之予且拭目而觀新志之成也

民國十七年戊辰夏五同學弟曹樹殷書於則廬

固安文獻志序

賈君以通今博古之才守先待後之志著吾邑文獻志一書以存梓鄉之掌故而揚前哲之幽光甚盛軌也使君出其艱卓之功精銳之力師韓蘇之宏著效李杜之苦吟日課一詩歲成一集則研精抽祕以抒其才鬪韻競奇以炫其博豈不舉世奉爲詞宗稱爲詩伯使文人學士齊拜下風哉然而鉅心鏤肝無關宏旨吟風弄月僅表才情比陸放翁之集著劍南仿白香山之詩編長慶以言風雅誠風雅矣顧祇揚一己之才華未表先賢之矩矱規模度量尙或未閔君則於一切文詞不輕命筆獨毅然留意於鄉邦文獻述而不作信而好古博求往籍勿厭煩勞

固安文獻志

上自漢魏下迄明清凡有一事之可記一節之足錄靡不揭櫟於篇志其概略屬草已成者凡若干卷尙友論世至詳且備使千餘載湮沒弗彰之事之人一旦表而出之開志乘之新紀元其有功於桑梓亦云偉矣至其識見之高卓議論之明通不僅合於史筆之體裁且足徵其居心之忠厚吾有以知賈君世澤之長子孫得永食其報於無疆也抑尤有言者吾族祖尉馬都尉明宇公與君之族遠祖孝子正卿公以道義相施報見稱士林爲後世矜式今憲與君復以文字結契同沐先人之餘光累世通家非偶然矣附綴數言以誌吾幸民國十有七年歲次戊辰秋八月朔同里楊憲淑泉甫序

固安文獻志序

吾縣輿地舊隸范陽與涿郡本境人物往往因汎舉郡望

如張氏

爲本縣巨族而隋唐以來多祗稱范陽張氏之類

以致籍屬莫定非一縣所得專或乃書史

明有可徵

如唐燕國公張說本貫方城之類

而孤陋相承從古無人省錄此舊志

於鄉邦文獻每歎多所闕畧而深心世道者所欲掇拾舊聞以補史乘之不足保人文於不墜者也同年友賈君君玉嗜學好

古日手一編少日最受知於當代耆儒豐城毛實君先生

先生愛才

若性命官直隸布政時甄拔吾縣士十餘人致之藩署儲才館尙義亦

添預焉而君玉晨爲先生器重故君玉亦相從數省侍杖履者逾十年 中年後

更假館於元首戮齋徐公所課其子姪以至於今其文學品望冠絕等倫素抱修輯縣志之心今先纂成固安文獻志若干卷

固安文獻志

王序

趙莊賈氏九閱齋

於古今載籍瀏覽不下數萬卷廣摭博採集爲此編可謂殫見
洽聞博物君子矣從茲吾鄉諸先哲潛德幽光煥然彪炳實可
與縣志並行如通鑑之有長編諸史之有紀事本末焉屬稿未
竟因尙義忝在至好寄與參閱適合肥李公海荃宰吾縣見之
歎爲奇才欲公諸世遂攜往都門付印時值國奉戰役事致中
綴今縣長熱河謝公仲魯下車伊始聞余道及是編慨然相與
籌集鉅資俾付剞劂此後吾鄉數千年遺聞雅故一展卷而瞭
然匪公毅力主持曷克觀成有日縣中諸同志僉以序文屬諸
尙義尙義十年來息影故園近雖再承乏縣中教育事而學殖
荒落謫陋不文其何敢以蕪詞妄綴簡端惟念與君玉篤好近

三十年心理之觀感互相映照是稿實由余手轉出故詳爲述
之夫時當國人醉心歐化潮流盪演波譎雲詭競尙新奇君玉
獨能不爲社會左右寢饋故簡陳編於鄉先哲之嘉言懿行流
風餘韻不欲其一字之遺輯錄大率出舊志之外蚤夜神往唯
有古人則其蘊於中者爲何如耶嗟乎一邦之文物典章要爲
一邦之精理神髓元氣所在風化攸關天地常存古道人心終
當不死甚願君玉闡發班馬宏願將來更續成吾縣新志則太
上不朽之功尤爲邦人君子所馨香默祝者也民國十六年歲
次丁卯冬十月同里年友王尙義裕齋甫序

同學友賈君君玉撰固安文獻志成為賦長句

同學弟曹樹殷

吾邑方城故屬廣陽國漢志紀述稿且詳後來改置訖莫定轉

隸幽州涿郡與范陽固安之栗名天下蓴羹羊酪同荒唐胡梅磧註通鑑

固安之栗天下稱之兩漢西晉北魏固安俱治易水今易縣境亦作故安故胡註云然吾邑本漢魏以來之方城縣隋開皇六年改名固安沿襲至今平陸無山自古不

也產栗志乘失修歷年久文獻遺軼無由彰吾友賈君篤嗜古劬

志博學聖所臧網羅及今二十載搜求金石兼縹緗鉤沈考逸

訂闕誤珠還劍合恢精光一旦殺青甫脫稿洵哉敬恭維梓桑

憶昔與君接研席保垣薇署儲才良爾時輩流劉與李唱酬更

疊紛紛翔南豐劉班侯超開縣李範之大防自經滄海屢變易分飛勞

燕天一方君今箸書志鄉國千秋盛業名山藏懷人感舊敦夙
好切劇高誼何時忘

固安文獻志

銜名

前

大

總

統徐世昌鑒定

光緒丙午科優貢生前公府祕書廳編書員賈廷琳編纂 君玉本縣南
趙各莊人

光緒己丑科進士翰林院檢討 前江南道監察御史陞戶科給事中 高潤生參訂 藁坡本縣渠
溝鎮人

光緒癸卯科舉人前江西九江蓮花等縣知事曹樹殷參訂 硯齋本縣中
公由人

光緒壬寅補科優貢生 前江蘇金壇宿遷等縣知事現國民政府財政部一等科員 楊憲參訂 淑舉本縣人
寄居江蘇

光緒丙午科優貢生本縣教育局局長王尙義籌印 喻齋本縣大
楊家府人

民國己未高等學校畢業生本縣教育局辦事員賈士魁校勘 冠英本縣南
公由人

民國辛酉京師法政學校肄業生賈錫琛採訪 瑞孫本縣南
趙各莊人

凡例

一吾鄉風俗樸僿自清代來縣中無一世家巨族故境內藏書家絕少欲問鄉邦故實每苦於文獻無徵宋馬貴與有言生乎百載之後而欲尙論千百載之前非史傳之實錄具存儒先之緒言未遠雖聖人亦不能臆爲之說故此編以摭採關於縣中故事爲主一以存梓里之舊聞一以昭一方之信史俾文獻不至日湮竊所深幸

一江文通謂修史之難無過於志誠以志者憲章之所繫非老於典故者不能爲也修郡縣方志與修國史諸志其難略同欲求方志之翔實而典核非先將一方之遺聞雅故薈萃成

書以備甄採不可此編於古今載籍但有相關各事宏纖巨細登錄靡遺庶幾數典忘祖之譏冀或稍免

一明史藝文志載有程敏政新安文獻志一百卷朱陸樾中州文獻志四十卷李濂祥符文獻志十七卷此外府縣志以文獻名者尙六七種顧諸家方志以文獻名者雖多迄今並未見一刊本流傳既無舊例可尋等於例自我創孔子言夏殷二代禮致慨於文獻之不足徵說者謂文典籍也獻賢者也典籍考之於古賢者證之於今往事摻羅燦乎備列亦如通鑑之有長編諸史之有紀事本末焉或乃以蕪濫譏之則在所不計

一自清阮文達撰國史四傳創爲集句體取各名人之事狀碑誌集而爲傳無一語無來歷尤足徵信來茲光緒初繆筱珊氏纂順天府志即沿襲其體而於我縣人各事攬摭尙多未備此編於諸先正嘉言懿行就所及見之書按條臚列且詳載撰書人名以爲將來修志撰集句體之嚆矢其有書爲目所未見及多年加意尋訪終未得見者均付諸闕如

一廷琳自弱冠後假館南北數省今已逾三十年於故里情形曹多未識且質性憐闇掩卷輒忘惟歷年所假館之主人如豐城毛實君師南皮張筱帆中丞及今府主天津弢齋徐公所皆富有藏書琳琅滿目而年來所自購藏者亦數十巨麓

披覽之餘手自繕寫又間往京津各圖書館借閱摻書不下數萬卷始克集爲此編雖挂漏尙多然補缺拾遺期諸異日一我縣有明一代科名仕宦號爲極盛此編所登載每有爲其後裔所不及知者然亦有諸家子孫迄今或幸存其遺書傳狀爲廷琳所不及知亟待表章者乃數年中函札紛馳竟無二三家以相鈔示又未見縣人一種著述在市肆流傳昔章實齋嘗謂修志者尤當取窮鄉僻壤畸行奇節子孫無力闡揚務爲立傳以備採風者觀覽然竊謂仕宦顯赫者採訪其遺事尙難爲甕牖窮簷之士立傳空談豈能秉筆顧瞻桑梓良用歉然

一我縣舊志創修於明嘉靖季年蘇中丞志臯其自叙有云吾縣歷世以來不知何故曾未有爲之志者然考明初文淵閣書目有固安新舊志二種又固安圖經見於宋太平御覽所引則固安之有志亦已久矣特世乏傳本故中丞偶未知耳以中丞之博雅宏通尙不免百密一疏何況末學後生耳目聽觀有限糾謬補遺是所望邦人君子

固安文獻志卷一目錄

耆舊事彙

魏

劉驃騎放



晉

劉宗正許

劉驃騎次子

張司空華

上鄉賢祀



固安文獻志卷一

天津徐世昌鑒定

縣人賈廷琳謹編

耆舊事彙

山川清淑。誕毓英賢。有人則郡邑為之增榮。無人則川
 原因之寡色。故稽一方志乘者。莫不首以一方人物為
 先。時閱千年。即一邑一里之人。其與草木同腐者。已無
 量數。惟英偉不世出之人。則歷千載而奕奕如生。然則
 人之所以不朽者。蓋有在矣。固安人物。以晉司空張華
 為稱首。考晉初諸臣列傳。幾無不有司空之遺事。雖慘
 遭家禍。而子孫蟬嫣繼起。焜耀簡編。於以歎忠盡名賢。

之世澤。其垂貽遠矣哉。前乎司空者。則為曹魏時劉驃
騎放。固安舊志失載世或以召還司馬宣王。肇魏室禍譏之。然悠
謬之口。亦何足憑。且其人文學優裕。吾鄉人物。最古見
於載籍者。莫之或先。又此編鈔纂。特以備一方之掌故。
而一方古今生才有限。難事苛求。茲故以劉驃騎父子
居首。張司空繼之。以逮於有清末造。所疚歉者。於鄉國
名賢。不免尚多掛漏。一則囿於耳目聞見。一則苦於文
獻無徵。所望踵事摻羅。責在吾鄉繼起君子。至若唐之
燕國公張說。其生平遊處。確為吾縣人。漢陽王張柬之。
身雖不居本縣。而溯其方城本貫。每每數典不忘。又若

五代晉之給事中曹國珍。元之定興令宋著。明清間吾
族祖之賢孝賈三槐。皆吾縣人物之卓卓者。乃舊志於
諸人。均未曾一字道及。殊為遺憾。廷琳今一一為之詳
徵博攷。載入編中。語曰。水非水不流。人非人不續。有志
之士。緬吾鄉先正之大有人在。所宜感奮興起。勉希前
修。勿自囿於一隅。而使吾鄉多數之賢哲。獨昭垂於志
乘也。民國十四年秋月。縣人賈廷琳謹識。

魏

劉驃騎放

〔三國魏志劉放本傳〕劉放。字子棄。涿郡方城。二字据通鑑胡三省注增人。漢廣

陽順王子西鄉侯宏後也。歷郡綱紀。舉孝廉。遭世大亂。時漁陽王松據其土。放往依之。太祖克冀州。放說松曰。往者董卓作逆。英雄並起。阻兵擅命。人自封殖。惟曹公能拔拯危亂。翼戴天子。奉辭代罪。所向必克。以二袁之彊。守則淮南。冰消戰則官渡。大敗。乘勝席卷。將清河朔。威刑既合。大執以見。速至者漸福。後服者先亡。此乃不俟終日。馳驚之時也。昔黥布棄南面之尊。仗劍歸漢。誠識廢興之理。審去就之分也。將軍宜投身委命。厚自結納。松然之。會太祖討袁譚於南皮。以書招松。松舉雍奴。泉州安次以附之。放爲松答太祖書。其文甚麗。太祖既善之。又聞其說。由是遂辟放。建安十年與松俱至。太祖大悅。謂放曰。昔班彪依

竇融而有河西之功。今一何相似也。乃以放參司空軍事。歷主

簿記室。出爲郃陽祿祔

祿音都祔音都

贊令。

魏國既建。與太原孫資俱

爲祕書郎。先是資亦歷縣令。參丞相軍事。文帝即位。放資轉爲左右丞。數月放徙爲令。黃初初。改祕書爲中書。以放爲監。資爲令。各加給事中。放賜爵關內侯。資爲關中侯。遂掌機密。三年放進爵魏壽亭侯。資關內侯。明帝即位。尤見寵任。同加散騎常侍。進放爵西鄉侯。資樂陽亭侯。太和末。吳遣將周賀浮海詣遼東。招誘公孫淵。帝欲邀討之。朝議多以爲不可。惟資決行策。果大破之。進爵左鄉侯。放善爲書檄。三祖詔命。有所招喻。多放所爲。青龍初。孫權與諸葛亮連和。欲俱出爲寇。邊侯得權書。放乃改

易其辭。往往換其本文而傳合之。與征東將軍滿寵。若欲歸化。封以示亮。亮騰與吳大將步騭等。騭等以見權。權懼亮自疑。深自解說。是歲俱加侍中光祿大夫。景初二年。遼東平定。以參謀之功。各進爵封本縣。放方城侯。資中都侯。其年帝寢疾。欲以燕王宇為大將軍。及領軍將軍夏侯獻。武衛將軍曹爽。屯騎校尉曹肇。驍騎將軍秦朗共輔政。宇性恭良。陳誠固辭。帝引見放資。入臥內。問曰。燕王正爾為。放資對曰。燕王實自知不堪大任。故耳。帝曰。曹爽可代宇。不放資因贊成之。又深陳宜速召太尉司馬宣王。以綱維皇室。帝納其言。即以黃紙授放作詔。放資既出。帝意復變。詔止宣王勿使來。尋更見放資曰。我自召太尉。而曹

肇等反使吾止之。幾敗吾事。命更為詔。帝獨召爽。與放資俱受

詔命。遂免宇獻肇朗官。太尉亦至。登牀受詔。然後帝崩。世語曰。放

資久典機任。獻肇心內不平。殿中有雞棲樹。二人相謂。此亦久矣。其能復幾。指謂放資。放資懼。故勸帝召宣王。帝作手詔。令給使辟邪至。以授宣王。宣王在汲。獻等先詔

令於輒關。西還長安。辟邪又至。宣王疑有變。呼辟邪具問。乃乘追鋒車。馳至京師。帝問放資。誰可與太尉對者。放曰。曹爽。帝曰。堪其事不。爽在左右。流汗不能對。放蹠其

足耳。之曰。臣以死奉社稷。曹肇弟纂為大將軍。司馬。燕王頗失指。肇出纂見。驚曰。上不

得入。懼詣廷尉。以處事失宜。免。帝謂獻曰。吾已差。便出。獻流涕而出。亦免。臣松之

以為孫劉子時。號為專任。制斷機密。政事無不綜。資放被託付之間。當安危所斷。而

更依違其對。無有適莫。受人親任。理豈得然。按本傳及諸書。並云放資稱贊曹爽。勸

召宣王。魏室之亡。禍基於此。資之別傳。出自其家。欲以是言掩其大失。然恐負國之

能。終莫也。齊王即位。以放資決定大謀。增邑三百。放并前千一百。資千戶。封愛子一人亭侯。次子騎都尉。餘子皆郎中。正始元年。更加放左光祿大夫。資右光祿大夫。金印紫綬。儀同三司。六年。

放轉驃騎。資衛將軍。領監令如故。七年復封子一人亭侯。各年老遜位以列侯朝朔望。位特進。曹爽誅後。復以資爲侍中。領中書令。嘉平二年放薨。謚曰敬侯。子正嗣。資復遜位歸第。就拜驃騎將軍。轉侍中。特進如故。三年薨。謚曰貞侯。子宏嗣。放才計優資。而自修不如也。放資既善承順主上。又未嘗顯言得失。抑辛毗而助王思。以是獲譏於世。然時因羣臣諫諍。扶贊其義。并時密陳損益。不專導諛言云。及咸熙中。開建五等。以放資著勳前朝。改封正方城子。宏離石子。評曰。劉放文翰。孫資勤慎。並管喉舌。權聞當時。雅亮非體。是故譏諛之聲。每過其實矣。

又魏明帝紀。裴注引漢晉春秋。帝以燕王宇爲大將軍。使與領軍將軍夏侯獻。武衛將軍曹爽。屯騎校尉曹肇。驍騎將軍秦朗等對輔政。中書監劉放。令孫資。久專權寵。爲朗等素所不善。懼有後害。因圖閒之。而宇常在帝側。故未得有言。甲申。帝氣微。宇下殿呼曹肇有所議。未還而帝少閒。惟曹爽獨在。放知之。呼資與謀。資曰。不可動也。放曰。俱入鼎鑊。何不可之有。乃突前見帝。垂泣曰。陛下氣微。若有不諱。將以天下付誰。帝曰。卿不聞用燕王邪。放曰。陛下忘先帝詔勅。藩王不得輔政。且陛下方病。而曹肇秦朗等便與才人侍疾者言戲。燕王擁兵南面。不聽臣等入。此即豎刁趙高也。今皇太子幼弱。未能統政。外有彊暴之寇。內

有勞怨之民。陛下不遠慮存亡。而近係恩舊。委祖宗之業。付二三凡士。寢疾數日。外內擁隔。社稷危而已。不知此臣等所以痛心也。帝得放言。大怒曰。誰可任者。放資乃舉爽代字。又白宜詔。司馬宣王使相參。帝從之。放資出。曹肇入。涕泣固諫。帝使肇勅停。肇出戶。放資趨而往。復說止帝。帝又從其言。放曰。宜爲手詔。帝曰。我困篤不能。放即上牀。執帝手強作之。遂齎出。大言曰。有詔。免燕王宇等官。不得停省中。于是宇肇獻朗相與泣而歸第。又魏明帝紀。裴注引魏略。帝既從劉放計。召司馬宣王。自力爲詔。既封。顧呼宮中常所給使者曰。辟邪來。汝持我此詔。授太尉也。辟邪馳去。先是燕王爲帝畫計。以爲關中事重。宜便道遣宣

王從河內西還。事以施行。宣王得前詔。斯須復得後手筆。疑京師有變。乃馳到入見。帝勞問訖。乃召齊秦二王以示宣王。別指齊王謂宣王曰。此是也。君諦視之。勿誤也。

又魏三少帝齊王芳紀。正始元年春二月乙丑。加侍中中書監劉放。侍中中書令孫資爲左右光祿大夫。六年八月癸巳。以左光祿大夫劉放爲驃騎將軍。右光祿大夫孫資爲衛將軍。

九年春二月。衛將軍中書令孫資。癸巳。驃騎將軍中書監劉放。三月甲午。司徒衛臻各遜位。以侯就第。位特進。

又魏辛毗傳。時中書監劉放。令孫資見信於主。制斷時政。大臣莫不交好。而毗不與往來。毗子敞諫曰。今劉孫用事。衆皆影附。

大人宜小降意。和光同塵。不然必有謗言。毗正色曰。主上雖未稱聰明。不爲闇劣。吾之立身自有本末。就與劉孫不平。不過令吾不作三公而已。何危害之有。焉有大丈夫欲爲公。而毀其高節者邪。宄從僕射畢軌表言。尙書僕射王思。精勤舊吏。忠亮計略。不如辛毗。毗宜代思。帝以訪放資。放資對曰。陛下用思者。誠欲取其効力。不貴虛名也。毗實亮直。然性剛而專。聖慮所當深察也。遂不用。出爲衛尉。

宋司馬光資治通鑑初太祖爲魏公。以贊令劉放。

胡三省注。鄴縣漢屬沛郡。

王莽改曰贊。治魏分屬譙郡。或曰贊相也。凡出令使之贊相。因以爲官名。蓋魏武霸府所置也。

參軍事孫資。皆爲祕書郎。

文帝即位。更名祕書曰中書。以放爲監。資爲令。遂掌機密。明帝

即位。尤見寵任。皆加侍中。光祿大夫。封本縣侯。

胡注。放。涿郡方城人。資。太原中都人。

是時帝親覽萬機。數興軍旅。腹心之任。皆二人管之。每有大事。朝臣會議。常令決其是非。擇而行之。中護軍蔣濟上疏曰。臣聞大臣太重者國危。左右太親者身蔽。古之至戒也。往者大臣秉事。外內扇動。陛下卓然自覽萬機。莫不祇肅。夫大臣非不忠也。然威權在下。則衆心慢上。勢之常也。陛下旣已察之於大臣。願無忘之於左右。左右忠正遠慮。未必賢於大臣。至於便辟取合。或能工之。今外所言。輒云中書。雖使恭慎。不敢外交。但有此名。猶惑世俗。况實握事要。日在目前。儻因疲倦之間。有所割制。衆臣見其能推移於事。即亦因時而向之。一有此端。私招朋援。臧

否毀譽必有所興功負賞罰必有所易直道而上者或壅曲附

左右者反達因微而入緣形而出意所狎信不復猜覺此宜聖

智所當早聞外以經意則形際自見胡注言放資日在左右狎而信之不復覺其為姦非若早聞忠言自

覽萬機外以示經意國事則放資之形際必呈露而不可掩矣或恐朝臣畏言不合而受左右之怨莫

適以聞臣竊亮陛下潛神默思公聽並觀若事有未盡於理而

物有未周於用將改曲易調遠與黃唐角功近昭武文之績豈

牽近習而已哉然人君不可悉任天下之事必當有所付若委

之一臣自非周公旦之忠管夷吾之公則有弄權敗官之敝當

今柱石之士雖少至於行稱一州智效一官忠信竭命各奉其

職可並驅策不使聖明有專吏之名也胡注專吏謂專任放資帝不聽胡注自此

以前皆非此年事通鑑因於此以先事之心及寢疾深念後事乃以武帝

子燕王宇為大將軍與領軍將軍夏侯獻武衛將軍曹爽屯騎

校尉曹肇驍騎將軍秦朗等對輔政爽真之子肇休之子也帝

少與燕王宇善故以後事屬之劉放孫資久典機任獻肇心內

不平殿中有雞棲樹二人相謂曰此亦久矣其能復幾胡注殿中

晨棲於樹上因謂之雞棲樹獻肇指以喻放資一言而發司馬氏纂魏之機言之不可不謹也如是夫以此觀獻肇之輕脫又何足以託孤哉放資懼有

後害陰圖間之燕王性恭良陳誠固辭帝引放資入臥內問曰

燕王正爾為對曰燕王實自知不堪大任故耳帝曰誰可任者

時惟曹爽獨在側放資因薦爽且言宜召司馬懿與相參帝曰

爽其其不不爽流汗不能對放躡其足耳之曰臣以死奉社稷

帝從放資言欲用爽懿既而中變敕停前命放資復入見說帝
帝又從之放曰宜爲手詔帝曰我困篤不能放即上牀執帝手
強作之遂齎出大言曰有詔免燕王宇等官不得停省中皆流
涕而出考異曰按陳壽當晉世作魏志若言放資本情則於時非美故
遷就而爲之諱也今依習鑿齒漢晉春秋郭頌世語似得其實甲申以
曹爽爲大將軍帝嫌爽才弱復拜尙書孫禮爲大將軍長史以
佐之

唐徐堅初學記漢武置中書有令有僕射至魏武置祕書令魏
文改祕書令左丞爲中書令又置監一人當僕射之職首以祕
書右丞孫資爲中書令左丞劉放爲中書監歷晉宋齊梁陳北
齊後魏皆置中書監位在令上隋室諱中依周官改爲內史

晉書荀勗傳武帝將廢賈妃勗與馮統等諫請故得不廢時議
以勗傾國害時孫資劉放之匹

廷琳按劉驃騎以力勸明帝黜燕王宇等且請馳召司馬
宣王論者謂魏室之禍兆基於此君子一言以爲不知諒
哉咎固無可辭矣雖然以司馬氏之梟雄而燕王宇等皆
庸駑常材欲令其西歸長安靖共臣節此何異以斥鷃之
力欲以困大鵬之翼哉卒致祚絕當塗運隆典午廢興關
鍵豈盡由驃騎一言觀於宣王馳至明帝謂曰死尙可忍
吾忍死以待君則召還宣王實出明帝之本意論者專以
歸罪驃騎過矣蓋驃騎專政日久缺望者多遂不免爲衆

國朝文獻志
矢所集。陳志謂譏諛之聲。每過其實。蓋承祚時代與驃騎相接。聞見較真。亦不以爾日悠悠之口。爲盡可憑也。

劉驃騎遺著

今存詔一首

奏一首

書詔可考者二首

以太尉司馬懿爲太傅詔

昔吳漢佐光武。有征定四方之功。爲大司馬。名稱于今。太尉體道一作履正直。盡忠三世。南擒孟達。西破蜀虜。東滅公孫淵。功蓋海內。先帝本以前後欲更其位者。輒不彌久。是以遲遲不施行耳。今大將軍薦太尉宜爲大司馬。既合先帝本旨。又放推讓。進德尙勳。乃欲明賢良。辨等列。順長少也。雖且爽之屬。宗師呂望。念在引領。以處其下。何以過哉。朕甚嘉焉。朕惟先帝固知君子樂

天知命。纖芥細疑。不足爲忌。當顧柏人彭亡之文。故用低徊。有意未遂耳。斯亦先帝敬重大臣。恩愛深厚之至也。昔周成王建保傅之官。近漢顯宗以鄧禹爲太傅。皆所以優崇雋乂。必有尊也。其以太尉爲太傅。持節統兵。都督諸軍事如故。

右見三國魏志曹爽傳裴注又魏志齊王芳紀

奏停賣胡粉

今官販粉賣胡粉。與百姓爭錐刀之末利。宜乞停之。

右見唐虞世南北堂書鈔一百三十五引魏名臣奏

爲王松答魏太祖書

與征東將軍滿寵書

召還太尉司馬宣王詔

右三首見魏志本傳均失傳

附錄

〔晉張華劉驃騎誄〕昔在殷周。惟伊惟呂。穆穆公侯。紹茲勳緒。如何上天。殲我鼎輔。金剛玉潤。水潔冰清。郁郁文彩。煥若朝榮。功遂身退。致仕懸輿。志邈留侯。心邁二疎。風凜凜以翼衡。雲霖霖以承蓋。旄聯翩以飄颻。旌繽紛以奄薄。

見藝文類聚四十六

晉

劉宗正許

〔三國魏志劉放傳裴注〕臣松之案頭責子羽曰。士卿劉許。字文

生。放子。正之弟也。與張華六人。並稱文辭可觀。意思詳序。晉惠帝世許爲越騎校尉。

〔宋劉義慶世說新語〕頭責秦子羽云。子曾不如太原溫頤。潁川荀寓。范陽張華。士卿劉許。義陽鄒湛。河南鄭詡。此數子者。或蹇喫無宮商。或疋陋希言語。或淹伊多姿態。或謹譁少智諳。或口如含膠飴。或頭如巾齏杵。而猶以文采可觀。意思詳序。攀龍附鳳。並登天府。

〔梁劉孝標世說新語注〕引晉百官名。劉許。字文生。涿鹿郡人。父放。魏驃騎將軍。許。晉惠帝時爲宗正卿。按許與張華同范陽人。故曰士卿。互其解也。宗正卿或曰士卿。

附錄

〔晉張敏頭責子羽文〕余友有秦生者。雖有姊夫之尊少而狎焉。同時好暱。有太原溫長仁。潁川荀景伯。寓范陽張茂先。華士卿劉文生許。南陽鄒潤甫湛。河南鄭思淵。詔數年之中。繼踵登朝。而此賢身處陋巷。屢沾而無善價。亢志自若。終不衰墮爲之慨然。又怪諸賢既已在位。曾無伐木嚶鳴之聲。甚違王貢彈冠之義。故因秦生容貌之盛。爲頭責之文。曰戲之。并曰嘲六子焉。雖曰諧謔。實有興也。其文曰。維秦始元年。頭責子羽曰。吾託子爲頭。萬有餘日矣。大塊稟我。曰精造我。曰形。我爲子植髮膚。置鼻耳。安眉須。插牙齒。眸子擿光。雙顴隆起。每至出入人間。遨遊市里。行者辟易。坐者竦蹠。或稱君侯。或言將軍。奉手傾側。佇立崎嶇。如此者。故我形之足偉也。子冠冕不戴。金銀不佩。釵曰當筭。恰曰代幘。旨味弗嘗。食粟茹菜。隈摧園間。糞壤汗黑。歲莫年過。曾不自悔。子厭我于形容。我賤子乎。意態若此者乎。必子行己之累也。子遇我如讎。我視子如仇。居常不樂。兩者俱憂。何其鄙哉。子欲爲仁賢也。則當如臯陶后稷。巫咸伊陟。保乂王家。永見封殖。子欲爲名高也。則當如許由子臧。卞隨務光。洗耳逃祿。千歲流芳。子欲爲遊說也。則當如陳軫蒯通。陸生鄧公。轉禍爲福。令辭從容。子欲爲進趣也。則當如賈生之求試。終軍之請使。砥礪鋒穎。曰

起。每至出入人間。遨遊市里。行者辟易。坐者竦蹠。或稱君侯。或言將軍。奉手傾側。佇立崎嶇。如此者。故我形之足偉也。子冠冕不戴。金銀不佩。釵曰當筭。恰曰代幘。旨味弗嘗。食粟茹菜。隈摧園間。糞壤汗黑。歲莫年過。曾不自悔。子厭我于形容。我賤子乎。意態若此者乎。必子行己之累也。子遇我如讎。我視子如仇。居常不樂。兩者俱憂。何其鄙哉。子欲爲仁賢也。則當如臯陶后稷。巫咸伊陟。保乂王家。永見封殖。子欲爲名高也。則當如許由子臧。卞隨務光。洗耳逃祿。千歲流芳。子欲爲遊說也。則當如陳軫蒯通。陸生鄧公。轉禍爲福。令辭從容。子欲爲進趣也。則當如賈生之求試。終軍之請使。砥礪鋒穎。曰

幹王事。子欲爲恬淡也。則當如老聃之守一。莊周之自逸。廓然離俗。志凌雲日。子欲爲隱遁也。則當如榮期之帶索。漁父之澣澣棲遲神丘。垂餌巨壑。此一介之所曰顯身成名者也。今子上不希道德。中不效儒墨。塊然窮賤。守此愚惑。察子之情。觀子之志。退不能爲處士。進無望于三事。而徒翫日勞形。習爲常人之所喜。不亦過乎。于是子羽愀然深念而對曰。凡所教敕。謹聞命矣。曰。受性拘係。不閒禮義。設曰天幸。爲子所寄。今欲使吾爲忠也。即當如伍胥屈平。欲使吾爲信也。則當殺身以成名。欲使吾爲介節邪。則當赴水火。曰。全貞。此四者子之所忌。故吾不敢造意。頭曰。子所謂天刑地網。剛德之尤。

不登山抱木。則褰裳赴流。吾欲告爾曰。養性。誨爾曰。優游。而與蟣蝨同情。不聽我謀。悲哉。俱寓人體。而獨爲子頭。且擬人其倫。喻子儕偶。子不如太原溫頤。潁川荀寓。范陽張華。士卿。劉許。南陽鄒湛。河南鄭詡。此數子者。或嘗吃無宮商。或庭陋希言語。或淹伊多姿態。或驛驥世說注少智諳。或口如含膠

飴。或頭如巾齋杵。而猶文采可觀。意思詳序。攀龍附鳳。竝登天府。夫舐痔得車。沈淵得珠。豈若夫子。徒令脣舌腐爛。手足沾濡哉。居有事之世。而恥爲權謀。譬猶鑿池抱甕。難曰求富。嗟乎子羽。何異牢檻之熊。深窞之虎。石間飢螻。竇中之鼠。事力雖勤。見功甚苦。宜其拳局煎蹙。至老無所希也。支離其形。

猶能不困非命也夫。豈與夫子同處也。

見世說排調篇注
又藝文類聚十七

張司空華

晉書張華本傳。張華字茂先。范陽方城人也。父平。魏漁陽郡守。華少孤貧。自牧羊。同郡盧欽見而器之。鄉人劉放亦奇其才。以女妻焉。華學業優博。辭藻溫麗。朗瞻多通。圖緯方伎之書。莫不詳覽。少自修謹。造次必以禮度。勇於赴義。篤於周急。器識弘曠。時人罕能測之。初未知名。著鷦鷯賦以自寄。其詞曰。何造化之多端。播羣形於萬類。惟鷦鷯之微禽。亦攝生而受氣。育翮鬣之陋體。無立黃以自貴。毛無施於器用。肉不登乎俎味。鷹鷂過猶俄翼。尚何懼於罾罟。鷦鷯蒙寵。是焉游集。飛不飄揚。翔不翕集。

其居易容。其求易給。巢林不過一枝。每食不過數粒。栖無所滯。游無所盤。匪陋荆棘。匪榮苙蘭。動翼而逸。投足而安。委命順理。與物無患。伊茲禽之無知。而處身之似智。不懷寶以賈害。不飾表以招累。靜守性而不矜。動因循而簡易。任自然以爲資。無誘慕於世僞。鷦鷯介其背距。鷦鷯軼於雲際。鷦鷯竄於幽險。孔翠生乎遐裔。彼晨鳧與歸鴈。又矯翼而增逝。咸美羽而豐肌。故無罪而皆斃。徒銜蘆以避繳。終爲戮於此世。蒼鷹鷂而受紲。鸚鵡慧而入籠。屈猛志以服養。塊幽繫於九重。變音聲以順旨。思摧翮而爲庸。戀鍾岱之林野。慕隴坻之高松。雖蒙幸於今日。未若疇昔之從容。海鳥爰居。避風而至。條支巨爵。踰嶺自致。提挈萬

里飄飄逼畏。夫惟體大妨物。而形瓌足偉也。陰陽陶烝。萬品一區。巨細舛錯。種繁類殊。鷦冥巢於蚊睫。大鵬彌乎天隅。將以上方不足。而下比有餘。普天壤而遐觀。吾又安知大小之所如。陳留阮籍見之。歎曰。王佐之才也。由是聲名始著。郡守鮮于嗣薦華爲太常博士。盧欽言之於文帝。轉河南尹丞。未拜。除佐著作郎。頃之。遷長史。兼中書郎。朝議表奏。多見施用。遂即眞。晉受禪。拜黃門侍郎。封關內侯。華強記默識。四海之內。若指諸掌。武帝嘗問漢宮室制度。及建章千門萬戶。華應對如流。聽者忘倦。畫地成圖。左右屬目。帝甚異之。時人比之子產。數歲拜中書令。後加散騎常侍。遭母憂。哀毀過禮。中詔勉勵。逼令攝事。初帝潛與

羊祜謀伐吳。而羣臣多以爲不可。唯華贊成其計。其後祜疾篤。帝遣華詣祜。問以伐吳之計。語在祜傳。及將大舉。以華爲度支尙書。乃量計運漕。決定廟算。衆軍旣進。而未有剋獲。賈充等奏誅華以謝天下。帝曰。此是吾意。華但與吾同耳。時大臣皆以爲未可輕進。華獨堅執以爲必剋。及吳滅。詔曰。尙書關內侯張華。前與故太傅羊祜共創大計。遂典掌軍事。部分諸方。算定權略。運籌決勝。有謀謨之勳。其進封爲廣武縣侯。增邑萬戶。封子一人爲亭侯。千五百戶。賜絹萬匹。華名重一世。衆所推服。晉史及儀禮憲章。並屬於華。多所損益。當時詔誥。皆所草定。聲譽益盛。有台輔之望焉。而苟勛自以大族。恃帝恩深。憎疾之。每伺閒隙。

欲出華外鎮。會帝問華誰可託寄後事者。對曰。明德至親。莫如齊王攸。既非上意所在。微爲忤旨。聞言遂行。乃出華爲持節都督幽州諸軍事。領護烏桓校尉。安北將軍。撫納新舊戎夏懷之。東夷馬韓新彌諸國。依山帶海。去州四千餘里。歷世未附者二十餘國。並遣使朝獻。於是遠夷賓服。四境無虞。頻歲豐稔。士馬強盛。朝議欲徵華入相。又欲進號儀同。初華毀徵士馮恢於帝。統即恢之弟也。深有寵於帝。統嘗侍帝。從容論魏晉事。因曰。臣竊謂鍾會之釁。頗由太祖。帝變色曰。卿何言邪。統免冠謝曰。臣愚冗瞽言。罪應萬死。然臣微意。猶有可申。帝曰。何以言之。統曰。臣以爲善御者必識六轡盈縮之勢。善政者必審官方控帶之

宜。故仲由以兼人被抑。冉求以退弱被進。漢高八王。以寵過夷滅。光武諸將。由抑損克終。非上有仁暴之殊。下有愚智之異。蓋抑揚與奪。使之然耳。鍾會才見有限。而太祖誇獎太過。嘉其謀猷。盛其名器。居以重勢。委以大兵。故使會自謂算無遺策。功在不賞。轉張跋扈。遂構凶逆耳。向令太祖錄其小能。節以大禮。抑之以權勢。納之以軌則。則亂心無由而生。亂事無由而成矣。帝曰。然。統稽首曰。陛下旣已然。微臣之言。宜思堅冰之漸。無使如會之徒。復致覆喪。帝曰。當今豈有如會者乎。統曰。東方朔有言。談何容易。易曰。臣不密則失身。帝乃屏左右曰。卿極言之。統曰。陛下謀謨之臣。著大功於天下。海內莫不聞知。據方鎮。總戎馬。

之任者。皆在陛下聖慮矣。帝默然。頃之徵華爲太常。以太廟屋棟折免官。遂終帝之世。以列侯朝見。惠帝即位。以華爲太子少傅。與王戎、裴楷、和嶠俱以德望爲楊駿所忌。皆不與朝政。及駿誅後。將廢皇太后。會羣臣於朝堂。議者皆承望風旨。以爲春秋絕文姜。今太后自絕於宗廟。亦宜廢黜。惟華議以爲夫婦之道。父不能得之於子。子不能得之於父。皇太后非得罪於先帝者也。今黨其所親。爲不母於聖世。宜依漢廢趙太后爲孝成后故事。貶太后之號。還稱武皇后。居異宮。以全貴終之恩。不從。遂廢太后爲庶人。楚王瑋受密詔。殺太宰汝南王亮。太保衛瓘等。內外兵擾朝廷。大恐。計無所出。華白帝。以瑋矯詔擅害二公。將士

倉卒。謂是國家意。故從之耳。今可遣驕虞幡。使外軍解嚴。理必風靡。上從之。瑋兵果敗。及瑋誅。華以首謀有功。拜右光祿大夫。開府儀同三司。侍中。中書監。金章紫綬。固辭開府。賈謐與后共謀。以華庶族。儒雅有籌略。進無逼上之嫌。退爲衆望所依。欲倚一作荷以朝綱。訪以政事。疑而未決。以問裴頴。頴素重華。深贊其事。華遂盡忠匡輔。彌縫補闕。雖當闇主虐后之朝。而海內晏然。華之功也。華懼后族之盛。作女史箴以爲諷。賈后雖凶妒。而知敬重華。久之。論前後忠勳。進封壯武郡公。華十餘讓。中詔敦譬。乃受。數年代下邳王晃爲司空。領著作。及賈后謀廢太子。左衛率劉卞甚爲太子所信遇。每會宴。卞必預焉。屢見賈謐驕傲。太子

恨之。形于言色。謚亦不能平。卞以賈后謀問華。華曰。不聞。卞曰。卞以寒悴。自須昌小吏。受公成拔。以至今日。士感知己。是以盡言。而公更有疑於卞邪。華曰。假令有此。君欲如何。卞曰。東宮俊父如林。四率精兵萬人。公居阿衡之任。若得公命。皇太子因朝入錄尚書事。廢賈后於金墉城。兩黃門力耳。華曰。今天下當陽。太子人子也。吾又不受阿衡之命。忽相與行此。是無其君父。而以不孝示天下也。雖能有成。猶不免罪。况權戚滿朝。威柄不一。而可以安乎。及帝會羣臣於式乾殿。出太子手書。徧示羣臣。莫敢有言者。惟華諫曰。此國之大禍。自漢武以來。每廢黜正嫡。恒至喪亂。且國家有天下。日淺。願陛下詳之。尚書左僕射裴頌。以

爲宜先檢校傳書者。又請比較太子手書。不然恐有詐妄。賈后乃內出太子素啟事十餘紙。衆人比視。亦無敢言非者。議至日西不決。后知華等意堅。因表乞免爲庶人。帝乃可其奏。初趙王倫爲鎮西將軍。撓亂關中。氏羗反叛。乃以梁王彤代之。或說華曰。趙王貪昧。信用孫秀。所在爲亂。而秀變詐。姦人之雄。今可遣梁王斬秀刈趙之半。以謝關右。不亦可乎。華從之。彤許諾。秀友人辛冉從西來。言於彤曰。氏羗自反。非秀之爲。故得免死。倫旣還。諂事賈后。因求錄尚書事。後又求尚書令。華與裴頌皆固執。不可由。是致怨。倫秀疾華如讎。武庫火。華懼因此變作。列兵固守。然後救之。故累代之寶。及漢高斬蚩劍。王莽頭。孔子屐等盡

焚焉時華見劍穿屋而飛莫知所向。初華所封壯武郡有桑化為柏識者以爲不祥。又華第舍及監省數有妖怪。少子躓以中台星坼。勸華遜位華不從。曰天道玄遠。惟修德以應之耳。不如靜以待之。以俟天命。及倫秀將廢賈后。秀使司馬雅夜告華曰。今社稷將危。趙王欲與公共匡朝廷。爲霸者之事。華知秀等必成篡奪。乃距之。雅怒曰。刃將加頸。而吐言如此。不顧而出。華方晝臥。忽夢見屋壞。覺而惡之。是夜難作。詐稱詔召華。遂與裴頌俱被收。華將死。謂張林曰。卿欲害忠臣邪。林稱詔詰之曰。卿爲宰相。任天下事。太子之廢。不能死節。何也。華曰。式乾之議。臣諫事具存。非不諫也。林曰。諫若不從。何不去位。華不能答。須臾使

者至。曰詔斬公。華曰。臣先帝老臣。中心如丹。臣不愛死。懼王室之難。禍不可測也。遂害之於前殿馬道南。夷三族。朝野莫不悲痛之。時年六十九。華性好人物。誘進不倦。至於窮賤。候門之士。有一介之善者。便咨嗟稱詠。爲之延譽。雅愛書籍。身死之日。家無餘財。惟有文史。溢於机篋。嘗徙居。載書三十乘。祕書監摯虞撰定官書。皆資華之本。以取正焉。天下奇祕。世所希有者。悉在華所。由是博物洽聞。世無與比。惠帝中。人有得烏毛三丈。以示華。華見慘然曰。此謂海鳧毛也。出則天下亂矣。陸機嘗餉華鮓。於時賓客滿座。華發器便曰。此龍肉也。衆未之信。華曰。試以苦酒濯之。必有異。既而五色光起。機還問鮓主。果云園中茅積下

得一白魚。質狀殊常。以作鮓。過美。故以相獻。武庫封閉甚密。其中忽有雉。華曰。此必蛇化爲雉也。開視。雉側果有蛇。蛻焉。吳郡臨平岸崩。出一石鼓。槌之無聲。帝以問華。華曰。可取蜀中桐材。刻爲魚形。扣之則鳴矣。於是如其言。果聲聞數里。初吳之未滅也。斗牛之間。常有紫氣。道術者皆以吳方強盛。未可圖也。惟華以爲不然。及吳平之後。紫氣愈明。華聞豫章人雷煥。妙達緯象。乃要煥宿屏。人曰。可共尋天文。知將來吉凶。因登樓仰觀。煥曰。僕察之久矣。惟斗牛之間。頗有異氣。華曰。是何祥也。煥曰。寶劍之精。上徹於天耳。華曰。君言得之。吾少時有相者言。吾年出六十。位登三事。當得寶劍佩之。斯言豈效。與因問曰。在何郡。煥

曰。在豫章豐城。華曰。欲屈君爲宰。密共尋之。可乎。煥許之。華大喜。即補煥爲豐城令。煥到縣。掘獄屋基。入地四丈餘。得一石函。光氣非常。中有雙劍。並刻題。一曰龍泉。一曰太阿。其夕斗牛間氣。不復見焉。煥以南昌西山北巖下土。以拭劍。光芒豔發。大盆盛水。置劍其上。視之者。精芒炫目。遣使送一劍。并土與華。留一自佩。或謂煥曰。得兩送一。張公豈可欺乎。煥曰。本朝將亂。張公當受其禍。此劍當繫徐君墓樹耳。靈異之物。終當化去。不永爲人服也。華得劍。寶愛之。常置坐側。華以南昌土。不如華陰赤土。報煥書曰。詳觀劍文。乃干將也。莫邪何復不至。雖然。天生神物。終當合耳。因以華陰土一斤致煥。煥更以拭劍。倍益精明。華誅

失劍所在。煥卒。子華爲州從事。持劍行經延平津。劍忽於腰間躍出墮水。使人沒水取之。不見劍。但見兩龍。各長數丈。蟠縈有文章。沒者懼而反。須臾光彩照水。波浪驚沸。於是失劍。華歎曰。先君化去之言。張公終合之論。此其驗乎。華之博物多此類。不可詳載焉。後倫秀伏誅。齊王問輔政。摯虞致箋於問曰。間於張華沒後。入中書省。得華先帝時答詔本草。先帝問華可以輔政持重。付以後事者。華答明德至親。莫如先王。宜留以爲社稷之鎮。其忠良之謀。款誠之言。信於幽冥。沒而後彰。與苟且隨時者。不可同世而論也。議者有責華以愍懷太子之事。不抗節廷爭。當此之時。諫者必得違命之死。先聖之教。死而無益者。不以責

人。故晏嬰齊之正卿。不死崔杼之難。季札吳之宗臣。不爭逆順之理。理盡而無所施者。固聖教之所不責也。問於是。奏曰。臣聞興微繼絕。聖王之高政。貶惡嘉善。春秋之美義。是以武王封比干之墓。表商容之閭。誠幽明之故。有以相通也。孫秀逆亂。滅佐命之國。誅骨鯁之臣。以斲喪王室。肆其虐戾。功臣之後。多見泯滅。張華裴頠。各以見憚。取誅。於時解系解結。同以羔羊。並被其害。歐陽建等。無罪而死。百姓憐之。今陛下更日月之光。布維新之命。然此等諸族。未蒙恩理。昔欒郤降在阜隸。而春秋傳其違。幽王絕功臣之後。棄賢者子孫。而詩人以爲刺。臣備忝在職。思納愚誠。若合聖意。可令羣官通議。議者各有所執。而多稱其寃。

壯武國臣竺道。又詣長沙王求復華爵位。依違者久之。太安二年詔曰。夫愛惡相攻。佞邪醜正。自古而有。故司空壯武公華。竭其忠貞。思翼朝政。謀謨之勳。每事賴之。前以華弼濟之功。宜同封建。而華固讓。至于八九。深陳大制。不可得爾。終有顛敗危辱之慮。辭義懇誠。足勸遠近。華之至心。誓於神明。華以伐吳之勳。受爵於先帝。後封既非國體。又不宜以小功踰前大賞。華之見害。俱以姦逆圖亂。濫被枉賊。其復華侍中中書監司空公廣武侯。及所沒財物與印綬符策。遣使弔祭之。初陸機兄弟志氣高爽。自以吳之名家。初入洛。不推中國人士。見華一面如舊。欽華德範。如師資之禮焉。華誅後作誄。又爲詠德賦以悼之。華著博

物志十篇。及文章並行於世。二子禕。遼。

禕字彥仲。好學謙敬。有父風。歷位散騎常侍。遼儒博曉天文。散騎侍郎。同時遇害。禕子輿字公安。襲華爵。避難過江。辟丞相掾。

太子舍人。

按張與善書見梁庾肩吾書品論下之中

史臣曰。夫忠爲令德。學乃國華。譬衆星之有禮義。人倫之有冠冕也。衛瓘撫武帝之牀。張華距趙倫之命。進諫則伯玉居多。臨危則茂先爲美。遵乎險轍。理有可言。昏亂方凝。則事睽其趣。松筠無改。則死勝於生。固以赴蹈爲期。而不辭乎傾覆者也。俱陷淫網。同嗟承劍。邦家殄瘁。不亦傷哉。

贊曰。賢人委質。道映陵寒。尸祿觀敗。吾生未安。衛以賈滅。張由

趙殘忠於亂世自古為難。

固安文獻志卷二目錄

耆舊事彙

晉

張司空華 中

固安文獻志卷二

天津徐世昌鑒定

縣人賈廷琳謹編

耆舊事彙

晉

張司空華

中

晉書武帝紀太康三年春正月甲午以尚書張華都督幽州諸軍事。

又惠帝紀元康六年春正月司空下邳王晃薨以中書監張華為司空夏四月癸巳梁王彤趙王倫矯詔廢賈后為庶人司空張華尚書僕射裴頡皆遇害。

又天文志元康五年四月有星孛于奎至軒轅太微經三台大陵占曰三台爲三司其後武庫火西羌反後五年司空張華遇禍四年九月甲午枉矢東北行竟天六年六月景午夜有枉矢自斗魁東南行案占曰以亂伐亂是後趙王殺張斐廢賈后因自篡盜以亂伐亂之應也

宋敕編太平御覽引
感榮緒晉書略同

又永康元年三月中台星坼太白晝見占曰台星失常三公憂太白晝見爲不臣是月賈后殺太子趙王倫尋廢殺后斬司空張華妖星見南方占曰妖星出天下大兵將起是月趙王倫斬司空張華

又元康三年填星歲星太白三星聚於畢昴占曰爲兵喪後趙王廢后又殺之斬張華裴頠遂篡位天下從此遭亂連禍

又律曆志泰始十年中書監荀勗中書令張華出御府銅竹律二十五具部太樂郎劉秀等校試其三具與杜夔及左延年律法同其二十二具視其銘題尺寸是笛律也

又樂志泰始九年光祿大夫荀勗始作古尺以調聲韻仍以張華等所制高文陳諸下管

又五行志武帝太康十年四月癸丑崇賢殿災是時帝納馮統之問廢張華之功聽楊駿之讒離衛瓘之寵此逐功臣之罰也其後楚王承竊發之旨戮害二公身亦不免震災其坊又天意乎

又惠帝元康五年閏月庚寅武庫火張華疑有亂先命固守然後救火是以累代異寶王莽頭孔子屐漢高祖斷白蛇劍及二百萬人器械一時蕩盡是後愍懷太子見殺之罰也張華閹纂皆曰武庫火而氏羗反太子見廢則四海可知八年十一月高原陵火是時賈后凶恣帝既眊弱而張華又不納裴頠劉卞之謀故后遂縊殺太子也永康元年五月壯武國有桑化為柏而張華遇害壯武華之封邑也四月張華第舍颶風起折木飛縉折軸六七是月華遇害

太平御覽引咸
榮緒晉書略同

又刑法志是時侍中盧璉中書侍郎張華又表鈔新律諸死罪條目懸之亭傳以示兆庶有詔從之

又后妃傳武悼楊皇后咸寧二年立為皇后賈后凶悖忌后父駿執權遂誣駿為亂因宣言太后同逆宜廢為峻陽庶人中書監張華等以為太后非得罪于先帝者也今黨惡所親為不母於聖世宜依孝成趙皇后故事曰武帝皇后處之離宮以全貴終之恩後竟廢為庶人

又羊祜傳祜寢疾求入朝既至洛陽侍坐面陳伐吳之計帝以其病不宜常入遣中書令張華問其籌策祜曰今主上有禪代之美而功德未著吳人虐政已甚可不戰而尅混一六合以興文教則主齊堯舜臣同稷契為百代之盛軌如舍之若孫皓不幸而沒吳人更立令主雖百萬之衆長江未可而越也將為後

患乎。華深贊成其計。祐謂華曰：成吾志者子也。

唐歐陽詢藝文類聚引王隱晉書。上與羊

祐張華謀伐吳。朝士莫知也。潛乃籌量虛實。為戰備。唐徐堅初學記引臧榮緒晉書。帝與羊祐謀伐吳。華贊成其計。及將大舉。以華為度支尚書。決勝綠江。地近萬里。始羊祐謂所親曰。終吾事者。唯張華耳。卒如祐言。

又杜預傳時帝密有滅吳之計。而朝議多違。唯預羊祐張華與帝意合。預處分既定。乃啓請伐吳之期。帝報待明年方欲大舉。預陳至計。帝與中書令張華圍碁。而預表適至。華推枰歛手曰。陛下聖明神武。朝野清晏。國富兵強。號令如一。吳主荒淫驕虐。誅殺賢能。當今討之。可不勞而定。帝乃許之。

又裴頠傳頠深慮賈后亂政。與司空張華侍中賈模議廢之。而立謝淑妃。華模皆曰。帝自無廢黜之意。若吾等專行之。上心不

以為是。且諸王方剛。朋黨異議。恐禍如發機。身死國危。無益社稷。頠曰。誠如公慮。但昏虐之人。無所忌憚。亂可立待。將如之何。華曰。卿二人猶且見信。然勤為左右陳禍福之戒。冀無大悖。幸天下尚安。庶可優遊卒歲。此謀遂寢。愍懷太子之廢也。頠與張華苦爭不從。語在華傳。初趙王倫諂事賈后。頠甚惡之。倫數求官。頠與張華固執不許。由是深為倫所怨。倫又潛懷篡逆。欲先除朝望。因廢賈后之際。遂誅之。

又裴楷傳楚王瑋既伏誅。以楷為中書令。加侍中。與張華王戎並管機要。楷有渴利疾。不樂處勢。王渾為楷請曰。楷今委頓臣深憂之光祿勳缺。以為可用。今張華在中書。王戎在尚書。足舉

其契無為復令楷入。

又劉卞傳卞為左衛率。知賈后廢太子之謀。甚憂之。以計干張華而不見用。益以不平。賈后親黨微服聽察。頗聞卞言。乃遷為雍州刺史。卞知言泄。飲藥卒。北堂書鈔引王隱晉書語較詳

又武陵莊王澹傳趙王倫作亂。以澹為領軍將軍。澹素與河內郭俶弟侃親善。酒酣俶等言張華之冤。澹性酗酒。因並殺之。送首于倫。其酗酒如此。

又荀勗傳領秘書監。與中書令張華。依劉向別錄整理記籍。李唐

善文選注引王隱晉書略同

又馮統傳初謀伐吳。統與賈充荀勗同共苦諫不可。吳平。統內

懷慚懼。疾張華如讎。及華外鎮。威德大著。朝論當徵為尚書令。統從容侍帝。論晉魏故事。因諷帝言華不可授以重任。帝默然而止。事具華傳。

又賈充傳伐吳之役。詔充為大都督總統六師。充慮大功不捷。表陳吳未可悉定。方夏江淮下濕。疾疫必起。宜召諸軍。以為後圖。雖腰斬張華。不足以謝天下。華預平吳之策。故充以為言。中書監荀勗奏。宜如充表。帝不從。杜預聞充有奏。馳表固爭。使及至。環轅而孫皓已降。

又賈謐傳先是朝廷議立晉書。限斷賈謐上議。請從泰始為斷。於是事下三府。司徒王戎。司空張華等。皆從謐議。謐重執奏戎。

華之議。事遂施行。初充伐吳時。常屯軍項城。軍中忽失充所。在充帳下。都督周勤夢見充引入一逕。驚覺出尋索。忽覩所夢之道。果見充行至一府舍。侍衛甚盛。府公南面坐。聲色甚厲。謂充曰。將亂吾家事。必爾與荀勗。既惑吾子。又亂吾孫。閒使任愷黜汝而不去。又使庾純詈汝而不改。今吳寇當平。汝方表斬張華。汝之闇戇。皆此類也。

又賈模傳。是時賈后既豫朝政。欲委信親黨。拜模爲侍中。模乃盡心匡弼。推張華裴頠同心輔政。數年之中。朝野寧靜。模之力也。

又楊珧傳。珧臨刑稱冤。云事在石函。可問張華。當時皆謂宜爲申理。而賈后族黨待諸楊如讎。促行刑者遂斬之。時人莫不嗟歎焉。

又魏舒傳。太康初拜右僕射。舒與衛瓘山濤張華等。以六合混一。宜用古典。封禪東嶽。前後累陳其事。帝謙讓不許。

又王濬傳。時朝議咸諫伐吳。濬乃上疏願無失事機。帝深納焉。賈充荀勗陳諫。以爲不可。唯張華固勸。又杜預表請。帝乃發詔。分命諸方節度。太平御覽引虞預晉書武帝論平吳功唯羊祜王濬張華三人各賤絹萬疋其餘莫得此比

又王戎傳。朝賢嘗上已禊洛。或問王濟曰。昨游有何言談。濟曰。張華善說史漢。裴頠論前言往行。衮衮可聽。王戎談子房季札之間。超超元著。

又華嶠傳初嶠以漢紀煩穢慨然有改作之意。會爲臺郎。典官制事。由是得徧觀秘籍。遂就其緒。改名漢後書。奏之。時中書監荀勗。令和嶠。太常張華。侍中王濟。咸以嶠文質事核。有遷固之規。實錄之風。藏之秘府。

又溫羨傳先是張華被誅。齊王冏建議。欲復其官爵。論者或以爲非。羨駁之曰。自天子以下。爭臣各有差。不得歸罪於一人也。故晏子曰。爲己死亡。非其親昵。誰能任之。里克之殺二庶。陳乞之立陽生。漢朝之誅諸呂。皆積年之後。乃得立事。未有事主見存。而得行其志於數月之內者也。式乾之會。張華獨諫。上宰不和。不能承風贊善。望其指麾從命。不亦難乎。况今皇后譖害其

子。內難不預。禮非所在。且后體齊於帝。尊同皇極。罪在枉子。事不爲逆。義非所討。今以華不能廢枉子之后。與趙盾不討殺君之賊同。而貶責之。於義不經通也。華竟得追復爵位。

又和嶠傳嶠轉侍中。愈被親禮。與任愷張華相善。

又任愷傳賈充既爲帝所遇。欲專名勢。而庾純張華溫頤向秀和嶠之徒。皆與愷善。

又何攀傳王濬爲益州辟。爲別駕。濬謀伐吳。遣攀奉表詣臺。口

陳事機。詔再引見。乃令張華與攀籌畫進討之宜。

北堂書鈔引臧榮緒晉書與此同

又劉頌傳及趙王倫之害張華也。頌哭之甚慟。聞華子得逃。喜曰。茂先卿尙有種也。倫黨張林聞之大怒。憚頌持正。而不能害

也。張林積忿不已。以頌為張華之黨。將害之。孫秀曰。誅張裴已傷時望。不可復誅。頌林乃止。

又閻纘傳。愍懷太子之廢也。纘與棺詣闕上書。理太子之冤。曰。今適無狀。尚可禁持。重選師傅。如司空張華。道德深遠。乃心忠誠。以為之師。光祿大夫劉實。寒苦自立。終始不衰。以為之保。如此前後左右。莫非正人。及張華遇害。賈謐被誅。朝野震悚。纘獨撫華尸。慟哭曰。早語君遜位而不肯。今果不免。命也夫。過叱賈謐尸曰。小兒亂國之由。誅其晚矣。趙王倫死既葬。纘以車轢其冢。時張華兄子景後徙漢中。纘又表宜還。纘不護細行。而慷慨好大節。太平御覽引王隱骨書。趙王倫害張華之時。洛中震悚。惟閻纘詣東市號哭。弔屍而撫之。曰。早語君遜位而不肯去。今果不免禍。詣

按纘字續伯

又束皙傳。皙博學多聞。性沈退。不慕榮利。作立居。釋以擬客難。張華見而奇之。召皙為椽。又為司空下邳王晃所辟。華為司空。復以為賊曹屬。時有人於嵩高山下。得竹簡一枚。上兩行科斗書。傳以相示。莫有知者。司空張華以問皙。皙曰。此漢明帝顯節陵中策文也。檢驗果然。時人伏其博識。

又愍懷太子傳。愍懷太子適。惠帝長子。帝即位。立為皇太子。盛選德望。以為師傅。以王戎為太傅。張華為少傅。元康元年。詔曰。適尚幼蒙。今出東宮。惟當賴師傅羣賢之訓。於是使太保衛瓘息庭。太子少傅張華息禕。與太子游處。以相輔導焉。北堂書鈔

引王隱晉書略同

賈后將廢太子。賜以酒棗。逼飲醉之。使黃門侍郎潘岳作書草。令太子醉迷不覺。遂依而寫之。后以呈帝。帝幸式乾殿。召公卿入。曰。適書如此。今賜死。徧示諸公王。莫有言者。惟張華裴頴證明太子。

又陸機傳。太康末。與弟雲俱入洛。造太常張華。華素重其名。如舊相識。曰。伐吳之役。利獲二俊。張華薦之。諸公後太傅楊駿。辟為祭酒。機天才秀逸。辭藻宏麗。張華嘗謂之曰。人之為文。常恨才少。而子更患其多。

唐李善文選注引臧榮緒晉書。機與弟雲勤學。積弟雲俱入洛。司徒張華素重其名。如舊相識。以文錄呈。天才綺練。當時獨絕。新聲妙句。係縱張蔡。

又陸雲傳。雲吳平入洛。機初詣張華。華問雲何在。機曰。雲有笑

疾。未敢自見。俄而雲至。華為人多姿制。又好帛繩纏鬚。雲見而大笑。不能自己。雲與荀隱素未相識。嘗會華坐。華曰。今日相遇。可勿為常談。雲因抗手曰。雲間陸士龍。隱曰。日下荀鳴鶴。鳴鶴隱字也。雲又曰。既開青雲。觀白日。何不張爾弓。挾爾矢。隱曰。本謂是雲龍駸駸。乃是山鹿野麋。獸微弩強。是以發遲。華撫手大笑。

又吾彥傳。吾彥吳郡吳人也。吳亡。彥始歸降。武帝嘗從容問孫皓。所以亡國。彥對曰。吳主英俊。宰輔賢明。天祿永終。所以為陛下擒。張華時在坐。謂彥曰。君為吳將。積有歲年。蔑爾無聞。竊所惑矣。彥厲聲曰。陛下知我。而卿不聞乎。帝甚嘉之。

又楚王瑋傳楊駿之誅也汝南王亮太保衛瓘以瑋性狠戾不可大任瑋甚忿之遂勒本軍矯詔收亮瓘殺之會天明帝用張華計遣殿中將軍王宮齎驕虞幡麾衆曰楚王矯詔衆皆釋杖而走瑋窘迫不知所爲遂斬之

又趙王倫傳倫深交賈郭諂事中宮大爲賈后所親信求錄尙書張華裴頠固執不可又求尙書令華頠復不許時左衛司馬督司馬雅傷太子無罪謀廢賈后復太子以華頠不可移難與圖權倫執兵之要性貪冒可假以濟事乃說倫嬖人孫秀言於倫倫納焉倫收捕賈謐等召中書監侍中黃門侍郎入坐皆夜入殿執張華裴頠解結杜斌等於殿前殺之

又解系傳及張華裴頠之被誅也趙王倫孫秀以宿憾收系兄弟害之後齊王冏起義時奏曰孫秀逆亂滅佐命之國誅骨鯁之臣以斲喪肆其虐戾功臣之後多見泯滅至如張華裴頠各以見憚取誅於時系結同以羔羊被害歐陽建等無罪而死百姓憐之

太平御覽引王隱晉書解系與孫秀不協秀誅張華陷殺系并欲誅系弟結梁王彤救之秀曰我于水中蟹尙惡之况其兄弟耶

又孟觀傳氏帥齊萬年反於關中衆數十萬諸將覆敗相繼中書令陳準監張華以趙梁諸王在關中士卒不爲之用周處喪敗職此之由以觀沈毅有文武材用乃啟觀討之觀身當矢石大戰十數皆破之生擒萬年威愾氏羗

又牽秀傳秀博辯有文才性豪俠與帝舅王愷素相輕侮遂坐

免官後司空張華請為長史。

又皇甫重傳性沈果有才用。為司空張華所知。稍遷新平太守。元康中華版為秦州刺史。

又索靖傳靖少有逸羣之量。該博經史。兼通內緯。對策高第。傳立張華與靖一面。皆厚與之相結。

又成公簡傳性朴素。不求榮利。潛心味道。罔有干其志者。默識過人。張茂先每言簡清靜比楊子雲。默識擬張安世。後為中書郎。

又劉喬傳初嵇紹為齊王問所重。每下階迎之。喬言於問曰。裴張之誅。朝臣畏憚。孫秀故不敢不受財物。嵇紹今何所逼忌。故

畜裴家車牛。張家奴婢耶。公何獨加敬於紹。問乃止。

又劉弘傳弘少家洛陽。與武帝同居永安里。以舊恩起家太子門大夫。累轉太宰長史。張華甚重之。由是為寧朔將軍。甚有威惠。為幽朔所稱。

又陶侃傳廬江太守張夔察侃為孝廉。至洛陽。數詣張華。華初以遠人。不甚接遇。侃每往。神無忤色。華後與語。異之。除郎中。

又薛兼傳兼清素有器宇。少與同郡紀瞻。廣陵閔鴻。吳郡顧榮。會稽賀循。齊名。號為五儁。初入洛。司空張華見而奇之。曰。皆南

金也。北堂書鈔引丹陽薛錄。太平御覽引何法盛晉中興書。皆與此略同。

又劉隗傳隗伯父訥有人倫鑒識。初入洛。見諸名士。而歎曰。王

夷甫太鮮明。樂彥甫我所敬。張茂先我所不解。周弘武巧於用短。杜方叔拙於用長。

又卞壺傳。父粹。以清辯鑒察稱。惠帝初爲尙書郎。楊駿執政。人多附會。而粹正直不阿。及駿誅。稍遷至右軍將軍。張華之誅。粹以華壻免官。壺弱冠有名譽。爲明帝東中郎長史。遭繼母憂。既葬起復舊職。累辭不就。元帝遣中使敦逼。壺牋自陳曰。壺年九歲。爲先母弟表所見。孤背十二蒙亡母張所見覆育。壺以陋賤。不能榮親。家產屢空。養道多闕。

又荀崧傳。時方修學校。簡省博士。崧乃上疏曰。世祖武皇帝。應運登禪。崇儒興學。九州之中。師徒相傳。學士如林。猶選張華。劉寔。居太常之官。以重儒教。

又陳壽傳。遭父喪。有疾。使婢丸藥。客往見之。鄉黨以爲貶議。坐是沈滯者累年。司空張華愛其才。以壽雖不遠嫌。原情不至貶廢。舉爲孝廉。除佐著作郎。撰魏吳蜀三國志。凡六十五篇。時人稱其善叙事。有良史之才。張華深善之。謂壽曰。當以晉書相付耳。其爲時所重如此。張華將舉壽爲中書郎。荀勗忌華而疾壽。遂諷吏遷壽爲長廣太守。辭母老不就。藝文類聚引王隱晉書壽與張華友善。華垂當

啓。轉中書郎。荀勗黨疾壽。華。語吏部出爲長廣太守。

又李密傳。密以洗馬徵至洛。司空張華問之曰。安樂公何如。密曰。可次齊桓。華問其故。對曰。齊桓得管仲而霸。用豎刁而蟲流。

安樂公得諸葛亮而抗魏。任黃皓而喪國。是知成敗一也。次問孔明言教何碎。密曰。昔舜禹臯陶相與語。故得簡。大雅誥與凡人言。宜碎。孔明與言者無已敵。言教是以碎耳。華善之。

又嵇紹傳。司空張華爲趙王倫所誅。議者追理其事。欲復其爵。紹駁之曰。臣之事君。當除煩去惑。華歷位內外。雖粗有善事。然闔棺之責。著于遠近。兆禍始亂。華實爲之。故鄭討幽公之亂。斲子家之棺。魯戮隱罪。終篇貶輦。未忍重戮。事已弘矣。謂不宜復其爵位。理其無罪。王鳴盛十七史商榷。歸生同謀。羽父始亂。豈可以例張華。紹之引經非也。廷琳按司空被難後。紹曾占其奴婢。大爲劉喬所譏。故此甘作違心之論。而不顧所比附經義之謬妄。語云。僣人必於其倫。若紹之所僣。亦可謂不倫甚矣。

又劉沈傳。領本邑大中正。敦儒道。愛賢能。進霍原爲二品。及申

理張華。皆辭旨明峻。爲當時所稱。

又韋忠傳。家貧藜藿不充。裴頌爲僕射。數言之於司空張華。華辟之。辭疾不起。人問其故。忠曰。吾茨簷賤士。本無宦情。且茂先華而不實。裴頌慾而無厭。若此。豈大丈夫之所宜行耶。

又成公綏傳。少有俊才。詞賦甚麗。閑默自守。不求聞達。張華雅重綏。每見其文。歎伏以爲絕倫。薦之太常。徵爲博士。歷秘書郎。轉丞。遷中書郎。每與華受詔。並爲詩賦。六臣文選注。引臧榮緒晉書。成公綏字子安。東郡白馬人。

也。少有俊才。而口吃。辭賦壯麗。張華一見。甚善之。時人以其貧賤。不重其文。仕爲中臺郎。

又左思傳。思辭藻壯麗。不好交游。惟以閑居爲事。及三都賦成。時人未之重。司空張華見而歎曰。班張之流也。使讀之者盡而

有餘久而更新。於是豪貴之家競相傳寫。洛陽為之紙貴。唐虞世南

北堂書鈔引臧榮緒晉書左思三都賦成人未之重張華見而咨嗟深贊之兼作序都邑豪貴競相傳寫都下紙貴。

又褚陶傳吳平召補尚書郎張華見之謂陸機曰君兄弟龍躍

雲津顧彥先鳳鳴朝陽謂東南之寶已盡不意復見褚生機曰

公但未觀不鳴不躍者耳華曰故知延門之德不孤川嶽之寶

不匱矣。梁劉孝標世說新語注引褚氏家傳略同

又范喬傳喬稟德真粹儒學精深時張華領司徒天下所舉凡

十七人於喬特發優論

又魯勝傳嘗歲日望氣知將來多故便稱疾去官中書令張華

遣子勸其更仕再徵博士舉中書郎皆不就。太平御覽引王隱晉書勝字叔時以歲日望氣

乃長嘆便稱疾去官中書令張華敬之欲用之遣二子喻意遂不動

又霍原傳原山居積年門徒百數及劉沈為國大中正進原為

二品司徒不過中書監張華令陳準奏為上品詔可

又劉聰載記年十四究通經史兼綜百家之言孫吳兵法弱冠

游於京師名士莫不交結樂廣張華尤異之也

又慕容廆載記廆幼而魁岸美姿貌身長八尺雄傑有大度安

北將軍張華雅有知人之鑒廆童州時往謁之華甚歎異謂曰

君至長必為命世之器匡難濟時者也因以所服簪幘遺廆結

殷勤而別

又符堅載記冠軍慕容垂言於堅曰昔晉武之平吳也言可者

張杜數賢而已。若採羣臣之言，豈能建不世之功。

〔三國蜀志楊戲傳裴注〕戲同縣有李密者，字令伯，為州大中正，性方直，不曲意勢位。後失荀勗，張華指左遷漢中太守，諸王多以為冤，一年去官。

又吳志大帝傳裴注引文士傳鄭豐，字曼季，有文學操行，與陸雲善，與雲詩詞往反。司空張華辟未就卒。

又魏志盧毓傳裴注引虞預晉書盧欽，少居名位，不顧財利，清虛淡泊，動修禮典。同郡張華家單少孤，不為鄉邑所知，惟欽貴異焉。欽子浮，字子雲。

又引晉諸公贊張華博識多聞，無物不知。盧浮高朗經博，有美

於華起家太子舍人。

藝文類聚引此贊經博作傳經

藝文類聚引晉諸公贊疎准為中書令，張華為監，准與華俱處機密，而准崇之。每至宣日，有詔書無大小，輒先示華，了不厝意。

華得詔書，不以示准。

按疎准當即前之陳準

北堂書鈔引臧榮緒晉書顧榮，字彥先，少有珪璋，機符朗徹。吳平，光祿大夫張華辟為祭酒。

又引王隱晉書傳咸再為本郡中正，遭繼母憂，張華建議起為司隸校尉。

太平御覽引張華別傳，駕西征鍾會，次長安，華兼中書侍郎，從行，掌軍中書疏表檄，文帝善之。

〔初學記〕引王隱晉書張華為黃門侍郎博覽圖籍四海之內若指諸掌世祖問華長安千門萬戶畫地成圖

〔開元占經〕引王隱晉書華少子暹曉仰占云中台拆內懼勸華遂遜位華言余惟修德以應之耳

〔晉庾翼晉陽秋〕張華將死中台星遂拆太元中復還合正太傅謝安為相所致也

〔梁劉勰文心雕龍諧隱篇〕魏晉滑稽盛相驅扇遂乃應瑒之鼻方於盜削卵張華之形比乎握春杵曾是莠言有虧德音豈非溺者之妄笑胥靡之狂歌與

〔又時序篇〕晉雖不文人才實盛茂先搖筆而散珠太冲動墨而

橫錦並結藻清英流韻綺靡

〔梁鍾嶸詩品〕晉平原相陸機詩咀嚼英華厭飫膏澤文章之淵

泉也張公歎其大才信矣

張華論韻謂士衡多楚見文心雕龍聲律篇

〔宋張景醫說〕引徐廣晉紀張茂先學業優博辭藻溫麗精於經方本草診論工奇理料多效

〔後魏陽銜之洛陽伽藍記〕洛城東陽門內暉文里趙逸云暉文里是晉馬道里其中李韶宅是晉司空張華宅

〔宋劉敬叔異苑〕魏時殿前大鐘無故大鳴人皆異之以問張華華曰此蜀郡銅山崩故鐘鳴應之耳尋蜀郡上其事果如華言

〔又晉武帝時〕吳郡臨平岸崩出一石鼓打之無聲以問張華華

云。可取蜀中桐材刻作魚形。打之則鳴矣。於是如言。音聞數十里。

又晉中朝有人畜銅澡盤。晨夕恒鳴如人扣。乃問張華。華曰。此盤與洛鐘宮商相應。宮中朝暮撞鐘。故聲相應耳。可錯令輕。則韻乖鳴自止也。如其言。後不復鳴。

又豫章有石。黃白色而理疎。以水灌之便熱。加鼎於上。炊足以熟。冷則灌之。雷煥以問張華。華曰。此燃石也。

又元康中有人入嵩高山下。得竹簡一枚。上有兩行科斗書。臺中外傳以相示。莫有知者。司空張華以問博士束皙。皙曰。此明帝顯節陵中策文也。檢校果然。

又晉惠帝元康五年。武庫火。燒漢高祖斬白蛇劍。孔子履。王莽頭等三物。中書監張茂先懼難作。列兵陳衛。咸見此劍穿屋飛去。莫知所向。

又張華有白鸚鵡。華每出行還。輒說僮僕善惡。後寂無言。華問其故。答曰。見藏甕中。何由得知。公後在外。令喚鸚鵡。鸚鵡曰。昨夜夢惡。不宜出戶。公猶強之。至庭爲鸚所搏。教其啄鸚脚。僅而獲免。

又陸機嘗餉張華鮓。於時賓客滿座。華發器便曰。此龍肉也。衆未之信。華曰。試以苦酒灌之。必有異。既而五色光起。機還問鮓主。果云園中茅積下得一魚。質狀非常。乃以作鮓。過美。故以相

獻。

又晉中朝武庫內封閉甚密。忽有雉雊。時人咸謂為怪。張司空云。此必蛇之所化耳。即使搜庫中。雉側果得蛇蛻。

又晉惠帝時人。有得一鳥毛長三丈。以示張華。華慘然歎曰。所謂海鳧毛也。此毛出則天下土崩矣。果如其言。

宋劉義慶世說新語。王朗每以識度推華。歆歆日嘗集子姪燕飲。王亦學之。有人向張華說此事。張曰。王之學華。皆是形骸之外。去之所以更遠。

又諸名士共至洛水戲。劉孝標注。竹林七賢論曰。王濟諸人嘗至洛水。還解褌事。明日或問濟曰。昨遊有何語。濟云云。

樂令也。廣。問王夷甫曰。今日戲樂乎。王曰。裴僕射善談名理。混混

有雅致。張茂先論史漢。靡靡可聽。晉陽秋曰。華博覽洽聞。無不貫綜。世祖嘗問漢事及建章千門萬戶。華盡

地成圖。應對如流。張安世不能過也。我與王安豐也。說延陵子房。亦超超元箸。

又左太冲作三都賦初成。劉注。思別傳曰。思博覽名文。遍閱百家。司空張華辟為祭酒。時人互有譏

訾。思意不愜。後示張公。張曰。此二京可三。然君文未重於世。宜以經高名之士。思乃詢求於皇甫謐。謐見之。嗟歎。遂為作叙。於是先相非貳者。莫不歛衽讚述焉。

又張華見褚陶。語陸平原曰。君兄弟龍躍雲津。顧彥先鳳鳴朝陽。謂東南之寶已盡。不意復見褚生。陸曰。公未覩不鳴不躍者耳。

又荀鳴鶴陸士龍二人未相識。俱會張茂先坐。張令共語。以其

並有大才。可勿作常語。陸舉手曰。雲間陸士龍。荀答曰。日下荀鳴鶴。陸曰。既開青雲。覩白雉。何不張爾弓。布爾矢。荀答曰。本謂雲龍駸駸。定是山鹿野麋。獸弱弩強。是以發遲。張乃撫掌大笑。

劉注。荀氏家傳曰。隱與陸雲在張華坐語。互相反覆。陸連受屈。隱辭旨美麗。張公稱善。云世有此書。尋之未得。按鳴鶴名隱。

梁劉孝標世說新語注引陶氏叙侃少有遠概。綱維宇宙之志。

舉孝廉入洛。司空張華見而謂曰。後來匡主寧民。君其人也。

又引文士傳。司空張華為人少威儀。多姿態。

明陳士元名疑。晉侍中張華。慕容垂之將。亦有張華。

清顧炎武日知錄。漢膠東國有壯武縣。括地志云。壯武故城在萊州即墨縣西六十里。後漢志。壯武故夷國。晉張華封壯武侯。

清錢大昕疑年錄。張茂先享年六十九歲。生魏明帝太和六年壬子。卒晉惠帝永康元年庚申。

清桂馥札樸。余油紙百翻。越歲取用。皆有火炷小孔。友人言其油衣亦自焚。案梁書樂藹傳。時長沙宣武王將葬。而車府忽於庫失油。絡欲推主者。藹曰。昔晉武庫火。張華以為積油萬石。必然。今庫若有灰。非吏罪也。既而檢之。果有積灰。時稱其博物宏恕焉。

秦王嘉拾遺記。晉武帝為撫軍時。府內後堂砌下。忽生草三株。莖黃葉綠。若搃金抽翠。花條萼弱。狀似金薤。時人未知是何祥草。故隱蔽不聽外人窺視。有一羗人。姓姚名馥。字世芬。充廐養

馬。妙解陰陽之術。云此草以應金德之瑞。後以府地賜張華。猶有草在。故茂先金薤賦云。擢九莖於漢庭。美三株於茲館。貴表祥乎金德。比名類乎相亂。至惠帝元熙元年。三株草化為三樹。枝葉似楊樹。高五尺。以應三楊擅權之事。時有楊駿。楊瑤。楊濟。三弟兄。號曰三楊。馬圍醉羌所說之驗。

〔又〕張華為九醞酒。以三薇漬麴蘖。蘖出西羌。麴出北胡。胡中有指星麥。四月火星出。麥熟而穫之。蘖用水漬麥。三夕而萌芽。平旦鷄鳴而用之。俗人呼為鷄鳴麥。以之釀酒醇美。久含令人齒動。若大醉不叫笑搖蕩。令人肝腸消爛。俗人謂為消腸酒。或云醇酒可為長宵之樂。兩說同而事異也。閩里歌曰。生得醇酒消

腸。不與日月齊光。言耽此美酒。以悅一時。何用保守靈而取長久。

〔晉陶潛搜神後記〕嵩高山北有大穴。莫測其深。百姓歲時遊觀。晉初嘗有一人。誤墮穴中。同輩冀其儻不死。投食于穴中。墜者得之。為尋穴而行。計可十餘日。忽然見明。又有草屋中有二人。對坐圍碁局。下有一杯白飲。墜者告以飢渴。碁者曰。可飲此。遂飲之。氣力十倍。碁者口。汝欲停此否。墜者不願停。碁者曰。從此西行。有天井。其中多蛟龍。但投身入井。自當出。若餓取井中物食之。依初學記增之字墜者如言。半年許乃出。蜀中歸洛。下問張華。華曰。

此仙館大夫。初學記無大字所飲者玉漿也。所食者龍穴石髓也。按初學記

引此條謂出劉義慶世說今世說本無此條

元伊世珍瑯嬛記引玄觀手鈔張茂先博學強記嘗爲建安從事游于洞宮遇一人于塗問華曰君讀書幾何華曰華之未讀者則二十年內書蓋有之也若二十年外則華固已盡讀之矣其人論議超然華頗內服相與驩甚因共至一處大石中忽然有門引華入數步則別是天地宮室嵯峨引入一室中陳書滿架其人口此歷代史也又至一室則曰萬國志也每室各有奇書惟一室屋宇頗高封識甚嚴有二犬守之華問故答曰此皆玉京紫微金真七瑛丹書紫字諸秘籍指二犬曰此龍也華歷觀諸室書皆漢以前事多所未聞者如三墳九丘檮杌春秋亦

皆在焉華心樂之欲賃住數十日其人笑曰君癡矣此豈可賃地耶即命小童送出華問地名對曰瑯嬛福地也華甫出門忽然自閉華回視之但見雜草藤蘿繞石而生石上苔蘚亦合初無縫隙撫石徘徊久之望石下拜而去華後著博物志多瑯嬛中所得帝使削去可惜也

唐徐堅初學記引雷次宗豫章記吳未亡恒有紫氣見於牛斗之間占者以爲吳興唯張華以爲不然及吳平此氣愈明張華聞雷孔章妙達緯象乃邀宿屏人問孔章曰唯斗牛之間有異氣是寶物之精上徹於天耳孔章具言遂以爲酆城令掘得二劍

宋吳淑事類賦注引豫章記雷煥掘地得干將莫邪二劍煥以一與華留一自佩張華遇害其劍飛入襄城水中至後煥死其子佩劍過延平津劍忽躍入水中使人沒水求之見二龍相隨而逝

宋劉義慶幽明錄洛下有洞穴不測有一婦欲殺夫推夫下經多時至底乃得一穴匍匐行數十里漸見明曠郭郭宮館金寶為飾明踰三光人皆長三丈被羽衣如此九處至最後所飢長人指中庭大柏樹近百圍下有一羊令跪持羊鬚將之得一珠長人取之次亦取後將令噉即療飢乃問詣九處名以求住答云君不得停還問張華當知乃復行出交州還洛問華華曰九

處地名九館大羊為螭龍初一珠食之與天地等壽次者延年後者充飢而已

晉干寶搜神記魏濟北郡從事掾竒超以嘉平中夜獨宿夢有神女來從之自稱天上玉女姓成公字知瓊天帝哀其孤苦遣令下嫁從夫作夫婦經七八年太康中猶在張茂先為之作神

女賦

廷琳按神女賦乃晉張敏作此謂茂先當係干令升誤記耳

又張華字茂先晉惠帝為司空於時燕昭王墓前有一斑狐積年能為變化乃變作一書生欲詣張公過問墓前華表曰以我才貌可得見張司空否華表曰子之妙解無為不可但張公智度恐難籠絡出必遇辱殆不得返非但喪子千歲之質亦當深

誤老表。狐不從。乃持刺謁華。華見其總角風流。潔白如玉。舉動容止。顧盼生姿。雅重之。於是論及文章。辨校聲實。華未嘗聞。比復商略三史。探賾百家。談老莊之奧區。披風雅之絕旨。包十聖。貫三才。箴八儒。擿五禮。華無不應聲屈滯。乃歎曰。天下豈有此年少。若非鬼魅。則是狐狸。乃掃榻延留。留人防護。此生乃曰。明公當尊賢容衆。嘉善而矜不能。奈何憎人學問。墨子兼愛。其若是耶。言卒。便求退。華已使人防門。不得出。既而又謂華曰。公門置甲兵。欄騎當。是致疑於僕也。將恐天下之人。捲舌而不言。智謀之士。望門而不進。深爲明公惜之。華不應。而使人防禦甚嚴。時豐城令雷煥。字孔章。博物士也。來訪華。華以書生白之。孔章

曰。若疑之。何不呼獵犬試之。乃命犬以試。竟無憚色。狐曰。我天生才智。反以爲妖。以犬試我。遮莫千試萬慮。其能爲患乎。華聞益怒曰。此必真妖也。聞魍魅忌狗。所別者數百年物耳。千年老精。不能復別。惟得千年枯木照之。則形立見。孔章曰。千年神木。何由可得。華曰。世傳燕昭王墓前華表木。已經千年。乃遣人伐。華表使人欲至木所。忽空中有一青衣小兒。來問使曰。君何來也。使曰。張司空有一年少來謁。多才巧辭。疑是妖魅。使我取華表照之。青衣曰。老狐不智。不聽我言。今日禍已及我。其可逃乎。乃發聲而泣。倏然不見。使乃伐其木。血流。便將木歸。燃之以照書生。乃一斑狐。華曰。此二物不值我。千年不可復得。乃烹之。

宋劉阜青瑣高議。晉時有客。臚御溝岸下。夜將半。有人切切語。言客望之。乃一狐。坐於華表柱下。狐云。吾今已百歲矣。所聞所見。亦已多矣。日將謁丞相張公。華表柱忽發聲云。張華相公。博物洪慎。勿去。狐云。吾意已決。柱曰。汝去他日。無累老兄。狐乃去。客爲丞相公。乃是表親。不知相公。一日見有若士人者。謁張公。既坐。辯論鋒起。往往異語出於義外。公歎服。私念此乃秀民。若居於中。豈不聞其名乎。此必怪也。乃呼吏視之。云。汝爲吾平人。津岸東南角。華表枯木。其人已變色。少選將至。公命視之。其人惶愧下階。化爲老狐。竄去。客乃出。謂公曰。向宿于橋旁。已聞呱呱不原缺入火焚燒柱。而狐何故化去。公曰。惟怪知怪。惟精知

原缺

五字

精茲已百餘歲矣。焚燒其柱。

字缺一

柱之言。其狐乃化去也。即知

狐之爲怪。並今日也。議曰。妖怪之變化。其詳論足以感人。自非

博物君子孰能知之。

案此條多訛誤難讀

清周濟晉略張華傳論。華以才智功名見忌。苟勛既退免矣。乃復起家任政。終以附賈致敗。然而元康以來。中間八九年。天下無事。民之飽食安居。獲歿牖下者。蓋已多矣。華雖湛族。舉世賴之。

廷琳按我縣張司空協謀羊杜。翊贊平吳。偉績豐功。隆於典午。及出鎮幽朔。士馬精強。戎夏懷服。其文武才用。侔乎遠矣。迨後楮柱於闇。主虐后之間。忠藎篤誠。天下隱被其

福而宏獎士類。拔茅彙征。尤得古大臣以人事君之誼。語曰。人之有技。若已有之。休休有容。以能保子孫。黎民司空有焉。乃古今論者。不加詳考。耳食晉韋忠華而不實之妄言。以相輕詆。豈篤論哉。又司空博物多聞。世無倫比。六代以來。往往以幽怪無稽之語。託之司空。此編所錄。如搜神記等書。大率皆誕妄不經。未足深信。而以其爲古人記載。且久成爲故實。文人徵引者多。故備列焉。

固安文獻志卷三目錄

耆舊事彙

晉

張司空華下

固安文獻志卷三

天津徐世昌鑒定

縣人賈廷琳謹編

耆舊事彙

晉

張司空華下

張司空遺著

今存賦七首 表一首 讚一首 考者一篇 義八首 箴銘七首 書四首 誄三首 甲乙

哀冊二首 樂歌雜詩共七十四首 可考者一首

鷓鴣賦

并序。晉臧榮緒晉書曰。張華少好文義。博覽墳典。為太常博士。轉兼中書郎。雖栖處雲閣。慨然有感。作鷓鴣賦。王隱晉書曰。阮籍見

華曰。鷓鴣賦以為王佐之才。中書郎成公綏亦推華文義。物莫之害。而余以為物

生則有害。免乎禍害者。其唯儀鳳也。晉賈彪大鵬賦序曰。余覽張茂先鷓鴣賦。以其質微處。而陋以遠害。愚以為未若大鵬棲形遐遠。自育之全也。

固安文獻志

卷三

耆舊事彙 張華

趙莊賈氏无悶齋

此固禍福之機。聊賦之云。梁劉勰文心雕龍曰。張華。章。奕奕清暢。其鷦鷯。富意即韓非之說。雞也。清張暉文曰。威榮緒。晉書。蘇。其開。慨然有

感。作鷦鷯賦。於文意為合。今皆書。謂華未知名。著此賦以自寄。非也。

鷦鷯小鳥也。生於蒿萊之間。長於藩籬之下。翔集尋常之內。而
生生之理足矣。色淺體陋。不為人用。形微處卑。物莫之害。繁滋
族類。乘居匹游。翩翩然有以自樂也。彼鷦鷯鷦鷯。孔雀翡翠。或
凌赤霄之際。或託絕垠之外。翰舉足以冲天。觜距足以自衛。然
皆負矰嬰繳。羽毛入貢。何者。有用於人也。夫言有淺而可以託
深。類有微而可以喻大。故賦之云爾。

何造化之多端兮。播羣形於萬類。惟鷦鷯之微禽兮。亦攝生而
受氣。育翮鬣之陋體。無玄黃以自貴。毛弗施於器用。肉弗登於
俎味。鷹鷂過猶俄翼。尚何懼於罾罟。翳蒼蒙籠。是焉游集。飛不
飄颻。翔不翕習。其居易容。其求易給。巢林不過一枝。每食不過
數粒。栖無所滯。游無所盤。匪陋荆棘。匪榮苙蘭。動翼而逸。投足
而安。委命順理。與物無患。伊茲禽之無知。何處身之似智。不懷
寶以賈害。不飾表以招累。靜守約而不矜。動因循以簡易。任自
然以為資。無誘慕於世偽。雕鷗介其觜距。鷦鷯軼於雲際。鷦鷯
竄於幽險。孔翠生乎遐裔。彼晨晷與歸雁。又矯翼而增逝。咸美
羽而豐肌。故無罪而皆斃。徒銜蘆以避繳。終為戮於此世。蒼鷹
鷦鷯而受縶。鸚鵡惠而入籠。屈猛志以服養。塊幽繫於九重。變音
聲以順旨。思摧翮而為庸。戀鍾岱之林野。慕隴坻之高松。雖蒙

幸於今日。未若疇昔之從容。海鳥鷓鴣。避風而至。條枝巨雀。踰嶺自致。提挈萬里。飄颻逼畏。夫惟體大妨物。而形瓌足瑋也。陰陽陶蒸。萬品一區。巨細舛錯。種繁類殊。鷦螟巢於蚊睫。大鵬彌乎天隅。將以上方不足。而下比有餘。普天壤以遐觀。吾又安知大小之所如。按此賦已見前晉書本傳惟字句頗有異同且無賦序故復錄此

右見梁蕭統文選十三又略見藝文類聚九十二

歸田賦

隨陰陽之開闔。從時宜以卷舒。冬奧處於城邑。春游放於外廬。歸邾鄆之舊里。託言靜以閒居。育草木之藹蔚。因地勢之丘墟。豐蔬果之林錯。茂桑麻之紛敷。用天道以取資。行藥物以為娛。

時逍遙於洛濱。聊相伴以縱意。目白沙與積礫。玩衆卉之同異。揚素波以濯足。泝清瀾以蕩思。低徊住留。棲遲菴藹。存神忽微。遊精域外。藉繼草以為茵。援垂陰以為蓋。瞻高鳥之陵風。臨儵魚於清瀨。眇萬物而遠觀。修自然之通會。以退足於一壑。故處否而忘泰。

右見藝文類聚三十六

朽社賦 并序

高柏橋南大道傍。有古社槐樹。蓋數百年木也。余少居近之。後去。行路遇之。則已朽。意有緬然。輒為之賦。因以言衰盛之理云爾。

伊茲槐之挺植。于京路之東隅。得託尊於田主。據爽塏以高居。垂重陰于道周。臨大路之通衢。饗春秋之所報。應豐腴於無射。歷漢京之康樂。踰喪亂之橫逆。朱夏當陽。蒼藹蕭森。征夫雲會。行旅歸心。輜軒停蓋。輕輿託陰。吉人向風而祛袂。王孫清嘯而啓襟。晞甘棠之廣覆。徧喬木之無陰。

右見藝文類聚三十九又太平御覽五百三十二

永懷賦

美淑人之妖豔。因盼睐而傾城。揚綽約之麗姿。懷婉婉之柔情。超六列于往古。邁來今之清英。既惠余以至懽。又結我以同心。交恩好之款固。接情愛之分深。誓中誠于皦日。要執契以斷金。

嗟夫天道幽昧。差錯繆於參差。怨祿運之不遭。雖義結而絕離。執纏絲之篤趣。守德音以終始。邀幸會於有期。冀谷華之我俟。儻皇靈之垂仁。長收懽於永已。

右見藝文類聚十八又北風興兮增涼句見北堂書鈔一百五十六

感婚賦

并序

方今歲在己巳。將次四仲婚姻者。競赴良時。粲麗之觀。相繼於路。雖葩英有顧。嫁娶之會。不乏平日。乃作感婚賦曰。

彼婚姻之俗。惡當梁之在斯。逼來年之且。至迨星紀之未移。窈窕初茂。玉質始盛。容華外豐。心神內正。接軫連騎。隱隱習習。

充街塞里。暉耀城邑。相麗姿之綽約兮。遙髣髴以感心。怨佳人
之幽翳兮。恨檢防之高深。

右見藝文類聚四十

相風賦

并序。晉傅咸集相風賦序曰。相風之賦。蓋已富矣。唯中書張令。以太史侯部有相風。在西城上。而作者弗為。豈曰其託處幽閑。違衆特立。無羽毛之飾。而丹漆不為之容乎。蓋在先聖。道濟生人。擬議天地。錯綜明神。在璿璣呂齊七政。象渾儀于陶鈞。考古芻于六氣。仰貞觀于三辰。爰在保章。世序其職。辯風候方。必立唯極。循物致用。器不假飾。眇修榦之迢迢。凌

頡有樞機。插以雞毛。于以占事。知來。斯乃簡易之至。張氏之賦。非其至也。

太史侯部有相風。在西城上。而作者弗為。豈曰其託處幽閑。違衆特立。無羽毛之飾。而丹漆不為之容乎。

蓋在先聖。道濟生人。擬議天地。錯綜明神。在璿璣呂齊七政。象渾儀于陶鈞。考古芻于六氣。仰貞觀于三辰。爰在保章。世序其職。辯風候方。必立唯極。循物致用。器不假飾。眇修榦之迢迢。凌

高墉而莖植。玄鳥偏其增翥。晞雲霄而矯翼。嘉創制之窮理。諒器淺而事深。步元氣于尋木。寄先識于茲禽。既在高而想危。又戒險而自箴。雖迴易之無常。終守正而不淫。永恪立曰彌世。志淹滯而愈新。超無返而特存。差偶景而為鄰。

右見藝文類聚六十八序見太平御覽九

金薤賦

右見秦王嘉拾遺記十已畧見前卷不錄

王公上壽酒食舉樂哥詩表

晉武泰始五年。尚書奏。使太僕傅玄。中書監荀勗。黃門侍郎張華。各造正旦行禮。及

王公上壽酒食舉樂哥詩。張華表曰。

按魏上壽食舉詩。及漢氏所施用。其文句長短不齊。未皆合古。

蓋以依詠弦節。本有因循。而識樂知音。足以制聲度曲。法用率非凡近所能改。二代三京。襲而不變。雖詩章詞異。興廢隨時。至其韻逗曲折。皆繫於舊。有由然也。是以一皆因。就不敢有所改易。

右見宋書樂志一。又晉書樂志上。又唐杜佑通典一百四十一。

讓封壯武郡公表

顧章表。

文心雕龍章表篇曰。遠管初筆札。則張華為偽。其三讓公封。理周辭要。引義比事。必得其偶。世珍鶴鷗。莫

右表已佚

晉文王謚議

殊位盛禮。實隆明德。班爵崇寵。亦光茂勳。至于表名贈號。世考洪烈。冠聲無窮者。莫尚于號謚也。論功高于禹稷。比德邁于伊周。

右見藝文類聚四十

封禪議

六篇晉陸雲集與兄平原書曰。頃得張公封禪事。平平耳。不及李氏其文無比。恐非其所作。又曰。尋得李龍勸封禪草。信自有才。頗多煩長耳。令送間人。又有張公所作。已令寫別送。

晉武帝平吳。混一區宇。太康元年九月庚寅。尚書令衛瓘。尚書左僕射山濤。右僕射魏舒。尚書劉寔。司空張華等奏曰。聖德隆茂。光被四表。諸夏乂清。幽荒率從。神策廟算。席卷吳越。孫皓稽顙。六合為家。巍巍之功。格于天地。宜同古典。勒封東嶽。告三府

太常爲儀制。

奏曰。臣聞肇自生民。則有后辟。載祀之數。莫之能紀。立德濟世。揮揚仁風。以登封泰山者。七十有四家。其謚號可知者。十有四焉。沈淪寂寞。曾無遺聲者。不可勝記。自黃帝以前。古傳昧略。唐虞以來。典謨炳著。三王代興。體業繼襲。周道既沒。秦氏承之。至于漢魏。而質文未復。大晉之德。始自重黎。實佐顓頊。至于夏商。世序天地。其在于周。不失其緒。金德將升。世濟明聖。外平蜀漢。海內歸心。武功之盛。實由文德。至于陛下。受命踐阼。弘建大業。羣生仰流。唯獨江湖沅湘之表。凶桀負固。歷代不賓。神謀獨斷。命將出討。兵威暫加。數旬蕩定。羈其鯨鯢。赦其罪逆。雲覆雨施。

八方來同。聲教所被。達于四極。雖黃軒之征。大禹遠略。周之奕世。何以尚今。若夫立石素文。底號前載。象以姓表。言以事告。河圖洛書之徵。不是過也。加以騶虞麟趾。衆瑞並臻。昔夏殷以不崇爲祥。周武以烏魚爲美。咸曰休哉。然符瑞之應。備物之盛。未有若今之富者也。宜宣大典。禮中嶽封泰山。禪梁父。發德號明至尊。享天休。篤黎庶。初學記作厚福慶篤黎民勒千載之表。播流後之聲。俾百代之下。莫不興起。斯帝王之盛業。天人至望也。

又奏曰。今東漸于海。西被流沙。大漠之陰。日南北戶。莫不通屬。茫茫禹跡。今實過之。則天人之道已周。巍巍之功已著。宜有事梁父。修禮地祇。登封泰山。致誠上帝。以答人神之願。乞如前奏。

又奏曰。臣聞處帝王之位者。必有歷運之期。天命之應。濟生民之大功者。必有盛德之容。告成之典。無不可誣。有不可讓。自古道也。而明詔謙冲。屢辭其禮。雖盛德攸在。推而未居。夫三公職典天地。實掌民物。國之大事。取議於此。漢氏封禪。非是官也。不在其事。臣等前奏。蓋陳祖考之功。天命又應陛下之德。合同四海。述古考今。宜循此禮。至於剋定歲月。須五府上議。然後奏聞。請寫詔及奏如前下議。

又奏。臣聞唐虞二代。濟世弘功之君。莫不仰答天心。俯協民志。登介丘。履梁父。未有辭焉者。蓋不可讓也。今陛下勳高百王。德無與二。茂績宏規。巍巍之業。固非臣等所能究論。而聖旨勞謙。

屢自抑損。時至弗應。推美不居。闕皇代之上儀。塞神祇之欵望。使大晉之典謨。不同風於三五。臣等誠不敢奉詔。請如前奏施行。

又奏。自古聖明。光宅四海。封禪名山。著於史籍。作者七十四君矣。舜禹之有天下。巡狩四嶽。躬行其道。易著觀民省方。禮有升中于天。詩頌陟其高山。皆載在方策。文王爲西伯。以服事殷。周公以魯蕃列于諸侯。或享于岐山。或有事泰山。徒以聖德。猶得爲其事。自是以來。功薄而僭其義者。不可勝言。號謚不泯。以至於今。况高祖宣皇帝。肇開王業。海內有截。世宗景皇帝。濟以大功。輯寧區夏。太祖文皇帝。受命造晉。蕩定蜀漢。陛下應期龍興。

混壹六合澤被羣生威震無外昔漢氏失統吳蜀鼎峙兵興以來近將百年地險俗殊民望絕塞以爲分外其日久矣大業之隆重光四葉不羈之寇二世而平非聰明神武先天弗違孰能巍巍其有成功若茲者歟臣等幸以千載得遭運會親奉大化日觀太平至公之美誰與爲讓宜祖述先朝憲章古昔勒功岱嶽登封告成弘禮樂之制正三雍之典揚名萬世以顯祖宗是以不勝大願敢昧死以聞請告太常具禮儀上

右見晉書禮志下又宋書禮志三又略見藝文類聚三十九太平御覽五百三十六初學記十三各引張華封禪議廢楊太后議

右見前晉書本傳又武悼楊后傳不錄

移書太常薦成公綏

竊見處士東郡成公綏年二十五字子安體珪璋之質資不器之量知深慮明足曰妙見研思篤好則仲舒之精引之下世貞幹足曰敦風篤俗淵才達學足曰弘道世教固逸倫之殊俊搢紳之檢式也

右見太平御覽六百三十二引文士傳

報雷煥書

右見前晉書本傳不錄

興褚陶書

二陸龍躍于江漢。彥先鳳鳴于朝陽。自此日來。常恐南金已盡。而復得之于吾子。故知延州之德不孤。淵岱之寶不匱。

右見世說新語賞譽篇劉注引褚氏家傳

答某書

絳帖評曰。茂先終於司空。非丞相唐世已無傳蹟。此帖偽作。清何焯曰。似齊梁人書。

得書為慰。僕諸惛疾已甚。已甚二字施釋為欲暫西臥。歸還乃悉。比將念反。不具。張華呈。

右見宋淳化閣帖二

甲乙問

晉書禮志曰。安豐太守程詵。先已有妻。後又娶。遂立二嫡。前妻亡。後妻子動疑所服。中書令張華造甲乙之問。

甲娶乙為妻。後又娶景。原丙字唐避諱改匿不說有乙。居家如一嫡。無有貴賤之差。乙亡。景之子當何服。本實竝立。嫡庶不殊。雖二嫡非

正此失在先人。人子何得專制析其親也。若為庶母服。又不成為庶。進退不知所從。

右見晉書禮志中

博物誌序

地理讚

右見本書另載藝文卷中此不錄

縱橫篇

蘇秦始與儀同學。鬼谷先生辯說剖毫釐。變詐入無形。巧言惑正理。人主莫不傾聽。

右見太平御覽四百六十四

女史箴

曹嘉之晉紀曰張華懼后族之盛作女史箴。

茫茫造化

初學作芸元化

一一儀既分

初學作兩儀始分

散氣流形既陶既甄在帝

庖羲肇經天人爰始夫婦以及君臣家道以正王猷有倫婦德

尚柔含章貞吉婉孌初學作變淑慎正位居室施衿結褵虔恭中饋

肅慎爾儀式瞻清懿樊姬感莊不食鮮禽衛女矯桓耳忘

初學作忌

和音志厲義高而二主易心立熊攀檻馮媛趨進夫豈無畏知

死不恡班妾

初學作女

有辭割驩同輦夫豈不懷防微慮遠道罔隆

而不殺物無盛而不衰日中則昃月滿則微崇猶塵積替若駭

機人咸知節其容而莫知節其性性之不飾或愆禮正斧之藻

之克念作聖出其言善千里應之苟違斯義則同衾以疑夫出

言如微而榮辱由茲勿謂幽昧靈監無象勿謂玄漠神聽無響

無矜爾榮天道惡盈無恃爾貴隆隆者墜鑒于小星戒彼攸遂

比心螽斯則繁爾類驩不可以黷寵不可以專專實生慢愛極

則遷致盈必損理有固然美者自美翩以取尤冶容求好君子

所讐結恩而絕職此之由故曰翼翼矜矜福所以興靖恭自思

榮顯所期女史司箴敢告庶姬

右見文選五十六又太平御覽一百三十五藝文類聚十

五初學記十

大司農箴

家有廬井王有廩籍阜茂豐物和鈞關石在周之季文室不虔

政首棄稷弗務。作藝修文不籍千畝。匱神乏祀。敗於戎醜。稽臣司農。敢告左右。

右見初學記十二又藝文類聚四十九

尚書令箴

明明先王。開國承家。作制垂憲。仰觀列曜。俯令百官。政用罔憊。憊與憲為韻是古入韻法昔舜納大麓。七政以齊。內成外平。而風雨不迷。山甫翼周。靡剛靡柔。補我衮職。闡我王猷。王猷允塞。而四海咸休。雖曰聖明。必賴良材。無曰我智。官不任能。古音台與材為韻發言如絲。其出成綸。王季道缺。天網縱替。古音近淫與綸為韻離騷即如此讀既無老成。改舊法制。法制不循。不長厥裔。尚臣司臺。敢言侍衛。

右見初學記十一

杖箴

杖道不正。陷墜傾危。明張溥漢魏百家集作不正陷墜不安傾危

右見北堂書鈔一百三十三

倚几銘

倚几之設。設而不倚。作器於此。成禮於彼。

右見同上又太平御覽七百十

席前左端銘

安樂必敬。□□上珍。大道坦坦。□□在人。

右見同上

席前右端銘

行莫若□。居莫若正。行處止恒。修理俟命。

右見同上

章懷皇后誄

自天陶靈。必有徵祥。誕在初載。亦曜神光。顯應天祿。聿嬪聖皇。受氣自然。實聽清和。內含茂質。外發英華。身處宸極。敬恭惟夙。窈窕淑媚。柔順婉穆。宣慈內政。流化太微。六宮變雅。清我壺闈。經綸庶屬。積思萬機。既臻緝熙。立澤流行。將翼我后。登封降禪。氛祲告妖。沈結彌留。奄忽升遐。棄世高遊。聖上哀懷。感切悼心。率土縞素。遏密八音。眇眇遊靈。將焉所之。容先幽邁。豈有反期。

杏杏新宮。下絕三泉。茫茫陵域。合體中原。委棄暉章。即安太清。

右見藝文類聚十五

列文先生鮑玄泰誄

陸雲集與兄平原書曰。張公箴誄。自過五言詩耳。但雲自不便五言詩。由己而言耳。玄泰誄自不及。

士祚誄。雲故日。不作文而常少張公。又今所作。兄軀復云。過之。得作此公輩。便可斐然。

於鑠烈文。續黜皇祚。夏后基命。靈根已固。杞郟既微。枝離葉布。爰暨叔牙。世贊齊風。翼桓濟管。遂登霸功。越在漢隆。三司並縱。烈考中丞。妙世顯名。峨峨先生。誕資英俊。淑質清淳。蘭芳玉潤。抗行崇邈。遊心大順。允文允明。聰昭秀哲。啟冥演幽。守文命世。抱道冲虛。執義貞厲。栖遲無悶。不營不伎。擬志雲霄。致命窮達。行爲範軌。言成隱括。宜登遐年。宏此徽猷。濟濟搢紳。永挹清流。

取識遺音。日想表儀孰云玄泰。曾不我知。感傷慷慨。揮淚滲澌。已矣鮑子。寧爾玄陰。振聲竹帛。永播徽音。

右見藝文類聚三十七

魏劉驃騎誄

右見藝文類聚四十八已載前劉驃騎卷

晉武帝哀策文

感大饗之無虧。哀罇俎之虛設。叩龍輻以長叫。痛靈暉之潛逝。其辭曰。

欽惟皇考。體道之真。德侔乾坤。齊曜三辰。應期登禪。協於天人。上虔郊祀。下惠兆民。憲章唐虞。允得其津。搜揚仄陋。故老是賓。

百揆時序。盛業日新。恩從雲翔。威猶霆震。江海靜波。岷岳無塵。四夷率服。莫不來臣。肅慎奉貢。越裳効珍。化此弊俗。歸之至淳。昔在上聖。咸享百年。哀哀皇考。用不是臻。遘厲彌侵。景命殞顛。舍此昭晰。即彼幽玄。仰瞻靡怙。廓若無天。終制尙儉。率由典度。華幕弗陳。器必陶素。不封不樹。所在惟固。貽法來世。是則是慕。大隧旣啟。吉日將征。鐘鼓雷震。白虎抗旌。龍螭驪首。良駟悲鳴。倡者振鐸。挽夫齊聲。背此崇殿。將適下庭。玄宮窈窕。脩夜冥冥。光燈永戢。幽闈長扃。仰訴皇穹。零淚屏營。云誰能忍。寄之我情。結心墳隴。永憑聖靈。

右見藝文類聚十五

武元楊皇后哀策文

天地配序。化成兩儀。王假有道。晉書作義在伉儷。姜嫄佐饗。

二妃興媯。仰觀古籍。晉書作覲亦同規。今胡不然。景命夙虧。

嗚呼哀哉。我膺麻運。晉書作臨萬方正位於內。實在嬪嬙。

天作之合。駿發其祥。河嶽降靈。啟祚華陽。奕世豐衍。朱紱斯皇。

晉書作朱纘女惟行。受命溥將。來翼家邦。憲度是常。緝熙陰教。德

聲顯揚。昔我先妣。暉暉晉書作曜休光。后承前訓。奉述遺芳。宜嗣

徽音。繼序無荒。如何不弔。背世隕喪。瑤齊無住。晉書作望長去蒸

嘗。迫晉書作追懷永悼。率土摧傷。嗚呼哀哉。陵兆既宅。晉書作遷將遷幽都。

宵陳夙駕。元妃其徂。宮門晉書作闈遏密。階庭永晉書作空虛。設祖屬晉書

布作紼。告駕啓途。法服翬綸。晉書作服字寄象容車。金輅掩藹。帷裳晉書

帳作裳不舒。千乘動軫。六驥踟躕。銘旌樹表。翠柳雲敷。祁祁同軌。

岌岌蒸徒。孰云不懷。哀感萬夫。寧神虞旃。晉書作安體玄廬。土房

陶簋。齊制遂初。依行紀謚。聲被八區。雖背明光。亦歸皇姑。沒而

不朽。世德作謨。嗚呼哀哉。

右見藝文類聚十五又晉書武元楊后傳

晉四箱樂歌十六篇。梁鍾嶸詩品曰晉司空張華詩其源出於王粲其體

亮疏之士猶恨其兒女情多風雲氣少謝康樂云張公雖復千

王公上壽詩一章

稱元慶奉壽。一作觴。后皇延遐祚。安樂撫萬方。

食舉東西箱樂詩 十一章

明明在上。不顯厥絲。翼翼三壽。蕃后惟休。羣生漸德。六合承流。三正元辰。朝慶鱗萃。華夏奉職。貢八荒覲。殊類黻冕。充廣庭鳴。玉盈朝位。

濟濟朝位。言觀其光。儀序既以時。禮文渙樂府作煥以彰。思皇享多祜。嘉樂永無央。

九賓在庭。臚讚既通。升瑞奠贄。乃侯乃公。穆穆天尊。隆禮動容。履端承元吉。介福御萬邦。

朝享上。下咸雍。崇多儀。繁禮容。舞盛德。歌九功。揚芳烈。播休蹤。皇化洽。洞幽明。懷柔百神。輯祥禎。潛龍躍。雕虎仁。儀鳳鳥。屈游

麟。枯蠹榮。竭泉流。菌芝茂。枳棘柔和。氣應休徵。滋樂府作弦協靈符。

彰帝期。綏宇宙。萬國和。昊天成命。賚皇家。賚皇家。

世資聖哲。三后在天。啓鴻烈。啓鴻烈。樂府少隆王基。率土謳吟。

欣戴于時。恒文示象。代氣著期。

泰始開元。龍升在位。四隩同風。燮寧殊類。五躔來備。嘉生以遂。凝庶績。臻大康。申繁祉。胤無疆。本枝百世。繼緒不忘。繼緒不忘。

休有烈光。永言配命。惟晉之祥。

聖神統世。篤皇仁。廣大配天地。順動若陶鈞。玄化參自然。至德通神明。清風暢八極。流澤被無垠。

於皇時晉。奕世齊聖。惟天降嘏。神祇保定。弘濟區夏。允集大命。

有命既集光帝猷。大明重耀鑑六幽。聲教洋溢惠滂流。惠滂流。
移風俗。樂府少一多士盈朝。賢俊比屋。敦世心。樂府作斷彫反素樸。反
素樸。懷庶方。干戚舞階庭。疏狄說遐荒。扶南假重譯。肅慎襲衣
裳。雲覆雨施。德洽無疆。旁作穆穆仁化翔。

朝元日。賓王庭。承宸極。當盛明。衍和樂。竭祗誠。仰嘉惠。懷德馨。
游滄風。泳淑清。協億兆。同歡榮。建皇極。統天位。運陰陽。御六氣。
殷羣生。成性類。王道浹。治功成人倫。序俗化清。虔明祀。祗三靈。
崇禮樂。式儀刑。

慶元吉。晏三朝。播金石。詠洽簫。奏九夏。舞雲韶。邁德音。流英聲。
八紘一。六合寧。六合寧。承聖明。王澤洽。道登隆。綏函夏。總華戎。

齊德教。混殊風。混殊風。康萬國。崇夷簡。尚敦德。弘王度。表遐則。

正旦大會行樂詩 四章

於赫皇祖。迪哲齊聖。經緯大業。基天之命。克開洪緒。誕篤天慶。
芻濟彝倫。仰齊七政。

烈烈景皇。克明克聰。靜封略。定勳功。成民立政。儀刑萬邦。式固
崇軌。光紹前蹤。

允文烈考。濬哲應期。參德天地。比功四時。大亨以正。庶績咸熙。
肇啟晉宇。遂登皇基。

明明我后。玄德通神。受終正位。協應天人。容民厚下。育物流仁。
躋我王道。暉光日新。

右見宋書樂志二又宋郭茂倩樂府詩集十三

晉正德大豫二舞歌二篇

晉書樂志曰。荀勗典知樂事。啓朝士解音律者共掌之。使郭瓊宋識等造正德大豫二舞。

其樂章亦張華之所作云。文心雕龍樂府篇曰。逮於晉世。則傳立曉音。創定雅歌。以詠祖宗。張華新篇。亦充庭萬。

正德舞歌詩

日皇上天。玄鑒惟光。神器周回。五德代章。祚命于晉。世有哲王。弘濟區夏。甄陶萬方。大明垂曜。旁燭無疆。蚩蚩庶類。風德永康。皇道惟清。禮樂斯經。金石在懸。萬舞在庭。象容表慶。協律被聲。軼武超濩。取節六英。樂府作韻同進退讓。化漸無形。太和宣洽。通于幽冥。

大豫舞歌詩

惟天之命。符運有歸。赫赫大晉。三后重暉。繼明昭樂府作紹世。光撫九圍。我皇紹期。遂在璿樂府作璇璣。羣生屬命。奄有庶邦。慎徽五典。立教遐通。萬方同軌。率土咸雍。爰制大豫。宣德舞功。淳樂府作醇化既穆。王道協隆。仁及艸木。惠加昆蟲。億兆夷人。說仰皇風。不顯大業。永世彌崇。

右見宋書樂志二又晉書樂志上又樂府詩集五十二

冬至初歲小會歌

藝文類聚引晉起居註曰。武帝太康元年。詔太常張華。止按舊事。拜公建始殿。因以小會。今拜公于太極殿。功

宜因以小會。蓋所以崇宰輔也。

日月不留。四氣回周。節慶代序。萬國同一作咸休。庶允羣后。初學作庶

奉壽一作壽升朝。我有壽初學樂府均作嘉禮。式宴百僚。繁肴綺錯。旨酒泉

淳。作府樂笙鏞和奏。磬管流聲。上隆其愛。下盡其心。宣其壅滯。訓

作樂府之德音。乃宣乃訓。配享交泰。永載仁風。長撫無外。

宴會歌

賡賡我皇。配天垂光。留精日昃。經覽無方。聽朝有暇。延命衆臣。冠蓋雲集。罇俎星陳。肴蒸多品。八珍代變。羽爵無算。究樂極宴。歌者流聲。舞武一作者投袂。動容有節。絲竹並設。宣揚四體。繁手趣摯。懽足發和。酣不忘禮。好樂無荒。翼翼濟濟。

命將出征歌

重華隆帝道。戎蠻或不賓。徐夷興有周。鬼方亦違殷。今在盛一作聖明世。寇虐動四垠。豺狼染牙爪。羣生號穹旻。元帥統方夏。出車

撫涼秦。衆貞必以律。臧否實在人。威信加殊類。疎狄思自親。單醪豈有無一作味。挾纊感至仁。武功尚止戈。七德美安民。遠跡由斯舉。永世無風塵。

勞還師歌

獾狁背天德。構亂擾邦畿。戎車震朔野。羣帥贊皇威。將士齊心旅。作樂府感義忘其私。積勢如礮弩。赴節如發機。囂聲動山谷。金光曜素暉。揮戈作樂府陵勁敵。武步蹈橫屍。鯨鯢皆授首。北土永清夷。昔往冒隆暑。今來白雪霏。征夫信勤瘁。自古詠采薇。收榮於舍作樂府爵。燕喜在凱歸。

中宮所歌

先王統大業。立化漸八維。儀刑孚萬邦。內訓隆壺闈。皇英垂帝
典。大雅詠三妃。執德宣隆教。正位理厥機。一作司含章體柔順。帥
一作率禮蹈謙祗。螽斯弘慈惠。樛木逮幽微。徽音穆清風。高義邈
不追。遺榮參日月。百世仰餘暉。

宗親會歌

族燕明禮順。餼食序親親。骨肉散不殊。昆弟豈他人。本枝篤同
慶。棠棣著先民。於皇聖明后。天覆弘且仁。降禮崇親戚。旁施協
族姻。式晏盡酣娛。飲御備羞珍。和樂既宣洽。上下同歡欣。德教
加四海。敦睦被無垠。

右歌六篇見晉書樂志上又見樂府詩集十三及十九又

冬初小會首八句見初學記三又出征歌見藝文類聚五
十九

遊獵篇

樂府解題曰梁劉孝威遊獵篇云之宗講射所上林
娛獵場備言遊行射獵之事亦謂行行遊且獵篇

歲暮凝霜結。堅冰沍幽泉。厲風蕩原隰。浮雲蔽昊天。玄雲掩默
合。素雪紛連翩。鷹隼始擊鷙。虞人獻時鮮。嚴駕鳴儔侶。攬轡過
中田。戎車方四牡。文軒馭紫燕。輿徒既整飭。容服麗且妍。武騎
列重圍。前驅抗修旃。倏忽似回飈。絡繹若浮煙。鼓噪山淵動。衝
塵雲霧連。輕繪拂素霓。百三家集作電織網蔭長川。游魚未暇竄。歸雁不

得旋

百三家集作還

由基控繁弱。公差操黃間。機發應弦倒。一縱百三家集作倒

連雙肩。僵禽正狼藉。落羽何翩

百三家集作翻

翻。積獲被山阜。流血丹

中原馳騁未及勸。曜靈俄移晷。結罝彌敷澤。囂聲振四鄙。鳥驚觸白刃。獸駭掛流矢。仰手接遊鴻。舉足蹴犀兕。如黃批藝文作批狡兔。青骹撮飛雉。鵠鷺不盡收。鳧鷖安足視。日冥徒御勞。賞勤課能否。野饗會衆賓。玄酒甘且旨。燔炙播遺芳。金觴浮素蟻。珍羞墜歸雲。纖肴出淥水。四氣運不停。年時何亶亶。人生忽如寄。居世遽能幾。至人同禍福。達士等生死。榮辱渾一門。安知惡與美。遊放使心狂。覆車難再履。伯陽爲我誠。檢跡投清軌。

右見樂府詩集六十七。又如黃四句見藝文類聚九十一及九十四。

遊俠篇

樂府詩集引魏志曰。楊阿若。後名豐。字伯陽。少遊俠。常以報仇解怨爲事。故時人爲之號曰。東市相斫。楊阿若。西市相斫。楊阿若。後世遂有遊俠曲。

翩翩四公子。濁世稱賢名。樂府作明龍虎相交爭。七國並抗衡。食客

三千餘。門下多豪英。遊說朝夕至。辨士自縱橫。孟嘗東出樂府作出東

關。濟身由雞鳴。信陵西反魏。秦人不窺兵。一作開趙勝南詛楚

乃與毛遂行。黃歇北適秦。太子還入荆。美哉遊俠士。何以尙四

卿。我則異於是。好古師老彭。

右見藝文類聚三十三。又樂府詩集六十七。

博陵王宮俠曲二篇

樂府詩集曰。後世有遊俠曲。魏陳琳張華。又有博陵王宮俠曲。

俠客樂幽險。築室窮山陰。燎樂府作燎獵野獸稀。施網川無禽。歲暮

飢寒至。慷慨頓足吟。窮令壯士激。安能懷苦心。干將坐自口繁

弱。控餘音。耕佃窮淵陂。種粟著劍鐔。收秋狹路間。一擊重千金。

棲遲熊羆穴。容與虎豹林。身在法令外。縱逸常不禁。

雄兒任氣俠。聲蓋少年場。借友行報怨。殺人租市旁。吳刀鳴手中。利劍嚴秋霜。腰間义素戟。手持白頭鏤。騰超如激電。迴旋如流光。奮擊當手決。交屍自縱橫。寧為殤鬼雄。義不入園牆。生從命子遊。死聞俠骨香。身沒心不懲。勇氣加四方。

右見藝文類聚三十三又樂府詩集六十七

門有車馬客行

門有車馬客。問君何鄉士。捷步往相訊。果是舊鄰里。語昔有故悲。論今無新喜。清晨相訪慰。日暮不能已。詞端競未究。忽唱分途始。前悲尚未弭。後憂方復起。

右見藝文類聚四十一

輕薄篇

樂府解題曰。輕薄篇言乘肥馬。衣輕裘。馳逐經過為樂。與少年行同意。何遜云。城東美少年。張正見云。洛陽美少年。是也。

末世多輕薄。驕或

百三家集作代

好浮華。志意能

百三家集作既

放逸。貨財亦豐

奢。被服極纖麗。肴膳盡柔嘉。童僕餘梁肉。婢妾蹈綾羅。文軒樹

羽蓋。乘馬鳴玉珂。橫簪刻玳瑁。長鞭錯象牙。足下金鑄履。手中

雙莫邪。賓從煥絡繹。侍御何芬葩。朝與金張期。暮宿許史家。甲

第面長街。朱門赫嵯峨。蒼梧竹葉清。宜城九醞醪。浮醪隨觴轉。

素蟻自跳波。美女興齊趙。妍唱出西巴。一顧傾城國。

百三家集作城國傾千

金不

百三家集作寧

足多。北里獻奇舞。大陵奏名歌。新聲踰

一作殊

激楚。

妙妓絕陽阿。玄鶴降浮雲。鱗魚躍中河。墨翟且停車。展季猶咨

嗟。淳于前行酒。雍門坐相和。孟公結重關。賓客不得蹉。二雅來何遲。耳熱眼中花。盤案互交錯。坐席咸喧譁。簪珥或百三家集作咸墮落。冠冕皆傾邪。酣飲終日夜。明燈繼朝霞。絕纓尚不尤。百三家集作言安能復顧他。留連彌信宿。此歡難可過。人生若浮寄。年時忽蹉跎。促促朝露期。榮樂遽幾何。念此腸中悲。涕下自滂沱。但畏執法吏。禮防且切磋。

右見樂府詩集六十七又美女以下八句見初學記十五

壯士篇

樂府詩集曰。燕荆柯歌壯士篇。蓋出於此。

天地相震蕩。回薄不知窮。一作窮人物稟常格。有始必有終。年時俯仰過。功名宜速崇。壯士懷憤激。安能守虛冲。乘我大宛馬。撫

我繁弱弓。長劍橫九野。高冠拂玄穹。慷慨成素霓。嘯吒起清風。震響駭八荒。奮威曜四戎。濯鱗滄海畔。馳騁大漠中。獨步聖明世。四海稱英雄。

右見樂府詩集六十七

蕭史曲

清丁福保全晉詩曰。此詩藝文作張華樂府作鮑照然詩之詞格不類晉人。當是鮑詩也。

蕭史愛長

樂府少年

嬴女老

樂府童顏

火粒願排棄。霞霧好

樂府作護好忽

登攀。龍飛竟

樂府天路

鳳起出秦關。身去長不返。簫聲時往還。

右見藝文類聚七十八

祖道征西應詔詩

赫赫大晉。奄有萬方。陶以仁化。曜以天光。貳跡陝西。實在我王。

內飪玉鉉。外惟鷹揚。四牡揚鑣。玄輅振綏。庶寮羣后。餞洛之涓。

詩紀作餞
飲洛涓

感離慨歎。

詩紀作歎
數悽

慕德遲遲。

右見藝文類聚二十九

祖道趙王應詔詩

崇選穆穆。利建明德。

一作明明
當從之

於顯穆親。時惟我王。稟姿自然。金

質玉相。光宅舊趙。作鎮冀方。休寵曲錫。備物煥彰。發軔上京。出

自天邑。百寮餞行。縉紳具集。軒冕峨峨。冠蓋習習。戀德維懷。永

歎弗及。

右見同上

太康六年三月二日後園會詩 四首

暮春元日。陽氣清明。祁祁甘雨。膏澤流盈。習習祥風。啟滯導生。

禽鳥翔逸。

初學作
逸豫

卉木

初學作
桑麻

滋榮。纖條被綠。翠華含英。

於皇我后。欽若昊乾。順時省物。言觀中園。讌及羣辟。乃命乃延。

初學
筵學

命樂華池。祓濯清川。汎彼龍舟。泝渚游源。

朱幕云

全晉詩
作雲

覆。列坐文茵。羽觴波騰。品物備珍。管絲繁會。變

用奏新。穆穆我皇。臨下渥仁。訓以慈惠。詢納廣神。好樂無荒。化

達無垠。

咨予微臣。荷寵明時。忝恩於外。攸攸三期。犬馬惟慕。天實爲之。靈啟其願。邀願在茲。於以表情。爰著斯詩。

右詩前二首見藝文類聚又初學記四全詩見明張溥漢

魏百三家集

上巳篇

仁風導和氣。句芒御昊春。姑洗應時月。元巳啟良辰。密雲蔭朝日。零雨灑微塵。飛軒遊九野。置酒會衆賓。臨川懸廣幕。夾水布長茵。徘徊存往古。慷慨慕先真。朋從自遠至。童冠八九人。追好舞雩庭。擬跡洙泗濱。伶人理新樂。膳夫然時珍。八音礪磻奏。肴俎從橫陳。妙舞起齊趙。悲歌出三秦。春醴踰九醞。冬清過十旬。盛時不努力。歲暮將何因。勉哉衆君子。茂德景日新。高風舞鳳翼。輕舉攀龍鱗。

右見詩首四句見初學記四妙舞二句見初學記十五全

詩見漢魏百三家集

勵志詩九首

文心雕龍明詩篇曰。若夫四言正體。則雅潤為本。五言流調。則清麗居宗。華實異用。唯才所安。故平子得其雅。叔夜含其潤。茂

先擬其清。景陽振其麗。明胡應麟曰。四言漢多主格。魏多主詞。晉以下若茂先勵志。廣徵補亡。尚有前代典刑。

太儀幹運。天迴地游。四氣鱗次。寒暑環周。星火既夕。忽焉素秋。涼風振落。熠燿宵流。

吉士思秋。寔感物化。日與月與。荏苒代謝。逝者如斯。曾無日夜。嗟爾庶士。胡寧自舍。

仁道不遐。德輶如羽。求焉斯至。衆鮮克舉。大猷玄漠。將抽厥緒。先民有作。貽我高矩。

雖有淑姿。放心縱逸。田一作般于游。居多暇日。如彼梓材。弗勤

丹漆雖勞朴斲終負素質

養由矯矢獸號于林。捕盧蒲一作盧縈繳神感飛禽末伎之妙。動物

應心研精就道安有幽深。清沈德潛古詩源注曰。捕且子見雙鳥過之其不被戈者亦下。見汲冢書。按捕盧即捕且。

安心恬蕩棲志浮雲體之以質彪之以文如彼南畝力耒既勤

蕪蓁致功必有豐殷

水積成淵川一作載瀾載清土積成山歆蒸鬱冥山不讓塵川不

辭盈勉爾志一作含弘以隆德聲

高以下基洪由纖起川廣自源成人在始累微以著乃物之理

纏牽之長實累千里。古詩源注曰。纏牽索也。千里之馬。繁以長索則爲累矣。見戰國策。

復禮終朝天下歸仁若金受礪若泥在鈞進德修業暉光日新

隰朋仰慕予亦何人

右見文選十九

答何劭三首

吏道何其迫窘然坐自拘纓綬爲徽纏文憲焉可踰恬曠苦不

足煩促每有餘良朋貽新詩示我以游娛穆如灑清風奐若春

華敷自昔同寮案於今比園廬衰夕疾一作近辱殆庶幾並懸輿

散髮重陰下抱杖臨清渠屬耳聽鶯鳴流目翫儵魚從容養餘

日取樂於桑榆

洪鈞陶萬類大塊稟羣生明闇信異姿靜躁亦殊形自予及有

識志不在功名虛恬竊所好文學少所經忝荷既過任白日已

西傾道長苦志

一作智

短責重困才輕。周任有遺規。其言明且清。

負乘為我戒。夕惕坐自驚。是用感嘉貺。寫心出中誠。發篇雖溫麗。無乃違其情。

駕言歸外庭。放志永棲遲。相伴步園疇。春草鬱鬱滋。榮觀雖盈日。親友莫與偕。悟物增隆思。結戀慕同儕。援翰屬新詩。永歎有餘懷。

右詩前二首見文選二十四後一首見藝文類聚

情詩五首

清沈德潛古詩源曰。禮麗之作。油然而入。茂先詩之上者。與袁生蒙楚詩同意。

清風動帷簾。晨月照幽房。佳人處遐遠。蘭室無容光。襟懷擁靈景。輕袞覆空牀。居歡愒夜促。在感怨宵長。

拊

玉臺作撫

枕獨嘯

玉臺作吟

歎感慨

玉臺作感

心內傷

遊目四野外。逍遙獨延佇。蘭蕙緣清渠。繁華蔭綠渚。佳人不在茲。取此欲誰與。巢居知風寒。

玉臺作覺風。類聚作寒風。

穴處識陰雨。

玉臺作未

曾遠別離。安知慕儔侶。

北方有佳人。端坐鼓鳴琴。終晨撫管絃。

清紀容舒。玉臺新詠考異。琴有絃而無管。管字與上句不叶。管

須吹而不須撫。撫字與本句亦不叶。此句必有訛字。然諸本並同。闕疑俟考。日夕不成音。憂來結不解。我思存

所欽。君子尋時役。幽妾懷苦心。

昔邪生戶牖。庭內自成林。

或作陰

翔鳥鳴翠隅。

玉臺新詠考異。翠隅二字未詳。詩紀作翠偶。亦

不可解。疑為率隅二字。以形似而訛。草蟲相和吟。心悲易感激。俛仰淚流衿。願託晨風

翼束帶侍

或作視

衣袞

明月曜清景。隴光照玄墀。幽人守靜夜。迴身入空帷。束帶俟侍或作

將朝。廓落晨星稀。寐或作假交精情或作爽。觀我佳人姿。巧笑媚

權或作靨。聯娟玉臺新詠考異。聯娟宋刻作聯娟。按眉聯娟。宋刻誤也。眸與眉。寤宋刻玉臺

作寐言增長歎。悽然心獨悲。

君居北海陽。妾在江南玉臺新詠考異。南江諸本作江南。然陰。於義為複。今從宋刻。陰。懸邈極

修途。途。避下有或無極字。山川阻且深。承權注隆愛。結分投所欽。銜恩

一作守篤篤一作義。萬里託微心。

右詩前二首見文選二十九又藝文類聚三十二又五首

同見陳徐陵玉臺新詠二

雜詩三首

晷度隨天運。四時互相承。初學東壁正昏中。初學陰寒節升。

繁霜降當夕。悲風中夜興。朱火青初學無光。蘭膏坐自凝。重

衾無暖氣。挾纒如懷冰。伏枕終遙昔。李善文選注引。廣雅云。昔夜也。寤言莫予應。

永思慮崇替。慨然獨撫一作膺。

逍遙游春宮。或作容與淥池阿。白蘋齊詩素葉。朱草茂丹華。

微風搖苒若。層玉臺新詠考異。層宋刻作增。案楚詞增冰峨峨。即作層義。蓋古

本作波動芰荷。榮彩曜中林。流馨入綺羅。王孫遊不歸。修路邈

以遐。誰與翫遺芳。竚立獨咨嗟。

荏苒日月運。寒暑忽流易。同好逝宋刻不存。迢迢或作遠離析。

房櫺自來風。戶庭無行迹。蒹葭生牀下。蛛螫網四壁。懷思豈不

隆感物重鬱積。遊雁比翼翔。歸鴻知接翮。來哉彼或作君子。無

愁玉臺考異愁字未詳疑有舛誤徒自隔。文心雕龍麗辭篇曰張華詩稱游雁比翼翔歸鴻知接翮若斯重出即對句之駢枝也

右詩前一首見文選二十九又初學記三後二一首見玉臺

新詠二

感婚詩

駕言遊東邑。東邑紛襮襮。婚姻及良時。嫁娶避當梁。窈窕出閨女。嫵婉姬與姜。素顏發紅華。美日流清暢。張溥百三家集改作揚 韓煒衆親盛。於我猶若常。譬彼暮春草。榮華不再陽。

右見初學記十四

松詩藝文類聚有詩無題古遺集云擬古一作鮑明遠

松生壠坂上。百尺下無枝。東南望河尾。西北隱岷崖。綱風振山籟。朋鳥夜驚離。悲涼貫年節。葱翠恒若斯。安得草木心。不怨寒暑移。

右見藝文類聚八十八

荷詩

荷生綠泉中。碧葉齊如規。迴蕩流霧珠。映水逐條垂。照灼此金塘。藻曜君王池。不愁世嘗絕。但畏盛明移。

右見同上

橘詩

橘生湘水側。菲陋人莫傳。逢君金華宴。得在玉几前。

右見藝文類聚八十九

遊仙詩三首

雲霓垂藻旒。羽袿揚輕裾。飄登清雲間。論道神皇廬。蕭史登鳳音。王后吹鳴竽。守精味玄妙。逍遙無爲墟。

玉佩連浮雲。輕冠結朝霞。列坐王母堂。豔體冷瑤華。湘妃詠涉江。漢女奏陽阿。

乘雲去中夏。隨風濟江湘。躋躋陟高陵。遂升玉巒陽。雲娥薦瓊石。神妃侍衣裳。

右見藝文類聚七十八

招隱二首

隱士託山林。遁世以保真。連惠亮未遇。雄才屈不伸。

棲遲四野外。陸沈背當時。循名奄不著。藏器待無期。羲和策六龍。弭節越崦嵫。盛年俛仰過。忽若振輕絲。

右見藝文類聚三十六

贈摯仲治全晉詩作治誤

君子有逸士。棲遲於一丘。仰蔭高林茂。俯臨淥水流。恬淡養玄虛。沈精研聖猷。

右見漢魏百三家集又全晉詩

寒夕詩

梁鍾嶸詩品曰。茂先寒夕諸作。皆五言之警策者也。所謂篇章之珠澤。文彩之鄧林。

右詩已佚

廷琳按明張溥漢魏百三家集本張司空詩尙有白紵舞歌詩三篇杯槃舞歌詩一篇拂舞歌詩三篇而宋郭茂倩樂府詩集均載爲無名氏作此編不錄

附錄

〔晉武帝咸寧五年以張華爲度支尙書詔〕一年不收使公私俱匱不唯天時乃人事有不盡也故總要者正在度支尙書也其以散騎常侍中書令張華爲度支尙書見太平御覽引晉起居注

〔晉惠帝永平元年以張華爲中書監詔華體良清粹才識經濟前任中書有思謀之勤機密之要宜得其才以華爲中書

監加侍中

見北堂書鈔引王隱晉書

〔惠帝元康元年以張華爲儀同詔〕中書監光祿大夫張華歷世腹心情所憑賴故酬其勲績使儀同三司而虛冲挹損難違高尙其以華爲光祿大夫儀同三司本職如故又給親信

滿百人

見太平御覽引晉起居注又參北堂書鈔引王隱晉書

〔晉陸雲與張光祿書〕長幼之序人倫大司季世多難失敬在昔敢希令典求思自邁謹奏下敬以藉虔疑見陸士龍集按張司空嘗加光祿大夫

又最推穀士龍兄弟及顧彥先等故此書及下二書即與司空者也

又顧令文彥先每宣隆眷彌泰之惠懷德惟慙守以反側旣歸仁風委心自昵加與沛君分同骨肉憑賴之懷疑心如結

見同上

〔又〕加蒙顧遇。重以傾倒。唯亮歸誠。石行文敦。素篤邃道。實茂淑器。敏既美。思學又快。南州良德。今者東行。望風自託。其意繾綣。願厚接納。副其乃心。見同上

〔又〕與兄弟平原書。往日論文。先辭而後情。尙絜文龍作心而不取悅澤。嘗憶兄道張公父子論文。實自欲得。今日便欲宗其言。雲今意視文。乃好清省欲。無以尙意之。至此乃出自自然。

張公在者必罷。必復以此見調。見同上

〔又〕仲宣文如兄言。實得張公力。如子桓書。亦自不乃重之。見同上

〔又〕張公語雲云。兄文故自楚。須作文爲思。昔所識文。乃視兄作誄。又令結使說音耳。兄所撰願且可付之。見同上

〔又〕兄詩賦自與絕域。不當稍與比較。張公昔亦云。兄新聲多之不同也。張公父子亦語雲。兄文過子安。見同上

〔唐〕劉仁軌在百濟上表。臣又見晉代平吳。史籍具載。內有武帝張華。外有羊祜杜預。籌謀策畫。經緯諮詢。王濬之徒。折衝萬里。樓船戰艦。已到石頭。賈充王渾之輩。猶欲斬張華以謝天下。武帝報云。平吳之計。出自朕意。張華與朕同見耳。非其本心。是非不同。乖亂如此。平吳之後。猶欲苦繩王濬。賴武帝擁護。始得保全。不逢武帝聖明。王濬不存首領。臣每讀其書。未嘗不撫心長歎。見舊唐書

〔晉〕何劭贈張華詩。四時更代謝。懸象迭卷舒。暮春忽復來。和

風與節俱。俯臨清泉涌。仰觀嘉木敷。周旋我陋圃。西瞻廣武廬。既貴不忘儉。處有能存無。鎮俗在簡約。樹塞焉足摹。在昔同班司。今者並園墟。私願偕黃髮。逍遙綜琴書。舉爵茂陰下。攜手共躊躇。奚用遺形骸。忘筌在得魚。見文選

梁江淹雜體詩擬張司空離情。秋月照簾籠。懸光入丹墀。佳人撫鳴琴。清夜守空帷。蘭逕少行迹。玉臺生網絲。庭樹發紅彩。閨草含碧滋。延佇整綾綺。萬里贈所思。願垂湛露惠。信我皎日期。見同上

梁吳均詠寶劍詩。鏗邊霜凜凜。匣上風淒淒。寄語張公子。何當來見攜。見初學記

唐崔融詠劍詩。匣氣衝牛斗。山形轉鹿盧。見同上

唐李白梁甫吟。張公兩龍劍。神物合有時。見李翰林集

又詩。寶劍雙蛟龍。雪花照芙蓉。精光射牛斗。電光不可衝。見同上

唐李嶠寶劍篇。風霜凜凜匣上清。精氣遙遙斗間明。見初學記

唐郭元振古劍歌。何言中路遭并捐。零落漂淪古獄邊。雖則沉埋無所用。猶能夜夜氣衝天。見舊唐書又張燕公集

唐汝楫詩。千年神物號干將。凜凜寒光濯雪霜。好遇英雄多激勵。不應塵土久埋藏。斬蛇已到三湘水。破膚曾歸百戰場。

向日不逢雷煥識。斗牛空自吐龍光。見事文玉屑

金元好問論詩絕句。鄴下風流在晉多。壯懷猶見鐵壺歌。風

雲若恨張華少。溫李新聲奈爾何。

見遺山集

〔清趙士麟詠史詩〕司空博物流。讀書三十乘。史漢滾滾談。其旨自詔令。奈何不見幾。猶自貪政柄。郭賈廢東宮。倫秀修夙

見讀書堂集

〔余世廉弔司空張華〕司空鄭之僑。博物古君子。讀書窮五車。稽古辨三豕。幽思寄鷓鴣。箴戒及女史。適遭煽處憂。牝雞□逆耳。中台象告凶。急流惜中止。誰知趙王倫。搆難自君始。蘭艾同焚煬。玉石無彼此。晉祚方泯斃。骨肉干戈起。鳧毛見海濱。柱石先傾圯。惜哉劍化龍。永沒延津底。人往悵風微。欷歔

弔梓里。

見安肅縣志

〔史元善詠張華〕茂先少時曾牧羊。聲價欵起動四方。文辭燦爛雲漢章。學窮三古追炎皇。伐吳勳績祐所當。建謀幃幄華獨襄。當時忌者列劍鋌。功成始知籌策良。華戎來歸朝軒裳。威德遠服聲汪洋。盛衰有時不可常。豔妻煽處勢徬徨。大厦將傾誰扶將。台星已拆天道彰。趙王孫秀同披猖。一朝變起□鷹揚。嗟哉赤族罹禍殃。曷不早駕臨風翔。智者慮患須周防。急流勇退古所望。

見同上

〔清邊汝元擬張司空離情〕秋夜簾櫳肅。月影壓重陰。燈殘萬籟寂。起坐彈鳴琴。一彈發商聲。再彈秋氣深。佳人隔天末。雁

鯁阻飛沈。代馬嘶朔風。晨風戀舊林。君恩亮未歇。敢賦白頭

吟見漁山詩草

〔清謝啟昆詠張華〕室無長物載書來。博物司空蓋世才。王室他年赤三族。天星夜半拆中台。祥占牛斗難言智。賦託鷓鴣尚惹災。寶劍佩時剛六十。悲深繫墓豫章雷。

〔清曹振鏞詠史詩〕鸚鵡詞華傷處士。鷓鴣賦意悼司空。伐吳力贊平戎策。匡晉宏資博物功。石鼓無聲桐刻蜀。斗牛有氣劍埋豐。天星夜半中台拆。使者來呼詔斬公。見話雲軒詠史詩集

〔宋吳淑劍賦〕音雷煥既得豐城之寶劍。致其一於張華。且言曰。自葛盧發金。蚩尤造始。竭楚鐵之利。涸齊金之美。淬以清波。斂之越砥。曄若流星。湛如照水。斯乃羊頭精利。水心靈秘。

七彩九華之飾。龜文龍藻之麗。陽文陰縵之奇。紫電白虹之異。雖曰一人之敵。且應八方之氣。故三賢所以受賜。而君子所以自衛也。茂先見之。矍然而驚曰。此蓋邪谿之粹。赤堇之精。傾秦去吳之異。五山六合之英。純鉤湛盧之器。豪曹巨闕之名。掩三鄉而擅價。敵千戶以騰聲。定光既聞於太甲。照膽仍傳於武丁。兵動則飛。月蝕而成。顧此神物。終當合并。然則薛燭之鑿。歐冶之作。桃氏靡差於廣狹。質氏尤工於灑削。越女擊猿之妙。苜子試人之虐。至於採牛頭之鐵。獲汲郡之銅。利能切玉。鳴聞荆鐘。既鎮山而沈水。亦斷犀而截鴻。佩北斗之寒星。伐南山之茂松。詠宋玉之詞。倚於天外。登王喬之墓。

停在空中。亦有改此曼纓鑄爲農器。或刻漢平之名。或鑄魏武之字。莊子之說趙文。張陵之呵梁冀。七見蘭子之弄。六聞衛綰之賜。不可躍大冶而自銜。唯宜絕重甲而稱利。寒暑兼華。堅柔異制。斯希代之神兵。佩服之巨麗也。於是并華陰之士。遺之而爲詩曰。赤霄與步光。辟閭兼墨陽。楚子問風胡。吳國得干將。嬴秦佩鹿盧。虎邱葬魚腸。陸賈百金重。高皇三尺長。魏傳飛景制。漢應大橫祥。佩牛化已遠。守路德彌臧。及寢嘗貽怒。倚戶舊傳方。白帝號大澤。朱雲請尙方。虞公求不已。宣帝意難忘。雷煥繼而和之曰。季札嘗心許。楊修曾見思。昭王投五岳。夏帝藏會稽。穫稻寧同颺。鑿履詎如錐。白首嘗被

指。血流俄見揮。朱虛一何壯。項莊徒爾爲。鑠身有所就。代形那可追。屬鏤旣受賜。杜郵方見貽。雋生佩櫪具。韓卒得棠谿。騎士徒蒙賜。黑卵竟無虧。刻舟愚已甚。斬蛟勇可奇。新都椎美玉。馮石受文犀。雷公爲發鼓。豐隆方奮椎。萬辟雖云就。千金持贈誰。張華見之。懣然心伏。繹精理之沉邃。翫驚采之繁縟。客有挹此餘風。過乎三復。千載神交。敢揚末曲。乃系之而爲歌曰。管涔輝五色。周官列三制。已服甘蔗工。俄驚水精墜。隴西專斷割。河內增獻歎。周瑜嘗秉持。陶君方鍛冶。已荷孟嘗恩。復感方諸賜。延平終化去。武庫俄焚弃。聊此續陽春。顧

慙妍唱麗。

見事類賦

固安文獻志卷四目錄

耆舊事彙

宋

張太守穆之

梁

張衛尉弘策

祀鄉賢

張侍中緬

張衛尉長子

張簡憲纘

上張衛尉第三子

固安文獻志卷四

天津徐世昌鑒定

縣人賈廷琳謹編

耆舊事彙

宋

張太守穆之

唐姚思廉梁書皇后傳太祖獻皇后張氏諱尙柔范陽方城人也。祖次惠。宋濮陽太守。父穆之。字思靜。晉司空華六世孫。曾祖興。坐華誅徙興古。未至召還。及過江。為丞相掾。太子舍人。穆之少方雅。有識鑒。宋元嘉中。為員外散騎侍郎。與吏部尚書江湛。太子左率袁淑。境淑薦之於始興王濬。濬深引納焉。穆之鑒其

禍萌。思違其難。言於湛。求外出。湛將用爲東縣。固乞遠郡。久之得爲寧遠將軍。交阯太守。治有異績。會刺史死。交土大亂。穆之威懷循拊。內善以寧。宋文帝聞之嘉焉。將以爲交州刺史。會病卒。子弘籍。字眞藝。齊初爲鎮西參軍。卒於官。高祖踐阼。追贈穆之光祿大夫。加金章。又詔曰。亡舅齊鎮西參軍。素風雅猷。夙肩名輩。降年不永。早世潛輝。朕少離苦辛。情地彌切。雖宅相克成。輅車靡贈。興言永往。觸目慟心。可追贈廷尉卿。弘籍無子。從父弟弘策。以第三子纘爲嗣。別有傳。

唐李百藥南史后妃傳。梁文獻張皇后。諱尙柔。范陽方城人也。父穆之。字思靜。晉司空華六世孫也。少方雅有識鑒。初爲員外

散騎侍郎。深被始興王濬引納。穆之鑒其禍萌。求爲交阯太守。政有異績。宋文帝將以爲交州刺史。會病卒。子弘籍。字眞藝。齊初爲鎮西參軍。卒於官。梁武踐祚。追贈穆之光祿大夫。加金章紫綬。贈弘籍廷尉卿。弘籍無子。從父弟弘策以子纘嗣。別有傳。

梁

張衛尉弘策

梁書張弘策本傳。張弘策。字眞簡。范陽方城人。文獻皇后之從父弟也。幼以孝聞。母嘗有疾。五日不食。弘策亦不食。母彊爲進粥。乃食。母所餘。遭母憂。三年不食鹽菜。幾至滅性。兄弟友愛。不忍暫離。雖各有室。常同臥起。世比之姜肱兄弟。起家齊邵陵王

國常侍。遷奉朝請。西中郎。江夏王行參軍。弘策與高祖年相輩。幼見親狎。恒隨高祖遊處。每入室。常覺有雲煙氣。體輒蕭然。弘策由此特敬高祖。建武末。弘策從高祖宿。酒酣。徒席星下。語及時事。弘策因問高祖曰。緯象云何。國家故當無恙。高祖曰。其可言乎。弘策因曰。請言其兆。高祖曰。漢北有失地氣。浙東有急兵祥。今冬初魏必動。若動則亡漢北。帝今久疾多異議。萬一伺釁。稽部且乘機而作。是亦無成。徒自驅除耳。明年都邑有亂。死人過於亂麻。齊之曆數。自茲亡矣。梁楚漢當有英雄興。弘策曰。英雄今何在。爲已富貴。爲在草茅。高祖笑曰。光武有云。安知非僕。弘策起曰。今夜之言。是天意也。請定君臣之分。高祖曰。舅欲效

鄧晨乎。是冬魏軍寇新野。高祖將兵爲援。且受密旨。仍代曹虎爲雍州。弘策聞之心喜。謂高祖曰。夜中之言。獨當驗矣。高祖笑曰。且勿多言。弘策從高祖西行。仍參帷幄。身親勞役。不憚辛苦。五年秋。明帝崩。遺詔以高祖爲雍州刺史。乃表弘策爲錄事參軍。帶襄陽令。高祖觀海內方亂。有匡濟之心。密爲儲備。謀猷所及。惟弘策而已。時長沙宣武王罷益州還。仍爲西中郎長史。行郢州事。高祖使弘策到郢。陳計於宣武王。語在高祖紀。弘策因說王曰。昔周室旣衰。諸侯力爭。齊桓蓋中人耳。遂能一匡九合。民到於今稱之。齊德告微。四海方亂。蒼生之命。會應有主。以郢州居中流之要。雍部有戎馬之饒。卿兄弟英武。當今無敵。虎據

兩州參分天下。糾合義兵。爲百姓請命。廢昏立明。易於反掌。如此則桓文之業可成。不世之功可建。無爲豎子所欺。取笑身後。雍州揣之已熟。願善圖之。王頗不懌。而無以拒也。義師將起。高祖夜召弘策。呂僧珍入宅定議。且乃發兵。以弘策爲輔國將軍。軍主領萬人。督後部軍事。西臺建。爲步兵校尉。遷車騎諮議參軍。及郢城平。蕭穎達。楊公則。諸將皆欲頓軍夏口。高祖以爲宜乘勢長驅。直指京邑。以計語弘策。弘策與高祖意合。又訪寧遠將軍庾域。域又同。乃命衆軍即日上道。緣江至建康。凡磯浦村落。軍行宿次。立頓處所。弘策逆爲圖測。皆在目中。義師至新林。王茂曹景宗等於大航方戰。高祖遣弘策持節勞勉。衆咸奮厲。

是日仍破朱雀軍。高祖入頓石頭城。弘策屯門禁衛。引接士類。多全免。城平。高祖遣弘策與呂僧珍先入清宮。封檢府庫。於時城內珍寶委積。弘策申勒部曲。秋毫無犯。遷衛尉卿。加給事中。天監初。加散騎常侍。洮陽縣侯。邑二千二百戶。弘策盡忠奉上。知無不爲。交友故舊。隨才薦拔。搢紳皆趨焉。時東昏餘黨。初逢赦令。多未自安。數百人因運荻炬。束仗得入。南北掖作亂。燒神獸門。總章觀。前軍司馬呂僧珍直殿內。以宿衛兵拒破之。盜分入衛尉府。弘策方救火。盜潛後害之。時年四十七。高祖深慟惜焉。給第一區。衣一襲。錢十萬。布百疋。蠟二百斤。詔曰。亡從舅衛尉。慮發所忽。殞身祆豎。其情理清貞。器識淹濟。自藩升朝。契闊

夷阻。加外氏凋衰。饗嘗屢絕。興感渭陽。情寄斯在。方賴忠勳。翼
宣寡薄。報効無徵。永言增慟。可贈散騎常侍車騎將軍。給鼓吹
一部。諡曰愍。弘策爲人。寬厚通率。篤舊故。及居隆重。不以貴勢
自高。故人賓客。禮接如布衣時。祿賜皆散之親友。及其遇害。莫
不痛惜焉。子緬嗣。別有傳。

〔南史張弘策本傳〕張弘策。字眞簡。范陽方城人。梁文獻皇后之
從父弟也。父安之。青州主簿。南蠻行參軍。弘策幼以孝聞。母嘗
有疾。五日不食。弘策亦不食。母彊爲進粥。弘策乃食。母所餘。遭
母憂。三年不食鹽菜。幾至滅性。兄弟友愛。不忍暫離。雖各有室。
常同臥起。世比之姜肱兄弟。弘策與梁武帝年相輩。幼見親狎。

恒隨帝游處。每入室。常覺有雲氣。體輒蕭然。弘策由此特加敬
異。建武末。與兄弘胄從武帝宿。酒酣。移席星下。語及時事。帝曰。
天下方亂。舅知之乎。冬下魏軍方動。則亡漢北。王敬則猜嫌已
久。當乘間而作。弘策曰。敬則張兩赤眼。容能立事。帝曰。敬則庸
才。爲天下唱先爾。主上運祚。盡於來年。國權當歸江劉。而江甚
隘。劉又闇弱。都下當大亂。死人如亂麻。齊之曆數。自茲亡矣。梁
楚漢當有英雄興。弘策曰。瞻烏爰止。于誰之屋。帝笑曰。光武所
云。安知非僕。弘策起曰。今夜之言。是天意也。請定君臣之分。帝
曰。舅欲數鄧晨乎。是冬魏軍攻新野。齊明帝密詔武帝代曹武

武本虎字以
避唐諱而改

監雍州事。弘策聞之心喜。謂帝曰。夜中言當驗。帝笑。

曰。且勿多言。弘策從帝西行。仍參帷幄。身親勞役。不憚辛苦。齊明帝崩。遺詔以帝爲雍州刺史。乃表弘策爲錄事參軍。帶襄陽令。帝觀海內方亂。有匡濟之心。密爲儲備。謀猷所及。唯弘策而已。時帝長兄懿罷益州還。爲西中郎長史。行郢州事。帝使弘策到郢。陳計於懿。曰。昔晉惠庸主。諸王爭權。遂內難九興。外寇三作。方今喪亂。有甚於此。六貴爭權。人握王憲。制主畫敕。各欲專成。且嗣主在宮。本無令譽。媒近左右。蜂目忍人。一居萬機。恣其所欲。豈肯虛坐主諾。委政朝臣。積相嫌貳。必大誅戮。始安欲爲趙倫。形迹已露。蹇人上天。信無此理。且性甚猜狹。徒取禍機。所可當軸。江劉而已。所怯而無斷。暄弱而不才。折鼎覆餗。跣踵可

待。蕭坦胸懷猜忌。動言相傷。徐孝嗣才非柱石。聽人穿鼻。若隙開。釁起。必中外土崩。今得外藩。幸圖身計。及今猜防未生。宜召諸弟。以時聚集。郢州控帶荆湘。西注漢沔。雍州士馬。呼吸數萬。時安則竭誠本朝。時亂則爲國翦暴。如不早圖。悔無及也。懿聞之。變色。心未之許。及懿遇禍。帝將起兵。夜召弘策。呂僧珍入定議。旦乃發兵。以弘策爲輔國將軍。主領萬人。督後部事。及郢城平。蕭穎達。楊公則。諸將皆欲頓軍夏口。帝以爲宜乘勢長驅。直指建鄴。弘策與帝意合。又訪寧朔將軍庾域。域又同。即日上道。凡磯浦村落。軍行宿次。立頓處所。弘策預爲圖。皆在目中。城平。帝遣弘策與呂僧珍先往清宮。封檢府庫。于時城內珍寶委積。

弘策申勅部曲。秋毫無犯。遷衛尉卿。加給事中。天監初。加散騎常侍。封洮陽縣侯。弘策盡忠奉上。知無不爲。交友故舊。隨才薦拔。縉紳皆趨焉。時東昏餘黨孫文明等。初逢赦令。多未自安。文明又嘗夢乘馬至雲龍門。心惑其夢。遂作亂。帥數百人。因運荻炬束仗。得入南北掖門。至夜燒神獸門。總章觀。入衛尉府。弘策踰垣匿于龍廡。遇賊見害。賊又進燒尚書省。及閣道雲龍門。前軍司馬呂僧珍直殿省。帥羽林兵。邀擊。不能卻。上戎服御前殿。謂僧珍曰。賊夜來是衆少。曉則走矣。命打五鼓。賊謂已曉。乃散。官軍捕文明斬於東市。張氏親屬鬻食之。帝哭之慟。曰。痛哉衛尉。天下事當復與誰論。詔贈車騎將軍。諡曰閔侯。弘策爲人寬

厚通率。篤舊故。及居隆重。不以貴地自高。故人賓客。接之如布衣。祿賜皆散之親友。及遇害。莫不痛惜焉。子緬嗣。

論曰。張弘策醇厚慎密。首預帝圖。其位遇之隆。豈徒外戚云爾。梁書武帝紀建武三年。以高祖行雍州府事。東昏即位。揚州刺史始安王遙光。尚書令徐孝嗣。尚書右僕射江祐。右將軍蕭坦之。侍中江祀。衛尉劉暄。更直內省。分日帖敕。高祖聞之。謂從舅張弘策曰。政出多門。亂其階矣。詩云。一國三公。吾誰適從。况今有六。而可得乎。嫌隙若成。方相誅滅。當今避禍。惟有此地。勤行仁義。可坐作西伯。但諸弟在都。恐罹世患。須與益州圖之耳。時高祖長兄懿罷益州還。仍行郢州事。乃使弘策詣郢。陳計於懿。

以下云云與南史略同不具錄

懿聞之變色。心弗之許。弘策還。

又先是東昏以劉山陽爲巴陵太守。配精兵三千。使過荊州。就行事蕭穎胄。以襲襄陽。高祖知其謀。乃遣參軍王天獸

當依通鑑作天虎因

避唐諱改

詣江陵。遍與州府書。及山陽西上。高祖謂諸將曰。我能使

山陽至荆便授首。諸君試觀何如。及山陽至巴陵。高祖復令天獸賫書與穎胄兄弟。去後謂張弘策曰。夫用兵之道。攻心爲上。攻城次之。心戰爲上。兵戰次之。近遣天獸往州府。人皆有書。今段檠驛甚急。止有兩封與行事兄弟。云天獸口具。及問天獸而口無所說。行事不得相聞。不容妄有所道。天獸是行事心膂。彼聞必謂行事與天獸共隱其事。則人人生疑。山陽惑於衆口。判

相嫌貳。則行事進退無以自明。必漏吾謀。是馳兩空函定一州矣。山陽至江安。果疑不上。穎胄乃斬天獸。送首山陽。山陽信之。將數十人馳入穎胄伏甲斬之。送首高祖。

又竟陵太守曹景宗勸高祖迎南康王都襄陽。待正尊號。然後進軍。高祖不從。王茂又私於張弘策曰。我奉事節下。義無進退。然今者以南康置人手中。彼便挾天子以令諸侯。而節下前去。爲人所使。此豈歲寒之計。弘策言之。高祖曰。若使前途大事不捷。故自蘭艾同焚。若功業克建。威讐四海。豈是碌碌受人處分。待至石城。當面曉王茂曹景宗也。

又天監元年五月乙亥夜。盜入南北掖。燒神獸

當依通鑑作虎門總章觀

害衛尉卿張弘策。

又庾域傳郢城平。域及張弘策議。與高祖意合。即命衆軍便下。又呂僧珍傳義兵起。高祖夜召僧珍及張弘策定議。明日乃會衆發兵。建業城平。高祖命僧珍率所領先入清宮。與張弘策封檢府庫。

又張惠紹傳時東昏餘黨數百人。竊入南北掖門。燒神獸門。害衛尉張弘策。惠紹馳率所領赴戰。斬首數十級。賊乃散走。按廷魏

書蕭衍傳云。衍遣冠軍張惠紹率衆屯糧於鍾離。統軍王足劉思祖邀擊大破之。生擒惠紹。惠紹衍舅子也。攷梁書惠紹本傳。乃義陽人。與張衛尉實非同族。魏收撰魏書。謂爲武帝舅子。當係遠道傳聞之訛。今不取。

又王茂傳高祖義師起。茂私於張弘策。勸高祖迎和帝。高祖以

爲不然。語在高祖紀。

又何遠傳遠聚衆欲迎高祖義師。刺史王肅遣兵援送。得達高祖。高祖見遠。謂張弘策曰。何遠美丈夫。而能破家報舊德。未易人也。板輔國將軍。

宋司馬光通鑑雍州刺史蕭衍密與張弘策修武備。它人皆不得預謀。招聚驍勇以萬數。多伐材竹。沈之檀溪。積茅如岡阜。皆不之用。中兵參軍東平呂僧珍覺其意。亦私具槽數百張。

又東昏賜蕭懿藥於省中。懿且死。曰。家弟衍在雍。深爲朝廷憂之。衍聞之。夜召張弘策呂僧珍長史王茂別駕柳慶遠功曹吉士瞻等入宅定議。

又衍使張弘策先入清宮。封府庫及圖籍。于時城內珍寶委積。弘策禁勒部曲。秋毫無犯。收潘妃及嬖臣茹法珍梅蟲兒王咄之等四十一人。皆屬吏。

張侍中緬

梁書張緬本傳。張緬字元長。車騎將軍弘策子也。年數歲。外祖中山劉仲德異之。嘗曰。此兒非常器。爲張氏寶也。齊永元末。義師起。弘策從高祖入伐。留緬襄陽。年始十歲。每聞軍有勝負。憂喜形於顏色。天監元年。弘策任衛尉卿。爲妖賊所害。緬痛父之酷。喪過於禮。高祖遣戒喻之。服闋。襲洮陽縣侯。召補國子生。起家秘書郎。出爲淮南太守。時年十八。高祖疑其年少。未閑吏事。

乃遣主書封取郡曹文案。見其斷決允愜。甚稱賞之。還除太子舍人。雲麾外兵參軍。緬少勤學。自課讀書。手不輟卷。尤明後漢及晉代衆家。客有執卷質緬者。隨問便對。略無遺失。殿中郎缺。高祖謂徐勉曰。此曹舊用文學。且居鵷行之首。宜詳擇其人。勉舉緬充選。頃之出爲武陵太守。還拜太子洗馬中舍人。緬母劉氏。以父沒家貧。葬禮有闕。遂終身不居正室。不隨子入官府。緬在郡。所得祿俸。不敢用。乃至妻子不易衣裳。及還都。竝供其母。振贍親屬。雖累載所畜。一朝隨盡。緬私室常闕然。如貧素者。累遷北中郎諮議參軍。寧遠長史。出爲豫章內史。緬爲政任恩惠。不設鈎距。吏人化其德。亦不敢欺。故老咸云。數十年未之有也。

大通元年徵為司徒左長史。以疾不拜。改為太子中庶子。領羽林監。俄遷御史中丞。坐收捕人與外國使鬪。左降黃門郎。兼領先職。俄復為真。緬居憲司。推緹無所顧望。號為勁直。高祖乃遣畫工圖其形於臺省。以勵當官。中大通三年。遷侍中。未拜卒。時年四十二。詔贈侍中。加貞威將軍。侯如故。賻錢五萬。布五十匹。高祖舉哀。昭明太子亦往臨哭。與緬弟纘書曰。賢兄學業該通。莅事明敏。雖倚相之讀墳典。邳穀之敦詩書。惟今望古。蔑以斯過。自列宮朝。二紀將及。義惟僚屬。情實親友。文筵講席。朝遊夕宴。何曾不同。茲勝賞共。此言寄如何。長謝奄然不追。且年甫強仕。方申才力。摧苗落穎。彌可傷惋。念天倫素睦。一旦相失。如何

可言。言及增哽。擘筆無次。緬性愛墳籍。聚書至萬餘卷。抄後漢晉書衆家異同。為後漢紀四十卷。晉抄三十卷。又抄江左集未及成。文集五卷。子傳嗣。汲古閣本傳作傳

南史張緬附傳。緬字元長。年數歲。外祖中山劉仲德異之曰。此兒非常器。非止為張氏寶。方為海內令名也。齊永元末。兵起。弘策從武帝向都。留緬襄陽。年始十歲。每聞軍有勝負。憂喜形於顏色。及弘策遇害。緬喪過于禮。武帝每遣喻之。服闋。襲封洮陽縣侯。起家秘書郎。出為淮南太守。時年十八。武帝疑其年少。未閑吏事。遣主書封取郡曹文案。見其斷決允愜。甚稱賞之。再遷雲麾外兵參軍。緬少勤學。自課讀書。手不輟卷。有質疑者。隨問

便對略無遺失。殿中郎缺。帝謂徐勉曰。此曹舊用文學。且雁行之首。宜詳擇其人。勉舉緬充選。頃之。爲武陵太守。還拜太子洗馬中舍人。緬母劉氏。以父沒家貧。葬禮有闕。遂終身不居正室。不隨子入官府。緬在郡。所得俸祿不敢用。至乃妻子不易衣裳。及還都。竝供之母。振遺親屬。雖累載所蓄。一朝隨盡。緬私室常閭然。如貧素者。累遷豫章內史。緬爲政。任恩惠。不設鉤距吏人化其德。亦不敢欺。故老咸云。數十年未有也。後爲御史中丞。坐收捕人與外國使鬪。左降黃門兼領先職。俄復舊任。緬居憲司。推繩無所顧望。號爲勁直。武帝乃遣圖其形於臺省。以勵當官。遷侍中。未拜卒。詔便舉哀。昭明太子亦往臨哭。緬抄後漢晉書。

抄三十卷。又抄江左集未及成。文集三卷。緬弟纘。

梁書王規傳。除中書黃門侍郎。敕與陳郡殷鈞當依何史作雲琅邪王錫。

范陽張緬。同侍東宮。俱爲昭明太子所禮。

唐李百藥北齊書宋顯傳。顯從祖弟繪。少勤學。多所博覽。好撰述。魏時張緬晉書未入國。繪依准裴松之注國志體。注王隱及中興書。

張侍中遺著 今存書一首

答釋法雲書難范縝神滅論

按法雲俗姓周義興陽羨人住莊嚴寺梁天監中爲光禪寺大僧正

尋二世炳然。二果昭著。安可惑六塵而不曉。迷五塗而長沒。以爲形謝身滅。骸亡識朽。此外道之邪見。豈可御瞿曇之正法。所

謂輕塵一旅。敵堂堂之鋒。輒馳駑駘。與騏驥而並行。恐長劫有盡。領蟲方至。一身死壞。復受一身。精神無異。人畜隨緣。涅槃明文。瑞應高說。主上聖照幽深。鏡察潭遠。譬兩祭而知不滅。喻妄作於背親。義隨八引而舛入。言比性道而難聞。弟子少遊弱水。受戒樊鄧師。白馬寺期法師。屢爲設生死之深趣。亟說精神之妙言。尔來歸心。絕此疑想。復覩斯判。益破魔徒。非但聞觀於今。方欲結緣於後。徒知歸信。闇比求名。猥惠沾示。深承眷篤。弟子張緬和南。

右見梁釋僧祐弘明集十

附錄

梁陸倕爲張侍中謝啓。陳力就列。不能者止。實欲強飯據鞍。自窮心力。濡足磨頂。少報洪私。徒課虛無。空延鐘箭。不悟爰降曲慈。復叨清顯。職司近切。任掌總綸。魏選異才。漢求高德。官次恪居。鮮非民譽。仰瞻內省。無一可階。見藝文類聚

又爲張纘謝兄尙書諡靖子表。亡兄夙構皇慈。早邀靈慶。立言著績。未酌天寵。門衰祚寡。遽辭昌運。拊心摧恨。私懷罔極。日月告時。幽埏浸遠。王人猥集。佳册光臨。榮溢里庭。恩沈松

櫃 見同上

張簡憲纘 上

梁書張纘附傳。纘字伯緒。緬第三弟也。出後從伯弘籍。弘籍高

祖舅也。梁初贈廷尉卿。纘年十一。尚高祖第四女富陽公主。拜駙馬都尉。封利亭侯。召補國子生。起家祕書郎。時年十七。身長七尺四寸。眉目疏朗。神采爽發。高祖異之。嘗曰。張壯武云。後八葉有逮吾者。其此子乎。纘好學。兄緬有書萬餘卷。晝夜披讀。殆不輟手。祕書郎有四員。宋齊以來。爲甲族起家之選。待次入補。其居職例數。十百日便遷任。纘固求不徙。欲遍觀閣內圖籍。嘗執四部書。日日若讀此畢。乃可言優仕矣。如此數載。方遷太子舍人。轉洗馬中舍人。竝掌管記。纘與琅邪王錫齊名。普通初。魏遣彭城人劉善明詣京師請和。求識纘。纘時年二十三。善明見而嗟服。累遷太尉諮議參軍。尚書吏部郎。俄爲長史。兼侍中。時

人以爲早達。河東裴子野曰。張吏部在喉舌之任。已恨其晚矣。子野性曠達。自云年出三十。不復詣人。初未與纘遇。便虛相推重。因爲亡年之交。大通元年。出爲寧遠華容公長史。行琅邪彭城二郡國事。二年。仍遷華容公北中郎長史。南蘭陵太守。加貞威將軍。行府州事。三年。入爲度支尚書。母憂去職。服闋。出爲吳興太守。纘治郡省煩苛。務清靜。民吏便之。大同二年。徵爲吏部尚書。纘居選。其後門寒素。有一介皆見引拔。不爲貴要屈意人。士翕然稱之。五年。高祖手詔曰。纘外氏英華。朝中領袖。司空以後。名冠范陽。可尚書僕射。初。纘與參掌何敬容意趣不協。敬容居權軸。賓客輻輳。有過詣纘者。輒距不前。曰。吾不能對何敬容。

殘客。及是遷。爲表曰。自出守股肱。入尸衡矢。可以仰首伸眉。論列是非者矣。而寸衿所滯。近蔽耳目。深淺清濁。豈有能預。加以矯心飾貌。酷非所閑。不喜俗人。與之共事。此言以指敬容也。纘在職。議南郊御祭素輦。適古今之衷。又議印綬官備朝服宜並著綬。時並施行。九年。遷宣惠將軍。丹陽尹。未拜。改爲使持節都督湘桂東寧三州諸軍事。湘州刺史。述職經途。乃作南征賦。另賦下見。纘至州。停遣十郡尉勞。解放老疾吏役。及關市戍邏先所防人。一皆省併。州界零陵衡陽等郡。有莫徭蠻者。依山險爲居。歷政不賓服。因此向化。益陽縣人作田二頃。皆異畝同穎。纘在政四年。流人自歸。戶口增益十餘萬。州境大安。太清二年。徵爲領

軍。俄改授使持節都督雍梁北秦東益郢州之竟陵司州之隨郡諸軍事。平北將軍寧蠻校尉。纘初聞邵陵王綸當代已爲湘州。其後更用河東王譽。纘素輕少王。州府候迎。及資待甚薄。譽深銜之。及至州。遂託疾不見纘。仍檢括州府庶事。留纘不遣。會聞侯景寇京師。譽節裝當下。援時荊州刺史湘東王赴援。軍次郢州武城。纘馳信報曰。河東已豎檣上水。將襲荊州。王信之。便回軍鎮荆湘。因構嫌隙。尋棄其部伍。單舸赴江陵。王即遣使責讓譽。索纘部下。既至。仍遣纘向襄陽。前刺史岳陽王譽推遷未去鎮。但以城西白馬寺處之。會聞賊陷京師。譽因不受代。州助防杜岸。給纘曰。觀岳陽殿下。必不容使君。使君素得物情。若走

入西山招聚義衆。遠近必當投集。又帥部下繼至。以此義舉無往不克。纘信之。與結盟約。因夜遁入山。岸反以告。營仍遣岸帥軍追纘。纘衆望岸軍大喜。謂是赴期。既至。卽執纘并其衆。竝俘送之。始被囚繫。尋又逼纘剃髮爲道人。其年營舉兵襲江陵。常載纘隨後。及軍退敗。行至澧水南。防守纘者慮追兵至。遂害之。棄尸而去。時年五十一。元帝承制贈纘侍中中衛將軍。開府儀同三司。謚簡憲公。纘有識鑒。自見元帝。便推誠委結。及元帝卽位。追思之。嘗爲詩。其序曰。簡憲之爲人也。不事王侯。負才任氣。見余則申旦達夕。不能已已。懷夫人之德。何日忘之。纘著鴻寶一百卷。文集二十卷。次子希字子顏。早知名。選尙太宗第九女。

海鹽公主。承聖初。官至黃門侍郎。

陳吏部尙書姚察曰。太清版蕩。親屬離貳。纘不能叶和藩岳。成溫陶之舉。苟懷私怨。構隙瀟湘。遂及禍於身。非由忠節。繼以江陵淪覆。寔萌於此。以纘之風格。卒爲梁之亂階。惜矣哉。

南史張纘附傳。纘字伯緒。出繼從伯弘籍。武帝舅也。梁初。贈廷尉卿。纘年十一。尙武帝第四女富陽公主。拜駙馬都尉。封利亭侯。召補國子生。起家祕書郎。時年十七。身長七尺四寸。眉目疏朗。神采爽發。武帝異之。嘗曰。張壯武。云後八世有逮吾者。其此子乎。纘好學。兄緬有書萬餘卷。晝夜披讀。殆不輟手。祕書郎四員。宋齊以來。爲甲族起家之選。待次入補。其居職例不數十日。

便遷任纘固求不徙。欲遍觀閣內書籍。帝執四部書目曰。君讀此畢。可言優仕矣。如此三載。方遷太子舍人。轉洗馬中舍人。竝掌管記。纘與琅邪王錫齊名。普通初。魏使彭城人劉善明通和。求識纘。與錫。纘時年三十三。按當依梁書列傳。善明見而嗟服。累遷尚書吏部郎。俄而長兼侍中。時人以為早達。河東裴子野曰。張吏部有喉膺之任。已恨其晚矣。子野性曠達。自云年出三十。不復詣人。初未與纘遇。便虛相推重。因為忘年之交。大通中。為吳興太守。居郡省煩苛。務清靜。人吏便之。大同二年。徵為吏部尚書。後門寒素一介者。皆見引拔。不為貴門屈意。人士翕然稱之。負其才氣。無所與讓。定襄侯祗無學術。頗有文性。與兄衡山

侯恭。俱為皇太子愛賞。時纘從兄謐。聿竝不學問。性又凡愚。恭祗嘗預東宮盛集。太子戲纘曰。丈人謐。聿皆何在。纘從容曰。纘有謐。聿亦殿下之衡定。太子色慙。或云。纘從兄聿及弼。愚短。湘東王在坐。問纘曰。丈人二從。聿弼。藝業何如。纘曰。下官從弟。雖竝無多。猶賢殿下之有衡定。舉坐愕然。其忤物如此。五年。武帝詔曰。纘外氏英華。朝中領袖。司空已後。名冠范陽。可尚書僕射。纘本寒門。以外戚顯重。高自擬倫。而詔有司空范陽之言。深用為狹。以朱异草詔與异不平。初。纘與參掌何敬容。意趨不協。敬容居權軸。賓客輻輳。有過詣纘。纘輒距不前。曰。吾不能對何敬容。殘客。及是遷。為讓表曰。自出守股肱。入居衡尺。可以仰首伸

眉論列是非者矣。而寸衿所滯。近蔽耳目。深淺清濁。豈有能預。加以矯心飾貌。酷非所閑。不喜俗人與之共事。此言以指敬容也。在職議南郊御乘素輦。適古今之衷。又議印綬官若備朝服。宜竝著綬時竝施行。改爲湘州刺史。述職經塗。作南征賦。初吳興吳規頗有才學。邵陵王綸引爲賓客。深相禮遇。及綸作牧。郢蕃。規隨從江夏。遇纘出之。湘鎮路經郢服。綸餞之南浦。纘見規在坐。意不能平。忽舉杯曰。吳規此酒慶汝得陪。今宴。規尋起還。其子翁孺見父不悅。問而知之。翁孺因氣結。爾夜便卒。規恨纘慟兒。憤哭兼至。信次之間。又致殞。規妻深痛夫子。翼日又亡。時人謂張纘一杯酒殺吳氏三人。其輕傲皆此類也。至州務公平。

遣十郡慰勞。解放老疾吏役。及關市戍邏先所防人。一皆省併。州界零陵衡陽等郡。有莫徭蠻者。依山險爲居。歷政不賓服。因此向化。益陽縣人作田二頃。皆異畝同穎。在政四年。流人自歸。戶口增十餘萬。州境大寧。晚頗好積聚。多寫圖書萬卷。有油二百斛。米四千石。佗物稱是。太清二年。徙授領軍。俄改雍州刺史。初聞邵陵王綸當代已爲湘州刺史。其後更用河東王譽。纘素輕少王。州府候迎。及資待甚薄。譽深銜之。及至州。譽遂託疾不見纘。仍檢括州府付度事。留纘不遣。會聞侯景寇建鄴。譽當下援。湘東王時鎮江陵。與纘有舊。纘將因之以斃譽兄弟。時湘東王與譽及信州刺史桂陽王慥。各率所領入援。臺下破。至江津。

固安文獻志
譽次江口。湘東王屆郢州之武城。屬侯景已請和。武帝詔罷援軍。譽自江口將旋湘鎮。欲待湘東至。謁督府方還州。纘乃貽湘東書曰。河東戴檣上水。欲襲江陵。岳陽在雍。共謀不逞。江陵遊軍主朱榮。又遣使報云。桂陽住此。欲應譽。譽湘東信之。乃鑿船。沈米斬纜而歸。至江陵。收慥殺之。荆湘因構嫌隙。纘尋棄其部。曲携其二女。單舸赴江陵。湘東遣使責讓譽。索纘部下。仍遣纘向雍州。前刺史岳陽王譽。推遷未去鎮。但以城西白馬寺處之。會聞賊陷臺城。譽因不受代。州助防杜岸給纘曰。觀岳陽不容使君。使君素得物情。若走入西山舉義。事無不濟。纘以爲然。因與岸兄弟盟。乃要雍州人席引等於西山聚衆。乃服婦人衣。乘

青布輿。與親信十餘人奔引等。杜岸馳告譽。譽令中兵參軍尹正等追討。纘以爲赴期。大喜。及至。竝禽之。纘懼不免。請爲沙門。

名法緒。

按通鑑作法纘

譽襲江陵。常載纘隨後。逼使爲檄。固辭以疾。及退

軍敗。行至澧水南。防守纘者。慮追兵至。遂害之。棄尸而去。元帝承制。贈開府儀同三司。謚簡憲公。元帝少時。纘便推誠委結。及帝即位。追思之。嘗爲詩序云。簡憲之爲人也。不事王侯。負才任氣。見余則申旦達夕。不能已已。懷夫人之德。何日忘之。纘著鴻寶一百卷。文集二十卷。初纘之往雍州。資產悉留江陵。性既貪婪。南中貲賄填積。及死。湘東王皆使收之。書二萬卷。竝撻還齊。珍寶財物悉付庫。以糲蜜之屬還其家。次子希。字子顏。早知名。

尚簡文第九女海鹽公主。承聖初位侍中。纘弟綰。

〔梁書武帝紀〕大同二年十二月丁酉。以駙馬都尉利亭侯張纘爲吏部尚書。五年春正月乙卯。以吏部尚書張纘爲尚書僕射。太清二年五月辛丑。以前湘州刺史張纘爲領軍將軍。

〔又元帝紀〕帝性不好聲色。頗有高名。與裴子野劉顯蕭子雲張纘及當時才秀爲布衣之交。

〔又王錫傳〕年十四舉清茂。除祕書郎。與范陽張伯緒齊名。俱爲太子舍人。時昭明尚幼。未與臣僚相接。高祖敕太子洗馬王錫。祕書郎張纘。親表英華。朝中髦俊。可以師友事之。普通初。魏使劉善明來聘。敕使中書舍人朱异接之。善明負其才氣。酒

酣謂异曰。王錫張纘。北間所聞。云何可見。异具啟。敕即使於南苑設宴。錫與張纘朱异四人而已。善明遍論經史。兼以嘲諷。錫纘隨方酬對。無所稽疑。未嘗訪彼一事。善明甚相歎揖。佗日謂异曰。一日見二賢。實副所期。不有君子。安能爲國。

〔又裴子野傳〕子野博極羣書。時吳平侯蕭勵。范陽張纘。每討論墳籍。咸折中於子野焉。

〔又劉之遴傳〕時鄱陽嗣王範。得班固所上漢書眞本。獻之東宮。皇太子令之遴與張纘到漑。陸襄等參校異同。

〔又陸雲公傳〕雲公先製太伯廟碑。吳興太守張纘罷郡經途。讀其文歎曰。今之蔡伯喈也。纘至都掌選。言之於高祖。召兼尚書

儀曹郎。

又河東王譽傳侯景寇京邑。譽率軍入援。時世祖軍于武城。新除雍州刺史張纘密報世祖曰。河東起兵。岳陽聚米。共爲不逞。將襲江陵。世祖甚懼。因步道閒還。

又蕭子範傳其年葬簡皇后。使與張纘俱製哀策文。太宗覽讀之曰。今葬禮雖闕。此文猶不減於舊。

唐姚思廉陳書江總傳總幼聰敏。有至性。及長。篤學有辭采。尙書僕射范陽張纘度支尙書琅邪王筠都官尙書南陽劉之遴。並高才碩學。總時年少有名。纘等雅相推重。爲忘年友。其爲通人所欽挹如此。

唐令狐德棻周書蕭贇傳太清二年。梁武帝以贇兄河東王譽爲湘州刺史。徙湘州刺史張纘爲雍州以代贇。纘恃其才望。志氣矜驕。輕贇少年。州府迎候有闕。贇深銜之。及至鎮。遂託疾不與纘相見。後聞侯景作亂。頗凌蹙纘。纘懼爲所擒。乃輕舟夜遁。將之雍部。復慮贇拒之。梁元帝時鎮江陵。與纘有舊。纘將因之以斃贇兄弟。會梁元帝與譽各率所領入援金陵。屬侯景已請和。譽自江口將旋湘鎮。纘時在江陵。乃貽元帝書曰。河東戴檣上水。欲襲江陵。岳陽在雍。共謀不逞。元帝信之。乃鑿船沈米。斬纘而歸。贇遣府司馬劉方貴領兵爲前軍。先與贇不協。令其子乞師於江陵。元帝乃厚資遣纘。若將述職。而密援方貴。纘次大

隄。樊城已陷。督擒方貴兄弟斬之。纘因進至州。督遷延不受代。乃以西城居纘。待之以禮。督以構其兄弟事始於纘。將密圖之。纘懼。請元帝召之。督留不遣。杜岸兄弟給纘曰。民觀岳陽殿下。勢不仰容。不如且往西山。以避此禍。使君既得物情。遠近必當歸集。以此義舉。事無不濟。纘深以爲然。因與岸等結盟誓。纘又要雍州人席引等於西山聚衆。纘乃服婦人衣。乘青布輿。與親信十餘人出奔。引等與杜岸馳告督。督令中兵參軍尹正。共岸等率兵追討。竝擒之。纘懼不免。因請爲沙門。督率衆二萬騎千匹伐江陵。會大雨暴至。衆頗離心。其夜遁歸襄陽。器械輜重多沒於澧水。初。督囚張纘於軍。至是先殺纘而後退焉。

又尹正傳。督莅雍州。正爲其府中兵參軍。擒張纘。獲杜岸。皆正之力。

陳書蕭濟傳。濟少好學。博通經史。尚書僕射范陽張纘。太常卿南陽劉之遴。並與濟討論。纘等莫能抗對。

又杜之偉傳。之偉年位甚卑。特以彊識俊才。頗有名當世。吏部尚書張纘。深知之。以爲廊廟器也。

宋司馬光通鑑考異。太清紀云。岳陽王督使張纘制文檄。纘曰。吾蒙朝廷不世之榮。又荷湘東王國士之眷。今日雖死。義無操筆。及軍敗。將殺之。纘曰。若使南師必振。北賊將亡。吾雖死無所恨。遂殺之。弃尸於江陵北湖。

宋黃朝英緗素雜記顏氏家訓云晉羊曼常顏縱任俠飯酒誕節兗州號爲齧伯此字更無音訓梁張纘呼爲嚙羹之嚙亦不知所出但耆老相傳世間又有齧齧語蓋無所不施無所不容之意也顧野王玉篇誤爲黑旁沓顧雖博物猶出張纘之下

固安文獻志卷五目錄

耆舊事彙

梁

張簡憲纘下

張僕射綰張衛尉第四子

隋

沙門靖嵩

固安文獻志卷五

天津徐世昌鑒定

縣人賈廷琳謹編

耆舊事彙

梁

張簡憲續下

張簡憲遺著 今存賦六首 表二首 書啟三首 墓誌銘二首 哀策文三首 詩四首

南征賦

歲次姬訾。月惟中呂。余謁帝於承明。將述職於南楚。忽中川而返顧。懷舊鄉而延佇。路漫漫以無端。情容容而莫與。乃弭節歎曰。人之寓於宇宙也。何異夫栖蝸之爭戰。附螭之游禽。而盈虛

倚伏俯仰浮沈矜榮華於尺景。總萬慮於寸陰。彼忘機於粹日。乃聖達之明箴。妙品物於貞觀。曾何足而繫心。撫余躬之末迹。屬興王之盛世。蒙三樂之休寵。荷通家之渥惠。登石渠之三閣。典校武英殿本作改文乎六藝。振長纓於承華。眷儲皇之上叡。居銜觴而接席。出方舟以同濟。彼華坊與禁苑。常宵盤而晝憩。思德音其在耳。若清塵之未逝。經二紀以及茲。悲明離之永翳。惟平生之編能。實有志於棲息。慙滅沒之千里。謝韓哀於八極。如蓑裘之代用。譬輪轅之曲直。愧周任之清規。諒無取於陳力。逢濯纓之嘉運。遇井汲之明時。懷君恩而未答。顧靈瑣而依遲。總端揆以居副。長庶僚而稱師。猶深泉之短綆。若高墉而無基。伊吾人之

罪薄。豈斯滿之能持。奉皇命以奏舉。方驅傳於衡疑。遵夕宿以言邁。戒晨裝而永辭。行搖搖於南逝。心眷眷而西悲。爾乃橫濟牽牛。傍瞻雉庫。前觀隱脈。却視雲布。追晉氏之啟戎。覆中州之鼎祚。鞠三川於茂草。霑兩京於朝露。故黃旗紫蓋。運在震方。金陵之兆。允符厥祥。及歸命之銜璧。爰獻璽於武王。啟中興之英主。宣十世而重光。觀其內招人望。外攘干紀。草創江南。締構基址。豈徒能布其德。主晉有祀。雲漢作詩。斯干見美而已哉。乃得正朔相承。於茲四代。多歷年所。二百餘載。割疆場於華戎。拯生靈於宇內。不被髮而左衽。繫明德其是賚。次臨滄之層巘。尋叔寶之舊堦。蘊珠玉之餘潤。昭羅綺之遺妍。懷若人之遠理。豈喜

愠其能遷。雖魂埋於百世。猶映澈於九泉。經法王之梵宇。觀因時之或躍。從四海之宅心。故取亂而誅虐。在蒼精之將季。翦洪柯以銷落。既觀蝎而逞刑。又施獸而爲誑。候高燹以巧笑。俟長星而懽噓。何慄慄之黔首。思假命其無託。信人欲而天從。爰物覩而聖作。我皇帝應籙受圖。聰明神武。堯豐而運。席卷三楚。師克在和。仁義必取。形猶積決。應若颺舉。於是殪桑林之封豨。繳青丘之大風。戢干戈以耀德。肆時夏而成功。放流聲於鄭衛。屏豔質於傾宮。配軒皇以邁迹。豈商周之比隆。化致升平。于茲四紀。六夷膜拜。八蠻同軌。教穆於上庠。寃申於大理。顯三光之照燭。降五靈之休祉。諒殊功於百王。固無得而稱矣。泝金牛之迅

渚。觀靈山之雄壯。實江南之丘墟。平雲霄而竦狀。標素嶺乎青壁。葺頰文於翠嶂。跳巨石以驚湍。批衝巖而駭浪。鏗千尋之峭岸。深萬流之大壑。隱日月以蔽虧。搏風煙而回薄。崖映川而晃朗。水騰光而倏爍。積霜霰之往還。鼓波濤之前卻。下流沫以洑險。上岑崑而將落。聞知命之是虞。故違風而靡託。訊會骸之詭狀。云怒特之來奔。及漁人之垂餌。沈潛鎖於洪源。鑒幽塗於忠武。馳四馬之高軒。不語神以徵怪。情存之而勿論。曬姑熟之舊朔。訪遺迹兮宣武。挾仲謀之雄氣。朝委裘而作輔。歷祖宗之明君。猶負芒於盛主。勢傾河以覆岱。威回天而震宇。雖明允之篤誠。在伊稷而未舉。矧有功而無志。豈季葉其能處。懼貽笑於文

景憂象賢之覆餗。雖苞蘖以代興。終夷宗而殄族。彼儋石之贏儲。尚邀之而俟福。况神明之大寶。乃闔干於天祿。造局鍵之候司。發傳書於關尉。據轅轅乎伊洛。守衡津於河渭。無矯且以招賓。闕捐繻而待貴。實祇敬於王典。懷鞠躬而屏氣。惟函谷之襟帶。疑武庫之精兵。採風謠於往昔。聞乳獸武英殿本作虎於甯成。在當今而簡易。止譏鑒其姦情。陋文仲之廢職。鄙彫門之食征。於是近睇赭岑。遙瞻鵲岸。島嶼蒼茫。風雲蕭散。屬時雨之新晴。觀百川之浩汭。水泓澄以闔夕。山參差而辨日。忽臨睨於故鄉。眇江天其無畔。溯洄流而右阻。遵長薄而左貫。獨向風以舒情。攀芳洲其誰翫。息銅山而繫纜。訪叔文之靈宇。得舊名而猶存。皆攢蕪

而積楚。想夫君之令問。實有聲於前古。拯巴漢之廢業。爰配名於鄒魯。辨山精以息訟。對祠星而寤主。每撫事以懷人。非末學其能覩。嘉梅根之孝女。尚藥肥於媵姬。嗟吳人之重辟。憂峻網於將貽。彼沈瓜而顯義。指滄波而為期。此浮履以明節。赴丹爛其何疑。信理感而情悼。實悽悵於余悲。空沈吟以遐想。愧邯鄲之妙詞。望南陵以寓目。美牙門之守志。當晉師之席卷。豈藩籬而不庇。攜老弱於窮城。猶區區乎一簣。雖挈瓶之小善。實君子之所識。句闕一是謂事人之禮。入雷池之長浦。想恭岱之芳塵。臨魚官以輟膳。踐寒蒲之抽筠。又有生為令德。沒為明神。或捐家事主。攜手拜親。或正身殉義。哀感市人。所以家稱純孝。國號能

臣揚清徽於上列。竝異世而爲隣。發曉渚而遡風。苦神吳之難習。岸躍舟而不進。水騰沙以驚急。天噎噎其垂陰。雨霏霏而來集。愍征夫之勞瘁。每褰帷而佇立。由江沔之派別。望彭滙之通津。塗未中乎及絳。日已盈於浹旬。於是千流共歸。萬嶺分狀。倒景懸高。浮天瀉壯。清江洗滌。平湖夷暢。翻光轉采。出沒搖漾。岷山嶓冢。悠遠寂寥。青溢赤岸。控汐引潮。望歸雲之蓊蓊。揚清風之飄飄。界飛流於翠薄。耿長虹於青霄。若夫灌莽川涯。層潭水府。游泳之所往還。喧鳴之所攢聚。羣飛沙漲。掩薄草渚。奇甲異鱗。雕文絳羽。聽寡鶴之偏鳴。聞孤鴻之慕侶。在客行而多思。獨傷魂而悽楚。美中流之衝要。因習坎以守固。旣因之而設險。又

居之而務德。南通珠崖夜郎。西款玉津華墨。莫不內清姦宄。外弭苛慝。籬屏京師。事有均於齊德也。眄匡嶺以躊躇。想霞裳於雲仞。流姮娥之逸響。發王子之清韻。若夜光而可投。豈榮華之難擯。羨還丹其何術。佇一丸於來信。徑遵途乎鄂渚。迹孫氏之霸基。陳利兵而蓄粟。抗十萬武英殿本作倍之銳師。在賢才之必用。寧推誠而忍欺。圖富強以法立。屬貞臣而日嬉。識徐基於江畔。云釣臺之舊址。方戰國之多虞。猶從容而宴喜。欽輔吳之忠諒。歎仲謀之虛己。處君臣而竝得。良致霸其有以。伊文侯之雅望。誠一代之偉人。彌觀書以心服。玉比德而譽均。遭時雄之應運。方協義以經綸。名旣逼而愈賞。言雖聞而彌親。惜勤王於延獻。俾漢

京之惟新。何天命其弗與。悲盛業之未申。汎蘆洲以延佇。聞伍員之所濟。出懷珠而免讐。歸投金以答惠。彼無求於萬鍾。唯長歌而鼓柁。慨斯誠之未感。乃沈軀以明誓。空負恨其何追。徒臨殮而先祭。及旋師於鄭國。美邀福於來裔。入郢都而抵掌。壯天險之難窺。允分荆之勝略。成百代之良規。賈生方於指大。應侯譬之木披。所以居宗振末。強本弱枝。聞古今之通制。歷盛衰而不移。可不謂然與。美經國之遠體也。酌忠言於城郢。播終古之芳猷。忘我躬之匪閱。顧社稷而懷憂。服莊王之高義。乃徵名於夏州。恥蹊田之過罰。納申叔之嘉謀。觀巫臣之獻箴。鑒周書以明喻。何自謀其多僻。要桑中而遠赴。若葆申之誅丹。實匡君以

成務。在兩臣而優劣。居二主其竝裕。臨赤崖而慷慨。摧雄圖於魏武。樂戰勝以長驅。志吞吳而并楚。總八州之毅卒。期姑蘇而振旅。時有便乎建瓴。事無留於蕭斧。霸孫赫其霆奮。仗萬俗之英輔。裂宇宙而三分。誠決機乎一舉。嗟立德之矯矯。思興復於舊京。招臥龍於當世。配管仲而稱英。收散亡之餘弱。結與國而連橫。延五紀乎岷漢。紹四百於炎精。望巴丘以邇回。遵洞庭而敞况。沈輕舟而不繫。何靈胥之浩蕩。眺君褊之雙峰。徒臨風以增想。償瑤觴而一酌。駕采蛻而獨往。爾乃南奠衡霍。北距沮漳。包括沅澧。汲引瀟湘。滂滂長邁。漫漫回翔。蕩雲沃日。吐霞含光。青碧潭嶼。萬頃澄澈。綺蘭從風。素沙被雪。雜雲霞以舒卷。閒河

洲而斷絕。回曉仄於中川。起長飈而半滅。稅遺構之舊浦。瞻汨羅以隕泗。豈懷寶而迷邦。猶殷勤而一致。蘊芳華以襲積。非黨人之所媚。合小雅之怨辭。兼國風之美志。譬彈冠而振衣。猶自別於泥滓。且殺身以成義。寧露才而揚己。悲先生之不辰。逢椒蘭之妒美。有驕驕而不馭。焉遑遑於千里。既踐境以思人。彌流連其無已。脩行潦之薄薦。敢憑誠於沼沚。謁黃陵而展敬。奠瑤席乎川湄。具蘭香以膏沐。懷椒精而要之。延帝子于三后。降夔龍於九疑。騰河靈之水駕。下太一之靈旗。撫安哥以會儷。疏緩節而依遲。日徘徊以將暮。情眇默而無辭。愠秦皇之川幸。尤土壤以加戮。昧天道之無親。勤望祀以祈福。將人怨而神怒。故飛

川而蕩谷。推冥理以歸譽。遂刊山而赭木。於是下車入部。班條理務。砥課庸薄。夕惕兢懼。存問長老。隱恤氓庶。奉宣皇恩。寬徭省賦。遠哉盛乎斯邦之舊也。有虞巡方以託終。夏后開圖而疏決。太伯讓嗣以來遊。臣祈仙而齊潔。固是明王之塵軌。聖賢之蹤轍也。若夫屈平懷沙之賦。賈子遊湘之篇。史遷摛文以投弔。揚雄反騷而沈川。其風謠雅什。又是詞人之所流連也。亦有仲寧咸德。仍世相繼。父子三台。緇衣改敝。古初抱於烈火。劉先高而忤世。蔣公琰之弘通。桓伯緒之匡濟。鄧克時之絕述。谷思恭之藻麗。實川嶽之精靈。常間出而無替也。至於殊庭之客。帝鄉之賢。神奔鬼化。吐吸雲煙。玉笥登之而卻老。金人植杖以尊

泉。蘇生騎龍而出入。處靜駕鹿以周旋。配北燭之神女。偶南榮之僮僮。時髣髴其遙見。亦往往而有焉。爾乃歷省府庭。周行街術。山川遠覽。邑居近悉。割黔中以置守。獻青陽而背質。鄒生所謂還舟。楚王於焉乘駟。巡高山之累仞。褒吳文之爲宰。彼非劉而八王。皆國士而身醢。在長沙而著令。經五葉其未改。知天道之福謙。勝一時之經始。尋太傅之故宅。今築室以安禪。邑無改於舊井。尙開流而洌。武英殿本作列泉。懷伊管之政術。遇庸臣而見遷。終被知於時主。嗟漢宗之得賢。受齊君之遠託。豈理謝而生全。哀懷王之不秀。遂抱恨而傷年。脩定祀于北郭。對林野而幽藹。庶無吐於馨香。祀瓊茅而沃醑。景十三以啟國。惟君王其能大。迨

炎正之中微。寔斯藩而是賴。顧四阜之紆餘。乍升高以遊目。審

山川之面帶。將取名爲

武英殿本作於

衡麓。下瀰漫以爽竦。

武英殿本作壇

上欽虧

而重複。風瑟瑟以鳴松。水琤琤而響谷。低四照於若華。疏千尋

於建木。冀躡塵之可屏。登巖阿而寤宿。捨域中之常戀。慕遊仙

之靈族。是時涼風暮節。萬寶西成。華池迥遠。飛閣淒明。嘉南州

之炎德。愛蘭蕙之秋榮。下名柑於曲榭。採芳菊於高城。樹羅軒

而竝列。竹被嶺而叢生。翫棲禽之夕返。送旅雁之晨征。悲去鄉

而遠客。寄覽物而娛情。惟傳車之所驚。實鷹揚其是掌。或解組

以立威。乍露服而加賞。遵聖主之恩刑。荷天地之厚德。沾河潤

於九壘。澤自家而刑國。闕小道之可觀。寧畏塗其易克。眄高衢

而願騁。憂取累於長纆。聞因石之非據。承炯戒乎明則。愧壽陵之
之餘子。學邯鄲而匍匐也。

右見梁書本傳又略見藝文類聚二十七

秋雨賦

震霖興乎爽節。膚寸起於曾岑。乃娛情而悅體。猶冬陽與夏陰。
塞南帷以寓目。傲北戶而披襟。商律戒於茲辰。涼雨感而已作。
甘泉集而溟溟。油雲興而漠漠。溫飈革於早暮。炎涼改於今昨。
乍斜檐而上階。或從風而灑幕。周小庭而密下。泣高枝而疎落。
淥池泛澹。員波儵鑠。低昂弱篠。葳蕤叢薄。

右見藝文類聚二

離別賦

并序

太常劉侯。前輩宿達。余在紈綺之歲。固已欽其風矣。及理棹江
干。攬涕還望。采蕭之詠。不覺成篇。

彼劉侯之矯矯。承世德之清輝。挺荆衡之箇籥。輝江漢之珠璣。
昔相知於一定。逾盛衰乎二紀。豈因媒以成親。非彈冠而來仕。
分自諧於金石。情冥合乎蘭芷。忘時輩之後先。略相知之年齒。
及胥遇於雲閣。又方駕而聯曹。宵擁衾而暗語。晝稅鞅以遊遨。
案方前而等食。衣共體而同袍。猶合歡之蠲忿。如來蘇之釋勞。
唯吾人之與子兮。諒不言其已召。在百代而奚殊。雖千年而同
調。寧風波之所移。豈流俗之能要。非高唱而云擬。逢下士而或

笑。隔願言於信次。尙眷眷而興懷。矧雲崖之遠訣。抱初學記離袖

而長乖。顧龍門而掩涕。瞻郢路而初學何借。在驚禽之屢初學

感。迫徂年之長初學暮。眺湘沅之分流。遵洞庭之永路。山峻高

而易隱。浦遑迴而難泝。猿啾啾而夜吟。鶻騷騷初學作風搔搔而曉度。撫

初學拊客子兮其初學無其字何心。能辭鄉兮初學與別故。其初學共抱荃蕙

之遺芳。共初學不離披於霜露。

右見藝文類聚三十又初學記十八

瓜賦

惟茲瓜之實茂。體太素之純精。翕玄潤於浮霄。含皇澤於夏庭。於是蒼春發歲。天地交和。乃啟沃壤。是殖是播。納佳種於畦畹。

應時運而剖牙。揮萌散孽。我葉負柯。莖茸鬱蒼。莽葶婆娑。晞慶雲以吐蕤。仰旭日之敷華。朝希重陽。夕承朗月。清露湛而宵降。翔風穆以晨發。振柯條之繞若。顧惠氣以滋悅。感靈化而網緼。觀佳實之並結。始懷徵而苦發。終感宮而甘通。信不和而自馨。與九鼎乎齊功。蔓草是藉。密葉是蔽。潛湫熟獨。墮莖落蒂。芬馥酷烈。氣暢雲際。申狄不能詳其味。隸首不能為之計。昔東陵之甘瓜。美顯名於中古。彼服閭之攸檐。乃衆仙之所睹。美人神之同好。何厥用之宏普。惟令實於無窮。永可殖於靈圃。

右見藝文類聚八十七

懷音賦 并序

西平劭陵王。以親賢近能。作蕃夏首。下走叨竊時命。驅傳湘羅。久託下風。素蒙淑顧。及塗經鄢郢。淹泊累旬。君王彈隨珠於千仞。乃貽之以麗則。詩云。懷我好音。敢爲懷音賦云爾。

伊宗周之令望。巡召南而述職。襟帶鄖夏之鄉。宣條江漢之域。服詩書於懷袖。抱仁義於胸臆。總九德以棲身。橫四溟而撫翼。循微躬之末迹。謬馳傳於衡嶷。由洞庭而左轉。指鄢醴而爲期。仰芳塵於夏汭。路將近而彌滋。棹陵波以遄務。舟望浦而倦遲。自清光之未覲。逾一紀以歷茲。敢憑情於往昔。逢君恩之未遺。陪桂苑之良遊。接蘭臺之高會。既醉酒以飽德。亦傾羞而緩帶。感平原之愛客。傷歧路之難留。戀西園之餘賞。泣南浦之徂舟。

結煩言於將贈。情有重乎琳球。顧龍門其不見。過夏首而西浮。申服義之未沫。長寄言於還郵。

右見藝文類聚三十一

妬婦賦

惟婦怨之無極。羌于何而弗有。或造端而構末。皆莠言之在口。常因情以起恨。每傳聲而妄受。乍隔帳而窺屏。或覘窗而瞰牖。若夫室怒小憾。反目私言。不忍細忿。皆成大冤。閨房之所隱私。牀第之所討論。咸一朝之發洩。滿四海之囂喧。忽有逆其妬鱗。犯其忌制。赴湯蹈火。瞋目攘袂。或棄產而焚家。或投兒而害婿。

右見藝文類聚三十五

讓吏部尚書表

漢革民曹。魏仍東掾。毛孝先以清公見美。盧子若魏盧欽字子若以

貞固任職。降及晉世。希觀其人。樂彥輔雍容自守。當時恨其寡

譽。山巨源意在拔奇。類聚作存賞拔不免與世浮沈。鄧攸牧馬家庭。何益

止。類聚作心聚競之操。下壺如含瓦石。類聚作如金丸在石未聞檢裁之功。

右見初學記十一又藝文類聚四十八

讓尚書僕射表

加以矯心飾貌。酷非所閑。不喜俗人。與之共事。雖復吐言如傷。屈體無骨。動容竊斧。猶成多憾。曾闡如闕。坐客恒滿。情態參差。世塗盈虛。蕙苴興謗。舍塵見猜。疑似難分。聖賢致惑。人之包藏。

山川非險。况在於臣。焉可證綜。

右見藝文類聚四十八又略見前梁書本傳

與陸雲公叔襄兄晏子書

都信至。承賢兄子賢弟黃門殞折。按雲公遷中書黃門郎太清元年卒年三十七非唯貴門

喪寶實。有識同悲。痛惋傷惜。不能已已。賢兄子賢弟神情早著。

標令弱年。經目所覩。殆無再問。懷橘抱柰。稟自天情。倨坐列薪。

非因外獎。學以聚之。則一箸能立。問以辯之。則師心獨寤。始踰

弱歲。辭藝通洽。升降多士。秀也。秀也句有脫誤詩流見與。齒過肩隨。禮殊

拜絕。拜絕按當作拜紀蓋用三國志陳羣傳為羣拜紀事也懷抱相得。忘其年歲。朝遊夕宴。一載

于斯。翫古披文。終晨訖暮。平生知舊。零落稍盡。老夫記意。其數

國安文獻志
幾何。至若此生。寧可多過。賞心樂事。所寄伊人。弟遷職瀟湘。維舟洛汭。將離之際。彌見情款。夕次帝郊。亟淹信宿。徘徊握手。忍分歧路。行役數年。羈病侵迫。識慮惛恍。久絕人世。憑几口授。素無其功。翰動若飛。彌有多愧。京洛遊故。成成雲雨。唯有此生。音塵數嗣。形迹之外。不爲遠近。隔情襟素之中。豈以風霜改節。客遊半紀。志切首丘。日望東歸。更敦昔款。如何此別。永成異世。揮袂之初。人誰自保。但恐衰謝。無復前期。不謂華齡。方春掩質。埋玉之恨。撫事多情。想引進之情。懷抱素篤。友于之至。兼深家寶。奄有此恤。當何可言。臨白增悲。言以無次。

右見梁書五十陸雲公傳

謝皇太子賚果然褥啟

伏以狐裘熊席。徒負舊名。玄豹青獐。未能適體。嚴冰在節。朔飈結宇。吹綸愧暖。挾纊慙溫。但勤非伏寢。恩重夜覆。道媿經明。坐叨重席。仰榮俯媿。進退在顏。

右見藝文類聚九十五

謝東宮賚園啟

性愛山泉。頗樂閑曠。雖復伏膺堯門。情存魏闕。至於一丘一壑。自謂出處無辨。常願卜居幽僻。屏避喧塵。傍山臨流。面郊負郭。依林結宇。憩桃李之夏陰。對徑開軒。采橘柚之秋實。而王畿陸海。畝號一金。涇渭土膏。豪傑所競。徒居好時。必待使越之裝。別

館河陽亦資牧荆之富。此園左帶平湖。修陂千頃。右臨長薄。清潭百仞。前逼逸陌。朝夕爽塏。後望鍾阜。表裏煙霞。每賸春迎夏。華卉競發。背秋向冬。雲物澄霽。歸瞰戶牖。不異登臨。升降堦墀。已窮歷覽。舟楫所屆。累日不能究其源。魚鳥之豐。山澤不能喻其美。

右見藝文類聚六十五

中書令蕭子顯墓誌

子顯字景暢。齊高帝之孫。豫章王嶷之子。好學工屬文。梁武帝愛其才。以為吏部尚書。吳興太守。

君狀貌丘墟。風神磊落。閒澹動于容止。英爽發于流盼。筆鋒席上。皆如素蓄。切問近思。見稱閑敏。帝嘗顧問。君曰。我撰通史。若成。衆史可廢。乃答詔曰。仲尼贊易道。黜八索。述職方。除九丘。聖

製符同。復在茲日。儲君毓德少陽。情協陳阮。□親妙思。式表玄石。

右見藝文類聚四十八

故左氏尚書忠子沈僧旻墓誌銘

左氏按當作左民。僧旻按當作僧旻。

漸東振古。龜組三襲。政若解繩。吏如燥濕。十陞龍管。四至九卿。居高首映。比德要明。

燥濕按當作燥濕。蓋用史記酷吏傳中操下如東濕新語也。

右見同上

丁貴嬪哀策文

葦塗既啟。桂樽虛凝。龍帷已薦。象服將升。皇帝傷璧臺之永閔。悼曾城之不踐。罷鄉歌乎燕樂。廢徹齊於祀典。風有采蘩。化行

南國爰命史臣。俾流嬪德。其辭曰。

軒緯之精。江漢之英。歸于君袂。生此離明。誕自厥初。時維載育。樞電繞郊。神光照屋。爰及待年。含章早穆。聲被洽陽。譽宣中谷。龍德在田。聿恭茲祀。陰化代終。王風攸始。動容諮式。出言顧史。宜其家人。刑于國紀。膺斯眷命。從此宅心。狄綴采珩。珮動雅音。日中思戒。月滿懷箴。如何不跲。天高照臨。玄統莫脩。禕章早缺。成物誰能。芳猷有烈。素魄貞明。紫宮照晰。逮下靡傷。思賢罔蔽。躬儉則節。昭事惟虔。金玉無玩。筐筥不捐。祥流德化。慶表親賢。甄昌軼啟。孕魯陶顏。嚴可均全燕方論婦教。明章闔席。玄池早扃。湘流已窅。展衣委華。朱幘寢迹。慕結儲闈。哀深藩辟。嗚呼哀哉。令

龜兆良葆。引遷祖具。僚次列承。華接武日。杳杳以羶春。風淒淒而結緒。去曾掖以依遲。飾新宮而延佇。嗚呼哀哉。啟丹旗之星旆。振容車之繡裳。擬靈金而鬱楚。泛悽管而凝傷。遺備物乎營寢。掩重闈於室皇。椒風暖兮猶昔。蘭殿幽而不陽。嗚呼哀哉。側闈高義。彤管有懌。道變虞風。功參唐迹。婉如之人。休光赤舄。施諸天地。而無朝夕。嗚呼哀哉。按丁貴嬪即梁昭明太子蕭統之母

右見梁書高祖丁貴嬪傳

擬若有人兮

若有人兮傍巖石。新蒲衣兮杜衡席。表幽居兮翠微上。臨春風兮聊騁望。日已暮兮夕雲飛。懷君王兮未能歸。

右見藝文類聚五十六

侍宴餞東陽太守蕭子雲詩

仲月發初陽。輕寒帶春序。淥池解餘凍。丹霞霽新雨。良守謁承明。徂舟戒蘭渚。皇儲惜將邁。金尊留宴醕。

右見藝文類聚二十九

大言應令詩

河流既竭。日月俱騰。置羅微物。動落雲鵬。

細言應令詩

遨游蟻目辨輕塵。蚊睫成宇虱如輪。

右見藝文類聚十九

附錄

梁簡文帝答張纘謝示集書。綱少好文章。於今二十五載矣。

竊嘗論之。日月參辰。火龍黼黻。尚且著於玄象。章乎人事。而

况文辭可止。詠歌可輟乎。不為壯夫。揚雄實小言破道。非謂

君子。曹植亦小辯破言。論之科刑。罪在不赦。至如春庭落景。

轉蕙承風。秋雨且初學記作朝晴。檐梧初下。浮雲生野。明月入樓。時

命親賓。乍動嚴駕。車渠屢酌。鸚鵡驟傾。伊昔三邊。久留四戰。

胡霧連天。征旗拂日。時聞塢笛。遙聽塞笳。或鄉思悽然。或雄

心憤薄。是以沈吟短翰。補綴庸音。寓目寫心。因事而作。見藝文類聚

又贈張纘詩。儀表咸推挹。墻仞難窺踐。既富垂帷學。復折波

濤辨全晉詩作辯綺思暖霞飛。清文煥騰轉。朱旗赫容與。雕梁紛曜

煜。波搖白鯉舟。風動蒼鷹舳。九疑勢參差。江天相蔽虧。三春

澧浦葉。九月洞庭枝。洞庭枝嬾娜。澧浦葉參差。芬芳與搖落。

俱應傷別離。見同上

梁庾肩吾侍宴餞湘州刺史張纘詩。洞庭資善政。層城送遠

離。九歌揚妙曲。八桂動芳枝。雨足飛春殿。雲峰入夏池。郢路

方遼遠。湘山轉蔽虧。何當好風日。極望長沙垂。見同上

張僕射綰

梁書張綰附傳。綰字孝卿。纘第四弟也。初為國子生。射策高第。起家長兼祕書郎。遷太子舍人。洗馬中舍人。並掌管記。累遷中

書郎。國子博士。出為北中郎長史。蘭陵太守。還除員外散騎常

侍。時丹陽尹西昌侯蕭深武英殿本作淵藻以久疾未拜。敕綰權知尹事。

遷中軍宣城王長史。俄徙御史中丞。高祖遣其弟中書舍人絢

宣旨曰。為國之急。惟在執憲。直繩用人。本不限升降。晉宋之世。

周閔蔡廓。竝以侍中為之。卿勿疑是左遷也。時宣城王府望重。

故有此旨焉。大同四年元日。舊制僕射中丞坐位東西。相當時

綰兄纘為僕射。及百司就列。兄弟導騶。分趨兩陛。前代未有也。

時人榮之。歲餘出為豫章內史。綰在郡。述制旨禮記正言義。四

姓衣冠士子。聽者常數百人。八年。安成人劉敬宮挾祆道。遂聚

黨攻郡。內史蕭悅棄城走。賊轉寇南康。廬陵屠破縣邑。有衆數

萬人進寇豫章新淦縣南中久不習兵革吏民恇擾奔散或勸
綰宜避其鋒。綰不從。仍修城隍。設戰備。募召敢勇得萬餘人。刺
史湘東王遣司馬王僧辯帥兵討賊。受綰節度。旬月間賊黨悉
平。十年復爲御史中丞。加通直散騎常侍。綰再爲憲司。彈糾無
所回避。豪右憚之。是時城西開士林館。聚學者。綰與右衛朱異。
太府卿賀琛。遞述制旨禮記中庸義。太清二年。遷左衛將軍。會
侯景寇至。入守東掖門。三年。遷吏部尚書。宮城陷。綰出奔外。轉
至江陵。湘東王承制授侍中。左衛將軍。相國長史。侍中如故。出
爲持節雲麾將軍。湘東內史。承聖二年。徵爲尚書右僕射。尋加
侍中。明年江陵陷。朝士皆俘入關。綰以疾免。後卒於江陵。時年

六十三。次子交。字少游。頗涉文學。選尙太宗第十一女安陽公
主。承聖二年。官至太子洗馬。祕書丞。掌東宮管記。

南史張綰附傳。綰字孝卿。少與兄纘齊名。湘東王繹嘗策之百
事。綰對闕其六。號爲百六公。位員外散騎常侍。中軍宣城王長
史。遷御史中丞。武帝遣其弟中書舍人絢宣旨曰。爲國之急。唯
在執憲直繩。用人之本。不限升降。晉宋時周閔蔡廓。兼以侍中
爲之。卿勿疑是左遷。時宣城王府重望。故有此旨焉。大同四年
元日。舊制僕射中丞。坐位東西。時當綰兄纘爲僕射。及百司就
列。兄弟竝導騶分趨兩塗。前代未有。時人榮之。出爲豫章內史。
在郡述制旨禮記正言義。四姓衣冠士子。聽者常數百人。八年。

安成人劉敬宮挾祆道。遂聚黨攻郡。進寇豫州。刺史湘東王遣司馬王僧辯討賊。受縮節度。旬月間賊黨悉平。十年復為御史中丞。縮再為憲司。彈糾無所迴避。豪右憚之。時城西開士林館。聚學者。縮與右衛朱异。太府卿賀琛。遞述制旨禮記中庸義。太清三年為吏部尚書。宮城陷。奔江陵。位尚書右僕射。魏剋江陵。朝士皆俘入關。縮以疾免。卒於江陵。次子交。字少游。尚簡文第十一女定陽按梁書作安陽公主。承聖二年官至祕書丞。掌東宮管記。

梁書元帝紀。大寶元年十一月甲子。侍中左衛將軍張縮等府州國一千人。奉賤於元帝。承聖二年十一月戊戌。以湘東太守張縮為尚書右僕射。三年十一月以右僕射張縮為副左

僕射。

又何敬容傳。大同十一年。敬容坐妾弟費慧明為導倉丞。夜盜官米。為禁司所執。敬容以書解慧明。高祖大怒。付南司推劾。御史中丞張縮。奏敬容挾私罔上。合棄市刑。詔特免職。

又羊侃傳。太清二年。侯景反。逼京師。賊既頻攻不捷。乃築長圍。朱异張縮議欲出擊之。高祖以問侃。侃曰不可。高祖不從。遂使千餘人出戰。望風退走。爭橋赴水死者太半。

又劉溉傳。溉性不好交游。惟與朱异劉之遴張縮同志。友密及臥疾。家園門可羅雀。三君每歲時常鳴騶枉道以相存問。置酒叙生平。極歡而去。臨終屬託張劉。勒子孫以薄葬之禮。

後周書劉璠傳璠少好讀書兼善文筆年十七為上黃侯蕭曄所器重范陽張綰梁之外戚才高口辯見推於世以曄之懿貴亦假借之璠年少未仕而負才使氣不為之屈綰嘗於新渝侯坐因酒後詬京兆杜騫曰寒士不遜璠厲色曰此坐誰非寒士璠本意在綰而曄以為屬已辭色不平璠曰何王之門不可曳長裾也遂拂衣而去曄辭謝之乃止

陳書陸山才傳山才少倜儻好尚文史范陽張續按當為續之訛續弟綰並欽重之

唐釋道宣廣弘明集梁元帝法寶聯璧序前國子博士范陽張綰年四十三字孝卿

宋司馬光通鑑安成望族劉敬躬以妖術惑衆人多信之大同八年春正月敬躬據郡反改元永漢署官屬進攻廬陵逼豫章南方久不習兵人情擾駭豫章內史張綰募兵以拒之綰纘之弟也二月戊戌江州刺史湘東王繹遣司馬王僧辯中兵曹子郢討敬躬受綰節度二月戊辰擒敬躬送建康斬之

又東魏大將軍高澄數遣書移復求通好上謂梁武帝得啟流涕與

朝臣議之右衛將軍朱异御史中丞張綰等皆曰靜寇息民和實為便司農卿傅岐獨曰高澄何事須和必是設間欲令侯景自疑必圖禍亂若許通好正墮其計中异等固執宜和上亦厭用兵乃從异言

又侯景自至壽陽。徵求無已。朝廷未嘗拒絕。景請娶於王謝。上曰。王謝門高。非偶。可於朱張以下訪之。胡三省注。朱張謂朱異。張綰之族也。景恚曰。會將吳兒女配奴。侯景啟曰。永安侯確。直閤趙威方。頻隔柵見詬。乞召侯及威方入。即當引路。上遣吏部尚書張綰召確。確累啟固辭不入。上不許。

張僕射遺著

今存碑一首

龍樓寺碑

蓋聞井魚之不識巨海。夏蟲之不見冬冰。故知局於泥甃者。未測滄溟之浩汗。篤於一時者。寧信寒暑之推移。何異乎玩即世而弗悟於生死之流。耽假樂而迷於真覺之觀。銘曰。

識相裁萌。無明重蔽。五住次起。四生無際。苦海倒流。業風橫厲。彼岸何遠。津航絕濟。輕毛易轉。花水難留。寔逢象正。悟彼生修。照曜真法。逍遙寶舟。占彼勝地。胥宇攸宅。遙川縈帶。峻矩盤桓。霞生蓮堞。風起長瀾。冬室停燠。夏臺增寒。

右見藝文類聚七十六

附錄

梁邵陵王綸贈言賦。張雲麾問望之美。作牧南蕃。維舟江漢。留連飲餞。發邁有期。會面無日。依依別袂。恨恨江干。古人贈別以言。聊爲贈言。賦曰。昔人有感於知己。深情投分。如斯已矣。相知勢利之間。實君子之所鄙。靜言神交之際。亦難得而

具美。豈直鮮其令終。曾自聞其善始。日踰久而益敬。蓋惟一人者爾。語同志而好合。諒今古之皆然。苟託御而自說。徐因芻而請前。况英聲與茂實。乃絕後而光先。似臨潭而對鏡。若披霧而睹天。欽愛顧之罔已。良佩服之在旃。資淑美之上才。超羣雄而獨峻。德既深於萬頃。牆有高乎數仞。思若神而泉湧。文如華而玉振。伊薄軀之固陋。謬攝官於夏汭。知美錦之難裁。處芬按當絲而易結。幸中途而遽止。仰旌旆之踟躕。似德星之東邁。類祥雲之西徂。亟留連於河渚。或終宴於城隅。賞既延於賓友。懽亦洽於僕夫。嗟灰琯之易逝。慨離袂之云促。惜日車之不駐。恨流影之難續。觀善誘而不倦。餐好音而

未足。佇浮雲之可寄。願無比乎金玉。

見藝文類聚

隋

沙門靖嵩

唐釋道宣續高僧傳。隋釋靖嵩。俗姓張氏。涿郡固安人。幼抱貞幹。在物不羣。十五出家。神氣俊越。及遊漳南。值高齊之盛。屢投明師。咨諏幽奧。後瑯琊王深加器重。河東俄屬周武。屏除釋教。遂南達江左。陳宣帝承風迎引。時建業有天竺僧。齋攝舍二論。至中國。惟嵩獨拔立心。翫味茲典。隋開皇十年北還。自此撰攝論疏六卷。雜心疏五卷。又撰九識三藏三聚戒二生死等立義。並傳於世。煬帝屢詔。嵩終固辭。門人問其故。答曰。王城有限。動

止嚴難。不如物外沙門。名爲解脫。如何反以事業累乎。以大業十年。遭疾卒於彭城。年七十有八。光祿大夫留守董純輩。殯于神臯之原。嵩性愛文史。時製詩頌。且工篆隸。足爲世模。

固安文獻志卷六目錄

耆舊事彙

唐

張漢陽王柬之

張著作湑

張漢陽王次子

固安文獻志卷六

天津徐世昌鑒定

縣人賈廷琳謹編

耆舊事彙

唐

張漢陽王柬之

晉劉昫舊唐書張柬之本傳張柬之字孟將范陽方城人也原作

襄州襄陽人據道光出
土張氏墓誌十一種改

少補太學生涉獵經史尤好三禮國子祭酒

令狐德棻甚重之進士擢第累補青城丞永昌元年以賢良徵

試同時策者千餘人柬之獨為當時第一擢拜監察御史聖曆

初累遷鳳閣舍人時弘文館直學士王元感著論云三年之喪

合三十六月。東之著論駁之曰。三年之喪二十五月。不刊之典也。謹案春秋魯僖公三十三年十二月乙巳公薨。文公二年冬公子遂如齊納幣。左傳曰禮也。杜預注云。僖公喪終此年十一月。納幣在十二月。士婚禮納采納徵皆有玄纁束帛。諸侯則謂之納幣。蓋公爲太子已行婚禮。故傳稱禮也。公羊傳曰。納幣不書。此何以書。譏喪娶在三年之外。何以譏。三年之內不圖婚。何休注云。僖公以十二月薨。至此冬未滿二十五月。納采問名納吉皆在三年之內。故譏。何休以公十二月薨。至此冬十二月纔二十四月。非二十五月。是未三年而圖婚也。案經書十二月乙巳公薨。杜預以長麻推乙巳是十一月十二日。非十二月。書十

二月是經誤。文公元年四月葬我君僖公。傳曰緩也。諸侯五月而葬。若是十二月薨。卽位五月。不得言緩。明知是十一月薨。故注僖公喪終此年至十二月而滿二十五月。故邱明傳曰禮也。據此推步。杜之考校。豈公羊之所能逮。况邱明親受經於仲尼乎。且二傳何杜所爭。唯爭一月。不爭一年。其二十五月除喪。由來無別。此則春秋三年之喪二十五月之明驗也。尙書伊訓云。成湯既沒。太甲元年。惟元祀十有二月。伊尹祀于先王。奉嗣王祇見厥祖。孔安國注云。湯以元年十一月崩。據此則二年十一月小祥。三年十一月大祥。故太甲中篇云。惟三祀十有二月朔。伊尹以冕服奉鬯王歸于亳。是十一月大祥訖。十二月朔日。加

王冕服吉而歸亳也。是孔言湯元年十一月之明驗。顧命云。四月哉生魄。王不懌。是四月十六日也。翌日乙丑王崩。是十七日也。丁卯命作冊度。是十九日也。越七日癸酉。伯相命士須材。是四月二十五日也。則成王崩至康王麻冕黼裳。中間有十月。康王方始見廟。則知湯崩在十一月。淹停至斂訖。方始十二月。祇見其祖。顧命見廟訖。諸侯出廟門俟。伊訓言祇見厥祖。侯甸羣后咸在。則崩及見廟。殷周之禮竝同。此周因於殷禮。損益可知也。不得元年以前別有一年。此尙書三年之喪。二十五月之明驗也。禮記三年問云。三年之喪。二十五月而畢。哀痛未盡。思慕未忘。然而服以是斷之者。豈不送死有已。復生有節。又喪服四

制云。變而從宜。故大祥鼓素琴。告人以終。又間傳云。朞而小祥。食菜果。又朞而大祥。有醯醬。中月而禫。食酒肉。又喪服小記云。再朞之喪三年也。朞之喪二年也。九月七月之喪三時也。五月之喪二時也。三月之喪一時也。此禮記三年之喪。二十五月之明驗也。儀禮士虞禮云。朞而小祥。又朞而大祥。中月而禫。是月也。吉祭。此禮周公所制。則儀禮三年之喪。二十五月之明驗也。此四驗者。竝禮經正文。或周公所制。或仲尼所述。吾子豈得以禮記載聖所修。輒欲排毀。漢初高堂生傳禮。既未周備。宣帝時少傅后蒼。因淹中孔壁所得五十六篇著曲臺記。以授弟子戴德。戴聖。慶溥三人。合以正經。及孫卿所述。竝相符會。列於學官。

年代已久。今無端構造異論。既無依據。深可歎息。其二十五日。先儒考校。唯鄭康成注儀禮。中月而禫。以中月間一月自死至禫。凡二十七日。又解禫云。言澹澹然平安之意也。今皆二十七日復常。從鄭議也。踰月入禫。禫既復常。則二十五日爲免喪矣。二十五日二十七日。其議本同。竊以子之於父母喪也。有終身之痛。創巨者日久。痛深者愈遲。豈徒歲月而已乎。故練而慨然者。蓋悲慕之懷未盡。而踊擗之情已歇。祥而廓然者。蓋哀傷之痛已除。而孤藐之念更起。此皆情之所致。豈外飾哉。故記曰。三年之喪。義同過隙。先王立其中制。以成文理。是以祥則縞帶素紕。禫則無所不佩。今吾子將徇情弃禮。實爲乖僻。夫弃縗麻之

服。襲錦黻之衣。行道之人。皆不忍也。直爲節之以禮。無可奈何。故由也不能過制爲姊服。鯉也不能過禘哭其母。夫豈不懷懼。名教偏已也。若孔鄭何杜之徒。竝命代挺生。範模來裔。宮牆積仞。未易可窺。但鑽仰不休。當漸入勝境。詎勞終年矻矻。虛肆莠言。請所有掎擿先儒。願且以時消息。時人以東之所駭。頗合於禮典。是歲突厥默啜表言有女。請和親。則天盛意許之。欲令淮陽郡王延秀娶之。東之奏曰。自古無天子求娶夷狄女。以配中國王者。表入頗忤其旨。神功初出。爲合州刺史。尋轉蜀州刺史。舊例每歲差兵募五百人。往姚州鎮守。路越山險。死者甚多。東之表論其弊曰。臣竊按姚州者。古哀牢之舊國。絕域荒外。山高

水深自生人以來。洎於後漢。不與中國交通。前漢唐蒙開夜郎滇筰。而哀牢不附。至光武季年。始請內屬。漢置永昌郡以統理之。乃收其鹽布氈罽之稅。以利中土。其國西通大秦。南通交趾。奇珍異寶。進貢歲時不闕。劉備據有巴蜀。常以甲兵不充。及備死。諸葛亮五月渡瀘。收其金銀鹽布。以益軍儲。使張伯岐選其勁卒。摻兵以增武備。故蜀志稱自亮南征之後。國以富饒。甲兵充足。由此言之。則前代置郡。其利頗深。今鹽布之稅不供。珍奇之貢不入。戈戟之用不實於戎行。寶貨之資不輸於大國。而空竭府庫。驅率平人。受役蠻夷。肝腦塗地。臣竊爲國家惜之。昔漢以得利既多。歷博南山。涉蘭倉水。更置博南哀牢二縣。蜀人愁

怨。行者作歌曰。歷博南。越蘭津。渡蘭倉。爲他人蓋。譏漢貪珍奇。鹽布之利。而爲蠻夷之所驅役也。漢獲其利。人且怨歌。今減耗國儲。費用日廣。而使陛下之赤子。身膏野草。骸骨不歸。老母幼子。哀號望祭於千里之外。於國家無絲髮之利。在百姓受終身之酷。臣竊爲國家痛之。往者諸葛亮破南中。使其渠率自相統領。不置漢官。亦不留兵鎮守。人問其故。亮言置官留兵。有三不易。大意以置官夷漢雜居。猜嫌必起。留兵運糧。爲患更重。忽若反叛。勞費更多。但巖設紀綱。自然安定。臣竊以亮之此策。妙得羈縻蠻夷之術。今姚府所置之官。既無安邊靜寇之心。又無葛亮且縱且禽之伎。唯知詭謀狡算。恣情割剝。貪叨劫掠。積以爲

常扇動酋渠。遺成朋黨。折支諂笑。取媚蠻夷。拜跪趨伏。無復慙恥。提挈子弟。嘯引凶愚。聚會蒲博。一擲累萬。劍南逋逃。中原亡命。有二千餘戶。見散在彼州。專以掠奪爲業。姚州本龍朔中武陵縣主簿石子仁。奏置之後。長史李孝讓。辛文協。竝爲羣蠻所殺。前朝遣郎將趙武貴討擊。貴及蜀兵。應時破敗。噍類無遺。又使將軍李義總等往征。郎將劉惠基在陳戰死。其州乃廢。臣竊以諸葛亮稱置官留兵。有三不易。其言乃驗。至垂拱四年。蠻郎將王善寶。昆州刺史爨乾福。又請置州。奏言所有課稅。自出姚府管內。更不勞擾蜀中。及置州後。錄事參軍李棧。爲蠻所殺。延載中。司馬成琛。奏請於瀘南置鎮七所。遣蜀兵防守。自此蜀中

騷擾于今不息。且姚府總管五十七州。巨猾遊客。不可勝數。國家設官分職。本以化俗防姦。無恥無厭。狼籍至此。今不問夷夏。負罪竝深。見道路劫殺。不能禁止。恐一日驚擾。爲禍轉大。伏乞省罷姚州。使隸舊府。歲時朝覲。同之蕃國。瀘南諸鎮。亦皆悉廢。於瀘北置關。百姓自非奉使入蕃。不許交通往來。增舊府兵。選擇清良宰牧。以統理之。臣愚將爲穩便。疏奏。則天不納。後累拜荊州大都督府長史。長安中。召爲司刑少卿。遷秋官侍郎。時夏官尙書姚崇爲靈武軍使。將行。則天令舉外司。堪爲宰相者。崇對曰。張柬之沈厚有謀。能斷大事。且其人年老。惟陛下急用之。則天登時召見。尋同鳳閣鸞臺平章事。未幾。遷鳳閣侍郎。仍知

政事及誅張易之兄弟。東之首謀其事。中宗即位以功擢拜天官尚書。鳳閣鸞臺三品。封漢陽郡公。食實封五百戶。未幾遷中書令。監修國史。月餘進封漢陽郡王。加授特進。令罷知政事。其年秋。東之表請歸襄州養疾。許之。仍特授襄州刺史。又拜其子漪為著作郎。令隨父之任。上親賦詩祖道。又令羣公餞送於定鼎門外。東之至襄州。有鄉親舊交抵罪者。必深文致法。無所縱舍。其子漪恃以立功。每見諸少長。不以禮接。時議以為不能易荆楚之剽性焉。尋為武三思所構。貶授新州司馬。東之至新州。憤恚而卒。年八十餘。景雲元年制曰。褒德紀功。事華典冊。節終追遠。理光名教。故吏部尚書張東之。翼戴興運。謨明帝道。經綸

謬。風範猶存。往屬回邪。構成豐咎。無辜放逐。淪沒荒遐。言念勳賢。良深軫悼。宜加寵贈。式賁幽泉。可贈中書令。封漢陽郡公。建中初。又贈司空。玄孫璟。開成二年。自宜城尉遷壽安尉。

宋宋祁新唐書張東之傳。張東之。字孟將。范陽方城人。

亦據張氏墓誌十一

改種

少涉經史。補太學生。祭酒。令狐德棻異其才。便以王佐期之。

中進士第。始調清源丞。永昌元年。以賢良召。時年七十餘矣。對策者千餘。東之為第一。授監察御史。遷鳳閣舍人。時突厥默啜有女請和親。武后欲令武延秀娶之。東之奏古無天子取夷狄女者。忤旨。出為合蜀二州刺史。故事。歲以兵五百戍姚州。地險瘴。到屯輒死。東之論其弊曰。臣按姚州古哀牢國。域土荒外。山

岨水深。漢世未與中國通。唐蒙開夜郎滇笮。而哀牢不附。東漢光武末。始請內屬。置永昌郡統之。賦其鹽布。氈罽以利中土。其國西大秦。南交趾。奇珍之貢不闕。劉備據蜀。甲兵不充。諸葛亮五月渡瀘。收其產入以益軍。使張伯岐選取勁兵。以增武備。故蜀志稱亮南征後。國以富饒。此前世置郡以其利之也。今鹽布之稅不供。珍奇之貢不入。弋戟之用不實於戎行。寶貨之資不輸於大國。而空竭府庫。驅率平人。受役蠻夷。肝腦塗地。臣竊爲陛下惜之。昔漢歷博南山。涉蘭倉水。更置博南哀牢二縣。蜀人愁苦。行者作歌曰。歷博南。越蘭津。度蘭倉。爲它人。蓋譏其貪珍奇之利。而爲蠻夷所驅役也。漢獲其利。人且怨歌。今減耗國儲。

費調日引。使陛下赤子。身膏野草。骸骨不歸。老母幼子。哀號望祭於千里之外。朝廷無絲髮之利。而百姓蒙終身之酷。臣竊爲國家痛之。往諸葛亮破南中。卽用渠率統之。不置漢官。不留戍兵。言置官留兵。有三不易。置官必夷漢雜居。猜嫌將起。留兵轉糧。爲患滋重。後忽反叛。勞費必甚。故粗設綱紀。自然久定。臣謂亮之策誠盡。羈縻蠻夷之要。今姚州官屬。旣無固邊厭寇之心。又無亮且縱且禽之伎。唯詭謀狡算。恣情割剝。扇動酋渠。遣成朋黨。折支諂笑。取媚蠻夷。拜跪趨伏。無復爲恥。提挈子弟。嘯引凶愚。聚會蒲博。一擲累萬。凡逋逃亡。命在彼州者。戶贏二千。專事剽奪。且姚州本龍朔中。武陵主簿石子仁奏置。其後長史李

孝讓辛文協死於羣蠻。詔遣郎將趙武貴討擊。兵無噍類。又以將軍李義總繼往。而郎將劉惠基戰死。其州遂廢。臣竊以亮有三不易。其言卒驗。垂拱中。蠻郎將王善寶。昆州刺史爨乾福。復請置州。言課稅自支。不旁取於蜀。及置州。掾李稜爲蠻所殺。延載中。司馬成琛更置瀘南七鎮。戍以蜀兵。蜀始擾矣。且姚府總管五十七州間。皆巨猾游客。國家設官。所以正俗防姦。而無恥之吏。敗謬至此。今劫害未止。恐驚擾之禍日滋。宜罷姚州隸巂府。歲時朝覲。同蕃國。廢瀘南諸鎮。而設關瀘北。非命使不許交通。增繕屯兵。擇清良吏以統之。臣愚以爲便。疏奏不納。俄爲荊州大都督府長史。長安中。武后謂狄仁傑曰。安得一奇士用之。

仁傑曰。陛下求文章資歷。今宰相李嶠。蘇味道足矣。豈文士齷齪。不足與成天下務哉。后曰。然。仁傑曰。荊州長史張柬之。雖老。宰相材也。用之必盡節於國。即召爲洛州司馬。它日又求人。仁傑曰。臣嘗薦張柬之。未用也。后曰。遷之矣。曰。臣薦宰相而爲司馬。非用也。乃授司刑少卿。遷秋官侍郎。後姚崇爲靈武軍使。將行。后詔舉外司可爲相者。崇曰。張柬之。沈厚有謀。能斷大事。其人老。惟亟用之。即日召見。拜同鳳閣鸞臺平章事。進鳳閣侍郎。誅二張也。柬之首發其謀。以功擢天官尙書。同鳳閣鸞臺三品。漢陽郡公。實封五百戶。不半歲。以漢陽郡王加特進。罷政事。柬之既失權。願還襄州養疾。乃授襄州刺史。中宗爲賦詩祖道。又

詔羣臣餞定鼎門外。至州持下以法。雖親舊無所縱貸。會漢水漲齧城郭。東之因壘爲隄。以遏湍怒。闔境賴之。又懇辭王爵。不許。俄及貶。又流瀧州。憂憤卒。年八十二。景雲元年。贈中書令。諡曰文貞。授一子官。東之剛直不傳會。然邃於學。論次書數十篇。子愿漪。愿仕至襄州刺史。漪以著作郎侍父襄陽。恃其家立功。簡接鄉人。鄉人怨之。初易之等誅後。中宗猶監國。告武氏廟。而天久陰不霽。侍御史崔渾奏。陛下復國。當正唐家位號。稱天下心。奈何尙告武氏廟。請毀之。復唐宗廟。帝嘉納。是日詔書下。霧翳澄駸。咸以爲天人之應。

贊曰。五王提衛兵。誅嬖臣。中興唐室。不淹辰。天下晏然。其謀深矣。至謂中宗爲英王。不盡誅諸武。使天子藉以爲威。何其淺邪。鬻牙一啟。爲豔后豎兒所乘。劫持戮辱。若放豚然。何哉。無亦神奪其明。厚韋氏毒以興先天之業乎。不然。安李之功。賢於漢平勃遠矣。

舊唐書武后紀。長安四年冬十月。秋官侍郎張柬之同鳳閣鸞臺平章事。十一月。爲鳳閣鸞臺平章事。

又中宗紀。時張易之與弟昌宗潛圖逆亂。神龍元年正月。鳳閣侍郎張柬之等定策。率羽林兵誅易之昌宗。迎皇太子即位於通天宮。大赦天下。

又正月庚戌。鳳閣侍郎同鳳閣鸞臺平章事張柬之爲夏官尙

書同鳳閣鸞臺三品。封漢陽郡公。四月乙亥爲中書令。五月癸巳。中書令張柬之封爲漢陽郡王。竝加特進。秋七月乙未。以特進漢陽郡王張柬之爲襄州刺史。仍不知州事。二年六月戊寅。特進襄州刺史漢陽郡王張柬之貶新州司馬。

新唐書中宗紀神龍二年六月戊寅。貶張柬之爲新州司馬。七月辛未。流張柬之於瀧州。

舊唐書睿宗紀景龍四年秋七月。復張柬之等官爵。三年五月。張柬之等特還其子孫實封二百戶。

又立宗紀開元六年六月乙酉。制以故侍中桓彥範敬暉。故中書令兼吏部尙書張柬之。故特進崔玄暉。故中書令袁恕己。配

饗中宗廟庭。

又狄仁傑傳初則天嘗問仁傑曰。朕要一好漢任使。有乎。仁傑曰。陛下作何任使。則天曰。朕欲待以將相。對曰。臣料陛下若求文章資歷。則今之宰臣李嶠蘇味道。亦足爲文吏矣。豈非文士齷齪。思得奇才用之。以成天下之務者乎。則天悅曰。此朕心也。仁傑曰。荊州長史張柬之。其人雖老。眞宰相才也。且久不遇。若用之。必盡節於國家矣。則天乃召拜洛州司馬。他日又求賢。仁傑曰。臣前言張柬之。猶未用也。則天曰。已遷之矣。對曰。臣薦之爲相。今爲洛州司馬。非用之也。又遷爲秋官侍郎。後竟召爲相。柬之果能興復中宗。蓋仁傑之推薦也。

又張行成傳神龍元年正月。則天病甚。是月二十日。宰臣崔玄暉張柬之等。起羽林兵迎太子至玄武門。斬關而入。誅張易之。昌宗於迎仙院。竝梟首於天津橋南。

又桓彥範傳是歲冬。則天不豫。張易之與弟昌宗入閣侍疾。潛圖逆亂。鳳閣侍郎張柬之。與桓彥範及中臺右丞敬暉等。建策將誅之。柬之遽引彥範及暉。竝爲左右羽林將軍。委以禁兵。共圖其事。

又武三思日夕讒毀彥範等。帝竟用三思計。進封彥範爲扶陽郡王。敬暉爲平陽郡王。張柬之爲漢陽郡王。崔玄暉爲博陵郡王。袁恕已爲南陽郡王。竝加特進。令罷知政事。仍賜襍綵錦繡。

金銀鞍馬等。雖外示優崇。而實奪其權也。

又神龍二年。光祿卿駙馬都尉王同皎。以武三思與韋氏姦通。潛謀誅之。事洩。爲三思誣構。言同皎將廢皇后韋氏。彥範等通知其情。乃貶彥範爲瀧州司馬。敬暉崖州司馬。袁恕已竇州司馬。崔玄暉白州司馬。張柬之新州司馬。是歲秋。三思又陰令人疏皇后穢行。榜於天津橋。請加廢黜。中宗聞之怒。命御史大夫李承嘉推求其人。承嘉希三思旨。奏言彥範與敬暉張柬之袁恕已崔玄暉等。教人密爲此榜。雖託廢后爲名。實有危君之計。請加族滅。中宗仍以彥範等五人。嘗賜鐵券。許以不死。乃流彥範於瀧州。敬暉於崖州。張柬之於瀧州。袁恕已於環州。崔玄暉

於古州竝終身禁錮。子弟年十六已以上者，亦配流嶺外。

又敬暉傳：初暉與彥範等誅張易之兄弟也。洛州長史薛季昶謂暉曰：二凶雖除，產祿猶在，請因兵勢誅武三思之屬。匡正王室，以安天下。暉與張柬之屢陳不可，乃止。季昶歎曰：吾不知死所矣。暉等既失政柄，受制於三思，暉每推牀嗟惋，或彈指出血。柬之歎曰：主上疇昔爲英王時，素稱勇烈，吾留諸武，冀自誅鉏耳。今事勢已去，知復何道。

又韋安石傳：安石神龍初徵拜刑部尙書，是歲又遷吏部尙書。復知政事。俄代張柬之爲中書令。

又姚崇傳：神龍元年，張柬之桓彥範等謀誅張易之兄弟，適會

元之按崇名元之自軍還都，遂預謀以功封梁縣侯，賜實封二百戶。則

天移居上陽宮。中宗率百官就閣起居，王公已下，皆欣躍稱慶。元之獨嗚咽流涕。彥範柬之謂元之曰：今日豈是嘯泣時。恐公禍從此始。元之曰：事則天歲久，乍此辭違，情發於衷，非忍所得。昨預公誅凶逆者，臣子之常道，豈敢言功。今辭違舊主，悲泣者，亦臣子之終節。緣此獲辜，實所甘心。無幾出爲亳州刺史，轉常州刺史。

又李義府傳：義府少子湛，神龍初累遷右散騎常侍，襲封河間郡公。時鳳閣侍郎張柬之將誅張易之兄弟，遂引湛爲羽林將軍。

又良吏楊元琰傳長安中張柬之代元琰爲荊州長史與元琰汎江中流言及則天革命議諸武擅權之狀元琰發言慷慨有匡復之意及柬之知政事奏引元琰爲右羽林將軍至都柬之謂日記昔江中之言乎今日之授意不細也乃結元琰與李多祚等定計誅張易之兄弟及事成賜鐵券恕十死俄而張柬之敬暉爲武三思所構元琰覺變奏請削髮出家及暉等得罪元琰竟以先覺得全。

又文苑李邕傳邕少知名召拜左拾遺以與張柬之善出爲南和令又貶富州司戶。

新唐書李多祚傳多祚以勞改右羽林大將軍遂領北門衛兵。

張柬之將誅二張以多祚素感槩可動以義乃從容謂曰將軍居北門幾何曰三十年矣將軍擊鐘鼎食貴重當世非大帝恩乎多祚泣數行下曰死且不忘柬之曰將軍知感恩則知所以報今在東宮乃大帝子而嬖豎擅朝危偪宗社國家廢興在將軍將軍誠有意乎舍今日尙何在答曰苟緣王室惟公所使乃引天地以自誓辭氣毅然柬之遂定謀以敬暉李湛爲右羽林將軍命總禁兵與多祚王同皎請太子至玄武門斬關入中宗

復位

按多祚係
蘇韜人

又忠義傳唐宣宗大中初詔求張柬之等三十七人畫像續圖

凌煙閣

國朝文獻志

卷六

舊唐書

張柬之

十四

趙莊賈氏无悶齋

又方伎嚴善思傳長安中熒惑入月鎮犯天關善思曰法當亂臣伏罪而有下謀上之象歲餘張柬之等起兵誅二張

張漢陽王遺著

今存對策二首論一首表一首可考者一首墓誌四首詩五首

賢良方正對策第一道

問。朕聞經國體野。取則於天文。設官分職。用立於人紀。名實相副。自古稱難。則哲之方。深所不易。朕以薄德。謬荷昌圖。思欲追逸軌於上皇。拯羣生於季俗。澄源正本。式起維新。俾用才委能。靡失其序。以事效職。各得其長。至於考課之方。猶迷於去取。黜陟之義。尚惑於古今。未知何帝之法。制可遵。何代之沿革。斯衷。此雖彘彘束帛。每賁於丘園。翹翹錯薪。未獲於英楚。並何方啟

塞。以致於茲。竚爾深謀。朕將親覽。

對。臣聞仲尼之作春秋也。法五始之要。正王道之端。微顯闡幽。昭隆大業。漚洛之功。既備。範圍之理。益深。伏惟陛下受天明命。統輯黎元。載黃屋。負黼辰。居紫宮之邃。坐明堂之上。順陽和以布政。攝三吏而論道。雍容高拱。金聲玉振。徵求無厭。誤及厮賤。微臣材朽學淺。誠不足以膺嚴旨。揚天休。雖然。敢不盡芻蕘。罄狂瞽。悉心竭節。昧死上對。臣聞天者羣物之祖。王者受命於天。故則天而布列職。天生蒸民。樹之君長。以司牧之。自非聰明睿哲。齊聖廣淵。不能使人樂其生。家安其業。陛下德自天縱。慈憫元元。既樂其生。且安其業。臣聞瑞者上天所以申命。人主也。故

使麒麟遊於囿。鳳凰集於庭。慶雲出。神龍見。其餘草木煙露之祥。不可勝紀。陛下日慎一日。雖休勿休。故天申之以禎石。告之以神文。大矣哉。聖人之鴻業也。臣聞河圖洛書之不至也久矣。孔子曰。鳳鳥不至。河不出圖。吾已矣夫。師說曰。聖人自傷已有能致之資。而天不致也。陛下有能致之資。而天蘊者。所以扶助聖德。撫寧兆人也。臣觀今朝廷含章瞻博之士。鯁言正議之臣。陛下誘而進之。並踐丹地。伏青規。顛顛昂昂。雲屬霧委。鸞騫鳳振。佩金鳴玉。曳朱紱。揚翠綵。充物於階庭者矣。昔舜舉十六相。去四凶人。有大功二十。而爲天子。前史美之。稱曰。盡善盡美。雖甚盛德。無以加此。陛下彰善去惡。昭德塞違。萬萬於虞舜。自託

薄德。愚臣何足以望清光。而敢有議哉。制策曰。思欲追逸軌於上皇。拯羣生於季俗。澄源正本。式啟惟新。臣聞善言古者必考之於今。善談今者必求之於古。臣竊以當今之務。而稽之往古。以往古之跡。而比之當今。以爲三皇神聖。其臣不能及。故於親之。陛下刊列格。正爰書。修本業。著新誠。建愍章。以申嚴配。置法。匭以濟窮冤。此前聖所不能爲。非羣臣之所能及也。今朝廷之政。上令下行。如身之使臂。臂之使手。百僚師師。罔不成又。此羣臣之能奉職也。書曰。元首明哉。股肱良哉。庶事康哉。故臣以爲陛下有三皇之位。而能隆三皇之業也。臣以今刺史。古之十二牧也。今之縣令。古之百里君也。有官聯焉。有社稷焉。可謂重矣。

任非其材。其害亦重矣。昔周宣王欲訓其人。問於樊仲曰。吾欲訓人。諸侯誰可者。仲曰。魯侯肅恭明神。敬事耆老。必咨於故實。問於遺訓。乃立之。晉之名臣亦言。舍人洗馬。一時之高選。臺郎御史。萬邦之俊哲。若出於宰牧。頌聲興矣。由此言之。則古牧州宰縣者。不易其人也。自非惠訓不倦。動簡天心者。未可委以五符之重。百里之寄。今則不然。多由門貲擢授。或以勳階蒞職。莫計清濁。無選藝能。負違聖誠。安肯肅恭明神。輕理慢法。安肯敬事耆老。取捨自便。安能求之故實。舉措縱欲。安能問之遺訓。選異一時之高材。非萬邦之俊傑。於是多其僕妾。廣其貲產。齒角兩兼。足翼雙備。蹈瑕履穢。不顧廉恥。抵網觸羅。覆車相次。孔子

曰。既得之。患失之。苟患失之。無所不至矣。故臣以爲陛下有三皇之人。無三皇之吏也。制策曰。俾用才委能。靡失其序。以事効力。各得其長。至於考課之方。猶迷於去取。黜陟之義。尙惑於古今。未知何帝之法。制可遵。何代之沿革。斯衷。臣聞皇王之制。殊條共貫。雖有改制之名。無不相因而立事。孔子曰。殷因於夏禮。所損益可知。周因於殷禮。所損益可知。其或繼周者。雖百代可知也。然則虞帝之三考黜陟。周王之六廉察士。雖有沿革。所取不殊。期於不濫而已。陛下取人之法。甚明。考績之規。甚著。臣以爲猶舟浮於水。車轉於陸。雖百王無易也。今丘園已賁。英楚雲集。啟塞之路。豈愚臣所能輕云也。謹對。

右見宋李昉文苑英華又清勅編全唐文一百七十五

賢良方正對策第二道

問。朕聞軌物垂訓。必隨正於因生。開國承家。理崇先於敦本。故七葉貂珥。表金室之榮。十紀羽儀。峻班門之躅。保姓受氏。義先於睦親。翼子謀孫。事隆於長發。朕以塞味。叨奉先靈。墜典咸新。遺章畢覩。思欲甄明譜系。澄汰簪裾。派別淄澠。區分士庶。至如陳田互出。號郭俱開。束皙改漢。傅之宗。輔果易晉。卿之號。巨君之姓。曾非馭鶴之苗。元海之家。諒非擾龍之族。永言紕繆。良用憮然。子大夫十室推英。三冬富學。允迪褒然之舉。宜揚鏘爾之詞。至若北郭南宮。本因何義。三鳥五鹿。起自何人。公孫之由。司

馬之姓。咸加辨析。且顯指歸。式副對揚。朕將親覽。

對。臣聞保姓受氏。明乎典訓。或因地以賜姓。或因官而命氏。或官以代功。亦以官族。或所居之地。因以爲氏。諸侯之子。稱爲公子。公子之子。稱爲公孫。公孫之子。乃以其王父字爲氏。後代因之。亦以爲姓。田陳號郭。以聲近而遂分。輔果束皙。以避難而更改。王莽以田王爲氏。元海因漢甥立族。騷括分南北之號。充宗爲五鹿之先。應氏著書。具表三鳥之始。司馬司徒。是曰因官。公孫叔孫。春秋備載。陛下盡六藝之英。窮百氏之要。淑問揚天地。立情貫幽顯。黃竹清吹。訓窮五際。白雲高唱。文包萬象。昔曹門三祖。道愧由庚。劉氏四葉。仁非解慍。豈若睿思瓊敷。同雨露之

國朝文獻志
霑漸神機若發。等曦望之照臨。起帝典而孤立。孕皇墳而獨秀。臣沐浴淳和。叨承至訓。名聞於聖聽。言奏於闕前。謹對。

右見同上

駁王元感喪服論

右已見前本傳

請罷姚州屯戍表

右已見前本傳。又宋姚鉉唐文粹二十六。又古文淵鑒。諫與突厥默啜和親表。

右畧見前本傳。文缺。

唐故益州大都督府功曹參軍事張公墓誌銘

唐處士張君墓誌銘

唐孝廉張君墓誌銘

唐將仕郎張君墓誌銘

右四首均見拓本。另載耆舊碑誌卷。

大堤曲

南國多佳人。莫若大堤女。玉牀翠羽帳。寶祿蓮花炬。全唐詩作炬魂處

自一作目成。色授開心許。迢迢不可見。日暮空愁予。按予古音近宇

右見宋郭茂倩樂府詩集四十八

東飛伯勞歌

青田白鶴。丹山鳳。嬖女姮娥。兩相送。誰家絕世綺帳前。豔粉芳

全唐詩
作紅

脂映寶。鈿窈窕。玉堂裏。翠幕參差繡。戶懸珠。箔絕世。五
愛紅妝。冶袖長裾。全唐詩
作裾蘭麝香春。去花枝。俄易改。可歎年光不
相待。

右見樂府詩集六十八

出塞

俠客重恩光。驄馬飾金裝。警聞傳羽檄。馳突救邊荒。歛野山川
動。囂天旌旆揚。吳鉤明似月。楚劍利如霜。電斷衝胡塞。風飛出
洛陽。轉戰磨笄俗。橫行戴斗鄉。手擒郅支長。面縛谷蠡王。將軍
占太白。小婦怨流黃。腰裏青絲騎。娉婷紅粉妝。三春鶯度曲。八
月鴈成行。誰堪坐愁思。羅袖拂空牀。

與國賢良夜歌二首

柳臺臨新堰。樓堞相重複。窈窕鳳皇姝。傾城復傾國。
杏間花照灼。樓上月裴回。帶嬌移玉柱。含笑捧金杯。

右詩五首同見全唐詩九十九

附錄

唐中宗册張柬之為漢陽郡王。詔維神龍元年。歲次乙巳。五
月己卯朔。十五日癸巳。皇帝若曰。咨古者之命官也。有德尊
以爵。有功尊以祿。用能百揆時序。庶績其凝。詳其利建之跡。
也。異姓則鬻熊封之於楚。宗子則召奭宅之於燕。惟皇作極。
率由前典。咨爾銀青光祿大夫中書令監修國史漢陽郡王

張柬之。効祉星辰。資靈川嶽。負佐時之略。有經邦之材。以忠孝爲己任。以仁義爲事業。頃者巨猾未殄。常思克清。一朝奮臂。二兇行翦。竟燃臍於東市。終掛膽於西州。遂得聖祚中興。皇運光啟。乾坤再闢。日月重明。刑白馬而書功。未足云答。指青山之比礪。曾何足酬。是用命爾爲特進漢陽郡王。爾其靖共乃職。咸允具瞻。使厚秩尊官。永全於長代。春蘭秋菊。無絕於終古。往欽哉。可不勉歟。可不慎歟。見全唐文

唐中宗令張柬之毋辭封爵。詔卿履謹尙遜。忌盈戒滿。詞志勤勤。請謝王位。然懸爵所以勸善。申至公也。裂土所以疇庸。非徇私也。故漢德之盛。異姓而王者八人。魏祚之隆。同功而

邑者千戶。今卿列爵之貴。未越於漢圖。食邑之豐。纔半於魏制。而遽形簡牘。一何甚也。朕承三代之丕業。荷七廟之威靈。惟唐據承祧之尊。於周保元良之重。至於復子休命。配天大業。雖曆數有歸。亦謳歌所繼。然狐鼠不掘。終貽城社之憂。頑兇未除。實負朝廷之懼。卿誠亮白日。忠勵秋霜。懷直道以立身。固一心而徇國。自二兇構患。潛圖不軌。惡跡初彰。釁萌始露。卿之大節。義在不虧。烈士之首。期於必碎。及難作宮禁。禍生肘腋。卿上銜天命。外發兵符。行正卯之戮。旣於兩觀。磔蚩尤之屍。俄成四冢。曾不延晷。鬱成大功。分壤錫珪。固其宜矣。行當勉以自愛。享此眉壽。乘几杖之榮。極鄉園之樂。崇讓小

節念勿為也。見同上

唐睿宗追贈張柬之中書令制。褒德紀功。事華典冊。節終追遠。理光名教。吏部尚書張柬之。翼戴興運。謨明帝道。經論審諤。風範猶存。往屬回邪。構成釁咎。無辜放逐。淪沒荒遐。言念勳賢。良深軫悼。宜加寵贈。式賁幽泉。可贈中書令。封漢陽郡

公。見同上

唐玄宗命桓彥範張柬之等配享中宗廟庭。詔皇輿肇建。必有輔佐之臣。天步多艱。爰仗經綸之業。故侍中譙國公桓彥範。侍中平陽郡公敬暉。中書令兼吏部尚書漢陽郡公張柬之。特進博陵郡公崔玄暉。中書令南陽郡公袁恕己等。並德

惟神降。材與運生。道協台嶽。名書讖緯。寅亮帝載。勤勞王家。參復禹之元謀。奉昇唐之景命。雖殂謝既久。而勳烈益彰。撫彝鼎以念功。想旂常而增感。緬遵故實。用表徽懿。俾列在清廟。登于明堂。克申從祀之儀。式茂疇庸之典。並可配享中宗孝和皇帝廟庭。其子弟咸加收擢。見舊唐書桓彥範傳

張著作漪

唐故朝散大夫著作郎張府君墓誌銘。另見耆舊碑誌卷

清繆荃孫藝風堂集唐著作郎張漪墓誌跋。按舊唐書張柬之傳云。柬之特授襄州刺史。又拜其子漪為著作郎。令隨父之任。東之至襄州。有鄉親舊交抵罪者。必深文致法。無所縱舍。子漪

恃以立功。每見諸少長。不以禮接。時議以爲不能易。荆楚之剽性焉。此志云。疾君蠹政。上害苗書。是漪亦錚錚有聲者。向非此志之顯於後代。漪亦徒有惡名矣。

張著作遺著

今存對策一首

長才廣度。沉迷下僚。對策

證聖元年

問四岳疇庸。羲和代掌其任。九官命職。稷禹不易其能。逢化久以康時。籍功深而成務。洎乎嬴劉以降。曹馬承流。罕爲官以擇人。直循資而就列。或十旬而登三事。或一日而致九遷。遂開趨競之門。莫守代工之美。國家網羅羣彥。驅駕時英。其政治於至和。其人淳於太古。今欲削漢魏之遺法。復堯禹之遠圖。能其事

者。永守其官。稱其職者。不遷其任。增秩賜爵。用申勸善之規。金帛璽書。載表優賢之義。變通之理。尙或多端。用捨之途。佇聞良策。

對。昔者明王之御天下也。奉若天道。建邦設都。樹之以后。王化之以師長。用人弗及私昵。建官惟在賢才。夫難知非獨在於今日。故曰。知人則哲。惟帝難之。自生人以來。有國之主。莫不得賢則治。失賢則亂。此乃自然之義。百王不能易也。是知賢人君子。國之所急。詩曰。南山有臺。北山有萊。樂只君子。邦家之基。言人君得其賢臣。所以成其美化。廣其基業也。遐觀歷代聖王之求賢哲也。義匪一途。或精選以取之。或降訪以得之。有營之經載。

而始獲。有求之不日而便至。遲速之理雖異。輔弼之職不殊。黃帝勞於夢想而感力牧。誠之至也。唐堯務於疇咨而致夔龍。訪之審也。至唐虞之黜陟幽明。三考就績。夏禹之顧盼空谷。之疑起成名。殷宗託夢於傅巖。姬文遊心於渭水。此六君者。可謂勤於求賢而善於用人也。故能使元凱就績。申甫登朝。道濟五臣。功宣十亂。康良作誦。喜起成歌。人無險詖之情。代有雍熙之樂。由庚入詠。天保爲詩。下懷報主之心。上荷受天之祿。書曰。百僚師師。百工惟時。庶績其凝。此之謂也。斯並政符大道。理合至公。委質能臣之一德。所以天工可代。人爵攸宜。憑久化以濟寰瀛。藉深功而安宇宙。暨戰國之代。王道寢微。各佇英賢。或雜或霸。

楚襄勞持金之聘。燕昭躬擁篲之禮。空聞僭號之議。未覩升平之業。雖恒公之有仲父。晉侯之獲趙文。委任責成。共登霸道。唯勤鬪爭之理。不務淳和之績。而動乖王度。舉違帝典。故五尺童子。恥之不論。况所由齷齪。何其卑也。秦皇不仁。虐亂是極。儒生填於坑井。詩書滅於煙火。忠貞清白。以爲徒苦。諂佞邪媚。謂之至公。卒以覆亡。爲後代誠實由遠賢近佞。使之然也。漢高祖雖不好儒然。亦任用英傑。登壇而禮韓信。輟洗而迎酈生。委蕭曹以股肱。寄張陳以社稷。至孝武之代。儒學漸該。採董仲舒之策。始令郡國貢舉。於是賢良方正之士。霧委雲集。其晁錯公孫弘。匡衡蕭望之輩。並繼踵而至。故當文景之代。號爲得人。詩稱濟

濟多士。文王以寧。漢所以寧者。亦士之力也。光武仗吳鄧以立功。任賈寇以起事。拔奇取異。決自於心。爰至顯宗中興。於茲爲盛。由此而兩漢之代。數百年間。陟正黜邪。褒善貶惡。雖不襲唐虞之法。亦去煩芟亂。幾乎大成矣。逮獻靈之際。姦猾縱橫。升必以財。進不由道。於是縉紳潔白之士。疾之若讐。乃曰舉秀才不知書。察孝廉。父別居。寒素清白濁如泥。高第良將怯如龜。至乃懸爵而賣之。列價而爭之。守正道者以爲陸沉。由斜徑者謂之智變。衣冠爲之失序。賢哲由是潛藏。遂使社稷喪亡。後嗣覆滅。悲夫。此伐檀所以興刺。黍苗所以勞歌。無他故焉。賢人不得進也。及乎當塗啟運。典午開基。陳羣制九品之條。劉毅興八損之

權。故曹羲疾其闊遠。孫楚以爲鬼錄。遂令權要歸於中正。威福去於天朝。臧否任情。品藻乖次。宋齊之季。梁隋之末。聘士求賢。罕聞稽古。棟橈鼎折。唯見陵夷。旣同自鄙之譏。詎勞更僕之說。聖上覽百王之得失。立萬代之規模。大開舉爾之科。廣陳訓迪之典。用與不用。賢否各稱其能。材與不材。輪楫並當其任。小人去位。疾之猶若寇讐。君子盈朝。求之恒如不及。故得百僚無濫。九有昇平。不聞濡翼之譏。永絕爛頭之誚。仲長亡越級之論。賈生無調下之悲。今欲遠服堯禹之蹤。近棄劉曹之法。增秩令其永任。錫帛許其不遷。使官不易能。職遵代掌。雖優賢之義。有所會通。而隨時之談。或恐未可。何則。太古敦朴。務靜人希。敦朴則

易淳。務靜人希則易理。故不勞而功可就。今聖明撫運才多俗阜。俗阜則事煩。才多則理劇。必資明哲。獨任不以避嫌。但使委得其人。數遷何妨化理。如其用失其理。久任豈廢功虧。愚管所窺。以爲如此。大體期於不濫。所務在於得賢。倘違此途。未知其可。謹對。

右見文苑英華

上聖麻封事

上害苗書

右二首見張著作墓誌銘今并佚

附錄

唐陳子昂爲張著作謝父官表。臣某言。臣父某守官不謹。獲罪自躬。犯非清廉。法宜不赦。實由臣爲子不孝。使父陷刑。天恩不肅嚴科。放全首領。臣得父子相見。已是非圖。豈謂天澤無涯。更垂休命。臣父子兄弟。免罪從榮。載惶載殞。實慶實躍。中謝。臣父子凡品。守道幽微。天恩矜憫。見垂采錄。叨承恩幸。側列陪臣。自侍奉已來。於今十有八載。雖業藝無紀。勞動不聞。小心恭勤。實免愆過。明明昊天。實昭實察。不敢有二。不敢有私。夙夜兢兢。祇惕若厲。所以父母兄弟。皆荷恩私。叨職謬官。並豫供奉。摩頂至趾。豈足上酬。愚臣兢兢。實慚實悚。不意臣父衰羸。恃寵忘公。貪潤微財。取犯朝憲。應是臣不忠不孝。

事父無良。廉恥不羞。幾諫有闕。遂使陷於刑法。有玷國章。臣之萬死。無補此責。刻肌刻骨。泣血泣天。恨負聖恩。以媿朝列。臣宜代父蒙罪。自殞闕庭。不合偷安。尚求苟免。誠以天波昭洗。得更自新。所以忍垢偷生。尅躬自勵。期効萬一。補過酬恩。灰軀糜骨。以甘心願。伏惟神皇陛下。恩同父母。矜照懇誠。信其赤心。實有罄竭。

見唐陳正字集

固安文獻志卷七目錄

耆舊事彙

唐

張刺史知謇

祀鄉賢

張侍郎知默

張刺史弟

張燕公說

上

固安文獻志卷七

天津徐世昌鑒定

縣人賈廷琳謹編

耆舊事彙

唐

張刺史知謩

新唐書張知謩本傳張知謩字匪躬幽州方城人徙家岐兄弟五人知玄知晦知泰知默皆明經高第曉吏治清介有守公卿爭為引重調露時知謩監察御史裏行知默左臺侍御史知謩歷十一州刺史所莅有威嚴武后降璽書存問萬歲通天中自德州刺史入計后奇其貌詔工圖之稱其兄弟容而才謂之兩

絕又門皆列戟。白雀巢其廷。后數寵賜。知泰歷益州長史。中臺左丞。兵部侍郎。封陳留縣公。中宗在房州。禁察苛嚴。知謩與董玄質。崔敬嗣。繼爲刺史。供擬保戴不少弛。帝復位。拜知謩左衛將軍。加雲麾將軍。封范陽郡公。知泰御史臺大夫。加銀青光祿大夫。封漁陽郡公。伯仲華首同貴。時以爲榮。知泰忤武三思。故出爲并州刺史。天兵軍使。終魏州刺史。謚曰定。知謩歷東都副留守。左右羽林大將軍。同華州刺史。大理卿。致仕。年八十。開元時卒。知謩敏且亮。惡請謁求進士。或不才冒位。視之若仇。每敕子孫。經不明不得舉。家法可稱云。武后革命。知泰奏置東都諸關十七所。譏歛出入。百姓驚駭。樵米踊貴。卒罷不用。議者羞薄。

之。知默與監察御史王守慎來俊臣周興掌詔獄。數陷大臣。守慎雖其甥。惡鞠引之暴。不得去。請度爲浮屠。后許之。而知默卒陷酷吏。子孫禁錮。爲張氏羞。知立子景昇。知泰子景佚。開元中

皆顯官。按張景佚以都水使者開元九年郭知運薨命護其葬見張燕公集

舊唐書良吏傳張知謩。幽州方城人也。原作蒲州河東人依新唐書改徙家于岐。

少與兄知立知晦。弟知泰知默。五人勵志讀書。皆以明經擢第。儀質瓌偉。眉目疏朗。曉於立理。清介自守。故當時名公爭引薦之。遞歷畿赤。知謩知泰知默調露後。又歷臺省。知謩天授後。歷房和舒延德定稷晉洛宣貝十一州刺史。所蒞有威嚴。人不敢犯。通天中。知泰爲洛州司馬。知默爲秋官郎中。知謩自德州入

絕又門皆列戟。白雀巢其廷。后數寵賜。知泰歷益州長史。中臺左丞。兵部侍郎。封陳留縣公。中宗在房州。禁察苛嚴。知謩與董玄質。崔敬嗣。繼為刺史。供擬保戴不少弛。帝復位。拜知謩左衛將軍。加雲麾將軍。封范陽郡公。知泰御史臺大夫。加銀青光祿大夫。封漁陽郡公。伯仲華首同貴。時以為榮。知泰忤武三思。故出為并州刺史。天兵軍使。終魏州刺史。謚曰定。知謩歷東都副留守。左右羽林大將軍。同華州刺史。大理卿。致仕。年八十。開元時卒。知謩敏且亮。惡請謁求進士。或不才冒位。視之若仇。每敕子孫。經不明不得舉。家法可稱云。武后革命。知泰奏置東都諸關十七所。譏歛出入。百姓驚駭。樵米踊貴。卒罷不用。議者羞薄

之。知默與監察御史王守慎來俊臣周興掌詔獄。數陷大臣。守慎雖其甥。惡鞠引之暴。不得去。請度為浮屠。后許之。而知默卒陷酷吏。子孫禁錮。為張氏羞。知玄子景昇。知泰子景佚。開元中

皆顯官。

按張景佚以鄆水使者開元九年郭知運莫命謚其非見張燕公集

舊唐書良吏傳張知謩。幽州方城人也。

原作蒲州河東人依新唐書改

徙家于岐。

少與兄知玄知晦。弟知泰知默。五人勵志讀書。皆以明經擢第。儀質瓌偉。眉目疏朗。曉於玄理。清介自守。故當時名公爭引薦之。遞歷畿赤。知謩知泰知默調露後。又歷臺省。知謩天授後。歷房和舒延德定稷晉洛宣貝十一州刺史。所蒞有威嚴。人不敢犯。通天中。知泰為洛州司馬。知默為秋官郎中。知謩自德州入

計則天重其才幹。又目其狀貌過人。命畫工寫之。以賜其本。曰。人或有才。未必有貌。卿家昆弟。可謂兩絕。時人稱之。尋以知泰爲夏官地官侍郎。益州長史。中臺右丞。初知謩爲房州時。中宗以廬陵王安置房州。制約甚急。知謩與董玄質崔敬嗣相次爲刺史。皆保護供擬豐贍。中宗德之。及神龍元年。中宗踐極。自貝州追知謩爲左衛將軍。加雲麾將軍。封范陽郡公。知泰自兵部侍郎。授右御史大夫。加銀青光祿大夫。進封漁陽郡公。鬚髮華皓。同貴於朝。時望甚美之。知泰以忤武三思出爲并川刺史。天平軍使。仍帶本官。尋又爲魏州刺史。景龍二年卒。優詔褒贈。諡曰定。時知謩爲洛州長史。東都副留守。又歷左右羽林大將軍。

同華州刺史。大理卿。致仕。開元中卒。年八十。知謩敏於從政。性亮直。不喜有請託求進。無才而冒位者。故子姪經義不精。不許論舉。知謩嘗與來俊臣周興等同掌詔獄。陷於酷吏。子孫禁錮。開元中皆至大官。門列棨戟。

清徐松唐兩京城坊考。唐左衛將軍范陽郡公張知謩宅。在東京定鼎門街東第三街。從南第一之尙賢坊。

張侍郎知謩

舊唐書中宗紀。神龍元年三月丁亥。廢左右司員外郎。其酷吏張知謩等十八人。雖已身死。竝宜除名。

又立宗紀開元十三年三月丙申御史大夫程行誥奏周朝酷吏張知默等二十三人殘害宗枝毒陷良善情狀尤重子孫不許仕宦

又徐有功傳時酷吏周興來俊臣等構陷無辜皆抵極法公卿震恐莫敢正言有功獨存平恕俄而鳳閣侍郎任知古冬官尙書裴行本等七人被構陷當死則天謂公卿曰古人以殺止殺我令以恩止殺就羣公乞知古等錫以再生各授以官佇申來效俊臣張知默等又抗表請申大法則天不許之俊臣乃獨引行本重驗前臯奏曰行本潛行悖逆告張知蹇按蹇與蹇通與廬陵王反不實臯當處斬有功駁奏行本竟以免死

又隱逸王守慎傳守慎垂拱中爲監察御史時羅織事起守慎舅秋官侍郎張知默推詔獄奏守慎同知其事守慎以疾辭因請爲僧

張燕公說上

舊唐書張說本傳張說字道濟其先范陽方城二字據張燕公集及張曲江集增人

代居河東近又徙家河南之洛陽弱冠應詔舉對策乙第授太子校書累轉右補闕預修三教珠英久視年則天幸三陽宮自夏涉秋不時還都說上疏諫曰陛下屯萬乘幸離宮暑退涼歸未降還旨愚臣固陋恐非良策請爲陛下陳其不可三陽宮去洛城一百六十里有伊水之隔崿阪之峻過夏涉秋水潦方積

道壞山險。不通轉運。河廣無梁。咫尺千里。扈從兵馬。日費資給。連雨彌旬。即難周濟。陛下太倉武庫。竝在都邑。紅粟利器。蘊若山邱。奈何去宗廟之上都。安山谷之僻處。是猶倒持劍戟。示人鋒柄。臣竊爲陛下不取。夫禍變之生。在人所忽。故曰安樂必戒。無行所悔。此不可止之理一也。宮城褊小。萬方輻湊。填城溢郭。併鋪無所。排斥居人。蓬宿草次。風雨暴至。不知庇託。孤惇老病。流轉衢巷。陛下作人父母。將若之何。此不可止之理二也。池亭奇巧。誘掖上心。削巒起觀。竭流漲海。俯貫地脈。仰出雲路。易山川之氣。奪農桑之土。延木石。運斧斤。山谷連聲。春夏不輟。勸陛下作此者。豈正人邪。詩云。人亦勞止。汽可小康。此不可止之理

三也。御苑東西二十里。所出入來往。裸人甚多。外無墻垣局禁。內有榛藜谿谷。猛獸所伏。暴慝是憑。陛下往往輕行。警蹕不肅。歷蒙密。乘嶮巖。卒然有逸獸狂夫。驚犯左右。豈不殆哉。雖萬全無疑。然人主之動。不宜易也。易曰。思患預防。願陛下爲萬姓持重。此不可止之理四也。今國家北有胡寇。覲邊。南有夷獠。騷徼。關西小旱。耕稼是憂。安東近平。輸漕方始。臣願陛下及時旋軫。深居上京。息人以展農。修德以來遠。罷不急之役。省無用之費。澄心澹懷。惟億萬年。蒼蒼羣生。莫不幸甚。臣自度芻議。十不一從。何者。沮盤遊之娛。間林沚之玩。規遠圖而替近適。要後利而奔前歡。未沃明主之心。已戾貴臣之意。然臣血誠密奏。而不愛

死者。不願負陛下言責之職耳。輕觸天威。伏地待罪。疏奏不省。長安初。修三教珠英畢。遷右史。內供奉。兼知考功。貢舉事。擢拜鳳閣舍人。時臨臺監張易之。與其弟昌宗。構陷御史大夫魏元忠。稱其謀反。引說令證其事。說至御前。揚言元忠實不反。此是易之誣構耳。元忠由是免誅。說坐忤旨。配流欽州。在嶺外歲餘。中宗即位。召拜兵部員外郎。累轉工部侍郎。景龍中。丁母憂去職。起復授黃門侍郎。累表固辭。言甚切至。優詔方許之。是時風教類紊。多以起復爲榮。而說固節。懇辭竟終其喪制。大爲識者所稱。服終復爲工部侍郎。俄拜兵部侍郎。加弘文館學士。睿宗即位。遷中書侍郎。兼雍州長史。景雲元年秋。譙王重福於東都

構逆而死。留守捕繫枝黨數百人。考訊結構之狀。經時不決。睿宗令說往按其獄。一宿捕獲重福謀主張靈均鄭愔等。盡得其情狀。自餘枉被繫禁者。一切釋放。睿宗勞之曰。知卿按此獄。不枉良善。又不漏罪人。非卿忠正。豈能如此。立宗在東宮。說與國子司業褚无量俱爲侍讀。深見親敬。明年同中書門下平章事。監修國史。是歲二月。睿宗謂侍臣曰。有術者上言。五日內有急兵入宮。卿等爲朕備之。左右相顧莫能對。說進曰。此是讒人設計。擬搖動東宮耳。陛下若使太子監國。則君臣分定。自然窺覷路絕。災難不生。睿宗大悅。即日下制。皇太子監國。明年又制。皇太子即帝位。俄而太平公主引蕭至忠崔湜等爲宰相。以說爲

不附己。轉爲尙書左丞。罷知政事。仍令往東都留司。說旣知太
平等陰懷異計。乃因使獻佩刀於玄宗。請先事討之。玄宗深嘉
納焉。及至忠等伏誅。徵拜中書令。封燕國公。賜實封二百戶。其
冬改易官名。拜紫微令。自則天末年。季冬爲潑寒胡戲。中宗嘗
御樓觀之。自是因蕃夷入朝。又作此戲。說上疏諫曰。臣聞韓宣
適魯。見周禮而歎。孔子會齊。數倡優之罪。列國如此。况天朝乎。
今外蕃請和。選使朝謁。所望接以禮樂。示以兵威。雖曰戎夷不
可輕易。焉知無駒支之辯。由余之賢哉。且潑寒胡未聞典故。裸
體跣足。盛德何觀。揮水投泥。失容斯甚。法殊魯禮。褻比齊優。恐
非干羽柔遠之義。樽俎折衝之禮。自是此戲乃絕。俄而爲姚崇

所構。出爲相州刺史。仍充河北道按察使。俄又坐事左轉岳州
刺史。仍停所食實封三百戶。遷右羽林將軍。兼檢校幽州都督。
開元七年。檢校并州大都督府長史。兼天兵軍大使。攝御史大
夫。兼修國史。仍齎史本隨軍修撰。八年秋。朔方大使王晙誅河
曲降虜阿布思等千餘人。時并州大同橫野等軍。有九姓同羅
拔曳固等部落。皆懷震懼。說率輕騎二十人。持旌節直詣其部
落。宿于帳下。召酋帥以慰撫之。副使李憲以爲夷虜難信。不宜
輕涉不測。馳狀以諫。說報書曰。吾肉非黃羊。必不畏喫。血非野
馬。必不畏刺。士見危致命。是吾效死之秋也。於是九姓感義。其
心乃安。九年四月。胡賊康待賓率衆反。據長泉縣。自稱葉護。攻

陷蘭池等六州。詔王峻率兵討之。仍令說相知經畧。時叛胡與党項連結。攻銀城連谷。以據倉糧。說統馬步萬人。出合河關。掩擊。大破之。追至駱駝堰。胡及党項自相殺阻。夜胡乃西遁。入鐵建山。餘黨潰散。說召集党項。復其居業。副使史獻請因此誅党項。絕其翻動之計。說曰。先王之道。推亡固存。如盡誅之。是逆天道也。因奏置麟州。以安置党項餘燼。其年拜兵部尙書同中書門下三品。仍舊修國史。明年又敕說爲朔方軍節度大使。往巡五城。處置兵馬。時有康待賓餘黨。慶州方渠降胡康願子。自立爲可汗。舉兵反。謀掠監牧馬。西涉河出塞。說進兵討禽之。并獲其家屬於木盤山。送都斬之。其黨悉平。獲男女三千餘人。於是

移河曲六州殘胡五萬餘口。配許汝唐鄧仙豫等州。始空河南朔方千里之地。說以討賊功。復賜實封二百戶。先是緣邊鎮兵常六十餘萬。說以時無強寇。不假師衆。奏罷二十餘萬。勒還營農。玄宗頗以爲疑。說奏曰。臣久在疆場。具悉邊事。軍將但欲自衛。及襍使營私。若禦敵制勝。不在多擁閑冗。以防農務。陛下若以爲疑。臣請以闔門百口爲保。以陛下之明。四夷畏伏。必不慮減兵而招寇也。上乃從之。時當番衛士。浸以貧弱。逃亡畧盡。說又建策。請一切召募強壯。令其宿衛。不簡色役。優爲條例。逋逃者必爭來應募。上從之。旬日得精兵一十三萬人。分繫諸衛。更番上下。以實京師。其後曠騎是也。是歲玄宗將還京。而便幸并

州。說進言曰。太原是國家王業所起。陛下行幸。振威耀武。并建碑紀德。以申永思之意。若便入京。路由河東。有漢武脍上后土之祀。此禮久闕。歷代莫能行之。願陛下紹斯墜典。以爲三農祈穀。此誠萬姓之福也。上從其言。及祀后土禮畢。說代張嘉貞爲中書令。夏四月。玄宗親爲詔曰。動惟直道。累聞獻替之誠。言則不諛。自得謀猷之體。政令必俟其增損。圖書又藉其刊削。才望兼著。理合褒升。考中上。說又首建封禪之議。十三年。受詔與右散騎常侍徐堅。太常少卿韋縉等。撰東封儀注。舊儀不便者。說多所裁正。語在禮志。玄宗尋召說及禮官學士等。賜宴於集仙殿。謂說曰。今與卿等賢才同宴於此。宜改名爲集賢殿。因下制。

改麗正書院爲集賢殿書院。授說集賢院學士。知院事。及將東封。授說爲右丞相兼中書令。源乾曜爲左丞相兼侍中。蓋勸成。岱宗以明宰相佐成王化也。說又撰封禪壇頌以紀聖德。初源乾曜本意不欲封禪。而說因贊其事。由是頗不相平。及登山。說引所親攝供奉官及主事等從升。加階超入五品。其餘官多不得上。又行從兵士。惟加勳不得賜物。由是頗爲內外所怨。先是御史中丞宇文融獻策。請括天下逃戶。及藉外贖田。置十道勸農使。分往檢察。說嫌其擾人。不使數建議違之。及東封還。融又密奏分吏部置十銓。融與禮部尙書蘇頌等分掌選事。融等每有奏請。皆爲說所抑。由是銓綜失敘。融乃與御史大夫崔隱甫。

中丞李林甫。奏彈說引術士夜解及受贓等狀。敕宰臣源乾曜。刑部尚書韋抗。大理少卿胡珪。御史大夫崔隱甫。就尚書省鞫問。說兄左庶子光詣朝堂割耳稱寃。時中書主事張觀。左衛長史范堯臣。並依倚說勢。詐假納賂。又私度僧王慶則。往來與說占卜吉凶。爲隱甫等所鞫伏罪。說經兩宿。玄宗使中官高力士視之。迴奏說坐於草上。於瓦器中食蓬首垢面。自罰憂懼之甚。玄宗憫之。力士奏曰。說曾爲侍讀。又於國有功。玄宗然其奏。由是停兼中書令。觀及慶則決杖而死。連坐遷貶者十餘人。隱甫及融等恐說復用爲己患。又密奏毀之。明年詔說致仕。仍令在家修史。初說爲相時。玄宗意欲討吐蕃。說密奏許其通和。以息

邊境。玄宗不從。及瓜州失守。王君奭死。說因獲鶴州鬪羊。上表獻之。以申諷諭。其表臣聞勇士冠雞。武夫戴鶡。推情舉類。獲此鬪羊。遠生越鶩。蓄性剛決。敵不避強。戰不顧死。雖爲微物。志不可挫。伏惟陛下。選良家於六郡。求猛士於四方。鳥不遁才。獸不藏伎。如蒙效奇靈圃。角力天場。卻鼓怒以作氣。前躑躅以奮擊。跌若奔雲之交觸。碎如轉石之相叩。裂骨賭勝。濺血爭雄。敢毅見而衝冠。鷲狼聞而擊節。冀將少助明主。市駿骨揖怒蛙之意也。若使羊能言。必將曰。若鬪不解。立有死者。所賴至仁無殘量。力取勸焉。臣緣損足。未堪履地。謹遣男詣金明門奉進。玄宗深悟其意。賜絹及襪彩一千匹。十七年復拜尚書左丞相。集賢院

國朝文獻志
學士。尋代源。乾曜爲尙書左丞相。視事之日。上敕所司供帳。設音樂。內出酒食。御製詩一篇以叙其事。尋以修謁陵儀注功。加開府儀同三司。時長子均爲中書舍人。次子均尙寧親公主。拜駙馬都尉。又特授說兄慶王傅。光爲銀青光祿大夫。當時榮寵莫與爲比。十八年遇疾。玄宗每日令中使問疾。並手寫藥方賜之。十二月薨。時年六十四。上憫惻久之。遽於光順門舉哀。因罷十九年元正朝會。詔曰。宏濟艱難。參其功者。時傑。經緯禮樂。贊其道者。人師。式瞻而百度。允釐既往。而千載貽範。台衡軒鼎。垂黼藻於當今。徽策寵章。播芳蕤於後葉。故開府儀同三司尙書左丞相集賢院學士知院事上柱國燕國公張說。辰象降靈。雲

龍合契。元和體其冲粹。妙有釋其至蹟。挹而莫測。仰之彌高。精義探繫。表之微。英辭鼓天下之動。昔侍春誦。綢繆歲華。含春容之聲。叩而盡應。蘊泉源之智。啟而斯沃。授命興國。則天衢以通。濟用和民。則朝政惟允。司鈞總六官之紀。端揆爲萬方之式。方弘風緯俗。返本於上古之初。而邁德振仁。不臻於中壽之福。於嗟不慙。旣喪斯文。宣室餘談。泠然在耳。王殿遺草。宛留其蹟。言念忠賢。良深震悼。是使當宁撫几。臨樂徹懸。罷稱觴之儀。遵往襚之禮。可贈太師。賜物五百段。始玄宗在東宮。說已蒙禮遇。及太平用事。儲位頗危。說獨排其黨。請太子監國。深謀密畫。竟清內難。遂爲開元宗臣。前後三秉大政。掌文學之任。凡三十年。爲

文俊麗。用思精密。朝廷大手筆。皆特承中旨。撰述天下詞人。咸諷誦之。尤長於碑文墓誌。當代無能及者。喜延納後進。善用已長。引文儒之士。佐佑王化。當承平歲久。志在粉飾盛時。其封泰山。祠睢上。謁五陵。開集賢。修太宗之政。皆說爲倡首。而又敦氣義。重然諾。於君臣朋友之際。大義甚篤。時中書舍人徐堅。自負文學。常以集賢院學士。多非其人。所司供膳太厚。嘗謂朝列曰。此輩於國家何益。如此虛費。將建議罷之。說曰。自古帝王功成。則有奢縱之失。或興池臺。或玩聲色。今聖上崇儒重道。親自講論。刊正圖書。詳延學者。今麗正書院。天子禮樂之司。永代規模。不易之道也。所費者細。所益者大。徐子之言。何其隘哉。玄宗知之。由是薄堅。說旣遭訕。樂罷知政事。專集賢文史之任。每軍國大事。帝遣中使先訪其可否。說嘗自製其父贈丹州刺史隲碑文。玄宗聞之。而御書其碑額。賜之曰。嗚呼。積善之墓。有文集三十卷。太常謚議曰。文貞。左司郎中陽伯誠。駁議以爲不稱。工部侍郎張九齡立議。請依太常爲定。紛紜未決。玄宗爲說自製神道碑文。御筆賜謚曰。文貞。繇是方定。

史臣曰。張燕公解逢掖而登將壇。驅貔虎之師。斷獯戎之臂。暨居衡軸。克致隆平。可謂武緯文經。惟申與甫而已。惜乎均堦務速。失節賊庭。自武德已來。稱賢相者。房杜姚宋四公。皆遭無賴子弟。汗圯先業。非獨燕國之不幸也。

新唐書張說本傳張說字道濟或字說之其先自范陽方城

字二

亦據曲江集等增徙河南更為洛陽人永昌中武后策賢良方正詔吏部

尚書李景謚糊名較覆說所對第一后署乙等授太子校書郎

遷左補闕后嘗問諸儒言氏族皆本炎黃之裔則上古乃無百

姓乎若為朕言之說曰古未有姓若夷狄然自炎帝之姜黃帝

之姬始因所生地而為之姓其後天子建德因生以賜姓黃帝

二十五子而得姓者十四德同者姓同德異者姓殊其後或以

官或以國或以王父之字始為賜族久乃為姓降唐虞抵戰國

姓族漸廣周衰列國既滅其民各以舊國為之氏下及兩漢人

皆有姓故姓之以國者韓陳許鄭魯衛趙魏為多后曰善久視

中后道暑三陽宮汽秋未還說上疏曰宮距洛城百六十里有

伊水之隔嶧坂之峻過夏涉秋水潦方積道壞山險不通轉運

河廣無梁咫尺千里扈從兵馬日費資饟太倉武庫並在都邑

紅粟利器蘊若山邱奈何去宗廟之上都安山谷之僻處是猶

倒持劍戟示人罇柄臣竊為陛下不取夫禍變之生在人所忽

故曰安樂必戒無行所悔不可一也告成編小萬方輻湊填郭

溢郭併錡無所排斥居人蓬宿草次風雨暴至不知庇託孤惇

老病流轉衢巷陛下作人父母將若之何不可二也池亭奇巧

蕩誘上心削巒起觀竭流漲海俯貫地脈仰出雲路易山川之

氣奪農桑之土延木石運斧斤山谷連聲春夏不輟勸陛下作

此者豈正人邪。詩云。人亦勞止。迄可小康。不可三也。御苑東西二十里。外無牆垣局禁。內有榛叢谿谷。猛獸所伏。暴慝所憑。陛下往往輕行。警蹕不肅。歷蒙密。乘險幘。卒有逸獸狂夫。驚犯左右。豈不殆哉。易曰。思患豫防。願爲萬姓持重。不可四也。今北有胡寇。覲邊。南有夷獠。騷徼。關西小旱。耕稼是憂。安東近平。輸漕方始。臣願及時旋軫。深居上京。息人以展農。修德以來遠。罷不急之役。省無用之費。澄心澹懷。惟億萬年蒼蒼羣生。莫不幸甚。臣度芻議十不從一。何者。沮盤游之娛。閒林沚之玩。規遠圖。替近適。要後利。棄前歡。未沃明主之心。已振貴臣之意。然不愛死者。懼言責不職耳。后不省擢鳳閣舍人。張易之誣陷魏元忠也。

援說爲助。說廷對元忠無不順言。忤后旨。流欽州。中宗立。召爲兵部員外郎。累遷工部兵部二侍郎。以母喪免。既葬。詔起爲黃門侍郎。固請終制。祈陳哀到。時禮俗衰薄。士以奪服爲榮。而說獨以禮終。天下高之。除喪復爲兵部。兼修文館學士。睿宗即位。擢中書侍郎。兼雍州長史。譙王重福。以東都支黨數百人。獄久不決。詔說往按。一昔而罪人得。乃誅張靈均。鄭愔。餘註誤。悉原。帝嘉其不枉直。不漏惡。慰勞之。玄宗爲太子。說與褚无量侍讀。尤見親禮。踰年。進同中書門下平章事。監修國史。景雲二年。帝謂侍臣曰。術家言五日內有急兵入宮。爲我備之。左右莫對。說進曰。此讒人謀動東宮耳。陛下若以太子監國。則名分定。姦膽

破蜚禍塞矣。帝悟。下制如說言。明年皇太子卽皇帝位。太平公
主引蕭至忠崔湜等爲宰相。以說不附已。授尙書左丞。罷政事。
爲東都留守。說知太平等懷逆。乃因使以佩刀獻玄宗。請先決
策。帝納之。至忠等已誅。召爲中書令。封燕國公。實封二百戶。始
武后末年。爲潑寒胡戲。中宗嘗乘樓縱觀。至是因四夷來朝。復
爲之。說上疏曰。韓宣適魯。見周禮而歎。孔子會齊。數倡優之罪。
列國如此。况天朝乎。今四夷請和。使者入謁。當接以禮樂。示以
兵威。雖曰戎夷。不可輕也。焉知無駒支之辯。由余之賢哉。且乞
寒潑胡。未聞典故。裸體跳足。汨泥揮水。盛德何觀焉。恐非干羽
柔遠。樽俎折衝之道。納之。自是遂絕。素與姚元崇不平。罷爲相。

州刺史。河北道按察使。坐累徙岳州。停實封。說旣失執政意。內
自懼。雅與蘇瓌善。時瓌子頌爲相。因作五君詠獻頌。其一紀瓌
也。候瓌忌日致之。頌覽詩嗚咽。未幾見帝。陳說忠謇有勳。不宜
棄外。遂遷荊州長史。俄以右羽林將軍。檢校幽州都督。入朝。以
戎服見。帝大喜。授檢校并州長史。兼天兵軍大使。修國史。敕齋
橐。即軍中論譔。朔方軍大使王峻誅河曲降虜阿布思也。九姓
同羅拔野固等皆疑懼。說持節從輕騎二十。直詣其部。宿帳下。
召見酋豪慰安之。副使李憲以虜難信。不宜涉不測。說報曰。吾
肉非黃羊。不畏其食。血非野馬。不畏其刺。士當見危致命。亦吾
效死秋也。由是九姓遂安。峻後討蘭池叛胡康待賓。詔說相聞。

經略。時党項羌亦連兵攻銀城。說將步騎萬人出合河關掩擊破之。追北駱党堰。彊胡自相猜夜鬪。待賓遁入鐵建山。餘衆奔潰。說招納駝項使復故處。副使史獻請盡誅之。說不從。奏置麟州以安羌衆。召拜兵部尙書。同中書門下三品。讓宋璟陸象先不許。明年詔爲朔方節度大使。親行五城督士馬。時慶州方渠降胡康願子反。自爲可汗。掠牧馬。西涉河出塞。說進討。至木槃山禽之。俘獲三千。乃議徙河曲六州殘胡五萬於唐鄧仙豫間。空河南朔方地。以功賜實封三百戶。故時邊鎮兵羸六十萬。說以時平無所事。請罷二十萬還農。天子以爲疑。說曰。邊兵雖廣。諸將自衛營私爾。所以制敵不在衆也。以陛下之明。四夷畏威。

不慮減兵而招寇。臣請以闔門百口爲保。帝乃可。時衛兵貧弱。番休者亡命略盡。說建請一切募勇彊士。優其科條。簡色役。不旬日得勝兵十三萬。分補諸衛。以彊京師。後所謂曠騎者也。帝自東都將還京。因幸并州。說見帝曰。太原王業所基。陛下巡幸。振耀威武。以申永思。絲河東入京師。有漢武雎上祠。此禮廢闕。歷代莫舉。願爲三農祚穀。誠四海之福。帝納其言。過祠后土。乃還。進中書令。說又倡封禪議。受詔與諸儒草議。多所裁正。帝召說與禮官學士置酒集仙殿。曰。朕今與賢者樂于此。當遂爲集賢殿。乃下制改麗正書院爲集賢殿書院。而授說院學士知院事。東封還爲尙書右丞相兼中書令。詔說撰封禪壇頌。刻之泰

山以夸成功。初源乾曜不欲封禪。說固請。乃不相平。及升山執事。官當從者。說皆引所厚。超階入五品。從兵唯加勳而不賜衆。怨其專。宇文融先獻策。括天下游戶及籍外田。署十道勸農使。分行郡縣。說畏其擾。數沮格之。至是融請吏部置十銓。與蘇頲等分治選事。有所論請。說頗抑之。於是銓綜失敘。融恨之。乃與崔隱甫、李林甫共劾奏說。引術士王慶則夜祠禱解。而奏表其間。引僧道岸窺訶時事。冒署右職。所親吏張觀、范堯臣依據說勢。市權招賂。擅給太原九姓羊錢千萬。其言醜慘。帝怒。詔乾曜、隱甫、刑部尚書韋抗。卽尚書省鞠之。發金吾兵圍其第。說兄左庶子光詣朝堂。刑耳列冤。帝遣高力士往視。見說蓬首垢面。席

橐。家人以瓦器饋脫粟鹽蔬。爲自罰憂懼者。力士還奏。且言說往納忠。於國有功。帝憮然。乃停說中書令。誅慶則等。坐者猶十餘人。說旣罷政事。在集賢院專修國史。又乞停右丞相。不許。然每軍國大務。帝輒訪焉。隱甫等恐說復用。巧文詆毀。素忿說者。又著疾邪篇。帝聞。因令致仕。始爲相時。帝欲事吐蕃。說密請講和。以休息鄯塞。帝曰。朕待王君奭計之。說出告源乾曜曰。君奭好兵以求利。彼入吾言不用矣。後君奭破吐蕃於青海西。說策其且敗。因上嵩州鬪羊於帝。以申諷諭。曰。使羊能言。必將曰。鬪而不解。立有殛者。所賴至仁無殘。量力取歡焉。帝識其意。納之。賜綵千匹。後瓜州失守。君奭歿。十七年復爲右丞相。遷左丞相。

國朝文獻志
上日敕所司供帳設樂內出醪饌。帝爲賦詩俄授開府儀同三司。十八年卒。年六十四。爲停正會。贈太師。謚曰文貞。羣臣駭異未決。帝爲製碑。謚如太常。繇是定。說敦氣節。立然許。喜推藉。後進於君臣朋友。大義甚篤。帝在東宮。所與祕謀密計甚衆。後卒爲宗臣。朝廷大述。作多出其手。帝好文辭。有所爲。必使視草。善用人之長。多引天下知名士。以佐佑王化。粉澤典章。成一王法。天子尊尚經術。開館置學士。修太宗之政。皆說倡之。爲文屬思精壯。長於碑誌。世所不逮。旣謫岳州。而詩益悽婉。人謂得江山助云。常典集賢圖書之任。閒雖致仕。一歲亦修史於家。始帝欲授說大學士。辭曰。學士本無大稱。中宗崇寵大臣。乃有之。臣不

敢以爲稱。固辭乃免。後宴集賢院。故事官重者先飲。說曰。吾聞儒以道相高。不以官閥爲先後。太宗時修史十九人。長孫无忌以元舅。每宴不冝先舉爵。長安中與修珠英。當時學士亦不以品秩爲限。於是引觴同飲。時伏其有體。中書舍人陸堅以學士或非其人。而供擬太厚。無益國家者。議白罷之。說聞曰。古帝王功成則有奢滿之失。或興池館。或尚聲色。今陛下崇儒向道。躬自講論。詳延豪俊。則麗正乃天子禮樂之司。所費細而所益者大。陸生之言。蓋未達邪。帝知遂薄堅。說嘗自爲其父碑。帝爲書其額。曰。嗚呼。積善之墓。說歿後。帝使就家錄其文行於世。開元後宰相不以姓著者。曰燕公云。大曆中詔配享玄宗廟廷。子均

增城。

贊曰。說於玄宗最有德。及太平用事。納忠惓惓。又圖封禪。發明典章。開元人物彬彬。說力居多。中為姦人排擯。幾不免。自古功名始終亦幾希。何獨說哉。至子以利遽敗其家。若蘇瓌蘇頌。再世稱賢宰相。盛矣。

〔舊唐書睿宗紀〕景雲二年春正月己未。太僕卿郭元振。中書侍郎張說。並同中書門下平章事。夏四月庚辰。張說為兵部侍郎。依舊同中書門下平章事。冬十月。兵部侍郎兼左庶子張說為尚書左丞。罷知政事。

〔又玄宗紀〕先天二年七月癸丑。尚書左丞新唐書作右丞張說為檢校中

書令。九月丁卯。檢校中書令燕國公張說為中書令。開元元

年十二月癸丑。紫微令張說為相州刺史。九年九月癸亥。右

羽林將軍權并州大都督府長史新唐書作天兵軍節度大使燕國公張說為兵

部尚書。同中書門下三品。十年閏五月壬申。兵部尚書張說

往朔方軍巡邊。九月。張說禽康願子於木盤山。詔移河曲六州

殘胡五萬餘口於許汝唐鄧仙豫等州。始空河南朔方千里之

地。十一年正月癸亥。兵部尚書張說兼中書令。夏四月癸亥。

張說正除中書令。十三年十一月。賜中書令張說為尚書右

丞相。兼中書令。十四年夏四月癸丑。御史中丞宇文融。與御

史大夫崔隱甫。彈尚書右丞兼中書令張說。鞫於尚書省。庚申

張說停兼中書令。十五年二月己巳。尚書右丞相張說。御史大夫崔隱甫。中丞宇文融。以朋黨相構。制說致仕。隱甫免官。侍母。融左遷魏州刺史。十六年八月己巳。特進張說進開元大衍曆。詔命有司頒行之。十七年二月庚子。特進張說復爲尚書左丞。十八年春正月辛卯。左丞相張說加開府儀同三司。十二月戊申。尚書左丞相燕國公張說薨。

又徐堅傳。堅與給事中徐彥伯。定王府倉曹劉知幾。右補闕張說。同修三教珠英。時麟臺監張昌宗。及成均祭酒李嶠。總領其事。廣引文詞之士。日夕談論賦詩聚會。歷年未能下筆。堅獨與說構意撰錄。以文思博要爲本。更加姓氏親族二部。漸有條彙。

諸人依堅等規制。俄而書成。

〔新唐書徐堅傳〕玄宗改麗正書院爲集賢院。以堅充學士。副張說知院事。帝大酺。集賢幔舍在百司上。說令揭大榜以侈其寵。堅見遽命徹之。曰。君子烏取多上人。

〔舊唐書張易之昌宗傳〕則天詔昌宗撰三教珠英於內。乃引文學之士。李嶠。閻朝隱。張說等二十六人。分門撰集。成一千三百卷上之。

〔又〕御史大夫魏元忠嘗奏二張之臯。易之懼不自安。乃誣奏元忠與司禮丞高戩云。天子老矣。當挾太子爲耐久朋。則天曰。汝何以知之。易之曰。鳳閣舍人張說爲證。翌日則天召元忠及說。

廷詰之皆妄。則天尙以二張之故。逐元忠爲高要尉。張說長流
欽州。

〔新唐書魏元忠傳〕時二張勢傾朝廷。元忠嘗奏其罪。易之等恨
怒。因武后不豫。即共譖元忠。遂下制獄。詔皇太子相王及宰相
引元忠等辨於廷。不能決。昌宗乃引張說爲證。說初僞許之。至
是。迫使言狀。不應。后又促之。說曰。臣不聞也。易之等遽曰。說與
同逆。說曩嘗謂元忠爲伊周。夫伊尹放太甲。周公攝王位。此反
狀明甚。說曰。易之昌宗安知伊周。臣乃能知之。伊尹周公歷古
以爲忠臣。陛下不遣學伊周將何效焉。說又曰。臣知附易之朝
夕可宰相。從元忠則族滅。今不敢面欺。懼元忠之冤。后寤其讒。

〔舊唐書朱敬則傳〕時御史大夫魏元忠鳳閣舍人張說爲張易
之兄弟所誣構。將陷重辟。諸宰相無敢言者。敬則獨抗疏申理
曰。元忠張說素稱忠正。而所坐無名。若令得罪。豈不失天下之
望也。乃得減死。

〔又宋璟傳〕璟當官正色。則天甚重之。長安中。倖臣張易之誣構
御史大夫魏元忠。有不順之言。引鳳閣舍人張說令證之。說將
入於御前對覆。惶惑迫懼。璟謂曰。名義至重。神道難欺。必不可
黨邪陷正。以求苟免。若緣犯顏流貶。芬芳多矣。或至不測。吾必
叩關救子。將與子同死。努力。萬代瞻仰。在此舉也。說感其言。及
入。乃保明元忠。竟得免死。

新唐書吳兢傳初與劉子玄撰定武后實錄敘張昌宗誘張說誣證魏元忠事頗言說已然可賴宋璟等邀勵苦切故轉禍爲忠不然皇嗣且殆後說爲相讀之心不善知兢所爲即從容謬謂曰劉生書魏齊公事不少假借奈何兢曰子玄已亡不可受誣地下兢實書之其草故在聞者歎其直說屢以情斬改辭曰徇公之情何名實錄卒不改世謂今董狐云

舊唐書后妃傳玄宗元獻皇后楊氏景雲元年八月選入太子宮時太平公主用事尤忌東宮太子心不自安后時方娠太子密謂張說曰用事者不欲吾多息胤恐禍及此婦人其如之何密令說懷去胎藥而入太子於曲室躬自煮藥醺然似寐夢神

人覆鼎既寤如夢如是者三太子異之告說說曰天命也無宜他慮既而太平誅后果生肅宗開元十七年后薨葬細柳原玄宗命說爲志文其銘云石獸澀兮綠苔黏宿草殘兮白露霑園寢閉兮脂粉膩不知何年開鏡奩

唐李德裕次柳氏舊聞玄宗之在東宮爲太平公主所忌朝夕伺察纖微聞於上而宮闈左右亦潛持兩端以附太平之勢時元獻皇后得幸方娠玄宗懼太平欲令服藥除之而無可與語者張說以侍讀得進太子宮中玄宗從容謀及說說亦密贊其事他日說又入侍因懷去胎藥三煮劑以獻玄宗得其藥喜盡去左右獨搆火殿中煮未及熟怠而假寐盼蠻之際有神人長

丈餘。身披金甲。操戈繞藥三匝。煮盡覆而無遺焉。玄宗起視異之。復增一人。又扶一劑煮于鼎中。因就榻瞬目以候之。而見神覆煮如初。凡三者皆覆乃止。明日說又至。告其詳。說降階拜賀曰。天所命也。不可去。厥後元獻皇后思食酸。玄宗亦以告說。說每因進經。輒袖木瓜以獻。故開元中說恩澤莫之與比。肅宗之於說。子均埒。若親戚昆弟云。史臣柳芳本張說所引。說嘗自陳述。與高力士詞協也。

新唐書后妃傳玄宗貞順皇后武氏帝即位寢得幸。將遂立皇后。御史潘好禮上疏曰。今人間咸言右丞相張說欲取立后功。圖復相。遂不果立。

又姚崇傳崇資權譎。始爲同州。張說以宿憾諷趙彥昭劾崇。及當國說懼。潛詣岐王申款。崇它日朝。衆趨出。崇曳踵爲有疾狀。帝召問之。對曰。臣損足。曰。無甚痛乎。曰。臣心有憂。痛不在足。問以故。曰。岐王陛下愛弟。張說輔臣。而密乘車出入王家。恐爲所誤。故憂之。於是出說相州。

唐李潛松窗雜錄姚崇爲相。忽一日對於便殿。舉左足不甚輕利。上曰。卿有足疾耶。崇曰。臣有腹心之疾。非足疾也。因前奏張說罪狀數百言。上怒曰。卿歸中書。宜宣與御史中丞共按其事。而說未之知。會朱衣吏報午後三刻。說乘馬先歸。崇急呼御史中丞李林甫以前詔付之。林甫語崇曰。說多智謀。是必困之。宜

國史文獻志
以劇地。崇構曰：丞相得罪未宜太偏。林甫曰：公必不忍耶。說當無害。林甫正將詔付於御史。中路以馬墜告假。說之未遭崇構也。前旬月有教授書生私通於侍婢最寵者。會擒得姦狀。以聞於說。說怒甚。將窮獄於京兆尹。書生厲聲曰：觀色不能禁。亦人之常情也。公貴爲相。豈無緩急方用人乎。斬於一婢女耶。說奇其言而釋之。以待兒與歸。書生一跳跡去。旬月餘無所聞知。忽一日直訪於說。憂色滿面。且言某感公之恩。思有謝者久之。今方聞公爲姚相國所構。外獄將具。公不知之。危將至矣。某願得公平生所寶者。用計於九公主。必能立釋之。說因自歷指狀所寶之物。書生告云：未足解公之難。又凝思久之。忽曰：近有雞林

郡夜明簾爲寄信者。書生曰：吾事濟矣。因請手札數行。懇以情言。遂急趨去。逮夜始及九公主邸第。書生具以說旨言之。兼用簾爲贊。且請公主曰：上獨不念在東宮時。思必始終恩加張丞相乎。而今反用快不利張丞相之心耶。明日公主入謁。具爲奏之。上感動。急命高力士就御史臺宣前所按事。並宜罷之。書生亦不再見張丞相矣。

唐語林 姚崇以拒太平公主爲申州刺史。玄宗深德之。太平旣誅。徵爲同州刺史。素與張說不叶。說諷趙彥昭彈之。玄宗不納。明何良俊世說新語補 姚崇與張說同爲宰輔。各懷疑阻。張銜之。崇病戒諸子曰：張丞相與吾釁隙甚深。然其人素懷奢侈。尤

好服玩。吾沒後來弔汝。具陳吾平生服玩寶帶重器羅列帳前。張若不顧。汝家族無類矣。若顧此當錄玩用致之。仍以神道碑爲請。既獲其文。登時錄進。先礮石以待。至便鐫刻。張丞相見事常遲。數日之後。必當有悔。若徵碑文。以刊削爲辭。當引視鐫石。仍告以聞上。崇沒張果至。目其服玩者三四。崇家悉如崇戒。不數日文成。敘致該詳。時謂極筆數日。果遣使取本。以爲辭未周密。欲加刪改。姚氏諸子引使者視其碑。仍告以奏御。使者復命。張悔恨撫膺曰。死姚崇能算生張說。吾今日方知才之不及遠矣。

舊唐書禮儀志開元十四年。通事舍人王岳上疏。請改撰禮記。

削去舊文。而以今事編之。詔付集賢院學士詳議。右丞張說奏曰。禮記漢朝所編。遂爲歷代不刊之典。今去聖久遠。恐難改易。今之五禮儀注。貞觀顯慶兩度所修。前後頗有不同。其中或未折衷。望與學士等更討論古今。刪改行用。制從之。

又元行沖傳。初有左衛率府長史魏光乘。奏請行用魏徵所注類禮。上遽令行沖集學者撰義疏。將立學官。行沖於是勒成五十卷。開元十四年八月奏上之。尚書左丞張說駁奏曰。今之禮記。是前漢戴德戴聖所編。錄歷代傳習。已向千年。著爲經教。不可刊削。至魏孫炎始改舊本。以類相比。有同抄書。先儒所非。竟不行用。貞觀中魏徵因孫炎所修。更加整比。兼爲之注。先朝雖

厚加賞錫。其書竟亦不行。今行冲等解徵所注。勒成一家。然與先儒第乖。章句隔絕。若欲行用。竊恐未可。上然其奏。於是賜行冲等絹二百匹。留其書貯於內府。竟不得立於學官。

〔又音樂志〕貞觀二年。太常少卿祖孝孫既定雅樂。至六年。詔褚亮。虞世南。魏徵等分制樂章。開元初。則中書令張說奉制所作。〔又曆志〕開元中。僧一行精諸家曆法。言麟德曆行用既久。晷緯漸差。宰相張說言之。玄宗召見。令造新曆。

〔又禮儀志〕玄宗即位。開元十一年十一月。親享園丘。時中書令張說爲禮儀使。衛尉少卿韋紹爲副。說建議。請以高祖神堯皇帝配祭。始罷三祖同配之禮。

〔又〕開元十二年。文武百僚朝集。請修封禪之禮。玄宗謙冲不許。中書令張說又累日固請。乃下制。以十三年十一月十日有事泰山。於是詔中書令張說等。與禮官於集賢書院刊撰儀注。玄宗初以靈山好靜。議用山下封祀之儀。於是張說等定議奏聞。上從之。及玄宗將作封禪之禮。張說等參定儀注。中書令張說執奏曰。徐堅等所議。燔柴前後。議有不同。據祭義及貞觀顯慶已後。既先燔。若欲正失禮。求祭義。請從貞觀禮。如且因循不改。更請從顯慶禮。凡祭者。本以心爲主。心至則通於天地。達於神祇。既有先燔。後燎。自可斷於聖意所至。則通於神明。燔之先後。臣等不敢裁定。玄宗令依後燔。及先奠之儀。四門助教施

敬本駁奏舊封禪禮八條。玄宗令張說徐堅召敬本與之對議。詳定。說等奏曰。敬本所議。其中四條。先已改定。有不同者。望臨時量事改攝。制從之。癸巳。中書令張說進稱天賜皇帝太一神策。周而復始。永綏兆人。帝拜稽首。

〔新唐書儒學施敬本傳〕敬本開元中爲四門助教。玄宗將封禪。詔有司講求典儀。帝詔中書令張說引敬本熟悉其議。

〔又隱逸王希夷傳〕及玄宗東巡。敕州縣以禮徵召。至駕前。年已九十六。上令中書令張說訪以道義。宦官扶入宮中。與語甚悅。〔舊唐書裴光庭傳〕開元十三年將有事於岱岳。中書令張說以大駕東巡。京師空虛。恐夷狄乘閒竊發。議欲加兵守邊。以備不

虞。召光庭謀兵事。光庭曰。封禪者所以告成功也。夫成功者恩德無不及。百姓無不安。萬國無不懷。今將告成而懼夷狄。何以昭德也。大興力役。用備不虞。且非安人也。方謀會同而阻戎心。又非懷遠也。有此三者。則名實乖矣。且諸蕃之國。突厥爲大。贄幣往來。願修恩好。有年矣。今茲遣一使徵其大臣赴會。必欣然應命。突厥受召。則諸蕃君長必相率而來。雖偃旗息鼓。高枕有餘矣。說曰善。吾所不及矣。因奏而行之。

〔又房瑄傳〕開元十二年。玄宗將封岱岳。瑄撰封禪書一篇。及牋啟以獻。中書令張說奇其才。奏授祕書省校書郎。

〔唐語林〕玄宗幸泰山回。車駕次上黨。過金橋。橋在潞州御路縈轉。上

見數千里旌旗嚴潔。羽衛整肅。謂左右曰。張說言我勒兵三十萬。旌旗千里。陝右上黨。止於太原。真才子也。左右皆稱萬歲。唐李潛松窗雜錄。自太和乙卯歲後。文宗不樂事。稍閒。則必有歎息之音。會幸三殿東亭。因見橫廊架巨軸於其上。上謂程修己曰。斯開元東封圖也。因命內侍巨軸懸於東廡下。上舉白玉如意。指張說輩數人。歎曰。使吾得其中一人來。則吾可以見開元矣。由是惋惜之意見于顏色。遂命進美耐盡爵。促步輦歸寢殿。

固安文獻志卷八目錄

耆舊事彙

唐

張燕公說 中

固安文獻志卷八

天津徐世昌鑒定

縣人賈廷琳謹編

耆舊事彙

唐

張燕公說 中

新唐書張九齡傳九齡七歲知屬文。會張說謫嶺南。一見厚遇之。

舊唐書張九齡傳時張說為中書令。與九齡同姓。敘為昭穆。尤親重之。常謂人曰。後來詞人稱首也。九齡既欣知己。亦依附焉。開元十三年車駕東巡。行封禪之禮。說自定侍從升中之官。多

國朝文獻志
引兩省錄事主書。及己之所親。攝官而上。遂加特進階。超授五品。九齡言於說曰。官爵者天下之公器。德望爲先。勞舊次焉。若顛倒衣裳。則譏謗起矣。今登封霈澤。千載一遇。清流高品。不沐殊恩。胥吏末班。先加章紱。但恐制出之後。四方失望。今進草之際。事猶可改。唯令公審籌之。無貽後悔也。說曰。事已決矣。悠悠之說。何足慮也。竟不從。及制出。內外甚咎於說。時御史中丞宇文融。方知田戶之事。每有所奏。說多建議違之。融亦以此不平於說。九齡復勸說爲備。說又不從其言。無幾。說果爲融所劾。罷知政事。初。張說知集賢院事。常薦九齡堪爲學士。以備顧問。說卒後。上思其言。召拜九齡爲祕書少監。集賢院學士。副知院。

事。

又宇文融傳。中書令張說素惡融之爲人。又患其權重。融之所奏。多建議爭之。融揣其意。先事圖之。中書舍人張九齡言於說曰。宇文融承恩用事。辯給多詞。不可不備也。說曰。此狗鼠輩焉。能爲事。融又密陳意見。分吏部爲十銓。典選事。所奏又爲說所抑。融乃與御史大夫崔隱甫。連名劾說。廷奏其狀。說由是罷知政事。融恐說復用爲己患。數譖毀之。上惡其朋黨。尋出融爲魏州刺史。

又良吏崔隱甫傳。開元十四年爲御史大夫。時中書令張說當朝用事。隱甫與御史中丞宇文融。李林甫。劾其犯狀。說遂罷。知

政事。隱甫既與張說有隙。俄又遞爲朋黨。帝聞而惡之。特免官。令歸侍母。

又崔日知傳。日知素與張說友善。說薦之。奏請授御史大夫。上不許。遂以爲左羽林軍衛大將軍。而以河南尹崔隱甫爲御史大夫。隱甫由是與說不叶。

新唐書崔日知傳。日知以明經進。至兵部員郎。與張說同爲魏元忠朔方判官。

又崔湜傳。湜初在襄州。與譙王數相問遺。王敗。湜當死。賴劉幽求。張說獲免。及爲宰相。陷幽求嶺表。又與太平公主逐張說。其猜毒詭險。殆天性。雖薑虺不若也。湜執政時年三十八。嘗暮出

端門。緩轡諷詩。張說見之。歎曰。文與位固可致。其年不可及也。舊唐書趙彥昭傳。彥昭素與郭元振。張說友善。及蕭至忠等伏誅。元振說等稱彥昭先嘗密圖其事。乃以功遷刑部尚書。

又王孝傑傳。契丹李盡忠。孫萬榮反叛。孝傑統兵十八萬以討之。軍至東峽石谷。遇賊甚衆。孝傑且戰且前。既無後繼。爲賊所乘。孝傑墮谷而死。時張說爲節度管記。馳奏其事。則天問孝傑敗亡之狀。說曰。孝傑忠勇敢死。乃誠奉國。深入寇境。以少禦衆。但爲後援不至。所以致敗。於是贈孝傑夏官尚書。

又王峻傳。開元十一年夏。代張說爲兵部尚書。同中書門下三品。會許州刺史王喬家奴告喬與峻潛謀構逆。敕侍中源乾曜

國朝文獻志
中書令張說鞫其狀。峻既無反狀。乃以違詔追不到。左遷蘄州刺史。

又李嶠傳。初中宗崩。嶠密表請處置相王諸子。勿令在京。及立宗踐阼。宮內獲其表。以示侍臣。或請誅之。中書令張說曰。嶠雖不辯逆順。然亦爲當時之謀。吠非其主。不可追討其辜。上從其言。

又郭元振傳。景雲二年。同中書門下三品。其冬與韋安石、張說等俱罷知政事。立宗於驪山講武。坐軍容不整。坐于纛下。將斬以徇。劉幽求張說於馬前諫曰。元振有翊贊大功。雖有罪。當從原宥。乃赦之。

又源乾曜傳。乾曜在政事十年。時張嘉貞、張說相次爲中書令。乾曜不敢與之爭權。每事皆推讓之。

又李元紘傳。先是左庶子吳兢舊任史官。撰唐書一百卷。唐春秋三十卷。其書未成。以丁憂罷職。至是上疏請終其功。有詔特令就集賢院修成其書。及張說致仕。又令在家修史。元紘奏曰。國史者。記人君善惡。國政損益。一字褒貶。千載稱之。前賢所難。事匪容易。今張說在家修史。吳兢又在集賢撰錄。遂令國之大典。散在數處。望勒說等就史館參詳撰錄。則典冊有憑。舊章不墜矣。從之。乃詔說及吳兢並就史館修撰。

又韓休傳。出爲虢州刺史。時虢州以地在兩京之間。常被支稅。

草以納閑廐。休奏請均配餘州。中書令張說駁之曰。若獨免虢州。即當移向他郡。郡牧守欲爲私惠。國體固不可依。又下符不許之。休復將執奏。寮吏曰。更奏必忤執政之意。休曰。爲刺史不能救百姓之弊。何以爲政。必以忤上得罪。所甘心也。竟執奏獲免。

又張嘉貞傳。開元十年冬。祕書監姜皎犯舉。嘉貞奏請杖之。皎遂死于路。俄而廣州都督裴旻先下獄。上召侍臣問當何舉。嘉貞又請杖之。兵部尙書張說進曰。臣聞刑不上大夫。以其近於君也。故曰士可殺不可辱。臣今秋受詔巡邊。中途聞姜皎以舉於朝堂。決杖配流而死。皎官是三品。亦有微功。若其有犯。應死

即殺。應流即流。不宜決杖廷辱。以卒伍待之。且律有八議。勳貴在焉。皎事以往。不可追悔。旻先祇宜據狀流貶。不可輕又決罰。上然其言。嘉貞不悅。退謂說曰。何言事之深也。說曰。宰相者。時來卽爲。豈能長據。若貴臣盡當可杖。但恐行當及之。此言非爲旻先。乃爲天下士君子也。初嘉貞爲兵部員外郎時。張說爲侍郎。及是說位在嘉貞下。旣無所推讓。說頗不平。因以此言激怒嘉貞。由是與說不叶。上又以嘉貞弟嘉祐爲金吾將軍。兄弟並居將相之位。甚爲時人所畏憚。十一年上幸太原。行在所。嘉祐賊汙事發。張說勸嘉貞素服待罪。不得入謁。因出爲幽州刺史。說遂代爲中書令。嘉貞惋恨。謂人曰。中書令幸有二員。何相迫

國朝文獻志
之甚也。明年復拜戶部尚書兼益州長史判都督事。敕嘉貞就中書省與宰相會宴。嘉貞既恨張說擠已。因攘袂勃罵。源乾曜王峻共和解之。

新唐書裴仙先傳。仙先遷秦桂廣三州都督。坐累且誅。賴宰相張說右之。免官。久乃擢范陽節度使。

舊唐書裴濯傳。濯早與張說特相友善。時說在相位。數稱薦之。濯又善於敷奏。上亦嘉重焉。由是擢拜吏部尚書。濯從祖弟寬。轉太常博士。禮部擬國忌之辰。享廟用樂。下太常。寬深達禮節。特建新意。以爲廟尊忌卑則登歌。廟卑忌尊則去籥。中書令張說謂寬明識。舉而行之。

又韋述傳。中書令張說專集賢院事。引述爲直學士。遷起居舍人。說重詞學之士。述與張九齡許景先袁暉趙冬曦孫逖王幹常遊其門。趙冬曦兄冬日。弟知璧居貞安貞頤貞等六人。述弟迪迢迢迨巡亦六人。並詞學登科。說曰。趙韋昆季。今之杞梓也。新唐書竇懷貞傳。懷貞在位半歲。無所事。帝切責之。俄與李日知郭元震張說。皆罷爲左御史大夫。

舊唐書蕭嵩傳。開元十四年加嵩兼中書令。自十四年燕國公張說罷中書令後。缺此位四年而嵩居之。

新唐書蘇頲傳。頲自景龍後與張說以文章顯。稱望略等。故時號燕許大手筆。

〔又裴子餘傳〕累遷冀州刺史。爲政惠裕。人稱有恩。入爲岐王府長史。卒謚曰孝。時程行謚貞。中書令張說歎曰。二謚可無愧矣。

〔舊唐書李林甫傳〕開元中。張嘉貞。王峻。張說。蕭嵩。杜暹。皆以節度使入知政事。林甫固位。志欲杜出將入相之源。嘗奏曰。文士爲將。怯當矢石。不如用寒族蕃人。自是安祿山竟爲亂階。由專得大將之任。故也。

〔又王琚傳〕琚於吏部選補諸暨主簿。於東宮過謝。玄宗遽召見之。琚曰。太平公主則天之女。凶狡無比。專思立功。朝之大臣多爲其用。今劉幽求。張說。郭元振。一二十大臣。心輔殿下。太平之黨。必有移奪。安危之計。不可立談。

〔又王毛仲傳〕毛仲檢校內外閑廐。兼知監牧使。開元九年。持節充朔方道防禦討擊大使。仍以左領軍大總督王峻。與天兵軍節度張說。東與幽州節度裴奩。先等會計。毛仲部統嚴整。羣牧孳息。遂數倍其初。扈從東封。以諸牧馬數萬匹。從。每色爲一隊。望如雲錦。玄宗益喜。於岳下以宰相源乾曜。張說加左右丞相。毛仲加開府儀同三司。又敕張說爲監牧。頌以美之。

〔又徐浩傳〕浩少舉明經。工草隸。以文學爲張說所器重。薦爲麗正殿校理。三遷右拾遺。仍爲校理。

〔又外戚竇維。盜傳〕維。盜好學。以撰著爲業。時宗族咸以外戚崇

節輿馬。維盜獨清儉自守。中書令張說。黃門侍郎盧藏用。給事中裴子餘。皆與之親善。

又外戚武崇訓傳。崇訓三思第二子也。尚安樂郡主。時三思用事於朝。欲寵其禮。行親迎禮。又令詞人沈佺期宋之問張說等賦花燭行以美之。

又外戚王仁皎傳。仁皎開元七年卒。贈太尉。官供葬事。柩車既發。上於望春亭遙望之。令張說爲其碑文。玄宗親書石焉。

又忠義李愬傳。愬早聰敏。以明經舉。開元初爲咸陽尉。時張說自紫微令燕國公出爲相州刺史。河北按察使。有洛州劉行善相人。說問察案後誰貴達。行乃稱愬及臨河尉鄭巖。說乃以女

妻巖。妹婿陰行真女妻於愬。及說爲并州長史。太平軍大使。引愬常在幕下。九年入爲相。愬又爲長安尉。

又孝友崔沔傳。沔當官正色。未嘗撓沮。中書令張說數稱薦之。服闋拜中書侍郎。或謂沔曰。今之中書。皆是宰相。承宣制命。侍郎雖是副貳。但署位而已。甚無事也。沔曰。不然。設官分職。上下相維。各申所見。方爲濟理。豈可俛默偷安。而爲懷祿士也。自是每有制敕及曹事。沔多所異同。張說頗不悅焉。

又孝友陸南金傳。南金頗涉經史。言行修謹。左丞相張說及宗人太子少保象先皆欽重之。

又文苑楊炯傳。炯與王勃盧照鄰駱賓王以文詞齊名。海內稱

爲王楊盧駱亦號爲四傑。炯聞之謂人曰。吾愧在盧前。恥居王後。當時議者亦以爲然。其後崔融李嶠張說俱重四傑之文。崔融曰。王勃文章宏逸有絕塵之迹。固非常流所及。炯與照鄰可以企之。盈川之言信矣。說曰。楊盈川文思如懸河注水。酌之不竭。旣優於盧亦不減王。恥居王後信然。愧在盧前謙也。開元中說爲集賢大學士十餘年。常與學士徐堅論近代文字。悲其凋喪。堅曰。李趙公崔文公之筆術。擅價一時。其間孰優。說曰。李嶠崔融薛稷宋之問之文。如良金美玉。無施不可。富嘉謩之文。如孤峰絕岸。壁立萬仞。濃雲鬱興。震雷俱發。誠可畏也。若施於廊廟則駭矣。閻朝隱之文。如麗服靚妝。燕歌趙舞。觀者忘疲。若類

之風雅則辜人矣。問後進詞人之優劣。說曰。韓休之文。如太羹旨酒。雅有典則。而薄於滋味。許景先之文。如豐肌膩理。雖穠華可愛。而微少風骨。張九齡之文。如輕縑素練。實濟時用。而微窘邊幅。王翰之文。如瓊杯玉斝。雖爛然可珍。而多有玷缺。堅以爲然。

〔新唐書李泌傳〕開元十六年。悉召能言佛道孔子者。相答難禁。中有員俶者。九歲升坐。詞辯注射。帝異之。因問童子豈有類若者。俶跪奏。臣舅子李泌。帝即馳召之。泌旣至。帝方與燕國公張說觀奕。因使說試其能。說請賦。方圓動靜。泌逡巡曰。願聞其略。說因曰。方若棋局。圓若棋子。動若棋生。靜若棋死。泌卽答曰。方

若行義。圓若用智。動若騁材。靜若得意。說因賀帝得奇童。帝大悅。

又貞元四年八月。月蝕東壁。泌曰。東壁圖書府。大臣當有憂者。吾以宰相兼學士。當之矣。昔燕國公張說。由是以亡。又可免乎。明年果卒。

又隱逸武攸緒傳。譙王重福之亂。攸緒以誣被繫。張說表置廬山。

又隱逸賀知章傳。累遷太常博士。張說爲麗正殿修書使。表知章及徐堅趙冬曦入院撰六典等書。累年無功。開元十三年。遷禮部侍郎。兼集賢院學士。一日併謝。宰相源乾曜語說曰。賀公

兩命之榮。足爲光寵。然學士侍郎孰爲美。說曰。侍郎衣冠之選。然要具員吏。學士懷先王之道。經緯之文。然後處之。此其爲間也。

舊唐書文苑尹元凱傳。元凱棲遲山林。不求仕進。垂三十年。與張說盧藏用特相友善。

又文苑許景先傳。自開元初。景先與中書舍人齊澣王邱韓休張九齡掌制誥。以文翰見稱。中書令張說嘗稱曰。許舍人之文。雖無峻峰激流。嶄絕之勢。然屬詞豐美。得中和之氣。亦一時之秀也。

又文苑齊澣傳。澣出爲汴州刺史。前後牧守多不稱職。唯倪若

水與澣皆以清嚴爲治。中書令張說擇左右丞之才。舉懷州刺史王邱爲左丞。以澣爲右丞。

〔又文苑王澣傳〕澣少豪蕩不羈。并州長史張嘉貞奇其才。禮接甚厚。張說鎮并州。禮澣益至。會說復知政事。以澣爲祕書正字。人多嫉之。說旣罷相。出澣爲汝州長史。

〔又文苑李邕傳〕邕頗自矜衒。自云當居相位。張說爲中書令。甚惡之。俄而陳州賊汚事發。下獄鞫訊。辜當死。

〔又韋陟傳〕陟坐貶昭州平樂尉。會安祿山反。楊國忠欲構陟與賊通。令陟憂死。其土豪人勸陟曰。昔張燕公竄逐。藏於陳氏。以免危亡。未若輕舟千里。候事清徐出。豈不美也。陟慨然曰。我素

所秉心。無負神理。命之合爾。其敢逃刑。燕公之謀。誠媿厚意。不能從也。因謝遣之。

〔又王君奩傳〕君奩爲河西節度使。迴紇等怏怏。恥在其麾下。君奩以法繩之。迴紇等積怨。遂掩殺君奩。上甚痛惜之。令張說爲其碑文。上自書石以寵異之。

〔又吐蕃傳〕吐蕃自恃兵強。言詞悖慢。上甚怒之。及封禪禮畢。中書令張說奏言。吐蕃醜逆。誠負萬誅。然又事征討。實爲勞弊。且十數年。甘涼河鄯。徵發不息。縱令屢勝。亦不能補。聞其悔過。請和。惟陛下遣使許其稽顙內屬。以息邊境。則蒼生幸甚。上曰。待吾與王君奩籌之。說出謂源乾曜曰。君奩勇而無謀。常思僥倖。

兩國和好。何以爲功。若入陳謀。則吾計不遂矣。尋而君奠入朝。奏事。遂請率兵深入以討之。

唐劉餗隋唐嘉話。沈佺期以工詩著名。燕公張說嘗謂之曰。沈

三兄詩。直須還他第一。

按亦見唐語林

又開元十七年。丞相源乾曜。張說以八月初五。今上生之日。請爲千秋節。百姓皆就此日。名爲賽白帝。羣臣上萬歲壽。王公戚里。進金鏡綬帶。士庶結絲承露囊。更相遺問。

又后土祠。隔河與梁山相望。舊立山神像以配座。如妃匹焉。至開元中年。始別建室而遷出之。或云張燕公之爲也。

元陶九成說。郭引唐劉餗傳。張燕公好求山東婚姻。當時皆惡之。及後與張氏爲親者。乃爲甲門。

唐語林。張燕公文逸而學奧。蘇許公文似古。學少簡而密。張有河朔刺史冉府君碑。序金城郡君云。薜華前落。藁瘞城隅。天使馬啟滕公之室。人之金屋。見仙鳥之瑤筐。亦其比也。又云。張巧於才。近世罕比。端午三殿侍宴。詩云。甘露垂天柱。芝盤捧御書。含丹同蠅蚘。灰骨慕蟾蜍。上親解紫拂。蒜帶以賜焉。

又彭城劉晏年八歲。獻東封書。上覽而奇之。命宰相出題。就中書試。張說源乾曜咸相慰薦。上以晏間生秀妙。引於內殿。縱六宮觀看。拜爲祕書正字。張說問曰。居官以來。正字幾何。晏尋聲對曰。他字悉正。獨朋字未正。說聞而異之。

又燕國文貞公弟某女婦盧氏。嘗爲舅盧公求官。候公下朝而問焉。公不語。但指檣牀龜而示之。女拜而歸室。告其夫曰。舅得詹事矣。

又開元初潞州常敬忠十五明經擢第。數年遍通五經。上書自舉云。一遍誦千言。勅赴中書考試。張燕公問曰。學士能一遍誦千言。十遍誦萬言乎。對曰。未曾自試。燕公遂出書。非人間所見也。謂之曰。可十遍誦之。敬忠危坐而讀。每遍畫地爲記。讀七遍起曰。此誦已得。燕公曰。可滿十遍。敬忠曰。若十遍即是十遍誦得。今七遍已得。何要滿十。燕公執本觀覽不暇。而敬忠誦畢一字不差。見者莫不嗟嘆。即日聞奏引對。賜綵衣一副。爲同輩所忌。中毒而卒。

又開元中燕公張說。當朝文伯。冠服以儒者自處。玄宗嫌其異已。賜內樣巾子。長脚羅幘頭。燕公服之入謝。玄宗大喜。

唐柳宗元龍城錄有唐惟開元最備文籍。集賢院所藏至七萬卷。當時之學士。蓋爲褚無量裴裕之鄭覃馬懷素張說陸堅康子元輩。凡四十七人。分司典籍。靡有闕文。而賊遽興。兵火交紊。兩都灰燼無存。惜哉。

唐兩京城坊考左丞相燕國公張說宅。在西京長安朱雀門街東永樂坊東南隅。本侍中王德貞宅。說大加修葺焉。又燕國公張說別宅。在朱雀門街西第二街宣義坊。又燕國公張說宅在

東京洛陽定鼎門街東第四街康俗里

〔河南通志〕含象亭在洛陽。唐開元中拜張說等十八人爲學士。于東都上陽宮含象亭詔寫御書。贊述翰林盛事。

〔五代王仁裕開元天寶遺事〕張說母夢有一玉鸞自東南飛來。投入懷中而有孕。生說果爲宰相。其至貴之祥也。

〔又開元中張說爲宰相。有人惠說一珠。紺色有光。名曰記事珠。或有闕忘之事。則以手持弄此珠。便覺心神開悟。事無巨細。渙然明曉。一無所忘。說祕而至寶也。〕

〔宋方回小學紺珠序〕唐張燕公患多讀少。記得紺碧大珠一顆。握以自照。則生平所讀所記。了了不忘。故後人摘書小說奇事。

名紺珠集。

〔五代王仁裕開元天寶遺事〕長安豪民郭行先有女字紹蘭。適巨商任宗。爲賈於湘中。數年不歸。紹蘭目覩堂中有雙鸞。遂吟詩云。我婿去重湖。臨窗泣血書。殷勤憑鸞翼。寄與薄情夫。小書其字繫於足上。鸞遂飛鳴而去。任宗時在荊州。忽見一鸞泊於肩上。一封書繫在足。解而視之。乃妻所寄之詩。宗感而泣下。次年歸。後文士張說傳其事。而好事者寫之。

〔清那蘭成德淶水亭雜識〕唐之詩人。惟陳子昂張說高適集中。間有幽州之作。此外游宦于茲土者寡。宋則非奉使不至。故題詠亦無多。

張燕公遺著

今存賦五首錄三首頌八首錄二首頌對策三首全錄 箴三首錄二首表四首
六首錄五首另見三首

喜雨賦

史臣啟先王之册府。校絕瑞於祥經。樂雲雨之平施。齊品物之流形。皇帝益重而為寶。麟鳳自輕而讓靈。况愆時而渴望。欲意達而神聽。是月也。朱明漸半。紫油全唐文作榴未吐。恐降災兮此下人。罄虔祈兮我仁主。退象龍之禮禱。斥持鷺之貌舞。屏翳慙其廢職。祝融悔其遷怒。山泱漭而出雲。天澍露而下雨。速一言而感應。尅三日而周溥。氣蒼靄以黦黹。聲颯灑以蕭條。璀如銀漢之屑落。燦似珠泉之噴澆。街鄜漫其潢潦。臯壤萋其綠苗。舒四溟

之清潤。卷六合之煩囂。咸澡骨於神液。共歡心於聖朝。借如五

月有梅雨之名。三春有穀雨之氣。越人以泥牛待沃。胡士賣土

龍全唐文作胡土以賣龍求費。出員嶠而石香。入成都而酒味。彼偏方與小

節。非大人之所貴。復有送山祗於鬱島。迎海若於葛川。疾雷碎

其山裂。走電煜其海燃。天子作愁霖之賦。詞人綴苦雨之篇。牆

屋壞於倒井。黍稷沈於下田。乃凶禳之不令。曷休徵之有焉。請

言瑞雨之可喜也。協氣交泰。嘉生是賴。湛覃而不溺。衍溢而不

害。東漸出日之表。西被無雷之外。南窮火鼠之譯。北盡燭龍之

右見張燕公集一又全唐文二百二十一

虛室賦

明月窗前。古樹簷邊。無北堂之樽酒。絕南隣之管絃。理涉虛趣。心階靜緣。室惟生白。文則思玄。厭百慮之勞止。歸一途之兀然。嗟呼。巧智首亂。禮樂增矯。名起異端。利成貪兆。役二見之交戰。驅五神而雜擾。形何費而不衰。性何煩而不夭。每竭源而追末。必亡多而獲少。玉帳瓊宮。圖侈務豐。朱門金穴。恃滿矜隆。榮與辱而俱盛。事隨憂而不窮。陷營爲之桎梏。留健美之樊籠。心元是幻。法本皆空。莫不因無證實。假異生同。魚何知而樂水。蛇何意而憐風。大哉默識。守此玄通。顧瞻天下。還如夢中。

右見同上

江上愁心賦

江上之峻山兮。鬱崎嶇而不極。雲爲峰兮。煙爲色。歛變態兮。心不識。江上之深林兮。杳冥濛而不已。鳥爲花兮。猿爲子。紛盪瀆兮。言莫擬。夏雲陰兮。若山。秋水平兮。若天。冬沙飛兮。淅淅。春草靡兮。芊芊。感四節之默運。知萬化之潛遷。伴衆鳥兮。寒渚。望孤帆兮。日邊。雖欲貫愁腸於巧筆。紡離夢於哀絃。是心也。非模放之所逮。將有言兮。是然。將無言兮。是然。

四

右見同上又宋姚鉉唐文粹九又明潘基慶古逸書二十

聖德頌

太古厥初。遺文闕矣。書祖二典。聿陳五教。唐虞之訓。歷代宗焉。孰同理而不休。奚同亂而克遘。皇唐之興也。道積四聖。時將百年。澤浸生人。自根流葉。孝和晏駕。嗣子幼沖。凶臣嬖女。蹙弱王室。人甚崩角之危。朝深綴旒之歎。賴天獎忠勇。大戮鯨鯢。尊文廟而安神。清帝宮而待聖。少主奉天命。以至禪。皇上拒天命。以固違。羣公卿士。胥進曰。陛下孝弟之至。曆數在躬。處儲闈。有讓元子之德。居藩邸。有辭太弟之高。六合欣戴。三靈允協。爲天下君。其誰與讓。皇帝義不得已。曰。吁。所憂之長也。乃被帝服。陟元后。延羣臣。見兆人。是日也。景雲至。茲歲也。戎狄來。其尤祥極瑞。

雜沓異類。蓋翫狎而不記矣。上方謹庶務。覽衆則履乾乾。懷翼翼。游道德之靈囿。從鸞鷲之珍羣。視天下之所不見。聽天下之所不聞。帝典皇綱。於斯備矣。宜定郊報之禮。革封禪之則。答神貺。揚元德。不然者。則二宗無類。帝之壇。五岳無省。方之館矣。若夫湯頌傳於考父。文什著於周公。臣下之志。不可闕也。敢作頌曰。

天祚聖唐。啟我明主。大哉皇帝。與天同矩。天乎蓋之。地乎載之。陽和化育。懷生賴之。孝乎惟孝。告成於天。靈壇神岳。思皇嘏焉。皇哉皇哉。胡可捨旃。大君受命。景雲來翔。流天汎日。爛漫成章。稽諸瑞典。昔祚軒皇。而今表聖。土德以昌。西戎遠國。畏君之靈。

古稱卽序。今乃來庭。帝女是降。其從如星。天人偃革。以迄太寧。北胡狙獷。狃於征伐。帝初歷試。護彼窮髮。懷我好音。稽顙天闕。遐哉大同。天子之功。

右見張燕公集六又全唐文二百二十一

廣州都督嶺南按察五府經略使宋公遺愛碑頌

清御選古文淵鑿注曰。環

為廣州都督。有惠政。廣人為立遺愛頌。環上言頌所以傳德載功。臣之治不足紀。廣人以臣當國。故為溢辭。徒成詔說。欲益正之。請自臣始。有詔許停。

清聖祖評曰。古質有鼎彝之規。頌詞跌宕岸異。迥非恒徑。清王熙評曰。紀功頌德之辭。鋪張盡致。商皇典麗。爛然成章。

維唐御天下九十有八載。蒼生賁乎海隅。元澤漫乎荒外。天子念窮鄉之僻陋。徼道之脩阻。吏或不率。不馴。人或不康。不若。乃命舊相廣平公宋璟。鎮茲裔壤。式是南州。篤五管之政教。總三

軍之旗鼓。幅員萬里。馴致九譯。詔書下日。靡然順風。曷由臻斯。威名之先路也。公曩時執白簡。登瑣闥。推誠謇譔。不私形骸。忤英主之龍鱗。躡奸臣之虎尾。挫二張之銳。則聲怛寰域。折三思之角。則氣蓋風雲。由是極有四星。維帝之輔。地有五嶽。維天之柱。其入宰也。君之股肱。其出守也。人之父母。至於此邦之長人。也。飲食有節。衣服有常。清心而庶務簡。正色而羣下一。瑟兮僴兮。赫兮咷兮。固以不怒而威。不言而信。雖有文身鑿齒。被髮儋耳。衣卉藟木。巢山館水。種落異俗。而化齊。言語不通。而心喻矣。其率人版築。教人陶瓦。室皆塗墍。古文壁字書遊則華風可觀。家撤茅茨。夜作而災火不發。棟宇之利也。自今始。祖國之舶車。海琛

雲萃物無二價。路有遺金。殊裔胥易其迴途。遠人咸內我邊郡。交易之坦也。有如此。故能言之士。舉為美談。蓋微子去殷以後。王者襄公伐楚。將得諸侯。尚書東漢之雅望。宋東漢弘黃門北齊之令德。北齊宋士素沈密少言有才識官黃門侍郎宋氏世名。公其濟美。詩所謂無念爾祖。聿修厥德。廣平有焉。若夫往者屈也。來者伸也。往來相召。而哀樂繼之。鴻飛遵渚。於汝信處。龍章袞衣。以我公歸。鬱陶乎人思。嗟嘆之不足。廣府司馬譚瓌。番禺耆老某乙等。相與刻石。傳徽斯文。予春秋之徒也。豈將苟其辭哉。雅敬宋公王臣之重。次嘉譚子贊德之義。遙感耆舊去思之勤。越裳變風。知周公之才之美。吉甫作頌。見申伯于藩于宣。觀政將來。惡可廢也。頌曰。

降王宰兮遠國靈。歌北戶兮

交州林邑開北戶以向日

舞南溟。酌七德兮考六

經。政畫一兮言不再。草木育兮魚鼈寧。變蓬屋兮改籬墻。魚鱗

瓦兮鳥翼堂。洞日華兮皎夜光。火莫炖兮風莫颺。事有近兮惠

無疆。崑崙寶兮西海財。幾萬里兮歲一來。舟如島兮貨為臺。市

無欺兮路無盜。旅忘家兮扁夜開。越井岡兮石門道。金鼓愁兮

旌旆好。來何暮兮去何早。爆牛牲兮菌雞卜。神降福兮公壽考。

右見張燕公集七又唐文粹二十一全唐文二百二十六

古文淵鑑二十七

贈別楊盈川炯箴

新唐書楊炯傳曰。炯出為梓州司法參軍。遷盈川令。張說以箴贈行。戒其苛。至官果以嚴酷稱。吏稍忤。意榜殺

之。不為人所多。卒官下。

杳杳深谷。森森喬木。天與之才。或鮮其祿。君服六藝。道德爲尊。君居百里。風化之源。才勿驕恣。政勿苛煩。明神是福。而小人無冤。畏其不畏。存其不存。作誥茲酒。成敗之根。勤銘其口。禍福之門。雖有韶夏。勿棄擊轅。豈無車馬。敢贈一言。

右見張燕公集八又全唐文二百二十六

獄箴

官有決曹。掌茲法獄。匪惟議罪。亦以防欲。所貴仁恕。非矜窘束。吏苟吹毛。人安措足。古之爲主。是戒是勸。茫茫率土。蠢蠢羣生。賢愚中雜。真僞相傾。若魚之駭。如鳥之驚。不能無犯。宜持以平。或大或小。時重時輕。無以快志。期乎得情。孰曰非重。國之政令。

孰曰非輕。人之性命。虐則招咎。寬則納慶。宜慎宜恤。可畏可敬。爲獄則固。爲牢則幽。晨嚴管鑰。夜密更籌。寂寂園土。纍纍繫囚。求食搖尾。見吏垂頭。自昔立名。此爲非所。逼隘狹室。欹傾漏宇。冬有祁寒。夏多隆暑。焉可失入。焉可妄處。勿謂無妨。勿謂無傷。匹夫結憤。六月飛霜。可以安危。可以興亡。敢告司憲。無輕國章。右見張燕公集八又唐文粹七十八全唐文二百二十六
諫內宴至夜表

臣聞上天示下災祥。將以誘導人主。先王仰觀休咎。亦以順修政教。易曰。天垂象。聖人則之。言天人之際。感通必矣。臣伏見去年十月十七日。月滿猶望。應虧不虧。今月十七日。亦未少虧。此

國朝文獻志
易常之異也。夫月者至陰之氣，臣下之象。當助天作明，順期盈缺。若過盛逾時，盈縮乖度，得非臣下之咎，而上天之誡耶？伏願陛下深察熟思而預防之。臣又見近日內宴，夜深方罷，小臣無識，抑所未安。王在在鎬，凱樂飲酒，此誠大雅之美也。臣卜其晝未卜其夜，此蓋春秋之義也。伏願陛下宴樂之餘，不及於夜，臣職忝補闕，昧死陳愚，謹言。

右見張燕公集九又全唐文二百二十二

讓起復黃門侍郎第三表

草土臣說言。臣荒喘窮情，再瀆旒宸，懇誠不到，未感天心。誓將冒死，祈恩分外。謝中臣本書生，門非代祿，數葉單緒，族無親房。臣

父遭憂，曾祖未葬，臣有兩兄一妹，甥姪九人，又有中表相依，尙成百口，吉凶衣食，待臣以辦。臣今拜職黃閣，侍奉丹墀，厚祿清班，一朝改官，舉宗榮賴，爲幸過甚。人情所欲，豈合稽恩，正以勞瘁苦心，有所未盡。臣亡母在日，朝夕誠臣，以臣獨立無徒，好直多忤，知子者母，果驗所言，往罹大獄，竄命炎海，晨出晚歸，貽慮非一。况涉危難，傷心幾途，追計生平，倍增摧慕。侍養日少，違離日多，即臣母憂，臣以終身。臣其忍服縗以從事，情既不同常例，望在特降殊恩，臣先患風緩，近加虛痺，陛下倘從臣數月，容過再期，非但寬其哀疚，固亦全其生理。亡身報國，庶竭後圖，木植有性，枉之則折，人願在心，違之則苦。雖強爲用，將何以堪。銜泣

仰天。冀蒙哀允。無任懇迫之至。謹詣朝堂路左。奉表陳乞以聞。

右見同上

讓兵部尙書平章事表

臣說言。伏奉九月十九日制書到并州。授臣兵部尙書同中書門下三品。王人在門。驛騎臨路。奉恩循分。以慙以惕。臣說謝中臣早以書生射策。載筆聖朝。晚以軍誌典兵。秉旄乘塞。祿非援進。寵是宸衷。久侍玉階。四掌綸誥。一心好直。三黜其宜。今復用之。猶夫人也。何足以舉明邦政。光緝帝猷。更策疲驂。來塵法駕。又臣已受命司籍。專意簡書。所希散冗。因閒就業。忽叨劇職。責大憂深。人心有限。事難兩濟。國史無成。臣執其罪。上思薦賢以自

代。下願守分以全節。竊見開府宋璟。清介獨立。倚法而不回。詹事陸象先。清明向道。臨事能斷。其高明有素。歷朝之所仗委。其積行無疵。衆人之所體信。揆停住任。未盡宿誠。乞迴此恩。以納來効。必能補舊政之缺漏。廣前途之軌轍。雖深全唐文作探心用力。臣頗與二子齊驅。然校德考年。彼皆有一日之長。天下者累聖之公器。宰相者萬方之具瞻。臣所以廷讓彰言。不陳密啟。伏願聖恩。聽輿論而舉衆望所矚。倘朝任得人。實海內幸甚。無任力微任重。惶懼之至。謹奉表陳讓。二年十月十七日

右見同上

讓封燕國公表

臣說言。伏奉今月七日制書。封臣燕國公。食封三百戶。寵靈猥及。中心如慙。臣說謝中臣聞至道之時。重法守義。上無無功之賞。下無無德之祿。故授受禮全。而踰越不起。伏惟陛下。光撫宇內。大寧天域。百度維新。萬靈翹注。建侯疏壤。允答元功。臣亦何人。首膺是命。自古有傳道而爵。說經而封。蓋以訓蒙成聖。資師通學。臣之侍講。有異前聞。何者。大明朝昇。螢爝無助。時雨夕濡。浸灌焉施。幸得依附光景。游泳渥澤。豈敢虛承啟發之恩。謬荷將就之報。且如人臣之義。二則爲罪。愚知之分。一心不回。譬如犬馬。有不背之性。草木有不彫之理。知何德於天壤。而欲蒙造化之偏施哉。臣之無功。正與此類。叨恩過量。終懼且慙。乞迴聖慈。

以容介節。無任惶悚之至。謹詣朝堂。奉表陳讓。以聞。

右見張燕公集九又全唐文二百二十三

讓右丞相第二表

臣說言。伏奉今月十日制書。除臣尙書右丞相。恩命自天。戰跼無地。臣說謝中臣少長儒門。墾鑿墳史。才非高格。官不因人。徒以命偶龍興。位階鴻漸。五入西掖。七踐南宮。中間拙延謫放。直招玷缺。傷矢之禽。聞弦虛墜。賜環之客。聽歌先泣。此則魂爲危感。氣由懼奪。安可重收廢器。再辱端揆。何以師長禮闈。正持憲府。當今典章革故。風教鼎新。野無四隱。朝有三傑。具瞻之地。願擇時髦。臣幸沐遺簪墜履之恩。好生養志之德。朝遊簡牘。暮對圖

書受賜無涯。循榮過分。豈更干處士之橫議。招匈奴之遙哂。艾骨自瘡。負乘致寇。雖則愚情懷戀。覲冒求寵。亦望聖慈限約。令度餘年。願停今授。長守舊史。罄陳肝膽。非敢飾讓。謹詣朝堂。奉表自乞。臣說誠惶誠恐。頓首頓首。死罪死罪。謹言。

右見張燕公集九又全唐文二百二十二

詞標文苑科對策第一道

問。朕聞立極開基之主。經文緯武之君。莫不法象殊流。污隆異制。至於安人導俗。咸即運以垂芳。緝化宣風。各因時而播美。是以道采繩木。爰膺九翼之年。圖祕龜龍。用啟六爻之代。窮桑御歷。狎威鳳以踐司。軒邱列位。因景雲而命職。徵汾陽之跡。則十

政方凝。俯河濱之化。則四門攸闢。祥披玉斗。理九土以興功。祚徙金精。調五聲而作教。周崇六禮。仁義之道爲先。漢設三章。皇霸之圖斯雜。皆所以牢籠八際。櫜括三靈。齊四大以居尊。協五神而稱正。且隨時之義。既不相沿。師古之言。又聞前誥。朕欽承先聖。對越上元。當宁興懷。鎮切推溝之慮。凝旒結想。方深馭朽之情。思所以式展宏猷。勉康庶績。而撫茲薄德。昧此永圖。爾等積學多聞。含章獨秀。未顯疇庸之德。宜申待叩之音。適時之務。何先。經國之圖何最。帝皇之道奚是。王霸之理奚非。佇聽良謨。朕將親覽。

對。臣聞舜命昌言。漢徵極諫。嘗覽千古。賢哉二君。今陛下發德

音。下明制。選空巖穴。訪匪輿臺。大哉邈乎。過之遠矣。臣以草莽之賤。謬當車乘之招。誠不足以庶幾王庭。充塞大問。伏讀聖旨。乃知天心之所存焉。臣聞昔者鳥跡代繩。龍文演卦。水土遷王。時更萬祀。金木互興。人非一姓。暨乎三皇五帝氏往。夏商周漢氏作。或導人以禮樂。或驅俗以政刑。或革弊以忠敬。或沿風以文武。非師古之誥有殊。蓋隨時之義且異也。伏惟聖母神皇陛下。誕受鴻基。光膺駿命。粵若立極。格天之業。論道布政之典。任賢克暴之功。出洛卿全唐文作飛雲之瑞。此并藏緯玉冊。勒休金版。鬱美前古。揚光後葉者矣。至若創業垂統之則。宏猷永圖之美。重光三聖。再清六合。可不謂然乎。猶或惕慮推溝。勞謙馭朽。謝文

明于薄德。想疇庸于清問。此陛下之至讓也。愚臣何足以知之。策曰。適時之務何先。經國之圖何最。臣聞古者因人以立法。乘時以設教。以義制事。以禮制心。夫人者理得則氣和。業安則心固。崇讓則不競。知恥則遠刑。若強人之所不能。雖令不勸。禁人

之所必犯。雖罰且違。故曰。政不欲煩。煩則數改。數改無定。人懷苟免之心。網不欲密。密則深文。深文多傷。下有非辜之懼。竊見今之俗吏。或匪正人。以刻爲明。以苛爲察。以剝下爲利。以附上爲誠。綜覈之司。考課專于刀筆。撫字之宰。職務具爲簿書。陛下

日昃雖勤。守宰風化多闕。臣以爲將行美政。必先擇人。失政謂之虐人。失人謂之傷政。捨人爲政。雖勤何爲。伏願陛下進經術

之士。退撝克之。臣崇簡易之化。流愷悌之風。畫一成歌。此適時之務也。慎賢而用。此經國之圖也。苟能英才不棄。大化方隆。而猶曰朝謝垂衣。野非擊壤。則文武之道。尚何言哉。堯舜之君。徒虛語耳。策曰。帝皇之道。奚是。王霸之理。奚非者。布在方策。臣聞之矣。聖人御歷。上淳而下信。帝者應期。君明而臣哲。周用王道。教化一而人從。漢雜霸政。全唐文 作道刑政嚴而俗偽。故親譽優于畏侮。文章。全唐文 作景劣於成康。臣謹對。

詞標文苑科對策第二道

問。朕聞禮崇三典。方宏慎罰之規。書著五刑。不以深文為義。朕母臨赤縣。子育黔黎。夏日貽憂。懼青牛之結氣。秋荼軫念。慮丹

筆之成冤。然以人尚掛於湯羅。情倍深於禹泣。頃者荆郊起祲。淮服挺妖。朕惟罪彼元凶。餘黨並從寬宥。今敬真之輩。猶蘊狼心。不荷再生之恩。重構三藩之逆。還嬰巨釁。便犯嚴科。豈止殺之方。乖於折衷。將小慈之澤。爽彼大猷。子大夫等學富三冬。才高十室。刑政之要。實所明閑。傾此虛襟。佇聞良說。

對。臣聞刑以助教。德以閑邪。先王慎于好生。大易誠于緩死。今陛下母臨黔首。子育蒼主。孚佑下人。克配上帝。然有東南小祲。荆蠻遠郊。雖聖德泣辜。尚用防風之戮。天心罪己。仍勞淮甸之征。其有註誤閭閻。脅從井邑。陛下愍孤孀于海淮。恤困窮于江漢。捨從寬宥。此陛下之恩也。而蕞爾餘孽。蠢茲頑兇。思弄兵于

潢池之下。將搆難于戎狄之域。罪盈稔貫。禍得萌芽。此又陛下之明也。今陛下乃賜臣曰。豈止殺之方。乖于折衷。將小慈之澤。爽彼大猷。臣實見折衷大猷之規。不知小乖微爽之義也。策曰。刑政之要。實所明閑。臣聞政猶水火。刑譬陰陽。頃者三監亂常。有司既糾之以猛。于今四罪咸服。陛下宜濟之以寬。明肆赦之渥恩。安萬人之反側。布深仁于羅鳥。收至察于泉魚。豈不大哉。天下幸甚。且夫人者。眊也。暗而不可罔。庶者衆也。愚而不可欺。是故刑在必澄。不在必慘。政在必信。不在必苛。故明王之理天下也。刑一則人畏而不干。政簡則俗齊而不僞。於是禍亂不作。災害不生。君安于上。臣悅于下。百姓日用而不知其然。四海風動。惟帝之則。道暢鍾石。聲流舞詠。其行己也非他。所理人者以此。刑政之要。庶幾一隅。臣謹對。

詞標文苑科對策第三道

問。朕聞仰觀乾象。房心爲布政之宮。俯察坤元。河洛建受圖之所。是以上稽珠緯。佇風雨之和。下表圭塵。均遠近之節。定都考室。斯焉是崇。顧以庸虛。忝膺大寶。乾乾夕惕。每軫納隍之懷。懍懍宵興。恒勞馭朽之念。而昊穹眷命。靈貺屢彰。雲構旣隆。天城斯畢。是用內省多愧。上答逾勤。將欲殷薦有常。嚴配不墜。光啟惟新之闕。申明祀典之方。順四時以布和風。考五物而行正氣。盛禮之要。猶慮未宏。爾等並積學基身。含章表質。或遠從賓貢。

聲滿於州閭。或遐應搜揚。譽光於朝選。採皇王於奧旨。援周漢之前蹤。蘊彼胸襟。咸應備曉。未知何代之政。參詳適中。何禮之規。施用爲切。務存必簡之道。式崇可久之基。試陳嘉謀。爾其揚摧。思擢太常之第。副朕求賢之懷。

對。伏惟陛下。則天法地。畏命重人。據河洛之規模。總風雨之交會。軒后魚圖之水。建邦設都。周公龜墨之地。考堂作室。靈祇降福。嘉祥薦祉。制同神造。力以子來。將以殷薦上帝。至法也。嚴配先王。至孝也。加以八風攸序。四時克諧。無得而稱。能事畢矣。猶復執勞謙之不已。懼盛禮之未宏。訪末學之臣。詢稽古之政。斯事體大。臣何足言。然而敢不欽承。以竭涓滴耶。策曰。何代之政。

參詳適中。何禮之規。施用爲切。臣謹錯綜三五。明徵典謨。竊以緯武經文。布方策而非遠。英風顯號。流頌聲而可襲。未有反義悖德。而致昇平之政。棄禮違經。以克永終之祿。莫不發號施令。法乾坤之動靜。執契縣衡。順金木之刑政。是故青陽元室。遵孟仲而觀風。白輅朱旂。因離光而布政。養老用上。庠之禮。教胄取太學之義。環水著辟雍之名。向陽表明堂之位。蓋所以享羣瑞。朝諸侯。頒正朔。調景緯。成簡易之基。崇久大之業也。皇王奧旨。庶此詳探。周漢前蹤。難于專用。臣才智駑劣。草莽鯁生。至如軍國務廣。政刑理急。但至敬無文。信言不美。陛下欲聽其說。必觀于事。將達其謀。先求諸道。危言抵禁。破膽寒心。伏惟聖主稍留

天聽。臣謹對。

右對策三首見張燕公集十一又全唐文二百二十四

固安文獻志卷九目錄

耆舊事彙

唐

張燕公說下

固安文獻志卷九

天津徐世昌鑒定

縣人賈廷琳謹編

耆舊事彙

唐

張燕公說下

張燕公遺著

洛州張司馬集序

夫言者志之所之。文者物之相雜。然則心不可蘊。故發揮以形容。辭不可陋。故錯綜以潤色。萬象鼓舞。入有名之地。五音繁雜。出無聲之境。非窮神體妙。孰能與乎。

全唐文作其孰能與於此乎

洛州司馬張公

名希元。中山人也。族高辰象。氣壯河山。神作銅鉤。天開金印。孝友內植。禮樂外滋。勵行閨庭。鄉人謂之曾子。飛名都邑。諸儒號曰聖童。下帷覃思。穿牆嗜古。蓬山芸觀之書。羣玉懸金之記。魯宮藏篆。汲冢遺編。無不日覽萬言。暗藏全唐文作識三篋。博學吞九流之要。處盈若虛。雄辯敵四海之鋒。退藏於密。漢王問策。知帝者之師。楚子聞名。實諸侯之選。故得雄飛白簡。鷹揚丹筆。卷檐帷於天郡。設鉤距於皇都。若乃抗埋輪之章。執驚馬之議。旌賢有通德之教。疾惡存署背之文。繼軌前途。遇物成興。理關刑政。咸歸故事之臺。義涉箴規。盡入名臣之奏。加以許與。氣類交遊。豪傑仕遭夷險。身更否泰。昔嘗攝戎幽易。謫居叩窻。亭臯漫漫。興

去國之悲。旗鼓洶洶。助從軍之樂。時復江鶯遷谷。隴雁出雲。夢上京之臺沼。想故山之風月。發言而宮商應。搖筆而綺繡飛。逸勢孤標。奇情新拔。靈仙變化。星漢昭回。感激精微。混韶武於金奏。天然壯麗。絳雲霞於玉樓。當代名流。翕然宗尚。自大夫之頌成室。太史之賦京都。魏則十龍儒雅。晉則三陽藻綴。朝分南北。運迄周隋。文人才子。重世間出。豈止柗榴體物。陳琳得以示人。鷓鴣寄辭。阮籍稱其王佐。故以開國籍。鱗次乎史傳之首。入文場。羽儀乎天下之半。公增繁榮業。桂林之一枝。彌廣源流。荆江之九派。宗門多士。斯為盛歟。且如承家舊德之基。賓王歷官之序。玉璫銅渾之數。黃公元女之符。落猿瘞兕之巧。飲鵲迴鸞之

妙。詳諸列傳。可略言焉。某室邈蘭芬。族聯棣萼。荷千里之嘉獎。接四友之良遊。謹撰令引。式題前集。七子賦詩。期取類於鄭志。一家垂範。庶齊衡于孔藜。來日新文。請俟君子。起儀鳳之後。迄景龍以前。凡若干卷。列之於目。

右見張燕公集十二又全唐文二百二十五

唐昭容上官氏文集序

舊唐書后妃傳曰。中宗昭容上官婉兒。常勸廣置昭容文學士。盛引當朝詞學之臣。數賜游宴。賦詩唱和。辭甚綺麗。時人咸諷誦之。及韋庶人敗。婉兒亦斬於旗下。玄宗命收其詩筆。撰成文集二十卷。令張說為之序。

臣聞七聲無主。律呂綜其和。五綵無章。黼黻交其麗。是知氣有壹鬱。非巧辭莫之通。形有萬變。非工文莫之寫。先王以是經天地。究人神。闡寂寞。鑑幽昧。文之辭義大矣哉。上官昭容者。故中

書侍郎儀之孫也。明淑挺生。才華絕代。敏識聰聽。探微鏡理。開卷海納。宛若前聞。搖筆雲飛。咸同夙構。初沛國夫人之方娠也。夢巨人俾之大秤曰。以是秤量天下。及昭容既生。彌月。夫人弄之曰。秤量天下。豈在子乎。孩遂啞啞。應之曰。是生而能言。蓋為靈也。越在襁褓。入於掖庭。天實啟之。故毀家而資國。運將興也。故成德而受任。自則天久視之後。中宗景龍之際。十數年間。六合清謐。內峻圖書之府。外闢修文之館。搜英獵俊。野無遺才。右職以精學為先。大臣以無文為恥。每豫游宮觀。行幸河山。白雲起而帝歌。翠華飛而臣賦。雅頌之盛。與三代同風。豈惟聖后之好文。亦云奧主之協讚者也。古者有女史。記功書過。復有女尚

書。決事宮閣。昭容兩朝專美。一日萬幾。顧問不遺。應接如響。雖漢稱班媛。晉譽左嬪。文章之道不殊。輔佐之功則異。迹祕九天之上。身沒重泉之下。嘉猷令範。代罕得聞。庶姬後學。嗚呼何仰。然則大君據四海之圖。懸百靈之命。喜則九圍挾纊。怒則千里流血。靜則黔黎乂安。動則蒼忙罷弊。入耳之語。諒其難乎。貴而勢大者疑。賤而禮絕者隔。近而言輕者忽。遠而意忠者忤。惟窈窕柔曼。誘掖善心。忘味九德之衢。傾情六藝之圃。故登崑巡海之意寢。翦胡刈越之威息。璿臺珍服之態消。從禽嗜酒之端廢。獨使溫柔之教。漸於生人。風雅之聲。流於末葉。非夫玄黃毓粹。貞明助思。衆妙扶識。羣靈挾志。誕異人之寶。授興王之瑞。其孰

能臻斯懿乎。鎮國太平公主。道高帝妹。才重天人。昔嘗共游東辟。同宴北渚。倏來忽往。物在人亡。憫雕瑄之殘言。悲素扇之空篋。上聞天子。求椒掖之故事。有命史臣。叙蘭臺之新集。凡若干卷。列之如左。

右見張燕公集十二又唐文粹九十一全唐文二百二十五

上東宮請講學啟

臣某等啟。臣聞安國家定社稷者武功也。經天地緯禮俗者文教也。社稷定矣。固寧輯於人和。禮俗興焉。在刊正於儒範。順考古道。率由舊章。故周文王之爲太子也。崇禮不倦。魏文帝之在

青宮也。好古無怠。博覽史籍。激揚令聞。取高前代。垂名不朽。伏惟皇太子殿下。英睿天縱。聖敬日躋。神算密發。雄威立斷。廓清氛祲。用寧家國。兆人由是歸德。六合所以推功。主鬯青宮。固本也。分務紫極。觀政也。副羣生之望。作累聖之儲。殿下之於天下。可謂不輕矣。監國理人。可謂至重矣。莫不拭目而視。清耳而聽。冀聞異政。以裨聖道。臣愚伏願崇太學。簡明師。重道尊儒。以養天下之士。今禮經殘缺。學校陵遲。歷代經史。率多紕繆。實殿下闡揚之日。刊定之秋。伏願博採文士。精全唐文求碩學。表正九經。刊考三史。則聖賢遺範。粲然可觀。况殿下至性神聰。留情國體。幸以問安之暇。應務之餘。引進文儒。詳觀全唐文文作古典。商略前載。

討論得失。降溫顏。開讜議。則政途理體。日以增益。繼業承祧。永垂德美。臣等行業素輕。藝能寡薄。顧慙端全唐文士。叨侍宮闈。日夜祇懼。無以匡輔。區區微誠。願効塵露。輕進芻鄙。庶垂採擇。臨啟如失。伏用兢惶。謹啟。

右見張燕公集十三又全唐文一百二十四

與執政書

說拙於守身。往年遷流嶺外。亡親愁懼。痼疾增加。比蒙生還。曾未數歲。家口在洛。身徒入京。及丁兇苦。不獲侍側。比於他人。情實不等。在禮君親同貫。事君無負。事親有負。不能殺身。以自咎責。乞過祥禫。報國非遲。二度表請。不蒙矜遂。當是文墨。不盡苦

心投之執事。乞為一言聞達。不敢守禮抗請。直是私情乞恩。若以此情可矜。猶冀聖人萬一哀憫。若將譴越。甘心待罪。謹狀。

右見同上

與營州都督弟書

骨肉世疏。居止地闊。宗族名迹。不能備知。讀厭次府君狀。已具歷官。未書性習。夫五常之性。出於五行。稟氣所鍾。必有偏厚。則仁義禮智信。為品不同。六藝九流。習科各異。若以稷禹之事。贊於巢由。孫吳之術。銘於游夏。必將神人於悒。未以為允。今之撰錄。蓋欲推美實行。崇識素心。先德怡神於知我。後生想望於見意。說為他人稱述。尚不敢苟。况於族尊行哉。往來信多。直疏早

報。冬末寒沍。野有戎歌。山無夏草。步步日遠。能無鄉國之心乎。荒州新立。向者未有。下車殊俗。意緒如何。說患恒服湯。虛多健少。因別奉去。說呈。

右見全唐文二百二十四

西嶽太華山碑銘

唐李肇國史補曰。玄宗令張說撰華嶽碑。首四句或曰一行禪師所作。或云碑之文鑿破亂取之。曰嶠嶠云云。

嶠嶠太華。柱天直上。青崖白谷。仰見靈掌。雄峰峻削。菌苔森爽。是曰靈嶽。衆山之長。白帝西下。黃河北來。陰陽孕育。精氣徘徊。偶聖呈瑞。逢昏降災。玉池神挹。石室仙開。海絕瀛洲。天遙玄圃。偉哉此鎮。崢嶸西土。鬼神乍游。風雲忽聚。高標赫日。半壁飛雨。自古王者。巡方必至。龍駕帝服。封天禪地。南面會神。西后在位。

待予治國安人。然後徐思其事。

右見張燕公集十四又唐文粹五十全唐文二百三十

唐玉泉寺大通禪師碑銘

并序 舊唐書方伎傳曰。曾神秀少遍覽經史。隋末出家為僧。後遇蘄州雙峯山東山寺

僧弘忍以坐禪為業。使往事弘忍。中書舍人張說嘗問道執弟子之禮。退謂人曰。禪師身長八尺。龍眉秀耳。威德巍巍。王霸之器也。神龍二年卒。岐王範張說

及徵士盧鴻一皆為其碑文。

譏夫總四大者。成乎身矣。立萬始者。主乎心矣。身是虛哉。即身見空。始同妙用。心非實也。觀心若幻。乃等真如。名數入焉。妙本乖。言說出焉。真宗隱。故如來有意。傳要道。力持至德。萬劫而遙。付法印。一念而頓。受佛身。誰其宏之。實大通禪師其人也。禪師尊稱大通。諱神秀。本姓李。陳留尉氏人也。心洞九漏。懸解先覺。身長八尺。秀眉大耳。應王伯之象。合聖賢之度。少為諸生。游問江表。老莊玄旨。書易大義。三乘經論。四分律儀。說通訓詁。音參吳晉。爛乎如襲孔翠。玲然如振金玉。既而獨鑒潛發。多聞旁施。逮知天命之年。自拔人間之世。企聞蘄州有忍禪師。禪門之法。胤也。自菩提達摩天竺東來。以法傳惠可。惠可傳僧璨。僧璨傳道信。道信傳弘忍。繼明重跡。相承五光。乃不遠遐阻。翻飛謁詣。虛受與沃。心懸會。高悟與真。乘同徹。盡捐妄識。湛見本心。住寂滅境。行無是處。有師而成。即燃燈佛所。無依而說。是空王法門。服勤六年。不捨晝夜。大師歎曰。東山之法。盡在秀矣。命之洗足。引之並坐。於是涕辭而去。退藏於密。儀鳳中始隸玉泉。名在僧

錄。寺東七里。地坦山雄。目之曰。此正楞伽孤峰。度門蘭若。蔭松藉草。吾將老焉。雲從龍。風從虎。大道出。賢人覩。岐陽之地。就者成都。華陰之山。學來如市。未云多也。後進得以拂三有。超四禪。昇堂七十。味道三千。不是過也。爾其開法大略。則慧念以息。想極力以攝。心其入也。品均凡聖。其到也。行無前後。趣定之前。萬緣盡閉。發慧之後。一切皆如。持奉楞伽。遞爲心要。過此以往。未之或知。久視年中。禪師春秋高矣。詔請而來。趺坐覲君。肩輿上殿。屈萬乘而稽首。洒九重而宴居。傳聖道者。不北面。有盛德者。無臣禮。遂推爲兩京法主。三帝國師。仰佛日之再中。慶優曇之一現。混處都邑。婉其祕旨。每帝王分座。后妃臨席。鸚鷺四匝。龍

象三繞。時熾炭待礦。故對默而心降。時診飢投味。故告約而義領。一雨溥霑於衆緣。萬籟各吹於本分。非夫安住無畏。應變無方者。孰能至爾乎。聖敬日崇。朝恩代積。當陽初會之所。置寺曰度門。尉氏先人之宅。置寺曰報恩。軾閭名卿。表德非擬。局厭誼輦。長懷虛壑。累乞還山。旣聽中駐。久矣衰憊。無他患苦。魄散神全。形遺力謝。神龍二年二月二十八日。夜中顧命。趺坐。泊如化滅。禪師武德八年乙酉。受具於天宮。至是年丙午。復終於此寺。蓋僧臘八十矣。生於隋末。百有餘歲。未嘗自言。故人莫審其數也。三界火心。四部冰背。榱崩梁壞。雷慟雨泣。凡諸寶身。生是金口。故其喪也。如執親焉。詔使弔哀。侯王歸賄。三月二日。册謚大

通。展飾終之義。禮也。時厥五日。假安闕塞。緩及葬之期。懷也。宸
駕臨訣。至午橋。王公悲送至伊水。羽儀陳設。至山龕。仲秋既望。
還詔乃下。帝諾先許。冥遂宿心。太常卿鼓吹導引。城門郎護監。
喪葬。是日。天子出龍門。泣金櫬。登高停蹕。目盡迴輿。自伊及江。
扶道哀候。幡花百輦。香雲千里。維十月哉生魄。明即舊居後岡。
安神起塔。國錢嚴飾。賜逾百萬。巨鐘是先帝所鑄。羣經是後皇
所錫。金榜御題。華幡內造。塔寺尊重。遠稱標絕。初禪師形解東
洛。相見南荆。白霧積晦於禪山。素蓮寄生於坐樹。則雙林變色。
泗水逆流。至人違代。同符異感。百日卒哭也。在龍華寺設大會。
八千人。度二十七人。二祥練縞也。成就西明道場。數如前會。萬

迴菩薩。乞施後宮。寶衣盈箱。珍價敵國。親舉寵費。侑供巡香。其
廣福博因。存沒如此。日月逾邁。榮落相推。於戲法子。永戀宗極。
痛慈舟之遽失。恨湧塔之遲開。石城之歎。也不孤。廬山之碑。焉
可作。竊比夫子貢之論夫子也。生於天地。不知天地之高厚。飲
於江海。不知江海之廣深。強名無迹。以慰其心。銘曰。

額珠內隱。匪指莫効。心鏡外塵。匪磨莫照。海藏安靜。風識牽樂。
不入度門。孰探法要。倬哉禪伯。獨立天下。功收密詣。解卻名假。
詣無所得。解亦都捨。月影空如。現於悟者。無量善衆。爲父爲師。
露清熱惱。光射昏疑。冀將住世。萬壽無期。奈何過隙。一朝去之。
嗟我門人。憂心斷續。進憶瞻仰。退思付囑。盡不離定。空非滅覺。

念茲在茲。敢告無學。

右見張燕公集十四又唐文粹六十四全唐文二百三十

故開府儀同三司上柱國贈揚州刺史大都督梁國公姚文

貞公神道碑奉敕撰

清聖祖古文淵鑿評曰。詳整鉅麗。叙功紀行。皆舉其大。故要而不煩。明方岳貢曰。燕梁二相。義好

乖異。及身後之文。極其歸美。雖是梁公習術牢籠。亦是燕公雅懷忠厚。不可以納路之事。譏之也。清陳廷敬曰。氣象則淵淳嶽峙。風骨則鴻鸞鳳舉。不專用

儷體。故一往饒雅健之致。姚宋與房杜比休。得此極力鋪張。真不愧高文典冊。

清徐乾學曰。史稱說掌文學之任三十年。朝廷大手筆。皆承中肯撰進。茲篇

即奉詔所撰也。唐世大臣碑版。或說灑宸藻。宋則詞臣撰文。而天子象其首。歷代制度具存。燕許尤稱典則。

叙曰。八柱承天。高明之位定。四時成歲。亨育之功存。畫為九州禹也。堯享鴻名。播時百穀。棄也。舜稱至德。由此言之。知人則哲。

非賢罔乂。致君堯舜。何代無人。有唐元宰曰姚文貞公者。位為帝之四輔。才為國之六翮。言為代之軌物。行為人之師表。蓋維嶽降神。應時而出者也。公諱崇。字元之。姚姓。有虞之後。遠在吳興。近徙於陝。今家洛陽焉。烈考長沙文獻公。崇父懿。貞觀中為嵩州都督。樹勳王

室。建旗舊府。公紈綺而孤。克廣前業。激昂成學。榮問日流。武庫則矛戟森然。文房則禮樂盡在。弱冠補孝敬挽郎。又制舉高第。歷佐濮鄭。並有聲華。入為司刑丞。天授之際。獄吏峻密。公持法無頗。全活者衆。進夏官員外郎。郎中侍郎。朝廷曰能。遂掌軍國。遷鳳閣侍郎。監修國史。兼相王府長史。始則天人讓王。承置醴之顧。終以飛龍利見。延驂乘之恩。自時厥後。恒當大任。凡三處

兵部尙書。三入中書令。一爲禮部尙書左庶子。又肅政大夫。總靈武軍兵馬。又司農唐文粹作僕卿。知隴右監牧使。出典亳宋常。越許申徐潞揚同十郡。景雲初。以藩邸舊寮。封梁國公。食賦百室。公性仁恕。行簡易。虛懷汎愛。而涓涇不雜。眞率徑盡。而應變無窮。常推是心。以御於物。故所蒞必。毗庶風偃。驚很化從。言不厲而教成。政不威而事理。去思覩頌。來暮聞歌。旣登邦政。卒乘輯睦。及在宗伯。神人允諧。今之中書。是爲理本。謀事兼於百揆。論道總於三台。公執國之鈞。金玉王度。大渾順序。休徵來臻。懋德格天。名遂身遜。拜開府儀同三司。崇其秩。逸其志也。初太夫人在堂。公受任西掖。頗限局禁。求侍晨昏。優詔旣許。尋令還職。公固

請以泣。制曰。家有令弟。足慰母心。國有棟臣。安可暫缺。其後剖符江表。敦諭起復。衰麻外墨。欒棘內毀。變禮中權。通識所貴。神龍之首。與聞興復。疇其井賦。累讓而停。夫以革故鼎新。大來小往。得喪而不形於色。進退而不失其正者。鮮矣。君子曰。忠不忘親。仁也。哀不違事。義也。讓功辭邑。禮也。濟代全名。智也。仁以長人。義以和下。禮以安上。智以周身。宜其光輔四帝。軒冕三紀。池臺琴筑。優游暮齒。傳爵土於祚胤。保祿位於終始矣。享年七十有一。開元九年九月。寢疾薨於東都之慈惠里。皇上悼焉。國人慕焉。撫牀輟春。曾未云比。制贈揚州大都督。謚曰文貞。禮也。十年二月。葬於萬安山之南原。在疾也。王人賜膳。御醫視藥。於薨

也。中使弔臨。羽儀哀送。君臣之義。厚莫重焉。子昇奔。思綴遺美。以寘罔極。有詔掌文之官敘事。盛德之老銘功。將以寵宗臣。揚英烈。帝乃洒恩仙翰。鏤澤豐祗。日月照臨於佳城。煙雲變態於神道。寶其文字。別爲羣玉之山。禁其樵蘇。即表三司之墓。銘曰。淵源自虞。派別從吳。避地魯陝。居家洛都。神明遠契。嶽瀆冥符。翌聖斯偶。生賢不孤。仁將勇濟。孝與忠俱。學刃攢植。文鋒迅驅。纔安卑位。卽騁長途。唯實唯有。若虛若無。再三軍國。一二訐謨。戎柄尤重。王綸最樞。兼司任切。久政榮殊。黼藻彌煥。丹青靡渝。以寬容物。以鑒分區。外或形放。中恆禮拘。箴雖誠口。諍亦忘軀。但覩渾璞。誰詳瑾瑜。伊咎尺寸。管樂錙銖。名正身遂。言誠願孚。

方辭漢祿。更辱齊組。旣積而散。窮懽盡娛。川歸東極。日去西晡。上惻旒扆。旁悲路衢。藍由美玉。荔浦明珠。載廣休慶。爰宏典謨。豐碑乃立。盛業其鋪。帝念頻軫。仙毫特紆。鐫金刻石。鳳篆龍圖。七耀光動。三泉澤濡。銓能敘事。理鬱詞敷。求舊銘實。慙殫惡蕪。緬思雲霧。尙想江湖。有道之德。其何以踰。延陵之墓。空此嗚呼。存沒終始。遐哉邈乎。

右見張燕公集十五又唐文粹五十六

贈涼州都督上柱國太原郡開國公郭君神道碑奉勅撰

唐

書郭知運傳曰開元八年六州胡康待賓等反詔知運與王皎討平之九年卒於軍。贈涼州都督。仍令張說爲其碑文。新唐書郭知運傳曰知運屯西方。戎

黃。長。憚。與。王。君。巢。功。名。略。等。時。號。王。郭。帝。詔。中。書。令。張。說。紀。其。功。於。墓。碑。

四時平分。清秋之氣勁。五方異俗。崆峒之人武。故隴上多豪。山西出將。其有雲龍感召。星象特生。金鼓登壇。隱如敵國。麾幢指塞。自比長城。得之于太原公矣。公諱知運。字逢時。其先太原著姓。今則晉昌人也。本乎文王之子。唐文粹作弟是為虢叔。虢或云郭。因而氏焉。自燕昭尊隗以築宮。漢祖封亭以列國。其侯于陽曲。宅彼太原舊矣。亭之玄孫友。從太原徙隴西。昭帝分隴西置西平。郭氏又為郡之右族。友之昆孫武威太守憲。憲之猶子散騎常侍芝。俱有名跡。見于魏晉。則晉昌諸宗。散騎之後也。爾乃一門連譽。時人號曰三儒。四海齊名。天下謂之八顧。唐文粹作凱光祿派分于馮翊。廷尉世茂于潁川。孝則天錫釜金。忠則帝章冕服。仁則

猛獸不害。信則兒童不欺。豈但介休見有道之碑。洛陽聞立德之傳而已。曾祖欽。瓜州大黃府統軍上柱國。祖才。朝議郎瓜州常樂縣令上柱國。父師。朝散大夫上柱國。贈伊州刺史。積鹵之地。戎馬生郊。業戰鬪而弘勳。仕州縣而為達。啟莫京之繇福。不在于其身。積無聲之善慶。必流于後嗣。公太白之精。雷泉之靈。膺家之禎。為國而生。身長七尺。力能扛鼎。猿臂虎口。虬鬚鶚瞬。射穿七札。劍敵萬人。子卿路逢。遙識將軍之相。唐舉一見。足辨封侯之骨。解褐以善戰。授昭武校尉。秦州三度府左果毅。以敗狄北庭。加游擊將軍。沙州龍勒府折衝。兼右金吾郎將。瀚海軍副使。尋改朝散大夫伊州長史伊吾副使。唐文粹無尋改以下十四字以軍累破

虜即授其州刺史。進當軍經略使。朝廷以未愜前除。且有後命。遷本衛中郎將。仍爲舊州軍使。默啜之寇北庭也。公奔命解圍。軍聲大振。加雲麾將軍。右武衛將軍。封介休縣開國公。食邑二千戶。開元二年。吐蕃入隴右。掠坳牧。公兵以奇勝。寇不復蹤。積甲山齊而有餘。收馬谷量而未盡。歸功廟算。朝議多之。拜右羽林將軍。持節隴右諸州節度大使。兼鄯州都督。河源軍使。鎮西陲。信國之藩屏。坐北落亦王之爪牙。故入奉期門。出分閫寄。于是料敵無備。間其師老。潛軍一舉。大俘九曲。鑱甲文劍。焚馬犂牛。旣獻戎捷。遂頒朝賜。乃兼鴻臚卿。攝御史中丞。封太原郡開國公。加前食邑三千戶。執憲總軍。典屬乘障。增爵益邑。遇厚恩。

深。俄而六州羣胡。相率大叛。命公統隴右之騎。濟河曲之師。鋒鏑爭先。玉石俱碎。拜左武衛大將軍。授一子官。賜金銀器百事。雜綵千段。班師臨洮。邁茲虐疾。嗟乎。匈奴未滅。宿志不伸。生也有涯。死而猶視。開元九年十月二十二日薨于軍舍。春秋五十有五。蕃夷邊鎮。血面摧心。悲慘風雲。號慟山谷。豈非良將視人如子。人亦視猶父乎。皇帝憫焉。詔贈涼州都督。米粟五百石。錦帛五百段。命都水使者張景佚備物護葬。遵朝典也。惟公氣猛而性和。量寬而精銳。沈謀可以掩蒼蔡。雄斷可以奪鬼神。故常糟粕韜鈴。芻狗風角。然其樹恩結信。立威用武。烜赫如風濤。震盪如雷雨。戰必克。攻必取。每有奏謁。帝特稱歎。孝文之得魏尙。

虜不足憂。太祖之見郭嘉。知成吾事。前後錫錦衣寶帶。文馬素女。爛其盈門。長鳴在廐。感知己之主。陳必死之力。皇情西顧。則九羌疊鼓。詔書北伐。則六狄焚旗。上成聖君之玄鑒。下効武臣之素節。其竟也如此。夫爲人子立廟致敬。祖考來格。不亦孝乎。爲人臣恢疆禦侮。以勞定國。不亦忠乎。若然者。歸義方于先人。揚令名于後代。可也。嗣子英傑。起復定遠將軍左領軍衛翊府中郎將。假紫服金章。河西節度副大使。英奇朝散大夫前尙輦奉御。英協游擊將軍前京兆府勵行府右果毅都尉。英彥朝議郎前左衛胄曹參軍等。或善居喪而過哀。或從王事而奪禮。則知辛賢父子。繼位將軍。祭彤兄弟。並參師律。志本不忘。達也。而

新是謀。權也。嘉此武功。創其宅兆。以十年七月葬于太原。夫人燉煌索氏。祔焉。禮也。皇上念功以惜逝。厚給以遇存。有詔詞人爲其碑志。介士送葬。即封征虜之墳。單于入廟。當祭度遼之墓。銘曰。

洸洸將軍。雄略冠羣。平西征北。震戎疊獯。亭障臥鼓。屯田饋軍。仗此白刃。致彼青雲。郭侯宴喜。旣多受祉。玄牡黻衣。清廟蠲祀。鼎食金奏。炮鱉膾鯉。旣來不庭。有嚴天子。流沙博望。羽林飛騎。河曲迴兵。臨洮舊防。手握金節。魂沉玉帳。千里送喪。三軍悽愴。詔葬禮崇。恩碑義豐。生爲神將。死爲鬼雄。身世一滅。榮華萬空。祁連之墓。長旌武功。

右見張燕公集十六又唐文粹五十七全唐文二百二十七

弔國殤文

北伐兮東胡。邈遼陽兮孤竹。偏師兮覆衆。在崇山兮峽谷。露芘芘兮蔓草。風蓊蓊兮拱木。見馬血兮夜燃。聞殤魂兮雨哭。君王按金鼓而氣憤。撫珠鈴而淚滋。橫萬里兮抽恨。弔羣山而寫悲。懟凶將兮我辱。悼勇夫之被唐文粹作秋纍。彼殷鑒兮未遠。何後來兮不追。對死地兮出陣。臨傷門兮用師。軍奪帥兮虹食壘。車脫輻兮火焚旗。有欒蠶兮復矣。無范宣兮愧之。命窮迫兮短兵錯。膚迎刃兮血染鏑。旋殘潰兮棄組練。山猶號兮谷餘戰。殪原野兮

奈何。違君親兮不見於戲。何天命之奄忽。俾仁義之禮兵。為蠻夷之俘骨。躡大校之飛將。間五營之勁卒。吾見出兮不歸。竟名存兮身沒。

右見張燕公集二十五又唐文粹三十三

錢本草清禁方炳跋曰。此唐張燕公說所撰。從不見於紀載。順治間修平涼府城。掘地得石碣。乃觀此文。碣係樊厚書。類聖教序。其碣今現存。山北先

生熟神農書。恐書中缺此味。故錄以遺之。康熙己丑。清汪士銓跋曰。錢之為神。見於論。而獨遺於本草。故人知其利而不知其毒也。燕公之為此。其真公之文耶。抑假託者耶。至其字畫之迥秀。非習右軍者不能矣。甲午夏日。

錢味甘。大熱。有毒。偏能駐顏。彩澤流潤。善療饑寒。困厄之患立驗。能利邦國。惡賢達。畏清廉。貪婪者服之。以均平為良。如不均平。則冷熱相激。令人霍亂。其藥采無時。采至非理。則味臭。及既

流行能役神靈。通鬼氣。如積而不散。則有水火盜賊之災生。如散而不積。則有饑寒困厄之患至。一積一散。謂之道。不以爲珍。謂之德。取與合宜。謂之義。使無非分。謂之禮。博施濟衆。謂之仁。出不失期。謂之信。入不妨已。謂之智。以此七術精鍊。方可久而服之。令人長壽。若服之非理。則溺志傷神。切須忌之。

右見清宋犖筠廊二筆又全唐文二百二十六

造像記

清端方跋曰。右燕公造像記。揭衙知方朔軍大節度使。方朔當是朔方之誤。按通鑑開元九年十二月置朔方節度使。領單于都護府夏隴等

六州。宅遠豐安二軍三受降城。新唐書方鎮表同。十年四月以張說兼知朔方軍節度使。兩唐書燕公傳並同。造像記作於開元六年。在朔方節度使未置之先。與史傳不合。唯據燕公傳。開元八年有朔方大使王皎。誅河曲降虜事。則是朔方節度使。雖開元九年始置。而朔方大使則固前有之。或者當開元六年燕公會爲朔方大使。而書造像記者。遂加增節度二字。故不曰節度使。而曰大節度使也。其三品黃門將輔國大將軍。傳皆無之。凡顯貴者所歷官史多從略。不

具書。不足異也。傳稱字文融。與崔隱甫李林甫共劾奏說。引僧道岸闕詞時事。冒署右職。燕公平日殆喜與繼流往還。則造像說經等事。容在所不免耳。

開元六年仲春月廿三日。三品黃門將輔國大將軍。知方朔軍

大節度使。爲

闕上

官軍請大法師說經

闕上

儿日。造佛像廿尊。佛

闕上

子張說香花供□。

右見清端方匊齋藏石記

奉和春日幸望春宮應制

別館芳菲上苑東。飛花澹蕩御

一作舞

筵紅。城臨渭水天河靜。

一作近

闕對南山雨露

一作雲霧

通繞殿流鸞。凡幾樹。當溪亂蝶許多叢。春

園既醉心和樂。共識皇恩造化同。

奉和春日出苑應制

國安文獻志

卷九

耆舊事彙

張說

十七

趙莊賈氏无悶

禁林豔裔發青陽。春望逍遙出畫堂。雨洗亭臯千畝綠。風吹梅李一園香。鶴飛不去隨青管。魚躍翻來入綵航。睿藻歡承天保定。迺文更覩日重光。

右詩二首見張燕公集一

將赴朔方軍應制

禮樂逢明主。韜鈴用老臣。恭憑神武策。遠御鬼方人。供帳榮恩餞。山川喜詔巡。天文日月麗。朝賦管絃新。幼志傳三略。衰材謝六鈞。膽猶忠作伴。心故道為鄰。漢保河南地。天清塞北塵。連年大軍後。不日小康辰。劍舞輕離別。歌酣忘苦辛。從來思博望。許國不謀身。

恩制賜食於麗正殿書院宴賦得林字

清翁方剛復初齋集書張燕公詩後曰東壁圖書府。

東壁人所共知也。西園翰墨林。義不相涉者。此當引沈休文詩。西園遊上才。而沈句步西園。則似與翰墨林義不相涉者。此當引沈休文詩。西園遊上才。而沈句之西園。則本於魏文帝逍遙步西園之句耳。此則詞場祖述。或原或委之理。

東壁圖書府。西園

一作垣

翰墨林。誦詩聞國政。講易見天心。位竊

和羹重。恩叨醉酒深。緩

一作載

歌春興曲。情竭為知音。

幽州夜飲

涼風吹夜雨。蕭瑟動寒林。正有高堂宴。能忘遲暮心。軍中宜劍舞。塞上重笳音。不作邊城將。誰知恩遇深。

城南亭作

珂馬朝歸連萬石。稍門洞啟親迎客。北堂珍重琥珀酒。庭前列

肆茱萸席。長袖遲迴意緒多。清商緩轉日騰波。舊傳比翼侯家舞。新出將雛主第歌。漢家絳灌餘兵氣。晉代浮虛安足貴。正逢天下金鏡清。偏加日飲醇醪意。誰復遊遨不復歸。閒庭莫畏不芳菲。會待城南春色至。竟將花柳拂羅衣。

右詩四首見張燕公集二

同賀八送亮公赴荊州

疇昔同聲友。鸞飛出鳳池。風雲一蕩薄。日月屢參差。此別黃葉下。前期安可知。惟憐楚南樹。不爲歲寒移。

岳州別梁六入朝

遠莅長沙渚。欣逢賈誼才。江山疲應接。風日復晴開。江樹雲間

斷。湘江水上來。近洲朝鷺集。古戍野猿哀。岸柳含蒼靄。河蒲秀紫臺。月餘偏地賞。心盡故人盃。自我違京洛。嗟君此泝洄。容華因別老。交舊與年頽。夢見長安陌。朝宗實盛哉。

送梁六自洞庭山作

巴陵一望洞庭秋。日見孤峰水上浮。聞道神仙不可接。心隨湖水共悠悠。

岳州別子均

離筵非燕喜。別酒正銷魂。念爾猶童孺。嗟余隔遠藩。津亭拔心草。江路斷腸猿。他日將何見。愁來獨倚門。

右詩四首見張燕公集三又送梁六一首見清王士禎廣

唐賢三昧集

蜀道後期

客心爭日月。來往預期程。秋風不相待。先至洛陽城。

廣州江中作

去國歲方晏。愁心轉不堪。離人與江水。終日向西南。

至尉氏

夕次阮公臺。嘯歌臨爽垲。高名安足賴。故物今皆改。吾兄昔茲
邑。遺愛稱良宰。桑中雉未飛。屋上烏猶在。途逢舊叅吏。城有同

僚案。望塵遠見迎。

一作遠見
咸相迎

拂館來傾待。慈惠留千室。友于存四

海。始知魯衛間。優劣懸相倍。

澧湖山寺

空山寂歷道心生。虛谷迢遙野鳥聲。禪室從來塵外賞。香臺豈
是世中情。雲間東嶺千尋出。樹裏南湖一片明。若使巢由知此
意。不將蘿薜易簪纓。

幽州新歲作

去歲荆南梅似雪。今春薊北雪如梅。共知人事何常定。且喜年
華去復來。邊鎮戍歌連夜動。京城燎火徹明開。遙遙西向長安
日。願上南山壽一杯。

右詩五首見張燕公集四又蜀道後期見唐文粹十五澧

湖山寺見蜀韋莊又玄集金元好問唐詩鼓吹

雜詩

問子青霞意。何事留朱軒。自言心遠俗。未始迹辭喧。過蒙良時幸。側息吏途煩。簪纓非宿好。文史棄前言。夕臥北窗下。夢歸南山園。白雲慙幽谷。清風媿泉源。十年茲賞廢。佳期今復存。掛冠謝朝侶。星駕別君門。

鄴都引

君不見。魏武草創爭天祿。羣雄睚眦相馳逐。晝攜壯士破堅陣。夜接詞人賦華屋。都邑繚繞西山陽。桑榆漫漫漳河曲。城郭爲墟人代改。但見西園明月在。鄴傍高塚多貴臣。蛾眉眴眴共灰塵。試上銅臺歌舞處。唯有秋風愁殺人。

右詩二首見張燕公集五又唐文粹十四及十二
廷琳按前張司空張簡憲二卷凡其片辭隻句無不甄採
張燕公詩文得江山之助稱一代大手筆惟其全集二十
五卷之多此編因限於篇幅故僅錄此欲考其全者有武
英殿叢書全唐文全唐詩及坊刻單行本張燕公集在茲
編不備列云

附錄

唐蘇頲授張說中書令制門下咸有其德委廊廟之元宰知
無不爲歸掖垣之成務銀青光祿大夫檢校中書令上柱國
燕國公張說含和育粹特表人師懸解精通見期王佐立言

布文武之用。定策勵忠公之典。才冠代而不有。功至大而若虛。自頃宏益時政。發揮王道。萬事必理。一心從乂。以觀其獨。伯起慎於四知。常得其貞。叔敖謹於三省。故能深而不竭。久而彌芳。宣大號於紫宸。潤昌圖於清禁。我憑柱石。爾作鹽梅。正名之謂羣議斯集。可守中書令。散官勳封如故。主者施行。

見文苑英華

〔唐玄宗命張說等與兩省侍臣講讀制〕先王務本。君子知教。化人成俗。理國齊家。必由於學矣。朕往在儲宮。旁求儒雅。則張說褚无量等爲朕侍讀。詩不云乎。如切如磋。如琢如磨。斯之謂也。咸能發揮啟迪。執經尊道。以微言匡非德者。朕甚休

之。自虔奉聖訓。祇膺大寶。冀天下學士。靡然向風。實獲我心。登於近侍。復欲勉聽虛佇。論思獻納。孔子曰。德之不修。學之不講。是吾憂也。豈食而不知其旨。耕而不知其耨。將何以因於義。求於善。補朕之闕。誨人罔倦哉。宜令銀青光祿大夫守中書令上柱國燕國公張說。銀青光祿大夫右常侍崇文館學士兼國子祭酒上柱國舒國公褚无量等。公務之暇。於中書與兩省侍臣講讀。其有昌言至誠。可體要經遠者。仍令銀青光祿大夫行黃門侍郎昭文館學士上柱國中山郡開國公李乂。銀青光祿大夫行中書侍郎兼知制誥上柱國成安縣開國男蘇頌。與左右起居。隨事編錄。三兩闕進。朕將親覽。

庶施乎海內。始自京師。鳳沼擅鴻都之遊。中書有稷下之事。應須紙筆鋪設等。令中書檢校供擬。見全唐文

又命張說兼領朔方節度。詔朔方之地。雍州之域。密邇關輔。是稱河塞。頃者胡孽爲寇。擾其居人。王師有征。戎事斯大。戎役之弊。邊氓旣勤。雖妖醜底清。而政理未洽。不有經制。曷云昭蘇。且和衆爲武者。所以詰姦慝。總軍命將者。所以訓甲兵。匪夫大賢。孰允茲任。兵部尙書中書門下三品燕國公張說。天與明秀。自然才傑。光被九德。宏宣七政。爰掌邦理。實爲國楨。謀而必忠。言則無隱。寅亮之美。用熙帝載。談笑之餘。更陳戎備。所謂善行樽俎。事立封疆。宜以上台之尊。遙統中軍之

任。可持節兼知朔方軍節度大使。餘如故。

見同上

又命張說修國史。詔肇有書契。是興簡冊。所以彰乎得失。示以勸懲。非夫詳而有體。辨而不華。含陽秋之蘊。總墳誥之蹟。豈能光我司典。崇其立言。右羽林軍將軍攝御史大夫權檢校并州大都督府長史持節天平軍節度大使燕國公張說。多識前志。學於舊史。文成微婉。詞潤金石。諒可以昭振風雅。光揚軌訓。可兼修國史。仍齎史本就并州修撰。見同上

張說拜相制。門下乾坤以陰陽化成。后王以輔相興理。所以寅亮天工。緝熙帝圖。非夫大賢。孰寄斯任。天平軍節度大使右羽林將軍兼并州長史攝御史大夫燕國公兼修國史張

說挺其公才。生我王國。體文武之道。則出將入相。盡忠貞之節。亦前疑後丞。諒可以宏此大猷。總其邦政。允釐庶績。保乂皇家。可守兵部尚書同中書門下三品。勳封修國史如故。仍即馳驛赴京。

見文苑英華引太平內制

唐張九齡停張說中書令制門下中書令燕國公張說往屬艱難。輸誠於履險。及茲輔相。潤色於告成。而不察細微之人。頗乖周慎之旨。朕畧小宥大。念舊褒功。且法不欲屈。宜罷中樞之任。義亦有在。更崇端揆之榮。可尚書右丞相。仍將國史於宅修撰。主者施行。

見張曲江集

拜張說中書令制門下殷命百工。傳膺審象。漢推三傑。良屬

運籌。不有斯人。孰賚予弼。尚書左丞張說居正合道。體真理精。朕昔在承華。首延博望。談經之際。欽若讜言。搗翰之間。潤色鴻業。屢陳匡益。見嫉奸回。頃雖抗跡疎遠。而載懷飢渴。今羣兇已服。大猷伊始。永言亮采。光朕側席之期。俾資啟沃。成朕濟川之望。宜登鼎鉉。式綜絲綸。

見文苑英華引太平內制

唐賈曾餞張尚書赴朔方序王者大司馬制軍詰禁封國正朔。惠綏蠻貊。刑齊猾夏。其儀尚矣。天子道穆三象。功清六合。截海來威。窮荒揆教。將以靜流服。度藩畿。削除凌暴。昭蘇寡弱。乃命元宰兵部尚書燕公。專節朔方。授律羣帥。涉河之外。距關之西。公皆統之。重分閩也。公智以開物。精以造微。文為

一變之英。武有萬人之敵。歷登庶尹。王猷載寧。三宅台衡。帝采惟亮。雖坐堂足以制勝。而勤國忘其定居。闕茂次年。仲夏貞閏。拜手東洛。馳輶北闕。備官而行。成旅以從。是日也。景風司至。星火殷宵。伯趙鳴而戒陰。爽鳩習而揚武。賦可以昇高望遠。詩可以出宿踐行。有詔具寮。爰開祖宴。且申後命。寵以蕃錫。天章賦別。御札題牋。副衣表挾。續之誠。兼闡喻投醪之旨。筐篚以將其貺。筆硯以表其文。前載未書。今冊斯觀。侍中安陽公以仁體國。中書令河東公以德熙朝。燮贊功成。訐謨景暇。慕采薇之興。張伐木之朋。詢彼甸師。卜茲郊候。鼎門右轉。歧路旁分。當闕塞之斷山。接華林之高樹。幕人宿設。重帟

雲平。大官饗舉。百羞霞錯。四夏六胤之變。朱干玉羽之容。雷殷川原。電燧林薄。朝傾多士。巷無居人。接蓋陰衢。揚袂風野。羽觴遞進。列座酣而不譁。清饒間發。將士激而逾厲。視日知其吉氣。吹律驗其商聲。則已景列穹都。風騰沙漠。西域輕郵支之使。東胡息冒頓之虞。顧夫南仲于征。吉甫薄伐。不其遠也。若木還照。前茅啟行。聽闐闐之去鼓。日悠悠之轉旆。歌事者每懷靡及。念離者跂予望之。成志在心。發言同唱。天子有念。式敘清風。請編出車之什。以繼蒸人之雅。見唐文粹

唐房琯上張燕公書竊惟當今主英臣誠海平天清干相國者更言朝廷之遺闕黔黎之艱阻妄矣琯直以有詞不自明

徵積心無與消散。此亦一夫不獲。願就相門陳之。或議相門重深賤。士罕及進言不少。非人則廢。退而復念。止於旬時。若借人爲容。則耻殊特達。欲持情徑往。則懼致忽遺。思所以自奇。圖左右見異。僭用舊禮。獻此琬珪。冀贄列得啟其書。書窮思見其人矣。至於輕好行怪。易爲犯德。瑄非敢如此也。願左右明之。瑄嘗聞既往布衣之士。亦賤者也。而一人下之。三公崇之。將欲分其賢愚。而係其理亂。瑄自料必不能有損益於盛朝。徒亦形似英哲之蹤。辱累珪璋之德。希左右以公選。瑄因以私進。所私者則敢終而言之。瑄幼而先相國棄代。委翳於蓁蕪之下。因物遂遷。與農者莫辨。不忍窘厄。然後以菑穫

爲懷。將祗若遺謀。乃發前言筐篋。有相公述作焉。有先君鑒誠焉。約之立言。依以扶信。若赴古道則適。若逢今人則乖。或謂之非。或謂之是。求我哲匠。擊此困蒙。顧此身在下流。無聞上士。未足爲先君之嗣。不可見先君之友。况有貴賤之異。爲之隔闊乎。深惟達音者希。恐不可再得。忽不知相國之富貴如此。瑄之貧賤又如此。期相國乃曰。人以道義求我。我不當以貴賤隔之。借如宣父有相國之貴。寧拒游夏之徒歟。夫其此心。千載一用。豈瑄也當之。又見禮經有難進易退者。戒貪也。起人來學者。勸道也。瑄趣仁者。而久未行何乎。衣惟素褐。乘非車馬。閤人斥之。馭者排之。長衢高門。驟拜左右。則近於

論訴。豈聞道之士乎。故獻玉貢書。以先其意。或垂善誘。使得登其門。假以溫和之顏。賜其清閒之宴。大觀宗廟。旁見百官。上諮爲人之紀綱。次及作文之利害。然後陳百一之誠。諷南山之詩。醉德寫誠。俯而告退。瑄之願也。未敢忘也。若其取於是日。許時入奉。一歲之內。得再厠法曹舍人。聞詩禮焉。人子畢矣。豈有恨哉。至如笥有衣裳。天有秩序。聖君在上。何人所欲。如瑄今日。未敢生心。倘見露之時。爲左右所器。亦願起自燕國門下。令衆人別意瞻矚也。貪竭鄙志。不覺多言。妨塵宴私。憂危失措。倘左右垂無窮之惠。降不測之禮。錫數字之答。加一介之使。則相國保下士之譽。小人獲見知之榮。光照微

軀。價傳多士。輒飾瑣貌。以俟軒車。

見唐文粹又全唐文

唐張九齡集賢殿書院奉勅送學士張說上賜宴序集賢殿者。本集仙殿也。上不以

唐文粹無不以二字

惟睿作聖。而猶垂意好學。用

相必本於經術。圖王亦始於師臣。及乎鴻生碩儒。博聞多識之士。自開元肇建。以迄於今。大用徵集。煥乎廣內。而聽政餘暇。式讌在茲。忠臣嘉賓。得盡心之所。聰明文思。有光被之德。故下以道親。上亦歡甚。即於御座。爰發德音。以爲候彼神人。事雖前載。傳於方士。言固不經。遂改仙爲賢。去華務實。且有後命。增其學秩。是以集賢之庭。更爲論思之室矣。中書令燕國公。外弼庶績。以奉沃心之謀。內講六經。以成潤色之業。故

得出入華殿。師表翰林。惟帝用臧。固天所賴。拜命之日。荷寵有加。降聖酒之罍。頒御厨之膳。食以樂侑。人斯飽德。時則有侍中安陽公等。承恩預焉。學士右散騎常侍東海公等。攝職在焉。或稷契大賢。或淵雲諸彥。文王多士。周室以寧。武帝得人。漢家爲盛。而高視前古。獨不在於今乎。咸可賦詩。以光鴻烈。

見張曲江集又唐文粹

唐張九齡祭張燕公文。維年月朔日。族子秘書少監集賢院學士某。謹以清酌少牢之奠。敢昭告于燕國公之靈。惟公應有期之運。降不世之英。坦高軌以明道。謹大節而立誠。懸鏡待人。虛舟濟物。妙用無數。精心惟一。明未朕而先覩。聽有餘

而每黜。猶豹變而成文。嘗鳳鳴而中律。故能羽翼聖后。丹青元化。陳臯陶之謨謀。盡仲山之夙夜。道因慮於文武。業惟永於王霸。綢繆恩渥。荏苒代謝。國重元輔。門承下嫁。實大我之宗盟。與人君之姻婭。天蓋福善。地益華宗。赫赫爲尹。巖巖比崇。不享黃髮。如何玄穹。旣道長而運短。豈祥降而惠終。人亡令則。國失良相。學墜司南。文殞宗匠。惟國華之見奪。何天道之弗諒。追惟小子。夙荷深期。一顧增價。二紀及茲。非駑駘之足數。蓋枝葉以見照。洎剖符於外臺。承徹琴於舊館。屢行號而身贖。空匍匐而腸斷。跡旣拘於彝憲。情未展於哀款。朝章猥及。傳名斯入。想德輝而不見。望仁里而徒泣。樹所歎而猶

存人具瞻而永戢。盡總帳之今感。哀烏衣之往集。庶羞雖薄。異享厥誠。尊靈斯降。是嘉平生。已矣萬古。纏綿五情。追悲緒於離筵。結巨恨於幽明。伏惟尚饗。見張曲江集

唐陽伯成駿太常燕國公張說諡議。諡者德之表。行之迹。將以激勵風俗。檢束名教。固無虛譽。是尊實錄。準張說罷相制云。不肅細微之人。頗乖周慎之旨。又致仕制云。行虧半古。防闕周身。未免瓜李之嫌。而喧衆多之口。且玉之有瑕。尚可磨也。人之斯玷。焉可追焉。諡日文貞。何成沮勸。請下太常。更據行事定議。謹議。見全唐文

廷琳按全唐詩中。各家奉詔贈送燕公及相酬唱之詩。不

下百餘首。茲編因卷帙已盈。概未錄。

元劉因張燕公讀書臺詩。陰壁下寒泉。陽崖隱深洞。想像張幽州。當年此絃誦。遐情納方寸。灑露驚宵夢。既有真積功。豈無致時用。不然起絕學。猶當垂後統。濟濟唐開元。儒臣相伯仲。文雖數燕許。名不並姚宋。遂令百世下。煙霞抱餘痛。尋幽縱步貪。懷古清歌送。緬思白鹿翁。眼中見連棟。茲山有道氣。會遇或天縱。聊以永今朝。白雲不可種。見靜修文集又清顧嗣立元詩選金元好問續夷堅志

日。順天西北四十里抱陽巖寶教院。廟曰顯濟。此寺唐張燕公說。馮瀛。干道。皆嘗讀書於此。有燕公石穴讀書堂。明珠窩。清黃彭年幾輔通志曰。石穴在滿城縣

抱陽山東巖下。上篆書。大唐張燕公讀書堂。

固安文獻志卷十目錄

耆舊事彙

唐

張大理均

張燕公長子

張太常均

張燕公次子

五代

曹給事國珍

金

王經略子昌

李主簿思明

元

李警院天翼

祀鄉賢

哈孝子都赤

張總管義

宋縣令著

固安文獻志卷十

天津徐世昌鑒定

縣人賈廷琳謹編

耆舊事彙

唐

張大理均

〔新唐書張均附傳〕說長子均亦能文。自太子通事舍人。累遷主
爵郎中中書舍人。開元十七年說授左丞相。校京官。考注均考
曰。父教子忠。古之善訓。王言帝載。尤難以任。庸以嫌疑而撓紀
綱。考上下。當時亦不以爲私。後襲燕國公。累遷兵部侍郎。以累
貶饒蘇二州刺史。久之復爲兵部侍郎。自以己才當輔相。爲李

林甫所抑。林甫卒，倚陳希烈，冀得其處。既而楊國忠用事，希烈罷，而均爲刑部尚書，坐貶。建安太守，還授大理卿，居常缺望不平。祿山盜國，爲僞中書令。肅宗反正，兄弟皆論死。房瑄聞之，驚曰：「張氏滅矣。」乃見苗晉卿營解之。帝亦顧說有舊，詔免死，流合浦。建中初，贈太子少傅。子濛，事德宗爲中書舍人。

〔舊唐書張均附傳〕張說子均，均皆能文。說在中書，兄弟已掌綸翰之任，居父憂，服闋，均除戶部侍郎，轉兵部。二十六年，坐累貶饒州刺史。以太子左庶子徵，復爲戶部侍郎。九載，遷刑部尚書。自以才名當爲宰輔，常爲李林甫所抑。及林甫卒，依附權臣陳希烈，期於必取。既而楊國忠用事，心頗惡之，罷希烈知政事，引

文部侍郎韋見素代之，仍以均爲大理卿，均大失望，意常鬱鬱。祿山之亂，受僞命爲中書令，掌賊樞衡。李峴、呂諲條疏陷賊宮，均當大辟。肅宗於說有舊恩，特免死，長流合浦郡。

〔又禮儀志〕天寶九載十月，先是御史大夫王鉷奏稱：「太白山人王玄翼見玄元皇帝於寶仙洞中，乃遣王鉷、張均、王倕等於洞中得玉石函，上清護國經寶券、紀籙等，獻之。」

〔又刑法志〕初，西京文武官陸大鈞等陷賊來歸，定所推之，辜爲六等。大理卿張均引至獨柳樹下刑人處，免死，配流合浦郡。

〔又房瑄傳〕天寶十五年六月，玄宗蒼黃幸蜀，大臣陳希烈、張倚等銜於失恩，不時赴難。瑄結張均、張垠兄弟，與韋述等行至城

南十數里山寺。均垧同行。皆以家在城中。逗留不進。瑄獨馳蜀路。謁見。玄宗大悅。

又苗晉卿傳。及朝廷失守。衣冠流離道路。多為逆黨所脅。自陳希烈張均已下數十人。盡赴洛陽。晉卿潛赴山谷。

新唐書文藝蕭穎士傳。天寶初。穎士補祕書正字。于時裴耀卿席豫張均宋遙韋述皆先進。器其材。與鈞禮。由是名播天下。

唐兩京城坊考注引常侍言旨。洪師與燕國公張說置西京永樂坊東南第一宅。有永巷者。戒曰。此宅西北隅。最是王地。慎勿

於此取土。越月。洪又至。謂燕公曰。此宅氣候忽然索漠。恐必甚有取土於西北隅者。公與洪偕行。至宅西北隅。果有取土坑三

數。坑皆深丈餘。洪大驚曰。禍事。令公富貴一身而已。更二十年

外。諸郎君皆不得天年。燕公大駭曰。填之可乎。洪曰。客土無氣。與地脈不相連。今欲填之。亦猶人有瘡痛。縱以他肉補之。終無

益也。燕國子均垧皆為祿山委任。克復後。均賜死。垧長流之。洪按

師新唐書方伎傳作浮屠泓。西北隅作東北隅。至謂垧死。垧長流亦與史異。

元辛文房唐才子傳。燕國公張說子均。開元四年進士。亦以詩鳴。

唐李翱卓異記。燕公張說自中書舍人拜禮部侍郎。子均自中書舍人拜禮部侍郎。孫濛自中書舍人拜禮部侍郎。按張公三

代皆自中書舍人拜侍郎。奕世無比。時號為佳美者耳。

新唐書文藝劉太真傳德宗以天下平貞元四年九月詔羣臣宴曲江自爲詩敕宰相擇文人賡和李泌等請羣臣皆和帝自第之以劉太真李紆等爲上鮑防于邵等次之張濛等爲下與擇者四十一人。

按張濛爲張大理子見唐書附傳而宰相世系表失載其名濛事止此一條無可載故附錄於此。

張大理遺著

今存議一首碑一首詩七首

宗廟加籩豆議

清聖祖古文淵鑒評曰孝思無窮而常典有制範圍古今所以安人情而順天道也斯文殆發明禮經之義清王

熙評曰禮有節制防淫侈也蓋以情本無涯禮爲有定古先聖王之制所以垂萬世而無弊歟清宋德宜評曰周禮祭禮籩豆醴醢之外如昌本菁茹

皆取氣味交於神明初非嗜好之物且不薦褻味也援據典正可資博採

謹按禮祭統曰凡天之所生地之所長苟可薦者莫不成在水草陸海三牲八簋昆蟲之異草木之實陰陽之物皆備薦矣聖人知孝子之情深而物類之無限故爲之節制使祭有常禮物有其品器有其數上自天子下至公卿貴賤差降無相踰越百代常行無易之道也又按周禮膳夫掌王之食飲膳羞食用六穀膳用六牲飲用六清羞用百有二十品珍用八物醬用百有二十瓮則與祭祀之物豐省本殊左傳曰享以訓恭儉宴以示慈惠恭儉以行禮慈惠以布政又曰享有體薦宴有折俎杜預曰享有體薦爵盈而不飲豆乾而不食宴則相與食之享之與燕猶且異文祭奠所陳固不同矣又按周禮籩人豆人各掌四

籩四豆之實。供祭祀與賓客。所用各殊。據此數文。祭奠不同常時。其來久矣。且人之嗜好。本無憑準。宴私之饌。與時遷移。故聖人一切同歸於古。雖平生所嗜。非禮亦不薦也。平生所惡。是禮即不去也。楚語曰。屈到嗜芰。有疾。召宗老而屬曰。祭我必以芰。及卒。宗老將薦芰。屈建命去之。曰。祭典有之。國君有牛享。大夫有羊饋。士有豚犬之奠。庶人有魚炙之薦。籩豆脯醢。則上下安之。不差珍異。不陳庶侈。不以私欲干國之典。遂不用。此則禮外之食。前賢不敢薦也。今欲取甘旨之物。肥濃之味。隨所有者。皆充祭用。苟踰舊制。其何限焉。雖籩豆有加。豈能備也。傳曰。大羹不致。粢食不鬻。昭其儉也。書曰。黍稷非馨。明德惟馨。事神在於

虔誠。不求厭飫。三年一禘。不欲黷也。三獻而終。禮有成也。風有采蘋采芣。雅有行葦洞酌。守以忠信。神其舍諸。若以今之珍饌。平生所習。求神無方。何必師古。簠簋可去。而盤盂杯案。當在御矣。韶護可息。而箜篌笙笛。當在奏矣。凡斯之流。皆非正物。或興於近代。或出於蕃夷。耳目之娛。本無則象。用之宗廟。後嗣何觀。欲爲永式。恐未可也。且自漢以降。諸陵皆有寢宮。歲時朔望。薦以常饌。此既常行。亦足盡至孝之情矣。宗廟正禮。宜依典故。率情變革。人情所難。又按舊制。一升曰爵。五升曰散。禮器稱宗廟之祭。貴者獻以爵。賤者獻以散。此明貴小賤大。示之節儉。又按國語。觀射父曰。郊禘不過繭栗。蒸嘗不過把握。夫神以精明臨

人者也。所求備物。不求豐大。苟失於禮。雖多何為。豈可捨先王之遺法。徇一時之所尚。廢棄禮經。以從流俗。裂冠毀冕。將安用之。且君子愛人以禮。不求苟合。况在宗廟。敢忘舊章。請依古制。庶可經久。

右見舊唐書禮儀志五。又略見新唐書韋縉傳。又清御選古文淵鑒三十二。

邢王府長史陰府君碑

公諱行真。

名原缺。據舊唐書忠義李愷傳增。

字某。武威姑臧人也。昔恭王之裔。別封

於管。有夷吾者。能霸桓公。則平周。辭上卿之禮。適楚。踐大夫之職。以地命氏。授於陰城。新野之涼。皆為著族。貴則重族。二后榮

則一門。四侯。道則山紀。神仙。行則里題。忠義。建名崇德。世有其人。公高祖湘東內史鏗。梁州之子。屬詞比事。天下宗之。曾祖江州刺史通道。館學士顯。祖朝請大夫國子博士弘道。考某。官景明。貽範清白。纂烈文史。累善所徵。及公而盛。公承禮樂之峻。胄稟清明之異姿。天生粹靈。氣合真素。下帷專思。重席擅業。至人藏用。有道德之鄉。君子為儒。無榮辱之境。尚東郭以自逸。與南容之不廢。調補陳州司倉。徵其志也。以為非足利時。不容終秩。遂優游初服。述祖移年。嘿志立言。洞心清律。常手操經籍。耳練宮商。澹有怡神。坦無嬰慮。是可忘機。造化豈徒屑意。公卿而已哉。故德充以外形。才全以內濟。委懷從運。與道無名。尋拜命宜。

城王府記室參軍。退一隅而无悶。進三府而交辟。署宰長河。曲資而往。曰惠人無小。吾所從之。其至也。去惡如救焚。急賢如濟渴。遇物風偃。推心理裕。平其志而異物不遷。一其誠而萬情咸括。清猷美績。克存餘詠。飛狐之地。戎馬生郊。俾公爲蔚州別駕。則惠化所存。勇且知方。肇建天人。懋官靈器。入爲慶王友。轉太子中允。又拜國子司業。邠王府長史。或舉德以進。或尙閑而退。不失其正。達識推高。某年月日寢疾東都。終於永豐第。春秋七十有五。惟公率心經於德義。檢口絕於臧否。秉禮樂而視正直。蘊文藻而含清真。可不謂才全而蹈道者歟。位不兼濟。惜也。夫人范陽縣君張氏。丞相燕公之妹。立師妙德。嬪風女師。梁氏義輕於前志。曹門克貽於後範。府君之喪。紀綰將縞。晝哭成疾。恐流年之易除。慟累月而云逝。沒而不朽者。非禮節絕倫之謂乎。春秋若干。以某年月日合葬於龍門南陵原。禮也。公無子。有二女。咸以淑行著於通門。喪葬克家。感戚行路。子婿吏部郎中吳興張珣。度支員外郎隴西李愷。當依舊唐書作李愷永懷清冰。緬託貞石。庶乎時遷陵谷。猶徵少女之詞。道在宗親。不昧諸姑之德。大人爲頌。俾小兼序焉。

右見文苑英華又張燕公集十九

和尹忭登南樓

客來已兩春。更瞻韶光早。花鳥旣環合。江山復駢抱。樓形寫北

潭堞勢凌青島。白雲謝歸鴈。馳懷洛陽道。

江上逢春

離憂耿未和。春慮忽蹉跎。擇木猿知去。尋泥燕獨過。驚花翻霽日。垂柳拂煙波。激意屢怡賞。無如鄉念何。

九日巴邱登高

客心驚暮序。賓鴈下滄洲。共賞重陽節。言尋戲馬遊。湖風扶戍柳。江雨暗山樓。且酌東籬酒。聊祛南國憂。

和尹懋秋夜遊澹湖二首

遠水沈西日。寒沙聚夜鷗。平湖乘月滿。飛棹接星流。黃葉鳴淒吹。蒼葭掃暗洲。願移滄浦賞。歸待潁川遊。

灣潭幽意深。杳靄浦寒岑。石痕秋水落。嵐氣夕陽沈。澄澈天爲底。淵玄月作心。青溪非大隱。歸弄白雲潯。

岳陽晚景

晚景寒鷗集。秋風旅鴈歸。水光浮日出。霞彩暎江飛。洲白蘆花吐。園紅柿葉稀。長沙卑濕地。九月未成衣。

流合浦嶺外作

瘴江西去火爲山。炎徼南窮鬼作關。從此更投人境外。生涯應在有無間。

右詩七首見全唐詩九十

附錄

唐孫逖命張均襲封燕國公制門下正議大夫行尚書兵部侍郎上柱國張均傳範濟美錫履承榮有構厦之壞材爲刺鐘之利器嗣其先職且歷縉雲之司纘乃舊封更開去社之國可襲封燕國公食邑三千戶主者施行見文苑英華

唐鄭少微授張均等加階制門下中大夫行中書舍人張均等並藻珪璋騰華綸綍文行致美駁議惟精肅侍嚴禋咸稱慎禮宜覃行慶之典俾承加等之榮可依前件見同上

唐孫逖授張均兵部侍郎制門下六官之任夏卿尤重貳職之選時望惟屬正議大夫行尚書戶部侍郎上柱國燕國公賜紫金魚袋張均才略通經文詞濟美修身自達擅鴻陸之

羽儀蒞事無難有龍泉之斷割累拜省闈彌彰器用芳蘭可久垂棘重歸宜允副於僉擇俾增修於舊政可行尚書兵部侍郎散官勳封如故見同上

張太常垧

新唐書張垧附傳說次子垧尙寧親公主時說居中秉政均爲舍人諸父光爲銀青光祿大夫榮盛冠時玄宗眷垧厚即禁中置內宅侍爲文章珍賜不可數均供奉翰林而垧以所賜夸均均曰此婦翁遺堦非天子賜學士也按此見唐李肇國史補垧嘗爲帝贊禮

舉上都雅帝悅之因幸內宅顧垧曰希烈辭宰相孰可代者垧錯愕未得對帝曰無易吾堦垧頓首謝會貴妃聞以語國忠國

忠惡之。及希烈罷。薦韋見素代之。均始怨上。

清沈丙震曰。按天寶十三年三月均。貶盧溪郡

司馬。八月韋見素入相。則見素入相時。均已就貶。非因此而缺望也。

天寶十三載。祿山入朝。以破奚契丹

功求平章事。國忠曰。祿山有軍功。然不識字。與之恐四夷輕漢。乃止。及還范陽。詔高力士餞滌坡。力士歸曰。祿山內鬱鬱。若知欲相而不行者。帝以語國忠。國忠曰。所告者必張均。帝怒。盡逐其兄弟。以均守建安。而均為盧谿郡司馬。均自給事中為宜春郡司馬。歲中還。均為太常卿。帝西狩至咸陽。唯韋見素楊國忠魏方進從。帝謂力士曰。若計朝臣當孰至者。力士曰。張均兄弟世以恩戚貴。其當即來。房琯有宰相望。而陛下久不用。又為祿山所器。此不來矣。帝曰。未可知也。後琯至。召見流涕。帝撫勞。且

問均。均在。琯曰。臣之西。亦嘗過其家。將與偕來。均曰。馬不善馳。後當繼行。然臣觀之。恐不能從陛下矣。帝嗟悵。顧力士曰。吾豈欲誣人哉。均等自謂才器。亡雙。恨不大用。吾向欲始終全之。今非若所料也。均遂與希烈皆相。祿山。均死賊中。

舊唐書張均附傳。說次子均。以主婚玄宗。特深恩寵。許於禁中。置內宅。侍為文章。常賜珍玩。不可勝數。時兄均亦供奉翰林院。常以所賜示均。均戲謂均曰。此婦翁與女婿。非天子賜學士也。天寶中。玄宗嘗幸均內宅。謂均曰。希烈累辭機務。朕擇其代者。孰可。均錯愕未對。帝即曰。無踰吾愛婿矣。均降階陳謝。楊國忠聞而惡之。及希烈罷相。舉韋見素代相。均深缺望。天寶十三年

正月。范陽節度使安祿山入朝。時祿山立破奚契丹功。尤加寵異。祿山求帶平章事。下中書擬議。國忠進言曰。祿山誠立軍功。然眼不識字。制命若行。臣恐四夷輕國。玄宗乃止。加左僕射而已。及祿山還鎮。命中官高力士餞於滙波。既還。帝曰。祿山慰意否。力士曰。觀其深心鬱鬱。必伺知宰相之命不行故也。帝告國忠。國忠曰。此議他人不知。必張垆所告。帝怒。盡逐張氏兄弟。出均爲建安太守。垆爲盧溪郡司馬。叔爲宜春郡司馬。歲中召還。再遷爲太常卿。祿山之亂。玄宗幸蜀。宰相韋見素。楊國忠。御史大夫魏方進等從。朝臣多不至。次咸陽。帝謂高力士曰。昨日蒼黃離京。朝官不知所詣。今日誰當至者。力士曰。張垆兄弟。世受

國恩。又連戚屬。必當先至。房琯素有宰相望。深爲祿山所器。必不此來。帝曰。事未可料。是日琯至。帝大悅。因問均垆。琯曰。臣離京時。亦過其舍。比約同行。均報云。已於城南取馬。觀其趣向。來意不切。既而均弟兄果受祿山僞命。垆與陳希烈爲賊宰相。垆死於賊中。

舊唐書刑法志。初西京文武官陸大鈞等陷賊來歸。定所推之。辜爲六等。於是陳希烈。張垆。郭訥。獨孤朗等七人。於大理寺獄賜白盡。

又后妃傳。玄宗元獻皇后楊氏。生肅宗。開元中肅宗爲忠王。后爲妃。又生寧親公主。張說以舊恩特承寵異。說亦奇忠王儀表。

必知運歷所鍾。故寧親公主降說子垺。

又韋述傳。蕭穎士者。聰儁過人。富詞學。有名於時。賈曾席豫張垺及述皆引爲談客。

又酷吏吉溫傳。會右相李林甫。與左相李適之駙馬張垺不叶。適之兼兵部尙書。垺兄均爲兵部侍郎。林甫遣人訐出兵部。

又文苑蕭穎士傳。當開元中。天下承平。人物駢集。如賈曾席豫張垺韋述輩。皆有盛名。而穎士皆與之遊。由是搢紳多譽之。

唐語林。著作郎孔至撰百家類例。第海內族姓。以燕公張說等爲近代新門。不入百家之數。駙馬張垺。燕公子也。觀至所撰。謂弟垺曰。多事漢。天下族姓何關汝事。而妄爲升降。垺與至善。以

兄言告之。時工部侍郎韋述諳練士族。至書初成。以呈韋公。以爲可行也。及聞垺言恐懼。將追改之。韋曰。文士奮筆。將爲千載之法。奈何以一言自動搖。有死而已。胡可改也。遂不改。

新唐書儒學孔至傳

同略

唐李肇翰林志。初國朝修陳故事。有中書舍人六員專掌詔誥。雖曰禁省。猶非密切。乾封以後。始曰北門學士。玄宗初改爲翰林待詔。張說陸堅張九齡徐安貞相繼爲之。改爲翰林供奉。開元二十六年。劉光謹張垺乃爲學士。始別建學士院于翰林院之南。

又天寶十一載。安祿山來朝。玄宗欲加同中書平章事。命張垺

草制不行。及其去也。怏怏滋甚。楊國忠曰。此張洎之告也。遂貶廬溪郡司馬。兄均。建安郡太守。弟叔宜。春郡司馬。

〔又〕貞元三年。陸贄上疏曰。貞觀中學士一十八人。太宗聽朝之餘。但與講論墳籍。時務得失。悉不相干。玄宗末。方置翰林。張洎因緣國親。特承寵遇。當時之議。以爲非宜。然止於唱和文章。批達表疏。其於樞密。輒不知。

〔又〕石銀臺之北第一門。向榜曰翰林之門。入門直西爲學士院。卽開元二十六年所置也。南廳五間。本學士駙馬都尉張洎飾爲公主堂。

唐韋執誼翰林院故事記。翰林院者。在銀臺門內。麟德殿西重

廊之後。蓋天下以藝能伎術見召者之所處也。學士院者。開元二十六年之所置。在翰林之南。別戶東向。貞觀中。祕書監虞世南等十八人。皆以弘文館學士會於禁中。其後永徽中。黃門侍郎顧琮復有麗正之稱。開元初中。書令張說等又有集賢之目。至二十六年始以翰林供奉改稱學士。由是遂建學士院。俾專內命。太常少卿張洎。起居舍人劉光謙等首居之。

〔全唐文〕張說爲男洎考語。父教子忠。古之善訓。祁奚舉午。義不務私。至如潤色王言。章施帝道。載參墳典。例絕常功。恭聞前列。尤難以任。豈以嫌疑。敢撓綱紀。考以上下。

按此條已略見前張大理傳中。全唐文則載爲張太

常考語且駮
詳故重錄此

張太常遺著

今存詩一首

奉和岳州山城

郡館臨清賞

一作開

局坐白雲。訟虛棠戶曙。觀靜竹簷曛。懸榻

迎賓下。趨庭學禮聞。風傳琴上意。遙向日華紛。

右見全唐詩九十

五代

曹給事國珍

宋薛居正舊五代史晉臣曹國珍傳曹國珍字彥輔幽州固安

人也。曾祖藹。

五局本舊五代作藹

祖蟾。父絢。代襲儒素。國珍少值燕薊亂離。

因落髮被緇。客于河西。延州高萬興兄弟皆好文。辟為從事。國

珍常以文章自許。求貢禮闈。且掌書奏。其年入為左拾遺。累遷

至尚書郎。每與人交。傾財無恡。性頗剛僻。經藝史學。非其所長。

好自矜衒。多上章疏。文字差誤。數數有之。為縉紳所誚。高祖在

藩時。嘗通私謁。以兄事之。及即位。國珍自比于嚴陵。上表敘舊。

由是自吏部郎中。拜左諫議大夫給事中。又求為御史中丞。時

宰怒不復為請。國珍銜之。李崧之母薨。遣諸弟護喪歸葬深州。

崧既起復。乃出北郊路隅設奠。公卿大夫皆送喪而出。國珍固

爭不行。衆咸推其讜直。高祖晏駕。朝廷以宰臣馮道為山陵使。

及靈柩既發。國珍上疏言馮道既為山陵使。不得復入都城。請

除外佐。以桑維翰入輔。李崧請罷相位。俾持喪制。少帝覽奏。以

所言侵越。出為陝州行軍司馬。至任悒快。遭疾而卒。

引永樂大典卷四千五百十三

宋歐陽修新五代史張彥澤傳。彥澤徙鎮彰義。為政暴虐。諫議大夫鄭受益曹國珍等伏闕上疏。論彥澤殺其掌書試張式之。冤皆不省。於是國珍等復與御史中丞王易簡。率三院御史詣閣門連疏論之。不報。

舊五代史晉高祖紀。天福三年十二月甲戌。以吏部郎中曹國珍為左諫議大夫。

又天福四年正月乙卯。左諫議大夫曹國珍上言。請于內外臣寮之中。選才略之士。聚唐六典前後會要禮閣新儀大中統類律令格式等。精詳纂述。俾無漏落。別為書一部。目為大晉政統。

從之。其詳議官。宜差太子少卿梁文矩。左散騎常侍張允等一十九人充。文矩等咸曰。改前代禮樂刑憲為大晉政統。則堯典舜典當以晉典革名。列狀駁之曰。作者謂之聖。述者謂之明。苟非聖明。焉能述作。若運因革故。則事乃惟新。或改正朔而變犧牲。或易服色而殊徽號。是以五帝殊時。不相沿樂。三王異世。不相襲禮。至於近代。率由舊章。比及前朝。日滋條目。多因行事之失。改為立制之初。或臣奏條章。君行可否。皆表其年月。紀以姓名。聚類分門。成文作則。莫不悉稽前典。垂範後昆。述自聖賢。歷于朝代。得金科玉條之號。設亂言破律之防。守而行之。其來尚矣。皇帝陛下。運齊七政。歷契千載。爰從創業開基。莫不積功累

德所宜直筆。具載鴻猷。若備錄前代之編年。日作聖朝之政統。此則是名不正也。夫名不正則言不順。而媚時掠美。非其實矣。若翦截其詞。此則是文不備也。夫文不備則啟爭端。而禮樂刑政。于斯亂矣。若改舊條而爲新制。則未審何門可以刊削。何事可以編聯。既當革故從新。又須廢彼行此。則未知國朝能守而不守乎。臣等同共參詳。未見其可。疏奏嘉之。其事遂寢。

〔又〕天福七年五月壬子。以左諫議大夫曹國珍爲給事中。

廷琳按曹給事事蹟。我縣舊志失載。明清以來。縣屬西辛里曹氏。如進士曹濡。及端妃曹氏。家世頗盛。豈即爲給事之裔歟。惜無從詳考矣。

金

王經略子昌

〔明〕宋濂元史張柔傳。金經略使固安王子昌。善戰知名。與信安張進。連兵阻水爲固。遠近憚之。柔出其不意。率兵徑渡。生擒以還。

〔金〕王若虛滹南遺老集張忠武王柔勳德碑。張甫嘗以數千人圍之。時全軍悉出。所留無幾。公三分之。更番接戰。甫懼。乃退保。王子昌原作昌阻水爲固。他將莫敢進。公冒險徑渡。出不意。生擒之以歸。

〔元〕史何伯祥傳。太祖定河朔。惟保定王子昌信安張進堅守不

下。子昌金驍將也。柔命伯祥取之。兵逼其城。子昌出走。追及之。伯祥執槍馳馬。子昌反射之。中手而貫槍。伯祥拔矢棄槍。策馬直前。徒手搏之。擒子昌。進聞之亦遁去。

畿輔通志宦績錄王子昌守保定。元太祖定河朔。子昌堅守不下。戰死。

廷琳按王經略子昌。元史既載為固安人。後又稱保定王。子昌。王氏滹南集亦同。蓋子昌本固安人。至其聯兵阻水。則在今之保定縣。入民國改新鎮清河一帶。元史稱保定者。就其戰地言也。考畿輔通志即列子昌於固安。今從之。

李主簿思明

河南通志名宦傳李思明固安人。金明昌間為邺縣簿。奉法循禮。不矜才能。歲旱禱雨多應。民刻石紀之。

廷琳按李主簿之名。不見於舊志。幸河南通志列入名宦。亦吾鄉之賢者也。惜邺縣志無從尋覓。未知縣民所刻紀德之碑。載錄否耳。

元

李警院天翼

金元好問中州集小傳李天翼。字輔之。固安人。金貞祐二年進士。歷滎陽長社開封三縣令。所在有治聲。遷右警巡使。汴梁既下。僑寓聊城。落簿失次。無以為資。辟濟南漕司從事。方鑿圓柵。

了不與世合。衆口媒孽。竟罹非命。輔之材具甚美。且有志於學。與人交款曲周密。久而愈厚。死之日。天下識與不識。皆爲流涕。予謂天道悠遠。良不可知。而天理之在人心者。亦自不泯也。

清朱彝尊曰。下舊聞引函山旅話。元裕之寄書耶律中書。薦當時士大夫在河朔者。固安李天翼。漁陽趙鑄。燕人張舜俞。曹居一。王鑄等。且曰。凡此諸人。雖其學業操行參差不齊。要皆天民之秀。有用於世者也。

元史太宗紀。二年冬十一月。始置十路徵收稅課使。以田木西李天翼使濟南。

元史耶律楚材傳。楚材奏立燕京等十路徵收稅課使。凡長貳。悉用士人。極天下之選。參佐皆用省部舊人。

金元好問遺山集濟南行記。予兒時從先隴城府君官掖縣。嘗過濟南。然但能憶其大城府而已。長大來聞人談此州風物之美。遊觀之富。每以不得一遊爲恨。歲乙未即元太宗七年秋七月。予來河

朔者三年矣。始以故人李君輔之之故。而得一至焉。因次第二

十日間所遊歷爲行記一篇。傳之好事者。初至齊河。約杜仲梁名仁傑俱東。並道諸山南。與太山接。是日以陰晦不克見。至濟南。

輔之與同官權國器置酒歷下亭故基。此亭在府宅之後。自周齊以來有之。節錄

固安縣志隱逸傳。李天翼。固安人。元好問以書薦於耶律公曰。

固安李天翼。天民之秀。有用於世者也。今祀於鄉賢祠。按元史無天翼名。又考金史天會四年天翼為禮部侍郎。安撫河北東西兩路。必別是一人。

廷琳按李警院以金宣宗貞祐二年成進士。上溯金太宗天會四年。相距垂八九十年。與金史所載為禮部侍郎之天翼。其為二人無疑。惟警院既於哀宗正大六年八月。尚任為滎陽令。後復移長社。開封二縣令。更遷右警巡使。即陞轉甚速。亦須數年之久。何以僅隔一年。元史便載其為濟南徵收稅課副使。在元太宗二年。即金哀宗正大七年。與遺山所謂汴梁既下。天翼僑寓聊城。始辟濟南漕司從事者。全不合。考遺山

致書耶律中書。薦達警院等四十九人。在元太宗五年四月。是時金崔立已於正月中以汴城降蒙古。金亡。警院由是改仕元。至太宗七年七月。遺山過濟南。正警院官濟南時。元史訛太宗七年事於二年。故於警院始末多不合也。我縣前此修志。僅曾見遺山致耶律公一札。便臆斷警院為石隱者流。特立一隱逸傳以表章之。而不知與其生平出處。大相謬戾。又謂元史無天翼名。則更疎矣。然警院既為元遺山趙滏水諸賢津津稱道如此。其為吾鄉不多見之賢哲。自不待言。宜其入祀鄉賢。馨香禋業也。

李警院遺著

今存七絕三首

還家三首

幽花雜草滿城頭。華屋唯殘土一丘。鄉社舊人何處在。語音強半是陳州。

牡丹樹下影堂前。幾醉春風穀雨天。二十六年漫一夢。堂空樹老我華顛。

殊音異服不相親。獨倚荒城淚滿巾。祇有青山淡相對。似憐我是此鄉人。

右詩見金元好問中州集

附錄

〔金元好問送李輔之之官濟南序〕輔之李君。膺剡章之招有

汎舟之役。東門祖道。北海開樽。念會合之良難。欲殷勤之重接。時則莫春三月。人則楚囚再期。魯連之一箭空飛。季子之百金行盡。釋射鉤之怨。雖當三沐而三薰。動去國之魂。徒有九招而九散。見銅駝之荆棘。夢金馬之衣冠。感今懷昔。怒焉如擣。况復中年哀樂。流景須臾。歌驪駒而再中。橫素波而徑去。瞻仰弗及。我勞如何。如春登臺。翻失熙熙之意。仰天擊缶。能無嗚嗚之聲。諸公從衍聖孔公。賦詩贈別。凡若干首。而某爲之引。見遺山集

〔又徐威卿相過留二十許日。將往高唐。同李輔之贈別二首。衣冠八座文昌府。襜被三年同舍郎。蕩蕩青天非向日。蕭蕭

春色是他鄉。傷時賈誼頻流涕。臥病王章自激昂。保社追隨

有成約。不應關塞永相望。東南人物未彫零。和氣春風四

座傾。但喜詩章多俊語。豈知談笑得新名。二年阻絕干戈地。

百死相逢骨肉情。別後相思重回首。杏花尊酒記聊城。見同上

又送輔之仲庸還大梁。驂騑爭道渺翩翩。誰遣風塵失壯年。

四壁舊聞懸磬宅。一囊今有賣書錢。淋浪一作別酒青鐙夜。

滅沒孤帆落照邊。想得還家過春半。故山清顯嗣立元喬木滿

蒼煙。見同上

又送李輔之官青州。親朋離燕日相仍。又向扁舟別李膺。晚

節浮沈疑未害。中年哀樂自難勝。樊籠不畜青田鶴。朔吹初

翻白錦鷹。鄭重雙魚問消息。故侯瓜圃在東陵。見道山集續編

漢循吏故聞熹。長韓仁銘熹平四年十一月甲子朔廿二日

乙酉。司隸缺下河南尹校尉空閣。典統非任素無績勳。宣善缺下

仁前在聞熹經國以禮。刑政得中。有子產君子缺下尉表上遷

槐里令。除書未到。不幸短命喪身。為缺下祀則祀之。王制之禮

也。書到郡遣吏以少牢祠。缺下勸厲清惠。以旌其美。豎

石訖。成表言如律。缺下十一月廿二日乙酉。河南尹君丞

熹謂京寫缺下墳道頭訖成。表言會月卅日如律令。正

大六年八月日奉政大夫滎陽縣令李天翼再立石。見拓本又金石萃編

金趙秉文漢故聞熹長韓仁銘跋。此碑出京索間。左氏傳京

城太叔之地。滎陽令李侯輔之行縣發地得之。字畫宛然。頗類劉寬碑書也。韓仁漢循吏蚤卒。不見於史。而見於此。非不幸也。李侯亦能吏。天其或者爲李侯出耶。抑偶然耶。夫物之顯晦有時。猶士之遇不遇也。向使此碑不遇李侯。埋沒於荒煙草棘中。得爲礎爲甃足矣。吾聞君子之道。闇然而日彰。然自古賢達。埋光斲采。堙滅無聞。亦何可勝數。抑有時而不幸也。後千百歲。陵谷變易。獨此碑尙存。李侯之名。託此以不朽。亦未可知也。正大五年十一月廿一日。翰林學士趙秉文題。

〔又李獻能跋〕兩漢重循吏。而韓君之名不見于史。則知班范所載遺逸者尙多。此碑文復埋沒於荒榛斷壟中。閱千載而

人不識。是重不幸也。及吾友輔之滌拂蘚。而樹之。然後大顯於世。其冥冥中亦伸於知己者耶。輔之疏朗英偉。初非百里才也。乃能不以一邑爲卑。留心政事。急吏緩民。靄然有及物之意。行見□□褒□踐揚□□其功名事業。必將著金石而光簡冊。蓋不待附見於此。然則二君皆不朽人也無疑。

趙郡李獻能。

〔清錢大昕潛研堂金石文跋尾〕右漢循吏聞熹長韓仁銘。金正大中滎陽令李天翼得之。京索間土中。令石匠王福再立石。趙秉文周臣李獻能欽叔俱有跋。刊於碑之左方。今在滎陽縣廨。漢世重吏治。而仁在聞熹刑政得中。碑額稱循吏賢

之也。仁自聞熹遷槐里令。除書未到而卒。故額不云槐里令也。仁既歿。司隸校尉愍其短命。下河南尹遣吏祠以少牢。豎石以旌其美。於此見善政之效。而校尉風勸良吏之意。亦可尚已。兩漢書俱作聞喜。此獨從心。熹喜古蓋通用。碑八行。每行止存十七八字。天翼字輔之。固安人。登貞祐二年進士。歷滎陽長社開封三縣令。所在有治聲。終右警巡使。

縣人曹樹殷。固安兩鄉先生遺詩跋。鄉賢李天翼。字輔之。事蹟具元遺山中州集甚詳。固安縣舊志紀載錯誤遺漏。沿訛已久。有明鄉宦蘇志臯。字德明。著作亦都遺佚。遺詩數首。僅存於錢牧齋列朝詩集。朱竹垞明詩綜。吉光片羽。尤足珍貴。

予今取中州集列朝詩集明詩綜所載兩先生遺詩。及事略彙鈔一冊。用以貽我鄉人。俾將來修縣志者有所稽考。藉以訂正舊志。夫兩先生文章事業。載在遺山牧齋竹垞諸名人巨帙。原自彪炳千秋。無庸另爲鈔存。予之爲此者。特以此等大著作。雖流布天壤。而先生桑梓之邦。竟湮沒數十百年。不知其詳。是烏可不亟亟表章者乎。後如訪求得獲鄉賢遺籍。重行續錄。是則區區之微意也。

哈孝子都赤

元史孝友傳。哈都赤。大都固安州人。天性篤孝。幼孤養母。母嘗有疾。醫治不痊。哈都赤礪其所佩小刀。拜天泣曰。慈母生我。劬

勞。今當捐身報之。乃割開左脇。取肉一片。作羹進母。母曰。此何肉也。其甘如是。數日而病愈。

〔清邵遠平元史類編孝義傳〕哈都赤。固安州人。幼孤。養母。母嘗有疾。醫治不痊。乃礪其所佩小刀。拜天泣曰。慈母生我。劬勞。今當捐身以報。遂割左脇。取肉一片。作羹進。母曰。此何肉。其甘如是。數日病愈。

〔柯劭忞新元史篤行傳〕按與元史略同

張總管義

〔明崇禎固安秦士奇志〕張義。明封邱知縣。張素曾伯祖也。自幼好學攻書。德重閭里。比長。膂力驍勇。尤精武畧。至正初。蒙徵召。

從戎有功。累陞至天下隨路打捕鷹房總管。

宋縣令著

〔清光緒定興縣志名宦傳〕宋著。字彥明。固安人。元至正三年。任定興知縣。務農桑。勵學校。法度嚴明。軍民敬畏。立碑縣署。容城尹費彝撰文云。鷹師寓縣境者以千數。農屋大擾。公抑汰被辱。訟言於朝。竟得請著爲令。

〔涑水縣志名宦志〕宋著。字彥明。大都路固安人。元至元五年。知定興。常平規畫。各得其術。守法嚴明。軍民畏敬。後改知涑水。威德並行。政聲如治定時。

廷琳按宋縣令事蹟。我縣舊志失載。據定興志。則今日該

固安文獻志
縣署前。應仍存宋公德政碑記。惜無從一椎搨。以詳公考
之行迹耳。又按舊志載元中書宋子貞為縣之官莊里人。
官莊里屬萬春鄉。子貞元史本傳。謂潞州長子人。因亂徙居趙魏。竊疑子貞由趙魏徙居縣境。舊志所傳當所有本。又縣之陀頭
邨有元大都路總管府判官宋侯墓。則宋氏實為元代顯
姓。惜年久無從考其世係。未知其果為同族否也。

固安文獻志卷十一目錄

耆舊事彙

明

王郡丞騏

王莊簡公父

王莊簡公復

祀鄉賢
印存遺像

王太守松

王莊簡公族曾孫

王參政煒

王莊簡公玄孫

明尚書莊簡王公復遺像



縣後學劉恩涵敬重撫

Blank area with vertical lines for text.

明尚書王莊簡公遺像贊

嶽嶽莊簡令德克延勳垂明史日星昭懸父循良吏
治譜家傳于公陰德子大其廬公官通政才出班聯
英皇北狩蒙塵也先土城駐蹕邀往迎旃舉朝慙惑
爭避不前公奮袂起觸冒戈鋌天顏載覲使命克宣
忠義之氣千載見焉晉職本兵乘障巡邊絕塞萬里
要害移遷機宜動合靜息烽煙再移工部十二歷年
謹循法度節省緡錢經國偉望愈重八紘懸輿致政
優游林泉胸無城府性嗜簡編論大臣節終始克全
縣城西郭曾謁公阡今展公像風度儼然考德述行
第一鄉賢 縣後學賈廷琳拜撰

固安文獻志卷十一

天津徐世昌鑒定

縣人賈廷琳謹編

耆舊事彙

明

王郡丞騏

〔明嘉靖固安蘇志〕王騏字秉良號存齋沙堡屯人少負奇略遠
謀於經史子傳博覽強記尤工詩禮學爲文章春容平實不尙
藻飾而氣概橫出乎辭語間補弟子員適永樂初以鄰縣生備
城守事定授永清縣簿尋調山東蒲臺縣丁憂民吏感惠不忘
詣闕保留會有詔求賢騏膺薦擢北京行部工曹主事居官廉

固安文獻志
介不阿。剛直自任。爲權貴所嫉。以事左遷河南舞陽知縣。初縣多盜賊。標掠村落。人不聊生。官吏亦被戕害。騏設法捕禁。獲其渠魁。誅之餘。悉喻以禍福。縱去。歲饑流殍載塗。惻然不寧。捐俸易米粟賑恤。其顛連由是全活甚衆。又以賦稅遠輸爲患。請折布花之半。以供官民。至今告便。考滿入京。時仁宗監國。詔諮民隱。騏手疏條陳利害數事。獲賜馳驛而還。尤注意學校。考課諸生。日加月益。士子駸駸仕途者。感戀不忘。解任之日。行李蕭然。縣人懷其德。走白當道乞留撫字。朝廷嘉其能。陞裕州同知。仍掌縣事。耄倪歡騰。如獲珍璧。騏政治有加無替。臨蒞未久。宣德元年秋以疾卒。年僅五十大學士高穀爲撰墓表。

舞陽縣志名宦傳王騏。順天固安人。明永樂中由生員任工曹主事。改知舞陽縣事。初下車。二麥災。民以告。騏請折納布花。以便公私。年饑發不待報。民賴全活。三載課最。給驛還任。操履益堅。宣德元年以疾卒於官。民至今悼焉。

河南通志名宦傳王騏。直隸固安人。永樂中知舞陽。時夏麥災。秋禾無收。騏請以布花代輸。公私俱便。隣縣效之。民饑發賑。不待報。賴以全活者甚衆。比書最朝廷嘉其績。給驛還任。時人榮之。

清章學誠永清縣志賈信。字中孚。永清人。元至正中師事固安王騏。有志聖賢之學。凡禮樂名數星曆兵制食貨水利之類。皆

相與孰究之。

廷琳按王郡丞卒於明宣德元年。其年五十。當生於洪武十年。今永清志言元至正中賈信相從問學。蓋非。考賈之從學。當在永樂中。王公爲永清縣簿之日。其謂元至正中者。誤也。

王郡丞遺著

今存詩八首

舞陽縣雜詠

南山

危巘崱嶸聳碧空。乾坤始闢判鴻濛。雲開鬱鬱丹青露。雨過葱蔥紫翠重。峻岫春深羣草秀。高峰日映晚霞紅。邑民鍾此多仁

厚。百里熙熙太古同。

舞陽水

源泉混混無時息。岸畔旋歸三里河。一派清流頻輾轉。四時和氣自婆娑。能穿大地爲瓊液。解入長淮作碧波。千古邑名由此始。至今官宦守廉多。

夜月望章華臺遺址

長空萬里夜澄澄。遠眺章華月色明。銅漏聲遲星斗轉。碧天雲淨玉河橫。冰輪皎潔山川麗。寶鑑嬋娟宇宙清。往事紛紜何暇論。幸逢盛世樂昇平。

晚渡沙河

固安文獻志

卷十一

耆舊事彙

王

三

趙莊賈氏无悶齋

烟波浩浩際平沙。茅舍灘頭八九家。汎汎柏舟驚落雁。招招蘭
槳蕩殘霞。風來綠水千層浪。月上黃蘆兩岸花。幾度朝天經此
地。傍人漫道泛仙槎。

西湖

西湖如鑑在官衙。孰樂亭前景色佳。夜半水簾籠壁斗。日高波
影動龍蛇。客停柳岸觀魚藻。風放篷舟蕩藕花。不是尋常遊衍
地。偏宜范老度年華。

漢舞陽侯樊噲祠

漢封侯爵位親臣。十八叢中第幾人。怒髮衝冠驚霸主。擁干排
闥諫丹宸。鴻門事業傳千古。舞邑蒸嘗報萬春。幾度祠前蘋藻

薦。儼然遺像至今新。

麥田

芄芄萬頃雨初收。陣陣風翻翠若流。野雉天晴常隱見。沙鷗日
暖欲沈浮。遙觀牧叟垂鞭策。疑是漁翁下釣鉤。願秀雙歧爲稔
歲。養民供賦兩無憂。

桑

滿野柔桑發綠枝。民安物阜太平時。青雲影裏鷓鴣嘯。碧樹陰
中戴勝飛。葉沃已知蠶食足。繭縑應見女工奇。舞陽風似豳民
厚。百里絃歌七月詩。

右見舞陽縣志

王莊簡公復

〔明嘉靖固安蘇志〕王復字初陽。沙堡屯人。裕州同知騏子。天性寬厚。沈靜寡言。三歲喪母。及長。事繼母以孝聞。知縣劉敬見其氣宇磊落。而莊重有威。博學強記。而不樂遊戲。知他日必爲經濟之器。深愛重之。補弟子員。教諭陳遜憫其純篤寒苦。惓惓有成就之意。平日人未見其誦讀。而於聖賢旨趣。性理蘊奧。悉研窮默識。爲文冲淡。善於講解。同列謂之王訓詁。督學侍御每試。必稱賞不已。正統六年舉鄉書。七年登第。九年授刑科給事中。十年陞通政使司左參議。景泰初也。先擁英宗入關。邀大臣迎駕。復奮然欲往。遂充禮部右侍郎。爲正使。齎捧敕書以行。至德

勝門外。得仰瞻御容。頓首拜泣也。先怒。令左右持刃迫脅。仍以數事詰責。復反覆辨論不屈。英宗止之曰。休與他辨。將紙筆來。寫啟與皇太后。知道也。先實意送朕來。即著大臣出迎。復等奏稱倉卒出城。未將紙筆。英宗笑曰。好秀才官。連紙筆也無。口傳去罷。遂回也。先遣騎馳追。欲加害。復等已入城矣。遂陞右通政。景泰四年持節册封瀋王妃。賚予一無所受。五年轉左通政。累陞兵部左侍郎尙書。調工部。特進榮祿大夫柱國太子少保。以疾卒。贈太子太保。諡莊簡。廕子瑁琛璟孫驥曾孫采入監讀書。崇祀鄉賢祠。

〔清張廷玉明史王復本傳〕王復字初陽。固安人。正統七年進士。

授刑科給事中。聲容宏偉。善敷奏。擢通政參議。也先犯京師。邀大臣出迎上皇。衆憚行。復請往。乃遷右通政。假禮部侍郎。與中書舍人趙榮偕。敵露刃夾之。復等不爲懼。還仍蒞通政事。再遷通政使。天順中。歷兵部左右侍郎。成化元年。延綏總兵官房能。奏追襲河套部衆。有旨獎勞。復以七百里趨戰。非宜。且恐以僥倖啟釁。請敕戒諭。帝是之。進尙書。錦衣千戶陳珏者。本畫工。及卒。從子錫請襲百戶。復言襲本先帝命。然非軍功。宜勿許。遂止。毛里孩擾邊。命復出視陝西邊備。自延綏抵甘肅。相度形勢。上言。延綏東起黃河岸。西至定邊營。接寧夏花馬池。縈紆二千餘里。險隘俱在內地。而境外乃無屏障。止憑墩堡以守。軍反居內。

民顧居外。敵一入境。官軍未行。民遭掠已盡矣。又西南抵慶陽。相去五百餘里。烽火不接。寇至民猶不知。其迤北墩堠。率皆曠遠。非禦邊長策。請移府谷響水等十九堡。置近邊要地。而自安邊營接慶陽。自定邊營接環州。每二十里築墩臺一。計凡三十有四。隨形勢爲溝牆。庶息響相聞。易於守禦。其經略寧夏。則言中路靈州以南。本無亭燧。東西二路。營堡遼絕。聲聞不屬。致敵每深入。亦請建置墩臺如延綏。計爲臺五十有八。其經略甘肅。則言永昌西寧鎮番莊浪俱有險可守。惟涼州四際平曠。敵最易入。又水草便利。輒經年宿留。遠調援軍。兵疲銳挫。急何能濟。請於甘州五衛內。各分一千戶所。置涼州中衛。給之印信。其五

固安文獻志
所軍伍。則於五衛內餘丁選補。且耕且練。斯戰守有資。兵威自振。又言洪武間建東勝衛。其西路直達寧夏。皆列烽堠。自永樂初北寇遠遁。因移軍延綏。棄河不守。誠使兵強糧足。仍準祖制。據守黃河。萬全計也。今河套未靖。豈能遽復。然亦宜因時損益。延綏將校。視他鎮爲少。調遣不足。請增置參將二人。統軍九千。使駐要地。互相援接。實今日急務。奏上皆從之。復在邊建置多合機宜。及還朝。言者謂治兵非復所長。特命白珪代之。改復工部。謹守法度。聲名逾兵部時。中官請修皇城西北迴廊。復議緩其役。給事中高斐亦言災沴頻仍。不宜役萬人作無益。帝皆不許。中官領騰驤四衛軍者。請給胖襖鞋袴。復執不可。曰。朝廷制

此。本給征行之士。使得刻日戒途。無勞縫紉。京軍則歲給冬衣布棉。此成憲也。奈何渝之。大應法王劄實巴死。中官請造寺建塔。復言大慈法王但建塔。未嘗造寺。今不宜創此制。乃止命建塔。猶發軍四千人供役云。十四年加太子少保。復好古嗜學。守廉約。與人無城府。當官識大體。居工部十二年。會災異。言官言其衰老。乞休不許。居二月。汪直諷言官更劾。復及鄒幹薛遠。乃傳旨並令致仕歸。久之卒。贈太子太保。謚莊簡。

清孫奇逢畿輔人物考王莊簡公復。字初陽。固安人。正統七年進士。土木之變。由給事加爲禮部侍郎。往迎上皇也。先謂復等小官。可令胡濙于謙楊善等來。復歸。英宗復辟。改兵部。又改工

部。尚書識治體。善節縮。卒贈太子太保。謚莊簡。

〔明國子監進士題名碑〕正統七年壬戌科劉儼榜。王復成第二甲第十名進士。

〔明英宗實錄〕正統十四年五月。陞刑科給事中王復爲通政司右參議。十月乙酉陞左參議。

〔又〕是年十月己未。虜衆奉土城。邀大臣出迎。帝疑其詐。乃陞通政使左參議王復爲右通政。中書舍人王榮按即趙榮爲太常寺少卿。遣復榮出城朝見。進羊酒等物。既見令復榮回。復邀于謙石亨王直胡濙出見。廷議以謙等國所倚仗。不遣。

〔明劉定之否泰錄〕野仙復遣使言欲和。十月十七日以通政參

議王復爲禮部侍郎。中書舍人趙榮爲鴻臚寺卿。持羊酒往。野仙與其弟及伯顏帖木兒環甲冑。屬弓矢。太上帶刀引復等前。露刃挾之。復等拜訖。野仙揮却羊酒。取勅視番字。太上取勅視漢字。野仙謂復爾等皆小官。可令胡濙王直于謙石亨楊善等來。復辭歸。

〔明陳建皇明從信錄〕正統十四年十月初九日。喜寧喉也先遣使來議和。索大臣出迎。駕衆知其詐。以通政司參議王復爲禮部侍郎。中書舍人趙榮爲鴻臚寺卿。出迎。復等至虜營。露刃夾之。見上皇及也先也。先謂爾等皆小官。可令胡濙王直于謙石亨楊善等來。復辭歸。上皇諭二人曰。彼無善意。爾等宜急去。二

人方回。而虜復縱騎攻城。

清谷應泰明史紀事本末略同

清顧亭林昌平山水記出德勝門八里爲土城元之舊也。正統十四年十月也。先奉上皇車駕登土城。以通政司左參議王復爲右通政。中書舍人趙榮爲太常寺少卿。出見上皇于土城。即此地也。

清敕編通鑑輯覽正統十四年冬十月。額森擁上皇登土城。喜寧嗾額森邀大臣迎駕。帝以通政司參議王復爲右通政。中書舍人趙榮爲太常少卿。出城朝見。喜寧又嗾額森以二人官小。邀于謙石亨胡濙王直出見。索金帛萬萬。復榮不得見上皇而

還。

按此謂不得見上皇與諸書所載迥異

明英宗實錄正統十四年十二月甲寅。敕居庸關及宣府大同諸邊將曰。自土木師潰之後也。先累言送上皇還京。朕喜以爲實然。三遣使賫書及金寶繒錦往迎。不見送來。十月也。先親率人馬犯京師。至土城外。又言送上皇還。朕念至親。立遣王復王榮出迎。虜意遂變。乃知也。先欺詐。今聞又以送駕爲名。顯是欲來窺伺邊境。倘彼復來。爾等其念宗社爲重。固守城池。拒絕勿納。毋墮虜計。以誤國事。

明景宗實錄景泰五年三月己巳。陞通政使司王復爲左通政。十月。通政使司左通政王復丁繼母喪。命奔喪。起復後陳情乞終制。不允。

又景泰六年二月乙酉命通政司左通政王復復任以奔喪還京也。

明英宗實錄天順元年三月禮部侍郎鄒幹奏殿試天下舉人二百九十四名合請讀卷並執事等官上命通政使王復等十人爲讀卷官八月甲寅陞通政司通政使王復爲兵部左侍郎。

又天順二年正月辛酉命兵部左侍郎王復掌本部事。

明憲宗實錄成化元年秋七月兵部左侍郎王復等以前四川安綿等縣屢被番蠻劫殺提督茂州衛關堡都指揮僉事呂昇不嚴督哨守而副總兵都督僉事盧能參將都指揮使周貴都

指揮僉事李文及整飭兵備副使王用皆隱匿不奏請代罪上曰罪本難恕事今已寧姑宥之再爾不貸。

又是年八月延綏總兵官都指揮同知房能等奏北虜久潛河套自西梁墩空突入犯邊官軍會合追勦至賊巢地名蓆把都川約七百餘里斬獲賊首一十三級馬牛羊器仗衣帳等各以百計上命梟賊首于邊分給馬牛羊器仗衣帳等於將士各賜敕獎勞能等既而兵部左侍郎王復等言兵法有云無恃其不來恃吾有以待之又曰倍道兼行百里而爭利則擒三將軍今能等所奏虜寇既以入境是不能有以待之及其遁去而率兵窮追是又不知百里趨利之戒恐其僥倖而啟釁且昧思患預

防之道。請更戒飭之。上從其請。

〔又〕成化二年春正月。十三道監察御史魏潮等言。邇者虜寇犯邊。擁衆長驅。動以萬數。而沿邊被其殺掠殘破。不可勝計。物情洶洶。殊爲可畏。兵部乃以乏兵召募。示弱於虜。伏望皇上特降敕旨。切責總兵等官。通將各營兵士。逐一點驗。如法操練。仍簡命給事御史各一員。不時點聞。設有賣放占役等項。就將該管頭目。通行參究。然所以選將練兵。而內修外攘者。其責尤繫于兵部之得人。今尙書王復。質實有餘。應變不足。以此之才。處此多事。未見其克濟。且右侍郎缺久。宜慎選其人。以充任。則武備修而戎狄懾。上是之。但以王復陞任未久。難責近效。餘下六部

都察院議行之。

〔又〕是月唐王瓊烜奏。近聞襄陽南漳等縣。賊勢猖獗。南陽城池空虛。護衛軍士調守鄧州。府中無人護守。乞敕該部選將出師。作急前來剿賊。事下兵部。尙書王復等以爲南陽府城。已調附近衛所軍士協守。其護衛軍士調守鄧州者。事難數改。而荆襄未靖。已遣總兵官朱永等率師討之。恐王未知也。宜以此意敕諭王以安其心。從之。

〔又〕二月庚子。禮部尙書姚夔奏。三月初一日殿試貢士。合請讀卷。並執事官。上命兵部尙書王復等十二人爲讀卷官。

〔又〕三月。兵部尙書王復等奏劾大同總兵官楊信等罪。宥之。先

是信與寧夏總兵官都督僉事王煥巡撫都御史項忠會師延綏討虜虜退班師于是復等奏討虜諸軍惟李杲所統寧夏兵五千于花馬池斬獲三十餘級楊信所統大同兵一萬惟都指揮羅俊呂原于河曲等處斬獲一十餘級任壽王煥項忠所統陝西兵一萬惟都指揮林盛于環縣斬獲首虜九級其楊信任壽王煥項忠俱未聞與賊一戰縱賊殺掠人畜不可勝計畏怯失機宜治其罪有旨信等既受命討賊不能輸忠効力以圖成功宜治其罪但邊境已寧姑宥之

又四月巡撫陝西右副都御史項忠奏國朝設布政司以統列郡之政設都司以總諸衛之兵又設按察司以糾之又遣御史以按之近以四方多故又遣都御史以巡撫之然御史出巡止于一年或三年而都御史巡撫乃至五六年或八九年雖云熟一方事體不免玩易弊生若以三歲爲期則行事更新人知警勵事下所司定議兵部尙書王復會吏部尙書王翺等議巡撫之任以防邊禦虜調兵討賊饋餉賑饑撫安兵民皆是重務若三年一易則一方利弊未能究知凡百所爲率皆苟且不爲經久之計忠所言難從上是之

又是月乙丑征夷將軍都督同知趙輔贊理軍務都御史韓雍奏臣等奉命討賊既已破大藤峽擣其巢穴矣然其流劫四出未盡勦除今又分兵數道進擊臣等率大軍以督戰隨處搜戮

首惡已擒。醜類就殄。其未殄餘賊。旋即戡定。捷聞。兵部尙書王復等。請降敕嘉獎。且命勦絕餘賊。以靖地方。無貽後患。從之。

〔又〕五月辛未。巡撫陝西右副都御史項忠奏。比有兵部以河套虜衆謀欲犯邊。擬調陝西諸衛官軍。并僉點延綏諸處民兵。分守榆林延綏鄜慶諸營堡。又敕協守涼州都督僉事趙英。統領都指揮仇勝等騎兵五千。赴延綏諸邊。往來遊擊。今賊衆可六七千。而英所統兵數少。彼己之勢不敵。又兵家貴有節制。如往者毛里孩侵犯神木。命彰武伯楊信節制諸軍。故不至於大失。今英名位素出信下。難以統馭各邊都指揮等官。事下兵事。尙書王復等覆奏。謂忠言威勢不敵。則延綏等處營堡屯戍。並增

調官軍。已三萬二千有餘。未可以爲不敵。謂英難統馭各邊都指揮。明有體統。謂楊信節制諸軍。不至大失。蓋忠與信去年受命往征延綏。各假持重爲名。擁兵不戰。縱賊擾攘。爲本部所劾。故爲此說。以掩其前日怯懦之罪耳。第英所統寧夏兵。至秋亦欲還守本鎮。不能久戍。而虜酋毛里孩今歲必復大舉入寇。忠所奏事宜如此。宜會廷臣議之。

〔又〕是月兵部武選司郎中楊琚自陝西記功還。疏備邊四事。曰。修武備。曰恤軍餘。曰慎邊報。曰公賞罰。上以其言切於時務。命所司看詳以聞。于是兵部尙書王復等議以爲可從。遂命如議行之。

〔又〕是月兵部尙書王復等慮兩廣流賊餘黨未平。請移文馳諭總兵官趙輔等會議方略。從之。時輔等已平大藤峽。及高廉博白洛容諸賊黨。至是奏言地方稍寧。意欲班師。復言輔等前後奏詞有不同者。又不詳陳可以班師與否之故。宜令再議方略。遂移文諭輔。令會監督贊理遊擊等官詳議。如兩廣果盡寧靖。保無後患。卽區畫治安之策。及旋師之故。以聞。或殘賊尙未盡殄。則量留官兵協剿。必撫捕得宜。使無後患。庶副委任。

〔又〕六月。巡按湖廣監察御史王瀛等奏。賊首石和尙按國權作石龍集衆

千數。燒劫四川大昌縣治。瞿塘衛指揮曹能柴成。夔州府通判王禎。率官民快往禦之。被殺者六百餘人。禎遇害。因効能等罪。

事下兵部。尙書王復等請敕提督湖廣軍務尙書白圭等。議留京營及山東官軍分往賊人行劫之所。運謀剿殺。仍請敕四川守臣馳赴夔州。調兵協剿。及移文都御史王恕。停能等俸。俾戴罪殺賊。兼守護城池。從之。

〔又〕是月壬子。制諭彰武伯楊信。佩平虜將軍印。充總兵官。統京營兵往延綏討虜寇。先是延慶守臣奏報五月初十日。虜衆可二萬。分爲五路。長十餘里。入境內。兵部尙書王復等。因請敕馳諭陝西延綏寧夏鎮守巡撫等官。併力飭兵防禦。仍請會官推舉武職重臣。令調京軍往剿之。有旨虜已入延綏境。調兵往剿。恐緩不及事。可再議以聞。復等又請敕都督同知趙勝充副總

兵統京操騎步精兵萬人。期以七月往勦。又得旨令俟信至詳處之。至是信至。復乃與會昌侯孫繼宗。大學士李賢等集議。以爲虜犯延綏。實欲俟今秋大舉。以掃夷氛。以安邊境。第彼地糧草不給。未可輕動。今宜量遣信等將兵討之。上以爲然。遂敕信充總兵官。將京營兵往延綏境上。會鎮守總兵等官飭兵勦寇。清谷應泰明史紀事本末。成化二年六月。大學士李賢奏。河套與延綏接境。今毛里孩居處其中。苟欲安邊。必須大舉而後可。乞令兵部會官博議。於是兵部尙書王復。同孫繼宗等集議。以大同總兵楊信舊鎮延綏。稔知地利。宜召還京。面受成算。其陝西寧夏延綏甘涼大同宣府鎮巡諸官。亦宜敕令整飭兵備。候期調發。帝允所擬。

清王鴻緒明史彙中官領騰驤四衛軍者。請給胖襖鞋袴。復執不可。余子俊詢其故。復曰。朝家制此。本給征行之士。使其刻日戒途。無勞縫紉。京師則歲給冬衣布棉。此成憲也。今奈何踰之子俊歎服。

明憲宗實錄。成化二年六月。福建沙縣學訓導周復上平夷十事。一調選將士。二激發智勇。三預察地形。四成算方略。五修飭兵器。六廣備軍餉。七嚴明號令。八採納衆謀。九公行賞罰。十儲養武俊。奏入。上嘉其言有理。命所司看詳以聞。於是兵部尙書王復等覆奏。以爲復言察地形算方略修兵器嚴號令採衆謀。

數事。則宜令總兵官楊信參酌行之。而備兵餉則宜行戶部參酌預備。其餘則皆已行。及有碍難行者。上曰如議。

〔又〕是月安遠侯教讀訓導戴仲衡上言陝西用兵事宜。奏入。上令仲衡隨彰武伯楊信剿賊。仍命兵部看詳所言以聞。尙書王復等覆奏。以爲仲衡所言厚賞賚。宜命戶部區畫。選土人命巡撫都御史項忠裁處。搜鈔河套方略。命總兵等官楊信等參酌用之。至其論功行賞。欲以當先破敵爲奇。生擒斬首爲次。則恐難行。蓋擒斬者有實可驗。當先者無跡可憑。以是爲功賞之差。不免有濫報之弊。如涼州奏報功次。生擒斬首者僅及三十。而奮勇當先者乃至千餘。豈足憑信。上是之。

〔又〕八月。命兵部尙書王復。都察院左都御史李秉。整飭邊備。陞山東左布政使原傑爲右副都御史。戶部郎中閻本爲右僉都御史。巡撫地方。時兵部尙書王復等以西北虜寇深入。條上邊防事宜。上命文武大臣會昌侯孫繼宗。大學士李賢等會議。一各邊兵備。近多廢弛。雖巡撫有官。而任久人玩。今邊務方殷。宜及時整飭。請於在京尙書都御史內。簡命二員。一員自大同抵遼東。一員自陝西延綏抵甘肅。巡歷邊關。凡軍馬甲兵等事務。爲審處。總兵等官臧否。具實奏聞。都指揮以下。隨宜黜陟。與凡邊境事宜。悉聽區處。餘七條未錄議上皆允行之。命復赴延綏迤西。整飭邊備。

〔又〕是月。兵部言陝西守臣屢報河套虜賊深入。攻縣治。掠民財。殺指揮知縣等官。惟都指揮林盛與戰。雖損失軍馬。亦能生擒寇賊。其總兵參將等官。既不能出奇剿截於其來。又不能據險邀擊於其去。請命整飭邊務尚書王復。會同巡按御史究治之。

〔又〕十二月。命陝西都指揮同知司整掌司事。先是蒙古入延綏。陝西鎮守巡撫等官。舉整統領西安左等四衛官軍。操守環慶。至是百戶平俊等六百餘人。詣尚書王復。言整才智超越。得軍士心。乞令回掌都司印。復具以聞。故有是命。

〔又〕是月。命都指揮張翊兼守備靈州。陞指揮僉事鄭英爲署都指揮僉事。掌興武營事。從兵部尚書王復薦也。

〔又〕成化三年四月。改兵部尚書王復爲工部尚書。

〔又〕成化四年二月辛丑。兵部奏。先因尚書王復。體量道理遠近。歸併邊軍。數有多寡。令於近衛補充。寧夏所少。例應西安等衛。選補甘肅所少。例應洮岷等衛。選補。今鎮守陝西寧遠伯任壽。以腹裏各衛。軍伍多缺。無可調遣。邊方多警之時。豈應減殺原額。宜行壽等斟酌於鄰近衛所。僉補。勿悞邊備。從之。

〔又〕是年十月甲辰。吏部尚書李秉。禮部尚書姚夔。兵部尚書白圭。工部尚書王復等數十人。俱于左掖門外候午朝。期已久。以爲尙早。誤不及入侍。聯名上奏待罪。詔爾等常以勤政爲言。及朕視午朝。却有怠慢。論法本當逮問。既引咎姑悉宥之。

又成化五年三月。命工部尚書王復等十三人爲殿試讀卷官。
又成化六年六月戊辰。順天河間永平等府大水。辛未。命總兵官趙輔。工部尚書王復。太監黃順。督官軍修理九門城垣。疏濬諸巷水道。

又成化七年三月。增置工部屬官三員。往直隸太平府蕪湖縣。湖廣荊州府沙市。浙江杭州府城南稅課司三處。專理抽分。前此三處客商。停聚竹木市賣。有司惟收其課鈔。至是工部尚書王復。以在京蓋造公署成。供應器物。及在外料造軍船。費用缺乏。建請添官分往抽分竹木。變賣銀兩解部。以爲營繕之費。是年所得僅餘千兩。其後續差者務多得爲能。歲歲加益。至以萬

數。遂事朘削。商人不便。頗有怨聲。屢懇于朝。皆不知省。

又成化七年秋七月甲戌。復徙平夷清平鎮靖三堡于舊城。時巡撫延綏右副都御史余子俊言。響水白洛城塞門三堡。往者兵部尚書王復行邊。徙置黑河山等處。易今名。今軍士皆言平夷水脈頓涸。清平鎮靖又去水太遠。其舊堡響水等城。尙完好可居。乞仍舊處。其新堡量兵護守。遇警暫時按兵於此。巡哨兵部議可從之。

又十月丙戌。戶部尚書楊鼎。工部侍郎喬毅。上濬通惠河舊道事宜。事下工部。尚書王復同太傅會昌侯孫繼宗。吏部尚書姚夔等官。議得古通惠河道閘座。設若開通修砌。可以泊船。可以

運糧。誠有益於國計。請旨簡命戶工二部堂上官各一員。會漕運參將袁佑。率識達水利官匠。前往相度。

〔又〕成化八年正月己未。工部奏漕運總兵楊茂先乞修通州至大通橋舊河石閘。以免官軍車運之費。有旨命戶部尚書楊鼎等勘報。上命依原擬量撥官軍四萬。令總兵官趙輔郭登統領。先濬京城壕塹。仍以太監黃順。工部尚書王復兼董其役。

〔又〕三月丁未。命工部尚書王復等十二人爲殿試讀卷官。

〔又〕成化十年六月辛丑。工部尚書王復九年任滿。命復任。

〔又〕成化十一年三月己酉。命工部尚書王復等十五人爲殿試讀卷官。

〔又〕成化十二年三月戊午。命都督同知趙勝。工部尚書王復。統五軍三千。神機三營官軍五千。十二團營一萬五千修京城。先是有旨撥三大營官軍四萬。修理京師九門城垣。總兵官英國公張懋等言三營官軍不及四萬之數。故以團營軍益之。

〔又〕九月。工部尚書王復嘗請以其子琛爲國子監生。未久而死。至是乃自陳正統末使虜之勞。請令次子璟入監。允之。不爲例。〔又〕成化十三年秋七月。吏部尚書尹旻。戶部尚書薛遠。禮部尚書鄒幹。工部尚書王復。掌通政司事。工部尚書張文質。俱自陳乞休致。詔曰。卿等宜盡心供職。所辭不允。

〔又〕成化十四年三月丙子。以工部尚書王復等十四人充殿試

同安府志
讀卷官。

又十月庚申。手敕加兵部尙書余子俊。刑部尙書林聰。工部尙書王復。掌通政司事。工部尙書張文質爲太子少保。俱仍舊視事。

又成化十五年冬十月戊子。戶科都給事中張海等。以災異上言五事。一今天災荐至。地道欠寧。皆由寅亮燮理者不職所致。今南京兵部尙書豈遠。年加衰憊。才愈荒疎。先年總理京儲。曾被劾退。今復寄以留京。豈能勝任。南京吏部侍郎錢溥。素乏清譽。屢見彈劾。老悖不明。藻鑑安在。太子少保戶部尙書楊鼎。才非經國。職業未修。太子少保工部尙書王復。年齡已老。精力亦

衰。此數臣者。上不能和陰陽。下不能安百姓。地道示戒。天意可知。乞將溥罷歸田里。遠等俱令致仕。

又是月庚寅。太子少保工部尙書王復奏乞致仕。詔曰。卿辦理部事。積有歲年。茲宜加勉。以副朕懷。不允休致。

明陳建皇明從信錄。成化十五年九月。罷戶部尙書楊鼎。及工部尙書王復。南京兵部尙書薛遠等。時六科十三道都給事中張海等。劾奏楊鼎。王復。薛遠。及南京吏部侍郎錢溥等。謂四方水旱。皆四人妨政失職所致。宜加罷黜。不允。既而當道者又欲求缺處知己。乃謀於腹心。復嗾科道重劾王復。薛遠。與禮部尙書鄒幹當罷。竝賜歸。

明尹直謇齋瑣綴錄成化己亥秋九月六科十三道都給事中張海等劾戶部尚書楊鼎工部尚書王復南京兵部尚書薛遠吏部侍郎錢溥謂四方水旱皆四人妨政失旨所致宜加黜罷不允鼎初與劉叔溫極厚後以干託事多不能盡從遂見啣至是鼎知叔溫等所主與復求致仕皆見留鼎又求去從之時溥以進表詣京聞於途既至陛見後出吏部尹冢宰同仁詢江南時事溥答以南直隸大熟請以歸諸公北直隸大水皆溥與薛當之同仁笑曰諺云女壻牙疼却灸丈母脚跟爲之哄然傳聞禁中以資笑具溥不得已亦乞致仕遠聞劾亦馳疏辭有旨褒留歲暮當道者又欲求缺處知己乃謀於汪直復嗾科道重劾

復遠與鄒宗伯幹當罷朝廷遲回數日不允汪力贊去之乃留劾牘於中傳旨賜歸

明憲宗實錄成化十五年十二月乙亥命禮部尚書鄒幹工部尚書王復致仕令有司給月米人夫視戶部尚書楊鼎例南京兵部尚書薛遠亦令致仕俱賜敕以歸時幹等俱爲科道所劾奏求致仕不允尋傳旨令致仕

又成化二十一年六月致仕太子少保工部尚書王復卒復字初陽順天府固安縣人正統壬戌進士初授刑科給事中陞通政使司右參議尋轉左也先入寇時選能使蒙古迎駕者復請行遂充禮部右侍郎與中書舍人趙榮同往還陞右通政再轉

左。丁繼母憂。奪情起復。踰年陞通政使。遂遷兵部左侍郎。命清武職貼黃。成化初擢本部尚書。以陝西多事。命出巡邊。得便宜行事。凡所建置。多合時宜。言者謂復居兵部非宜。改工部。久之加太子少保。已而乞致仕。從之。賜敕而行。仍令有司如例給夫米終身。至是卒。年七十。贈太子太保。謚莊簡。賜葬祭如例。復重厚寡言。雅志冲澹。遇人不設城府。臨事審處。綽有條理。與人言未嘗有矜異色。一時公卿有大臣體者。惟復。人不盡知也。且好古嗜學。廉約自守。不事矯亢。故能以德量保其祿位而終。近時大臣歿而得謚者。多出於同年當道。子居顯位。惟復以公道得之。

王莊簡公遺著

今存奏疏十五首
碑記可考者一首

又略見前三首

請仍飭總兵官芮成等會兵討賊疏

先因四川總兵官芮成。都御史汪浩。及貴州鎮守內官鄭忠。副總兵李安等互奏失機。已遣給事中秦崇。御史吳瑠。錦衣衛鎮撫趙璟。往彼覈實。且命璟星馳回奏。命崇等就會諸將議兵討賊。今璟已回奏。而崇等亦有奏至。事下臣等看詳。其芮成。李安所奏。各有虛實。而成及汪浩。又殺降要功。激變貽患。以□□逮治。然自成等退軍後。永寧等處。又有賊情。欲行成等仍督諸將會兵討賊。待事寧。併勘回奏。以俟裁處。從之。

成化元年十二月

請移文尙書白圭等速剿荆襄土賊疏

比緣兩廣荆襄弗靖。朝廷遣都督同知趙輔。左僉都御史韓雍等征兩廣。工部尙書白圭。撫寧伯朱永等征荆襄。今廣西捷報已至。而荆襄未聞捷音。宜移文圭等。令亟剿除。以紓朝廷南顧之憂。從之。成化二年三月

請將廣西失機各官究治疏

廣西猺賊攻陷洛容縣治。越入博白縣城。殺虜官民人口。劫掠印信。燒燬公廨民居。其守禦百戶等官失機者。宜令巡按御史執治之。又全州臨桂宜山平樂等境。亦被多賊殺掠焚燬。不可勝計。其守禦都指揮等官失機者。宜令巡撫等官究治之。又總兵官趙輔。都御史韓雍等。已奏荔浦修仁大藤峽等處賊已殄

滅。今又滋蔓如此。蓋其漏網者必多。宜令輔及雍等調兵分剿。務使根株悉拔。噍類不遺。以除後患。悉從之。成化二年三月

劾寧夏都督僉事李杲懷姦退縮疏

先有敕命鎮守寧夏都督僉事李杲帥兵往延綏。聽總兵官楊信節制擊賊。既而李杲奏將往延綏。因賊入寧夏境。引兵剿殺。且欲與鎮守寧夏等官會議。還駐靈州操守。臣等按杲既奉敕往延綏。若寧夏有警。在彼守臣自有調度。杲何必旋師會議。又止巡邊而還寧夏。守臣會議安在。顯是抗違敕旨。不服楊信節制。且畏延綏達賊。託故以避。既方命不忠。懷姦退縮。又復飾詞罔上。宜重罪之。已行遣官體勘待報以聞。上是之。成化二年四月

覆陳防範苗賊餘黨機宜疏

荆襄流民嘯聚為寇。

時賊黨焚熾巫山縣治

率因石和尚倡引其黨雖平而

此賊猶在苟剿之不豫勢必復熾宜移文提督軍務工部尚書

白圭等詳議賊勢緩急及可以罷兵與否或令暫留監督總兵

一人量領官軍與都御史王恕右參將王信急殄賊首以靖地

方并區畫久安之策以聞仍請行四川鎮守等官急調兵往夔

州守據要害行守備漢中都指揮等官一體防範遇警彼此相

應前後夾攻使賊進退無據然後可以成擒報可。成化二年六月

詳陳整飭陝西邊備情形疏

明陳建皇明從信錄曰按斯地受堡壘臺

當事者自傳塘馳報收斂人畜之外一籌莫展縱有請纓繫頸之心而委任權利則實有限言之督府漫不為意求如王尚書者不可得矣

臣奉命整飭延綏寧夏甘涼一帶邊備看得東自黃河岸府谷

堡起西至定邊營連接寧夏花馬池邊界東西縈紆二千餘里

險隘俱在腹裏而境外臨邊無有屏障止憑墩臺城堡以為守

備緣有舊城堡二十五處原設地方或出或入參差不齊道路

不均遠至一百二十餘里近至五六十里軍馬屯操反居其內

人民耕牧多在其外遇賊入境傳報聲息倉卒相接比及調兵

策應軍民已被搶擄蒙古俱已出境雖稱統領人馬不過虛聲

應援及西南直抵慶陽等處相離五六百里烽火不接人民不

知防避其北面沿邊一帶墩臺皆稀疏空闊難以瞭望臣與鎮

守延綏慶陽等處總兵巡撫等官計議臨邊府谷等一十九堡

俱係極邊要地。必須增置那移。庶為易守。趁今聲息稍寧。先行
 摘撥軍餘。採辦木植。候春暖土開。委官監督。併力興工。將府谷
 堡移出芭州舊城。東村堡移出高漢嶺。響水堡移出黑河山。土
 門堡移出十頃坪。大兔鶻堡移出響鈴塔。白洛城堡移出甄皇
 營兒。塞門堡移出務柳莊。不惟東西對直捷徑。而水草亦
 各利便。內高家堡至雙山堡。雙山堡至榆林城。寧塞營至安邊
 營。安邊營至定邊營。相去隔遠。合於各該交界地方。崖寺子三
 眼泉柳樹澗瓦劄梁。各添哨堡一座。就於鄰近營堡。量摘官軍
 哨守。又於安邊營起。每二十里築墩臺一座。共十座。接連環縣。
 俱於附近軍民內量撥守瞭。北面沿邊一帶墩臺空遠者。各添

從信錄
作甄

皇

墩臺一座。共三十四座。隨其形勢以為溝牆。必須高深足以遮
 賊來路。因其舊堡。廣其規制。必須寬大足以積糧草。容人馬。庶
 幾墩臺稠密。而易於瞭望。烽火相接。而人知防避。營堡聯絡。而
 緩急易於策應。聲勢相倚。而可以遙振軍威。從之。
成化二年十一月

請以指揮使神英等十員分守城堡疏

延綏慶陽東西二路。沿邊城堡共二十七處。其間榆林龍州等
 城。孤山府谷神木柏林高家坡羅大兔鶻等堡。及定邊營。尤為
 緊關要害。蒙古不時出沒之處。苟非得人。恐難戰守。臣會總兵
 都御史等官。推得指揮使等官神英等十員。年力精壯。驍勇有
 謀。乞陞署職。令操守分地。以神英劉寵仍守榆林城。岳嵩守龍

州城。耿雄守府谷堡。朱政守神木堡。東鉉守柏林堡。隋能守高家堡。劉釗守波羅堡。傅英守大兔鷓堡。廖斌守定邊營。兵部覆奏神英傅英劉寵耿雄東鉉廖斌屢被衆薦才識尤長宜陞署都指揮僉事。隋能劉釗朱政岳嵩宜仍舊職操守從之。年月同上

奏陳整飭寧夏三路邊備情形疏

寧夏三路皆衝要。中路靈州往南二百八十里。原無墩臺。東西二路營堡墩臺相去甚遠。聲息不接。蒙古深入。路皆經此。不即經理。何以保障。請以東路興武營移至近裏。與花馬池靈州東西對直各一百里。自花馬池東南紅山兒至環縣等處。西南長流水至小鹽池等處。西路自河北分水嶺至固原半箇城等處。

及永安墩至靖虜等處。中路靈州至石溝兒。一路往韋州胡蘆硤等處。一路接小鹽池至萌城等處。每二十里添設墩臺一座。共五十有八座。周圍築牆掘溝。務在寬廣。可容運糧接遞軍民。客商投宿避害。量摘附近衛所屯守軍餘。每墩撥給五人。看守瞭望。庶幾營堡相連。烽火相接。而易於應援。鹽貨流通。糧馬漸增。從之。成化二年十二月

參劾畏賊失機各官疏

七月蒙古由花馬池散入平涼諸處劫掠。越二十日。參將韓斌王安游擊將軍趙英等。合兵截其歸路。衆寡不敵。蒙遂入興武營。副總兵張榮畏其勢衆。不敢進兵。蒙尋入靈州。總兵李杲畏

怯不出。使都指揮焦政出戰被殺死。八月賊入固原州。都指揮林盛軍屯甘州羣牧所城外。遣指揮董晉等截殺。獲一人。斬首二級。尋復遇賊。戰於西山長城。大衆突至。官爲賊殺死者二十二人。賊遂擁衆至羣牧所劄營。官軍堅壁不出。賊分衆攻陷開城縣。殺知縣于達。教諭湯敏。大使汪士讓。虜其妻子二十餘口。居民一十六戶。遂長驅深入靜寧隆德等六州縣大掠。蒙旨令臣覆實。謹具以聞。臣謂林盛等畏縮失機。宜置於重法。都御史項忠雖往延綏會議邊務。聞賊入境。宜兼程回平涼調度軍士應援。今乃在途。延綏日久。致誤軍機。亦宜逮之。諭曰。項忠林盛趙英王安韓斌俟邊警寧息奏聞處分。時李杲已謫邊戍。張

榮以才不勝代回。故不及也。

成化二年十二月

添設延綏駐劄兵將疏

今天下一統。諸種番夷。雖或出沒。不足深慮。惟此蒙古。動輒長驅深入。最爲邊患。遼東宣府大同寧夏甘肅。皆有高山大川長城固壘限隔。延綏境外。亦有黃河千六百餘里。實天造地設之險。洪武間東勝迤西。路通寧夏。墩臺基址尙存。永樂初殘胡遠遁。始將守備軍馬移入延綏。棄河不守。且延綏地方。東起府谷堡。西至定邊營。縈紆二千餘里。今聲息稍緩。亦可因循度遣。倘班師之後。賊若復來。何以支持。且大同宣府兩處地方。通無二千里遠。又皆控據雄險。尙有正副總兵參將協同守備共一十

二員。寧夏三路不滿千里。亦有正副總兵參將協同守備八員。延綏城堡窳遠。最爲難守。止有總兵參將三員。調度豈能周徧。議者咸謂若依舊守把黃河險阻。實爲萬全之計。然今賊未出套。宜因時損益。不拘故常。於延綏添設協同參將二員。於高家龍川緊關衝要城堡駐劄。往來提調。互相策應。就將先調陝西鄜慶等處官軍存留四千員名。相參土兵四千八百六十六名。甘肅兌回慶陽衛官軍八百一十七員名。共轄官軍九千六百餘員名。添撥各堡輪班操守。缺少器仗。行總兵等官候大軍回京之日。將原領官軍盔甲神鎗銃砲。於內量數存留。交與少監秦剛收管備用。庶幾戰守有人。而邊備充實。軍馬有常。而糧草

易供矣。

成化三年三月

請將李均保等放回原衛隨住疏

鞏昌臨洮衛舍餘李均保等二百八十名。先年招募在官。聽調赴京。接應殺賊。景泰元年起。調靈州操備。及寧羌鳳翔等衛所。連雲棧青陽等驛站軍姜迪等三十六名。先年祖父爲事編發各驛充軍。自備鞍馬鋪陳什物擺站。景泰四年調送寧夏操備。且均保等原非正軍。而與正軍一體差操。因關行糧。家屬又無月糧養贍。歲久逃亡。一例勾補。揆之人情。誠有不堪。臣以爲均保等宜放回原衛隨住。姜迪等宜退回原站走遞。以後如果缺人調用。宜另於丁多之家選補。庶幾人得甦息。事體允當。

成化三年三月

奏陳整飭甘肅邊備情形疏

甘肅所屬十五衛所地方。雖有遠近不同。然自永昌迤西。與西寧鎮番。頗有險隘可據。賊亦不敢久留。莊浪雖有通賊路徑。山密地狹。軍馬頗易戰守。惟涼州地方。四際寬廣散漫。緊關衝要。最先受敵。又兼水草便利。賊一入境。動輒經年不出。往歲蒙古犯本城。止是一衛軍馬。戰守不敷。不免差人遠調甘肅等衛官軍策應。相去六七百里。為蒙古邀遮。未能即至。比到人馬疲弊。緩

以下實錄本原缺十行略見前明史本傳宜相湊補

成化三年三月

增撥三岔黑山二遞運所人夫疏

鎮衛極臨邊境。原設三岔黑山二遞運所。僉撥為事囚犯置備

車牛。令其接遞。後因革去遞運所。併與馬驛帶管接運。今三岔驛人夫止有二十六名。黑山驛止有二十一名。重役人難。以莊浪衛鎮羌驛路當衝要。原設軍民夫役。見在不滿二十餘戶。不惟接遞艱難。抑且缺人守堡。查得舊革鑼鍋泉遞運所餘下人夫七十三名。見撥在黑松林兼管。及查莊浪衛在城遞運所。實有人夫一百六十三名。武盛遞運所。實有一百三十七名。紅城子驛人夫一百名。此處驛遞。比其他人夫倍多。宜將黑松林原帶管鑼鍋泉人夫內撥三十名。安插鎮羌驛在城三處驛遞。共摘撥六十名。分撥三岔黑山二遞運所。每處三十名。就領原牛車馬驛驢走遞。庶使接遞均平。人無耗累。抑且邊站城堡。得以

守護

成化三年三月

量移永昌肅州西寧各衛邊備疏

永昌衛原有白石崖墩一座。距本衛二百餘里。近於山丹衛。下有河水灌溉山丹田地。土魯干墩一座。亦距本衛二百餘里。切近於涼州衛。下有河水灌溉涼州田地。今永昌衛軍少。哨守不敷。宜將前項白石崖墩。改隸山丹衛管轄。土魯干墩口。改隸涼州衛管轄。各令撥軍哨守。其永昌境內所管五奴五赤墩。係干衝要之地。各當添築城堡一座。就將掣回官軍。改撥哨守。庶得地方適均。事體利便。又肅州衛上河清至臨水地界。逼臨邊境。山外原有哨馬營一所。先因達賊侵擾。移入山裏路旁駐劄。緣

官軍耕種地土。多在境外。而哨瞭軍馬。反居其內。宜移本營復立故處。通賊隘口。修築城堡。防護屯種。庶使人知避害。可以保障無虞矣。又西寧衛地方。僻在西北番族之中。四面受敵。且又控制罕東阿端曲先等衛夷虜。乃緊關重地。本衛軍馬。專一巡守要害。捍禦番族。先年邊方寧靖。北蒙不來侵犯。各族番夷。頗聽撫諭。不敢爲非。近來因見蒙寇擾邊。乘機倣倣。往往聚衆出沒。阻截道路。劫掠財畜。殺傷人命。調兵剿殺之後。至今猶未寧貼。乞將西寧衛原調官軍土民五百六十七員名。於莊浪涼州二處。輪流備禦者。存留本衛操守。遇莊浪等處有警。量調策應。不惟彼此有備。亦且省用邊儲。以上五疏。上皆是之。命兵部

即文移所司施行。

成化三年三月

請申嚴私役軍士各情弊疏

今衛所因循日久。姦弊愈滋。以致軍士有名無實。有私役跟官者。有辦納月錢者。及聞上司查點。輒開作守城把門看廠種菜。當匠差操等項。破調影射。甚者新軍解到。百計騷擾。索要財物。或逼迫在逃。或隨即賣放。情弊非一。故有司雖有清理之名。而衛所無充實之效。今各營軍士。已蒙查理。而在京在外衛所。亦當如之。如有私役跟官。辦納月錢。要素財物。逼迫賣放者。該管官員革去管軍管事。若新解軍到。逼迫賣放者。十名以上降一級。多者計數遞降。其不及十名者。如常例發落。在京衛分行令

見委管理存恤軍士。本部員外郎給事中御史。稽考遞年各衛食糧文冊。要其某衛軍士原數若干。見在若干。在衛差占并空閒各若干。逐一查出。將精壯者送營操備。在外衛所。兩直隸行移巡按御史。同所在知府。十三布政司行移布政司。同分巡按察司官。查弔各衛食糧文冊。照例清出操練。仍將清理之數。造冊繳部。每年一次查考。如有前項作弊情由。一體參奏問罪。如所擬著爲例。庶幾有司不致煩擾。軍伍得清。上可其奏。成化三年四月

右奏議十五首同見明憲宗實錄又整陝飭西邊備整飭寧夏邊備延綏駐劄兵將整飭甘肅邊備四疏均略見前明史本傳整飭陝西邊備疏又見明陳建皇明從信錄

明修太師莊關帝廟碑記 成化十五年致仕尚書王復撰
右見崇禎固安秦志文缺待訪

附錄

〔明〕褒贈工部尚書王復祖母得玉碑文詔曰。大臣克修其職者。朝典推及其先太考。恩蓋厚矣。矧茲賢勞爲屬之重任者乎。爾贈兵部左侍郎王得玉。乃工部尚書王復之祖父。積善行以裕於家。致賢孫効用於國。功勤荐著。優典宜殷。茲特贈爾以資政大夫工部尚書。服此休嘉。昌厥胤系。成化四年十二月初八日

〔明〕褒贈工部尚書王復祖母劉氏碑文制曰。朝廷簡閱賢能。畀之重任。褒榮之典。必及其先。所以伸勸獎之意也。爾贈淑

人劉氏。乃工部尚書王復之祖母。德蘊自初。祉延厥後。致有賢孫。歷躋顯位。揆厥所自。宜加恩典。特贈爾爲夫人。尚克靈承。宜永垂蔭。年月同上

〔明〕賜祭通政使司左通政王復母許氏碑文維景泰五年歲次甲戌十月乙卯朔十九日丁酉。皇帝遣禮部左侍郎姚夔。賜祭通政使司左通政王復母太恭人許氏曰。爾有令子。効勞于國。良由賢淑。教訓所臻。胡不壽康。遂遺祿養。特賜葬祭。以榮始終。爾克有知。尚其欽服。

〔明〕諭祭工部尚書諡莊簡王復碑文維成化二十一年歲次乙巳九月己酉朔初二日庚戌。皇帝遣太子少保禮部尚書

周洪謨。諭祭於太子少保工部尚書王復曰。卿以通敏之才。發身賢科。列官禁闈。封敕有稱。進通政而奉使虜營。位司馬而才猷茂展。載陟冬官。載陞少保。勤誠彌著。倚畀方殷。奈何乞休之未幾。竟爾訃音之忽至。追念往勞。可無優恤。爰命有司。爲營葬事。特贈太子太保。謚莊簡。靈其有知。尚克歆服。

[又]維成化二十一年歲次乙巳九月己酉朔十一日己未。皇帝遣禮部左侍郎兼翰林院學士徐溥。諭祭於太子少保工部尚書贈太子太保謚莊簡王復曰。卿國之大臣。倏爾長逝。奄臨首七。良增悼傷。特茲遣祭。以表始終。靈其不昧。尚克享之。

[又]維成化二十一年歲次乙巳十二月戊寅朔初十日丁亥。皇帝遣禮部左侍郎謝一夔。諭祭於太子少保工部尚書贈太子太保謚莊簡王復曰。卿國之大臣。倏爾長逝。窳奄臨。良增悼傷。特茲遣祭。以表始終。靈其不昧。尚克享之。

[明]諭祭工部尚書謚莊簡王復妻齊氏碑文。維正德元年歲次丙寅七月戊申朔十一日甲子。皇帝遣太子少保禮部尚書張昇。諭祭於太子少保工部尚書贈太子太保謚莊簡王復妻封夫人齊氏曰。爾以端淑之姿。勤儉之行。夙敦婦道。善相其夫。爲國重臣。茂揚勛勩。久沾祿養。累受榮封。眉壽康寧。踰八望九。宜享遐福。胡遽長終。爰推榮恩。爲營葬域。特茲諭

祭尚克歆承。

以上褒贈及諭祭碑文共七首在今西關外王莊簡公墓前縣人賈士魁依原碑錄

〔清王三太九世祖莊簡公遺像記〕莊簡公者三太九世大祖也。公諱復官太保。謚莊簡。其勳勤炳若日月。載在明史。不敢瑣贅。今滿漢攸分。旗民各體。太以旗弁而祖莊簡。無乃謬甚。是蓋有說明崇禎二年。太父崇有之三韓。娶有母氏。生太三弟兄。至順治甲申。從龍抵都。時以天下未平。父行役戎馬。閱十年始歸聚。其鞅掌勞苦。已著於鬚髮間矣。父以垂老之年。當茲暮景。故土依依。爰溯本源示太。且以拜掃切囑。嗟嗟遺言。父形色凋。太何敢以承祧於父者。因忠盡而忘孝友乎。於是請圖斯像。以完父志。以盡晨昏。更僭贊言。用識昌熾。贊曰。

苟能見才也。異域可也。苟能著節也。子身可也。苟能昭令名於千秋。雖冒死迎君。丹心扶主可也。純白存心。清勁立業。今之人與古之人也。太不得而及見之。猶可以想像之也。噫。冠履端嚴。矯矯乎方城之翹楚。三槐之大廈也。九世孫王三太天祿敬記。

〔縣人賈士魁王莊簡公遺像跋〕我縣有明一代。以科名仕宦最先見稱於鄉國者。首推莊簡王公。公之勳名事業載在明史。自足昭垂千古。今邑紳賈君玉先生。搜輯故鄉文獻。於公之遺文佚事。甄錄靡遺。並擬拓公之遺像於卷中。俾傳久遠。客冬屬余代求之。余念與王氏為至契。莊簡公諱康之字子強者余之外舅也因與

叔和先生

名錫春為拔貢生彭齡弟

道及。即蒙慨允。余以末學後生。生於數

百年後。猶得仰瞻公之遺範。豈非厚幸耶。公之貌豐澤。美鬚

髯。眉目清朗。迥逾常人。紅袍烏紗。危然端拱。具一種儒雅氣

概。見之令人敬畏。宜乎公之豐功偉績。至今稱道弗衰也。惟

原像以歲久色黯。君玉先生更屬其同里劉君淩滄重樵付

印。

劉君名恩。涵精於繪像。在都門。名稱藉甚。

自是流布天壤。俾人人得識前賢之丰采。

非獨王氏子孫之幸。亦由公之靈爽不昧。禩世常昭。冥默中

或有以致之。昔曾文正公汲汲於聖哲之畫像。以為感發興

起。由來已舊。吾鄉人士。幸得此編。可不力圖孜肩往哲。以為

梓里光耶。民國十七年閏二月。縣後學賈士魁敬識。

王太守松

固安縣志選舉表。王松字汝節。沭陽縣主簿。鸞子。明正德十一

年舉人。嘉靖二年進士。授戶部主事。歷陞員外郎。郎中。陝西平

涼府知府。補直隸廬州府。調揚州府。

明國子監進士題名碑。嘉靖二年丙戌科。王松成第二甲第一

百十八名進士。

清朱彝尊日下舊聞引嘉靖祀典。明世宗嘉靖九年公議郊祀

禮。主合祭天地而不以古禮為非者。為郎中劉序。王松等共一

百九十八人。

固安縣志封贈表。王鸞

原作鸞。誤。

任縣主簿。以子松貴。封戶部廣西

司主事。贈中憲大夫揚州府知府。妻董氏史氏皆封安人。
附錄

〔明封贈戶部主事王松父鸞為承德郎文〕敕曰。國家制推恩之典。以寵任事之臣。其克修舉職務。揚休著績。必榮及其親。所以示褒勸而勵忠孝也。爾直隸淮安府沭陽縣主簿王鸞。乃戶部廣西清吏司主事王松之父。長厚有容。篤於倫理。明經入仕。不著聲績。既迺明於止足。矯焉遺榮。厥所遺餘。萃于令子。勛名福澤。咸未可量。茲特推恩封爾為承德郎。益崇詩書之風。永示鄉閭之範。欽哉。

〔明封贈戶部主事王松母董氏為安人文〕敕曰。教子父道。成

之者。母。肆國家緣子貴。父。與母並命焉。禮也。爾董氏乃戶部廣西清吏司主事王松之母。為婦則順。為母則慈。相成夫子。而祿弗逮。養賦受則然。茲特贈爾為安人。方覃禮命之恩。用慰終身之慕。嘉靖七年閏十月二十四日

右碑在西關外王氏祖墓
縣人賈士魁訪錄

王參政煒

〔固安縣志選舉表〕王煒。字克新。正德十四年舉人。十六年進士。南京工部主事。改禮部。陞員外郎。郎中。山東副使。補河南副使。

陞陝西左參政

〔山東通志職官表〕王煒。固安進士。明嘉靖末任山東副使。

〔明敕纂明倫大典〕嘉靖五年七月辛丑。禮部主事王煒等會奏

曰世廟之建。民勞逾年。念大工不可屢興。大孝難以遽盡。量寬民力。稍節民財。所謂得萬國之懽心。以事其先王者在是矣。上曰。卿等欲節民財。已見忠意。但觀德殿改遷舊宇。所費不多。宜令改作。以慰朕懷。

又八月庚午。禮部主事王煒等會請世廟告成。古今殊典。恭穆獻皇帝入祀茲廟。世享天子之禮。神靈永安。聖孝獲伸。凡齋戒祭告陳牲樂舞。悉如時享儀。并具慶賀儀以上。上免慶賀。

又是月丙子。禮部主事王煒等會議曰。臣等謹按觀德殿既准奉先殿。則世廟奉安神主之後。章聖皇太后止宜於觀德殿行禮。則可免世廟之謁。而聖祖家法。守之益堅矣。上切責該科部

阻滯禮儀。俱令伏罪。

又九月甲申。禮部主事王煒等會議曰。章聖皇太后與中宮皇后先謁太廟。次謁世廟。臣等按國朝以來。無皇后出甄城謁太廟事。今觀德殿準奉先殿。世廟準太廟。太后似無可出謁廟之禮。上曰。聖母奉謁世廟禮儀。仍具以上。

又是月甲午。禮部主事王煒等會議曰。聖母謁見世廟。翟車暫離法宮。遠出甄城。况路經太廟。地涉尊嚴。往復之間。降輿陞輿。必須皇上躬自扶持。皇太后聖體乃安。而皇上孝心亦始愜矣。上從之。

明世宗實錄嘉靖十八年六月。黜河南按察司副使張倫。王煒

山東按察司副使孟居仁爲民以巡按御史朱方王瑛劾其貪暴故也。

固安縣志封贈表王相。任府照磨。以子煒貴。封奉政大夫。禮部郎中。妻李氏封宜人。

固安文獻志卷十二目錄

耆舊事彙

明

張處士士學

張縣令父

張縣令素

祀鄉賢

張通判緒宗

張縣令子

張巡檢塤

齊孝子綱

李巡按鸞

王副使欽

王副使繼芳 王副使子

李太守達

張御史宏

劉侍郎永

段縣令補之

段太守鍊 段縣令孫

段主事鏞 段縣令孫

王巡按正宗

楊學正和 祀鄉賢

楊侍讀維傑 楊學正長子
祀鄉賢

固安文獻志卷十二

天津徐世昌鑒定

縣人賈廷琳謹編

耆舊事彙

明

張處士士學

明崇禎固安秦志張士學。負郭里人。明封邱知縣素父也。隱居樂善。嘗有鄉人入室竊物。既見及反身藏避。少頃呼其名諭之曰。汝得非饑窘乎。其人羞赧跪拜。復與之米麥而去。人稱長者。

張縣令素

明崇禎固安秦志張素。字文質。負郭里人。天資秀穎。博學多聞。

從遊鄉校。名重師友間。少孤。事母至孝。母歿喪葬。一循乎禮。服衰麻廬於墓側。哀毀骨立。時有瑞草靈鵲之應。有司欲上其事。力辭而止。永樂七年登胄監。十八年授河南涉縣知縣。洪熙元年調封邱縣。撫字賢勞。政績顯著。嘗築古潭。水患遂弭。吞蝗蝻。禾稼獲收。民到於今稱之。後乞老還鄉。人重其有二疏之風。暇則攜琴訪舊。把釣坐石。或遨遊琳宮。或訓育諸子。故以四樂自號。縉紳士大夫咸題詠以贈。春秋九十二而卒。崇祀鄉賢祠。

封邱縣志張素。順天固安人。明宣德六年任封邱知縣。

亦見河南通志

廷琳按舊志云素洪熙改元調封邱縣。蓋就其始任之年言之。洪熙為明仁宗年號。一年而終。子宣宗立改元宣德。

封邱志謂宣德六年任者。就其去任之年言之。非兩歧也。

張通判緒宗

明崇禎固安秦志張緒宗。封邱知縣素子。永樂年貢生。篤志力學。任陝西岐山知縣。在官無纖芥之愆。聲譽著聞。九載考績蒙旌異。封父母並妻。榮莫大焉。陞山東萊州通判。

岐山縣志名宦傳張緒宗。順天固安縣人。景泰六年由監生任岐山知縣。興舉廢墜。牧愛有守。

張巡檢墳

明嘉靖固安蘇志張墳。新安屯人。明正統中任巡檢。自少孝養其親。父寢疾。供湯藥。嘗糞穢。復告天。願以身代。及歿廬墓三年。

事母晨昏必定省之。景泰初母卒。一如喪父然。負土成墳。植木成林。野鳥依戀。如素所感焉。

齊孝子綱

明嘉靖固安蘇志齊綱。當渠里人。事母盡孝。母疾遍求名醫。及疾篤。乃自取肝調羹奉母。疾遂愈。後母歿。終身不食鹽醬。人稱其孝云。

李巡按鸞

明崇禎固安秦志李鸞。字天瑞。南鋪里人。倉副使榮子。成化十三年舉人。二十三年進士。廣東道監察御史。巡按陝西。以劾左布政使。互相奏訐。謫湖廣衡州府知事。陞涇縣知縣。和州知州。

明國子監進士題名碑。成化二十三年丁未科。李鸞成第一甲第九十一名進士。

明孝宗實錄。弘治二年五月丁亥。實授都察院理刑進士李鸞等十五人爲監察御史。鸞廣東道。

又弘治四年十一月。光祿寺買應用品物。舊例皆預支官錢。各行頭及吏役等。因而侵欺。後乃預令各行賒取報納。然後領價。各項行頭。復乘此爲奸。又有遊手之徒。號爲報頭。假供應爲名。公私攘於市。其於品物。或刷以紅土。或覆以黃袱。則恣其所取。官得其一。而私倍之。及進納后。動輒經年。方得給價。遠方之人。往往不及守候而去。京師人遷延積久。虧損資本。况所給錢物。

多被行頭侵剋抵換。至是巡視監察御史李鸞具疏前弊。以爲朝廷實惠。沒于姦人。舖戶被害。多生嗟怨。乞下禮部議。今後光祿寺買辦。各照時估。本寺差官領之。給與印信票帖。同該縣委官。率行頭到市平價。隨即給價。毋付行頭。及通同減價收買不堪之物。凡遇領價。一聽提督內官驗放如舊例。具數送監收給事中巡視御史並本寺委官。日逐驗放。每五日一結算。發該署附卷。俱送刷卷御史處照刷。仍移文五城巡視御史。令責兵馬司。并行錦衣衛巡視官校。一體訪察。有稱報頭等名目。在市街抑勒賒買者。即執治其罪。若被害者指實告官。審明卽發生理。止將犯人逮問。如此則官民兩便。姦弊可除。禮部覆奏。上從其

議。具議買辦供應。即宜給價。不許行頭用強賒買。今後但有指稱報頭等名目。強賒害人。所司嚴以法治之。

又弘治六年七月庚子。命以陝西漢中府歲輸西安府倉米四千石。折銀類解布政司。准給諸司官俸。石折銀七錢。并發布政司所貯餘銀。令各州縣糴米以備賑濟。從巡按御史李鸞奏也。

又弘治七年六月。黜陝西左布政使王衡爲民降監察御史張文爲貴州布政司照磨。李鸞爲湖廣衡州府知府。初文開報各官考語。署衡曰不謹。衡聞而怨忿。遂奏文監臨科場。戳記私號。出巡回至成。與總兵官夜飲。路逢三司不下馬。且失奏賊數。託鸞代奏之。復奏鸞酷刑箠死知縣時文。典史任振。及與已辯爭。

之時。追至察院門外。投以磚石。失風憲體。命下鸞文于錦衣衛獄。鸞文亦奏衡進表索屬縣夫銀。與驛丞崔璽有仇。毆之溺水而死。酷刑致死人命。及取所部女爲妾。徵收停徵物料。科罰商人銀米諸不法事。上命工科給事中童瑞等往勘。虛實相半。衡因訐瑞等私撥驛馱送廩米。連引者甚衆。至是解衡至京。與文鸞面證。刑部擬衡贖罪革職。鸞文贖罪還職。有旨衡原籍爲民。鸞降四級。文降三級。俱調外任。

李巡按遺著

今存奏疏三首 碑記一首

請仍以茶易蕃馬疏

西寧等三茶馬司。爲貯茶以易番馬而設。比年以賑飢故。開茶

易粟。其爲民則便矣。而茶馬司所積漸少。今各邊馬耗。而諸郡歲稔無事于易粟以賑。請於西寧西河二茶馬司。各開報茶四十萬斤。洮州茶馬司二十萬斤。召商中納。每引不過百斤。每商不過三十斤。官收其十之四。餘者聽其貨賣。總之可得四十萬斤。約易馬可得四千匹。數足即止。戶部議覆從之。

弘治三年七月

右見明孝宗實錄

請嚴禁光祿寺買物擾害商民疏

右見同上已具前

歷陳陝西邊患情形疏

陝西之地。依山帶河。內屏諸夏。外控西陲。號爲重鎮。自撤東勝

之後。河曲內地棄爲虜穴。靈夏外險。反南備河。故成化中。毛里孩。亂加思蘭。擾我邊場。轉輸勞費。民已不能堪。去歲以來。寧夏地方。烽火不絕。行旅惶惑。居民失業。而其典兵事者。安居自適。以爲無事。今歲二月。虜入廟山墩。殺指揮一人。旗軍十餘人。肆行無忌。倘秋高馬肥。大舉入寇。不知何以待之。臣竊思夷狄之在前代。多者百餘萬。少者數十萬。又必有豪黠者。君長之。至於元爲天所厭。北遯沙漠。我太宗親御六師。驅逐益遠。厥後種類交惡。互相吞噬。其勢不能當我一鎮。夷狄之衰。未有過於今日者也。夫以中國全盛。馭極衰之虜。雖草薶禽獮。諒不爲難。當疆場之寄者。漠然不加之意。使其豨奔豕突。跳梁邊鄙。上厪九重

之憂。此臣所以日夜不能忘也。陝西東自榆林。西盡寧夏。城堡綦布。墩墩相望。經理區畫。可謂精矣。典兵之官。有守備。有分守。有協守。有主帥。大小相維。又有內臣以監督之。都御史以贊治之。體統節目。可謂備矣。然葺爾小醜。輒敢輕入。官兵閉門一籌莫展。惴惴焉自保之不暇。臣曰。擊其事。豈勝扼腕。臣聞邊事所急者。曰兵。曰食。曰馬而已。然軍不疲於戰陳。而疲於典兵者之剝削。馬不疲於馳驟。而疲於典兵者之勞利。芻糧不疲於餽餉。而疲於典兵者之巧取。監臨主守。互相效尤。欲望三軍生敵愾之心。邊塞有長城之恃。難矣。至於都御史之設。諸軍歸其節制。庶事聽其便宜。正當搏擊貪殘。肅清弊政。奈何宴會往來。歲時

館餽人情習玩。動相掣肘。邊備不修。實由於此。然臣之所慮。又有急於此者。請舉已往言之。正統十四年。王師北征。號三十萬衆。而土木之難。懸如一髮。成化十九年。北虜犯邊。嘗動宣府大同兩鎮重兵。而下米莊之危。幾於覆沒。當是時。邊將如石亨許寧。雖皆敗衄之餘。其平昔才勇操守。猶足以繫屬人心。今國家承平日久。沿邊撫臣。又非一時重望。若安常習故。無所更改。萬一虜騎長驅。則前下米莊之覆轍。固在也。乞簡命在廷才望大臣一人。重授節制。凡沿邊錢糧軍馬。一應重務。悉聽便宜奏聞。以是居安慮危。使虜知我待之者有備。而朝廷亦可以免西顧之憂矣。奏下。兵部議請通行於各邊鎮巡等官。俾知思患預防。

之道從之。

弘治六年五月

右見同上

重修固安縣北關真武廟記

右見崇禎固安秦志另載本編金石遺文卷

王副使欽

明崇禎固安秦志人物傳王欽。字曰恭。澄清坊人。明成化十年舉人。弘治三年進士。授刑科給事中。屢有建白。如曰學校無成。皆由師道不立等項事宜。吏部題覆有云。無非愛惜人才。崇重師儒之意。詳見經濟錄。陞湖廣僉事。補河南。陞福建副使。

明國子監進士題名碑。弘治三年庚戌科。王欽成第三甲第六

十一名進士。

明孝宗實錄弘治十年三月甲申。陞刑科給事中王欽為湖廣按察司僉事。

又弘治十三年秋七月。湖廣按察司僉事王欽長蘆都轉運鹽司運使陳倫俱丁憂服闋。欽復除河南按察司。倫復除原任。

河南通志職官表王欽固安進士。弘治中任河南按察司僉事。

明孝宗實錄弘治十八年二月丁丑。陞刑部郎中朱恩。河南按察司僉事王欽。福建僉事張壘俱為按察司副使。恩河南。欽壘俱福建。

明武宗實錄正德元年二月。南京雲南等道監察御史沈賚等。

劾奏福建副使王欽等九人不職。吏部覆奏。言欽等五人抵任

未久。或曾蒙旌異。其南康府知府王溥等四人。則清議未諧。上

是之。令溥等四人致仕。而留欽等五人供職。按是條仍附見孝宗實錄卷末

固安縣志封贈表王端以子欽貴。贈徵仕郎。刑科給事中。妻楊

氏封孺人。

王副使繼芳

固安縣志選舉表王繼芳。字世昌。福建副使王欽子。嘉靖十年

舉人。十一年進士。授山東兗州府推官。陞戶部主事。歷陞員外

郎郎中。陝西西寧兵備副使。調四川副使。

明國子監進士題名碑嘉靖十一年壬辰科。王繼芳成第三甲

第一百八十八名進士。

〔清宣統山東通志職官表〕王繼芳固安進士。明嘉靖間任山東戶部管倉分司。又任監兌分司。

〔明世宗實錄〕嘉靖十六年四月甲戌。先是六科缺給事中。詔量簡數人以充。至是吏部擬授推官王繼芳等南京工科。上不許。命改別用。員缺不必選補。

〔又〕十八年冬十月丁丑。戶部左侍郎王杲上言。救荒當如救焚。今河南災甚。奏報死亡已十萬有餘。其存者冀旦夕得升合以延殘喘。乞先發內帑銀十萬。會同撫按分投賑濟。仍遣主事一員同往聽用。章下戶部議報。戶部覆言。今河南既已災重。可且

裁給數萬。命主事王繼芳同往。詔如擬。

〔又〕十九年五月庚子。詔賞戶部右侍郎王杲巡按河南御史陶欽夔銀各二十兩。綵幣二表裏。主事王繼芳一表裏。時河南大饑。以杲等賑濟有方故也。

〔又〕三十二年春正月。吏科都給事中何雲雁等。四川道御史鄭本立等。以考察拾遺。糾劾副使王繼芳等十五人各貪酷不職。詔繼芳等十人俱冠帶閒住。

〔固安縣志封贈表〕王欽任副使。以子繼芳貴。進階中憲大夫。妻祖氏贈安人。

廷琳按王副使之姓。我縣舊志作馮。又詳載其子孫散見

數處亦無一不作馮。然按明國子監進士題名碑及實錄山東通志諸書則均作王。又副使之父福建副使王欽實吾鄉有名人物。茲故依諸書全作王而不從馮姓。至舊志何以王馮二姓互出則不得其解矣。

李太守達

固安縣志選舉表李達字士達彭村里人。明弘治二年舉人。九年進士。授主事。陞員外郎。郎中。杭州府知府。

明國子監進士題名碑弘治九年丙辰科李達成第二甲第十二名進士。

明武宗實錄正德六年春正月丁巳南京六科給事中毛玉十

三道御史張叔安等以當考察之期劾奏知府李達等十四人皆奔競乞照例罷黜降調。章下吏部請會都察院定其去留以俟聖裁。報可。

又是月乙卯六科給事中楊一漢十三道御史曹岐等言近日考黜不職官有遺漏者如知府李達等十七人亦當黜退。吏部議覆達等五人各不謹宜冠帶間住。詔從之。

張御史宏

固安縣志選舉表張宏縣人。入南京神策衛籍。弘治十二年進士。南京戶部主事。

明國子監進士題名碑弘治十二年己未科張宏成第二甲第

三十九名進士。

〔明武宗實錄〕正德四年十一月。授理刑進士張宏等為試御史。宏雲南道。

〔又〕正德五年三月戊午。吏部會都察院考察河南等路御史。短於激揚。歷練未純者。為張宏等十八人。俱調改別任。改宏為府推官。

劉侍郎永

〔固安縣志選舉表〕劉永。字思永。三安屯人。成化十九年舉人。二十年進士。授廬州府推官。歷陞吏部主事員外郎郎中。太僕寺卿。工部左右侍郎。

〔明國子監進士題名碑〕成化二十年甲辰科。劉永成第三甲第一百二十八名進士。

〔明武宗實錄〕正德三年二月乙酉。令南京刑部員外郎劉演致仕。演病痊赴部。吏部擬復職。有旨責吏部不遵新旨。查開演病痊年月。姑貸堂上官罪。文選司郎中劉永等各奪俸有差。四

月丙申。陞吏部文選司郎中劉永為通政司右通政。提督騰黃。〔又〕四年三月己未。通政司左通政叢蘭。右通政羅欽忠。劉永。各以考察自陳乞休。不許。七年十二月丙寅。陞太僕寺卿劉永

為工部右侍郎。管理易州山廠。九年冬十月戊申。陞工部右侍郎俞琳為本部左侍郎。令管領易州山廠。右侍郎劉永令回

部管事。

〔又〕是年十二月庚戌。奪工部右侍郎劉永俸一年。總理易州山廠內官監奏缺供用柴炭。有旨詰責。永言該歲者起運已足。所司皆以補前任逋欠之數。故與奏報不合。詔宥之。仍罰俸。

〔又〕十年夏四月庚戌。都給中李陽春。監察御史周奎等。劾奏工部侍郎劉永侵漁而致國用之損。共二十人。乞俱賜罷黜。吏部覆奏。永等八人先自陳。俱留用。

〔又〕十一年八月丁丑。遣工部尚書李鏐祭司工之神。侍郎劉永祭河伯之神。以營建宮室故也。十一月己丑。賞工部侍郎俞琳。劉永各銀十兩。紵絲一表裏。以修理象房畢功也。一役之微。

而恩賞之濫如此。

同膺賞者七人。又匠役等四十一人。

〔又〕十二年三月戊戌。南京六科給事中易瓚。十三道監察御史王崧等。論劾工部右侍郎劉永貪濫有聲。共十一人。乞亟為罷黜。以清仕路。上曰。各官累有旨留用。何乃又來奏擾。本當究治。姑宥之。秋七月己卯。陞工部右侍郎劉永為左侍郎。以右侍郎趙璜注補。

〔又〕十四年八月癸未。上南征。辛卯。命工部左侍郎劉永等九人。同內外坐營官防守都城九門。

〔又〕十六年四月戊申。罷工部左侍郎劉永等五人。皆以奉詔自陳也。己酉。六科給事中張九敘等。劾奏工部左侍郎劉永等

十三人。俱庸陋不職。得旨。劉永等先已自陳解官。及論黜不復究。

固安縣志封贈表劉諒。以孫永貴。贈通議大夫工部右侍郎。妻陳氏。贈淑人。劉賢暨妻麻氏。以子永貴。封贈同上。

段縣令補之

固安縣志選舉表段補之。弘治二年己酉科舉人。任河南通許知縣。

通許縣志官績傳段補之。字希甫。固安人。明正德七年任通許知縣。重士撫民。紳士尤德之。

段太守鍊

固安縣志選舉表段鍊。字文純。澄清坊人。明通許知縣。補之之孫。臨淮縣訓導進之子。嘉靖十六年舉人。二十年進士。授工部主事。歷陞戶部員外郎。郎中。大同府知府。

明國子監進士題名碑嘉靖二十年辛丑科。段鍊成第三甲第二百五十二名進士。

明世宗實錄嘉靖二十四年七月甲子。以太廟工完。工部主事段鍊陞俸一級。賞銀十兩。

固安縣志封贈表段進。以子鍊貴。封承德郎工部都水司主事。妻陶氏封安人。

段主事鍊

固安縣志選舉表段鏞。字文貴。澄清坊人。通許知縣補之之孫。嘉靖十六年舉人。二十三年進士。山東高密縣知縣。陞刑部主事。調兵部。陞員外郎。

明國子監進士題名碑嘉靖二十三年甲辰科段鏞成第三甲第一百二十二名進士。

固安縣志封贈表段貢任驛丞以子鏞貴封承德郎兵部武選司主事妻商氏贈安人

附錄

明褒封兵部主事段鏞為承德郎文朕敕曰。□□□吏之選。以待天下之材而七兵之曹。名秩甚寵。匪得謹敏老成□□士不

以輕授爾兵部武選清吏司主事段鏞學足以通方才足以任事早發賢科試官民部勞猷茂著遴擢今官而服政愈勤持身愈恪歷年滋久考績惟明特進爾階承德郎錫之救命夫朕方修安攘之政思頗牧之□焉□世胄以敘官拔才能授事爾寔與有責焉尚益祇愷□□□勲以稱朕用人經□□意當有崇階需爾之成欽哉

明褒封兵部主事段鏞妻袁氏為安人文敕曰鷄鳴□□□所以相乎夫也爾人臣有夙夜在公而罔恤於私者非得內□□□能此故朝廷之恩命必均焉兵部武選清吏司主

事段鏞妻袁原缺依段氏墓碑增氏敏秀德□□嬪於良□克修婦道允宜

厥家茲特封為安人。式□冠帔之榮。益□□□之職。嘉靖三

十一年七月初十日。右碑在縣城東祖家場村南。縣人賈士魁訪錄。

王巡按正宗

固安縣志選舉表。王正宗。字嫡夫。縣人。錦衣衛籍。明正德五年

舉人。十二年進士。會試第九名。浙江臨安知縣。被徵陞福建道監察御

史。謫州判。陞山西介休知縣。汾州知州。調陝西寧羌州。陞壽府

左長史。

山東通志職官表。王正宗。固安進士。明嘉靖間任巡按山東監

察御史。

明敕纂明倫大典。嘉靖二年四月乙亥。御史王正宗等會奏曰。

興獻帝於陛下不得而子明矣。八佾之舞。豈獻廟之所得為乎。今既用十二籩豆。宜如鳳陽不必用樂。可也不聽。

又三年正月癸巳。御史王正宗等會議曰。祖訓兄終弟及。指同產言。則皇上為親弟。武宗為親兄。自宜考孝宗。母昭聖。前後章奏。惟進士張璠。主事霍韜。給事中熊浹。二三人。與桂萼議同。其兩京尚書侍郎等官。凡八十餘疏。二百五十餘人。皆如本部議。夫推尊之非。莫詳於魏明帝之詔。稱親之非。莫詳於宋儒程頤之議。而桂萼之徒。肆言無稽。情罪可惡。議上上曰。還參衆論再議。

又御史王正宗等會奏曰。陛下於議立之臣。尚欲封拜。安得不

以昭聖皇太后爲母乎。旣母昭聖。安得不考孝宗而稱皇伯乎。上責其朋言亂政。俱罷俸。

又二月丙申。御史王正宗等會議曰。皇上入繼大統。考孝宗。母昭聖。蓋純得乎天理之正。深即乎人心之安者也。今興獻帝后已極尊稱。而聖孝無窮。復今臣等再參衆論。請於興獻帝帝字上。興國太后太字上。更加一字。以全尊稱。議上留中。

又二月甲子。御史王正宗等會奏曰。孝宗深仁厚澤在天下。使桂萼等說行。則拂人心。失綱常。皆係於此矣。上俱切責之。

又三月壬申。御史王正宗等會議曰。皇上入奉大宗。不得祭小宗爲本生父立廟大內。從古所無。惟漢哀帝嘗爲共王立廟京

師。師丹以爲不可。請於安陸廟增飾爲獻皇帝。百世不遷之廟。俟他日襲封興王子孫。世世奉享。陛下歲時遣官祭祀。亦足以伸至情矣。上曰。朕奉太廟。豈敢間越。與漢哀帝不同。務協公論。以伸朕情。

又御史王正宗等會奏曰。陛下篤念本生。建室大內。衆論至公。宗法難紊。願以禮制情。而後可以弗畔矣。俱不聽。

又三月戊子。御史王正宗等會奏曰。桂萼等行取來京。恐干進者皆務迎合。邪說橫行。國是無由而定矣。給事中章僑等各復論奏。愈肆悖慢矣。

又四月丁酉。御史王正宗等會議曰。尊崇典禮。近奉敕諭。正統

本生秩然有別。陛下已洞燭桂萼等邪說之非。而天下皆知陛下能明爲人後之義矣。惟建室事干正統。不敢曲從。聖心未已。復命臣等議擬。未蒙罷議。今兩京臣工各論奏建室之非。則天下萬世公論。具見於此。夫爲人後者爲之子。乃儀禮經傳本文。孔子述經所定。太祖高皇帝著于孝慈錄。大明律。臣等正欲遵祖訓。本禮經。守師丹程頤之論。以悟聖心。宜停建室之議。仍廟安陸。歲時遣官奉祀。俟他日皇子衆多。襲封興王。世世奉享。議上不聽。

又四月壬戌。御史王正宗等會奏曰。席書授爲尙書。皆以爲不可。蓋以大臣進退。士習邪正係焉。書所以有碎首不敢拜官之語者。亦自知而不能安也。

楊學正和

明嘉靖固安蘇志人物傳楊和。字節之。自少孝親睦族。勤學好問。及長。嚴重剛方。不愧暗室。且絕口不言人非。成化二十二年。領鄉書。授直隸徐州學正。被徵陞國子監學正。歷任教職。勤於訓誨。造就人才居多。又篤於恩義。當時生徒咸欽仰之。陞代府左長史。未幾卒於官。比歸。行李蕭然。平昔不務蓄積。惟嚴於教子。所至必爲擇師。以講明義理。不專於科舉之學也。其在徐州。路當水陸之衝。名公巨卿。道經徐者。必使諸子執贄求教。以聞所未聞。故皆掇巍科。致盛譽。爲海內聞人云。遼州祀於名宦祠。

本邑崇祀鄉賢祠。子維傑。維聰。維誠。孫文祥。文祈。文科。

清孫承澤畿輔人物志。楊和。字節之。固安人。自少孝親。睦族。勤學好問。及長。剛方嚴正。不媿暗室。且絕口不言人非。晚領鄉薦。由徐州學正。陞國子博士。平時不務蓄積。惟嚴於教子。著有學範。一言以教後人。講明義理。不專事科舉之學。長子維傑。正德按當作嘉靖丙戌。廷試第二。次子維聰。正德辛巳。廷試第一。俱為海內聞人。向年予過方城。彼中父老。侈譚楊太公居鄉之善。及訓子之方。而兩子俱占巍科。入木天。乃無人言及者。始知人之在世。科名不足恃也。

清孫奇逢畿輔人物考。楊學正。公和。字節之。固安人。孝親睦族。

人無間言。嚴重剛方。不愧暗室。絕口不言人非。晚登鄉薦。乞教授。歷遼州。青州。徐州。勤於訓誨。造就人才為多。陞國子監學正。惟嚴於教子。為海內聞人。長子維傑。正德丙戌。廷試第二。次子維聰。正德辛巳。廷試第一。按公生平精力全在教子。而兩子俱及第。無愧科名。公有餘愜矣。因憶兩程子父珦。令從學元公。而二子之成就如此。父之愉快更何如耶。

徐州府志職官表。楊和。固安人。明正德八年任徐州學正。

固安縣志封贈表。楊名。以孫維聰。貴贈中議大夫。南京光祿寺卿。妻王氏。贈淑人。楊和。以子維傑。維聰。貴贈翰林院編修。南京光祿寺卿。妻張氏。贈淑人。于氏。贈宜人。

楊侍讀維傑

明崇禎固安秦志人物傳楊維傑字英甫國子監學正和長子。嘉靖五年廷試一甲第二授翰林院編修。七年充經筵展書官。八年會試同考試官。十四年九載考滿陞本院侍講充武舉考試官。明年校錄累朝實錄寶訓成。陞司經局洗馬充經筵講官。十八年陞右春坊右庶子兼翰林院侍講。明年告歸養疾。二十二年復職。二十四年校錄皇祖列聖御集并經史諸書成。陞左春坊左庶子兼翰林院侍讀加從四品服俸卒崇祀鄉賢祠。明世宗實錄嘉靖五年三月乙未禮部尚書席書言舊例廷試貢士掌卷官先行看閱分送內閣然後以次及於九卿進士甲

第前後第決於讀卷官職之尊卑不復論其文之高下非所以示大公也。自今請糊名混送以防奸弊。其一甲三名不分內閣九卿。從公會取既定然後輪次均填不宜偏私以官爵爲序。疏入上初未允書復爭論乃許之。

又是年夏四月癸丑朔授一甲進士龔用卿爲翰林院修撰楊維傑歐陽衢爲編修。

清傅維鱗明書制科表嘉靖五年丙戌科大學士賈詠詹事府學士董玘爲主考取中進士趙時春等三百人賜及第狀元龔用卿福建懷安人榜眼楊維傑順天固安人探花歐陽衢江西泰和人。

徐州府志嘉靖十三年兵備副使宋圭改建應壁樓爲讀書樓以固安楊維傑維聰從其父學正和讀書於此相繼及第。

明世宗實錄嘉靖八年夏四月戊辰大學士楊一清等言大明會典一書誠國家典禮所係昨已奉旨令諸司纂述近來條例送翰林院重訂仍乞賜敕命官開館纂修以成盛典上從之遂命編修徐階楊維傑歐陽衢等二十三人爲纂修官。

又十一年九月己巳吏部推翰林院侍讀修撰編修年深者王教倫以訓姚涑王用賓楊維傑歐陽衢張袞等七人堪補宮僚之缺詔姑停之。

又十三年三月辛未命國子監祭酒王激翰林院編修童承敘

楊維傑歐陽衢充經筵講書官。

又是年秋七月丁丑重書累朝及恭睿獻皇帝實訓實錄遂命編修童承敘楊維傑歐陽衢唐順之等十二人爲校錄官。

又十四年春正月乙未陞翰林院編修楊維傑歐陽衢爲侍講俱以九年秩滿也。

又十五年八月庚戌賜重錄列聖寶訓實錄監錄等官宴于謹身殿尋以禮部議照成化三年進呈實錄例賞校錄官諭德姚涑侍講楊維傑等十三人各銀二十兩紵絲二表裏羅衣一襲。

九月甲寅以重錄列聖訓錄成詔吏部列上史館効勞諸員役職名於是陞校錄官右春坊右中允童承敘侍講楊維傑歐

陽衢俱為洗馬。

又十八年二月癸丑。先是吏部上選置東宮官僚。得旨東宮輔導。端本攸係。仍敕內閣詳擬以聞。至是大學士夏言等疏名以請。擬陞司經局洗馬童承敘為左春坊左庶子。楊維傑為右春坊右庶子。俱兼侍講。詔如擬。

又十九年三月。先是御史楊瞻樊得仁奏。故禮部侍郎薛瑄。國朝大儒。宜從祀文廟。詔下儒臣議。時庶子楊維傑等二十三人議宜祀。庶子童承敘贊善浦應麟議宜緩。給事中丁湛等請從眾議之多者。上曰。聖賢道學不明。士趨流俗。朕深有感。薛瑄能自振起。誠可嘉尚。但公論久而後定。宜候將來。童承敘浦應麟

議是。

按薛文清公於隆慶六年從祀。是楊侍讀等之議。終得伸也。

又是年八月己卯。右春坊右庶子兼翰林侍講楊維傑疏乞養疾。許之。

又二十四年春正月乙巳。以恭錄列聖御製文集。并聖學心法四書五經大全。及性理大全二十一史諸書成。陞校錄官右春坊右庶子。兼侍講楊維傑為左庶子。兼侍讀。加從四品服俸。

日下舊聞引嘉靖祀典。嘉靖九年正月。吏科都給事中夏言。請更定郊祀。言國家合祀天地於南郊。弗應經義。乞敕多官集議。以求至當。上嘉之。詔博采公議。主合祭而未嘗以古禮為非者。編修張袞。楊維傑。徐階等一百九十八人。

廷琳按楊侍讀故宅。在今縣城北門內大街東。與楊太僕之故宅。左右斜對。而此稍南耳。當日為侍讀所懸。不愧科名四字匾額。至今猶存。又按孫夏峰撰楊學正小傳云。二子俱及第。無愧科名。此匾額不愧科名四字。應為夏峰語所自出。

楊侍讀遺著

今存墓誌一段

柴思恭墓誌銘

思恭為泰安知州。柴景德之玄孫。曾任陝西延安府推官。慶陽府通判。在延安平反死囚數百餘人。以包老稱。及任慶陽行民遮道悲泣解履。有題姓氏而祝頌禱者。

右見保定縣志選舉表惜全文未載

附錄

〔明〕封贈翰林院編修楊維傑母于氏為宜人文制曰。人子之才。雖本於父。而資於母德亦深矣。故褒榮之典。母與父均。亦不以存亡有閒。爾于氏乃翰林院編脩楊維傑之母。代府長史司左長史和之妻。毓秀德門。禮歸儒族。相夫致顯。已徵內助之良。且篤生令子。以高才及第。作我辭臣。爾雖先逝。淑行固彰矣。茲特因父故秩。贈為宜人。九原有知。服茲責命。嘉靖七年九月二十五日

〔明〕褒封翰林院編修楊維傑為文林郎文救曰。國家簡文學

之士列職翰林而編脩實維史官所以備紀載之公而傳信於天下後世也茲維殊選不輕畀人爾翰林院編脩楊維傑以高才廷對有協朕心賜之及第爰授斯職式克慎勤考績既成宜有寵褒茲特進爾階文林郎賜之救命夫古之論良史者謂才足以周萬事之理道足以備天下之用智足以通難知之意文足以發難顯之情然後其任可得而稱尙其懋懋光我訓辭欽哉

明褒封翰林院編脩楊維傑妻侯氏爲孺人文敕曰士夫名行每資於內助之良故朝廷推恩羣臣必及其配翰林院編脩楊維傑妻侯氏毓秀名門禮嬪儒族克修婦道善相其夫

夫既進階恩宜爾被茲特封爾爲孺人服此渥榮宜敦儆戒嘉靖八年六月二十三日

明晉封司經局洗馬楊維傑爲奉直大夫文制曰翰林宮僚俱爲清峻之秩故相爲轉遷然至五品亦崇矣匪文行兼備積勞有年者曷克臻斯爾司經局洗馬楊維傑學術純正志行端謹兄弟及第廊廟齊名曩居史僚式精纂述頃遷宮職益殫勤誠進講經幃良多啟沃非堯舜之道不陳惟仁義之謀是告厥惟良侍從也哉顧其操存忠厚識見宏深朕益嘉之茲以大慶覃恩是用進階奉直大夫錫之誥命於乎人臣之心惟在所養爾其益懋厥猷朝夕匡贊用弼予於治朕惟

爾勗焉。欽哉。

〔明〕晉封司經局洗馬楊維傑妻侯氏為宜人。〔文〕制曰。朕崇修內治。用基化本。褒揚之典。必首逮於閨門焉。爾司經局洗馬楊維傑妻封孺人侯氏。淑德令儀。早歸儒閥。孝勤篤至。儉約有恒。以能弼相良人。高才及第。荐登華貫。望實俱隆。賢矣哉。茲特加封為宜人。服此寵光。益崇祗慎。嘉靖十五年閏十二

月十六日

右誥敕現藏楊氏後裔縣人賈士魁借錄

固安文獻志卷十三目錄

耆舊事彙

明

楊太僕維聰

楊學正次子印存遺像

肥鄉賢

楊主事文裕

楊太僕子

楊縣令竊學

楊侍讀孫

蘇郎中民

曹主事濡

高中丞澄

明太僕寺卿楊公維聰遺像



縣後學劉恩涵敬重樵

明太僕楊方城先生遺像贊

觥觥太僕一世之英早承父訓家學崇闕驂騮初步
領解蜚聲冠冕多士對策承明巍科繼擢更有難兄
雁行鵷序聯袂蓬瀛世宗嗣統考所本生大禮議起
張桂佞傾公偕百僚抗疏哭爭廷杖雖酷百世猶榮
玉堂厄運外轉紛更按察三晉遷職汴京青齊布政
俗美風清陞南光祿轉北回卿勳業未竟稅駕半程
榘枌殞折太室何營栽栽故廬遺匾崢嶸巍巍華表
孫郭舊筮讀公對策晁董抗衡拜瞻公像嶽鎮淵泓
表章往哲下士微情我欽碩德永冠方城

縣後學賈廷琳拜撰

固安文獻志卷十三

天津徐世昌鑒定

縣人賈廷琳謹編

耆舊事彙

明

楊太僕維聰

明崇禎固安秦志人物傳楊維聰字達甫國子監學正和次子

正德十四年以第一人舉於鄉明年成進士名列第十十六年廷試

一甲第一授翰林院修撰嘉靖二年充會試同考官遷右春坊

右中允因議大禮廷杖出為山西副使改河南提督學校陞山

東右參政山西右布政使山東左布政使會推南京光祿寺卿

轉太僕寺卿。崇祀鄉賢祠。廢一子入監讀書。

〔明〕敕纂明倫大典。初武宗皇帝疾革。廷臣俱莫與聞。大漸之明日。尙擬策進士奉天殿。上既賜進士第。楊廷和主選庶吉士。遂以濮議試題。希旨者多入選。忤者斥爲奸邪。自是無敢異議。〔明〕陳洪謨繼世紀聞。正德十五年二月會試。取中式舉人三百三十名。禮部請殿試。時楊閣老廷和議稱臨軒策問。必天子親御。且因是或早有迴鑿之機。一向未舉。延至冬未回。次年辛巳。今上即位。方御西角門賜策問。乃五月十五日也。又次日放榜。賜楊維聰爲狀元。餘如制。內浙人史立模常得夢云。汝巳年進士。衆以爲寅甲巳亥非開科之年。恐無分耳。至是始驗云。

〔清〕傅維鱗明書制科表。正德十五年庚辰科。禮部侍郎石瑤侍講學士李廷相爲主考。取中進士張治等三百五十人。明年辛巳廷試。賜及第者三百三十人。狀元楊維聰。順天固安人。榜眼陸鈺。浙江鄞縣人。探花費懋中。江西鉛山人。

〔明〕武宗實錄。正德十六年五月。先是會試取中舉人張治等三百五十名。以大行皇帝南巡。未經殿試。至是禮部尙書毛澄等。請於五月十五日引赴殿廷試策。緣遇大行皇帝大喪。擬照天順八年事例。至日早引諸貢生於西角門行禮畢。赴奉天殿前丹墀內策試。十八日早。仍於西角門引諸進士行禮。免傳制唱名。并恩榮宴。文武百官各具素服侍班。樂設而不作。詔曰可。

〔又〕是月己巳。賜楊維聰等三百三十人進士及第出身有差。辛未。賜狀元楊維聰朝服冠帶。及諸進士寶鈔。

〔明顧鼎臣狀元圖考〕正德十五年庚辰會試。取中張治等三百五十人。會毅皇帝狩於南京。未及廷試。至十六年辛巳。嘉靖登極始舉之。時廷對之士三百三十三人。擢楊維聰第一。實嘉靖龍飛第一科。勵政求賢之始云。

〔玉堂叢話〕固安縣大水岸。斷橋邊出一碑。題曰。橋傾天子過。碑出狀元來。其年武宗南幸。過其邑。次年辛巳。邑人楊維聰狀元及第。

〔明狀元紀事〕楊維聰幼隨父和任長史。在塾讀書。每膳具維聰已至。母張氏問其何故知之。答曰。恒聞耳邊呼曰。狀元可食飯。及長在京。夢崇文坊迎金字辛巳狀元牌來。扣之。曰。送與固安楊秀才。覺而自喜。但疑是歲非試期。既而已卯庚辰鄉會連捷。因武宗南巡。未暇廷試。至今上登極舉之。實辛巳歲也。兄維傑亦治詩。以嘉靖己丑登進士第二人。

〔日下舊聞引六館日鈔〕正德十六年辛巳。楊維聰榜。進士題名碑。少師兼太子太師吏部尚書華蓋殿大學士楊廷和撰文。太常寺卿劉棨書。

〔明敕纂明倫大典〕正德十六年十月己卯。臣張聰永齋疏至左順門。楊廷和知之。令修撰楊維聰偕庶吉士十餘人沮之。曰。是

必欲與內閣爭邪。臣璉曰。內閣誰為爭者。焉有為禮使上母子不得相接者乎。按明倫大典乃明代張桂諸小人所纂。凡編中所譏斥者。率皆一時正人云。

又嘉靖三年三月壬申。修撰楊維聰等會奏曰。陛下本生皇考乃興國始封之君。上比太祖太宗。皆為大宗。百世不遷之祖。若欲立別室。則禮有所厭。不得以獨尊。又親盡而終毀矣。夫在興國則為百世不遷之祖。在大內則為親盡當毀之祖。雖欲尊之而反卑之。而未盡所以尊之之道也。

又七月丙子。修撰楊維聰等會奏曰。義隆正統。情盡本生。頒之詔令。聖心亦既慰矣。奈何欲去本生之稱。非先王之禮。啟後世之議。豈不為聖德累乎。

又七月戊寅朝罷。上齋居文華殿。編修王元正等遮留諸朝臣於金水橋南。曰萬世瞻仰。在此一舉。今日有不力爭者。當共擊之。於是翰林楊維聰等凡二百二十人。俱赴左順門跪伏。有大呼高皇帝孝宗皇帝者。聲徹于內。上命司禮監官諭之。羣臣仍伏不起。及午。上命司禮監官錄姓名。收繫諸為首者八人於獄。修撰楊慎及王元正乃撼門大哭。一時羣臣皆哭。聲震闕廷。上大怒。遂命逮繫馬理等於獄。庚辰。拷訊豐熙等八人。編伍四品以上罷俸。五品以下各杖之。

明世宗實錄。嘉靖三年六月丙午。上命主事桂萼張璉為翰林學士。方獻夫為侍讀學士。於是翰林院學士豐熙。修撰楊維聰

舒芬。編修王思。皆不欲與萼等同列。各疏乞歸。上皆不允。

〔明史舒芬傳〕嘉靖三年。世宗欲尊崇本生。修撰舒芬偕其僚連章極諫。及張璁。桂萼。方獻夫。驟擢學士。芬及同官楊維聰。編修王思。羞與同列。抗疏乞罷。未幾復偕同官伏左順門哭爭。帝怒。下獄。廷杖奪俸如初。

〔又何孟春傳〕其時詹事翰林給事御史及六部諸司大理行人諸臣。各具疏爭。竝留中不下。羣臣益洶洶。會朝方罷。遮留羣臣於金水橋南。於是翰林則修撰楊維聰等。凡二百二十九人。俱跪伏左順門。自辰至午。猶跪伏不起。帝大怒。收繫四品以下官若干人。翼日編修王相等十八人俱杖死。

〔明世宗實錄〕嘉靖四年六月丙午。以武宗皇帝實錄成。賜纂修官修撰楊維聰等人白金三十兩。文綺三表裏。羅衣一襲。辛亥。以武宗實錄修完。陞纂修官修撰楊維聰。編修孫紹祖。俱右春坊右中允。七月庚辰。左右春坊右中允楊維聰等。各奪俸一月。坐坊局無官上陵故也。

〔又〕六年冬十月。上命內閣選擇翰林。臣稱職者留用。不稱者量材除他官。于是大學士楊一清等言。翰林清要之地。誠不可以匪人處之。臣請自講讀以下。其學有本原。文能華國。及行義無玷者。存留供職。即文學未稱。而才識疏通。堪理政事者。請下吏部。量才外補。因言左中允劉棟。右中允楊維聰等。皆政務疏通。

可外補。十二月甲寅。陞右春坊右中允楊維聰爲山西按察司副使。

明廖道南殿閣詞林記嘉靖初以擴充政事。謫侍讀崔桐修撰楊維聰等。

明沈德符野獲編嘉靖辛巳科。一甲合庶常共二十七人。無一拜相者。狀元楊維聰外謫。僅從外藩一補回卿而止。

又張蘿峰入閣。因侍讀汪佃講書不愜上旨。令吏部調外。張因密揭并他史官不稱者改他官。上遂允行。而中允楊維聰侍講崔桐等二十餘人。俱易外吏以去。京師十可笑中所云。翰林箇箇都外調者是也。此玉堂一時厄運。特假手於權臣耳。

清孫承澤春明夢餘錄上命內閣選擇翰林諸臣稱職者留用。不稱者量除他官。於是中允劉棟楊維聰等。侍講崔桐等皆補外。

明世宗實錄嘉靖十年春正月戊申。陞河南按察司副使楊維聰爲山東布政使司右參政。

又十二年九月乙巳。罷吏部右侍郎席春。先是詔吏部推舉各司堪任翰林者。春言之尙書汪鋈。請召楊維聰陳沂還職。鋈不聽。二人遂有郤。及再推禮部侍郎。鋈不復與春議。春怒詬鋈。至抵冠于地。鋈于是劾春。乞亟罷之。上令春冠帶閒住。不許再用。又十三年九月。陞山東布政使司右參政楊維聰爲山西右布

政使。十五年秋七月。陞山西右布政使楊維聰爲山東左布政使。十六年十月壬申。陞山東左布政使楊維聰爲南京光祿寺卿。十七年十一月甲申。改南京光祿寺卿楊維聰爲太僕寺卿。十八年五月。以册立皇太子覃恩。蔭南京光祿寺卿楊維聰子文祥爲國子生。

〔又是年八月丁未。吏科都給事中薛廷寵。陝西道監察御史戴璟等。以考察拾遺。論劾太僕寺卿楊維聰。戶部主事曹濡等二十人各不職。宜罷。得旨令維聰濡等七人閒住。〕

〔又南京江西等道監察御史利賓等。以考察論劾太僕寺卿楊維聰等十九人各不職。疏上得旨維聰等已有旨矣。〕

〔明穆宗實錄〕隆慶元年三月癸未。補蔭原任太僕寺卿楊維聰子文禕爲國子生。以維聰長子文祥既蔭而殘也。

〔固安縣志恩蔭表〕楊文祥維聰子。未仕卒。楊文禕維聰子。任都察院檢校。歷陞上林院監左監丞。山東濟南府州判。兗州府同知。

〔又選舉表〕楊文祈維聰子。嘉靖三十一年舉人。未仕卒。

〔清朱彝尊靜志居詩話〕文徵仲待詔翰林。相傳爲姚明山學士。及楊方城所窘。昌言於衆曰。吾衙門非畫院。乃容畫匠處此。何元朗叢說述之。而曰二人只會中狀元。更無餘物。衡山長在天地間。今世豈有道著姚涑楊維聰者邪。聞者以爲快心之論。然

金華吳少君詩曰。說謊定推何太史。然則元朗乃好爲誑語者。虞山錢受之信何氏之說。載之列朝詩選。未免偏於聽矣。

清儲大文存研樓集。何元朗語曰。衡山先生在翰林。大爲姚明山楊方城所窘。時昌言於衆曰。我衙門不是畫院。迺容畫匠處此。惟黃泰泉馬西元陳石亭與相得。酬唱甚歡。二人只會中狀元。更無餘物。衡山長在天地間。今世豈更有道著姚涑楊維聰者耶。艾千子曰。快哉斯言。百世而後。猶可以興起也。近日汪茗文亦嘗書之。予按元遺山中州集。撰李長源傳。謂當時亦有不直雷李者。其識正同。予曩送儲禮執入都有句云。雷李清班輕駿足。姚楊下士笑漁竿。臨川少司馬李公。亟問雷李姚楊典實。

予繙公案頭書指眎之。迺靦然一笑。人識度之相去。豈不遠哉。

廷琳按自何元朗

名良俊

創爲姚楊二公在翰苑窘辱文衡

山之說一唱百和。後竟成爲口實。而其實未必然也。嘗讀姜西溟湛園藁。有爲姚明山學士辨誣一篇。援据姚氏詩文。其推崇衡山先生者甚至。力駁何氏說之純屬虛構。然則明山旣屬厚誣。則我縣楊太僕之被誣。更有不待辨而明者矣。宜乎朱竹垞直斥何氏爲好說謊語也。儲六雅此文。猶力持何氏之說。不足取。

楊太僕遺著

今存對策一首 墓誌一首 墓碑可考者一首 詩二首

明正德辛巳科殿試對策

固安文獻志

卷十三 耆舊事彙 楊維聰

八

趙莊賈氏无悶齋

皇帝制曰。朕惟自古人君臨御天下。必慎厥初。而其爲臣者。亦未嘗不以慎初之說告之。蓋國家之治忽。君子小人之進退。世道之否泰。其機皆繫於此。誠不可以不慎也。然觀之詩書所載。則亦不能無疑焉。舜正月上日。受終于文祖。首察璣衡以齊七政。而類禋望徧之並舉。觀天交神。庶政固在所先矣。異時月正元日。格于文祖。詢四岳。闢四門。明日達聰。惟恐或後。且進十二牧而歷咨之。豈聽言用人又在所急歟。太甲元祀。祇見厥祖伊尹。明言烈祖之成德。以訓于王。是天下之政。無大于法祖宗矣。高宗恭默思道。傳說告之。尤惓惓遜志時敏之務。典學亦豈容緩歟。成王即位。周公作無逸。舉三宗以勸之。惟以畏天愛民爲

主。訪落一詩。乃又以盡下情守家法爲說。立政一書。又以三宅三俊爲不可忽。終之無誤庶獄爲重。意固各有在歟。抑又有可疑者。禹舜命于神宗。不旋踵會羣后誓師征苗。康王率循天下。大臣進戒。首以張皇六師爲言。他務未遑。顧以兵事先之何歟。若乃禹祇承于帝。有精一執中之傳。湯黜夏命。有克綏厥猷之任。武王勝殷。訪洪範于箕子。踐阼授丹書于尙父。且退而几席觴豆。刀劍戶牖。莫不有銘。則又萬世道學淵源所自。未可以尋常政事目之也。然則人君慎初之道。果孰有外于是歟。漢唐宋以來。其君臣之間。蓋無足與於是者。然一代之治功論議。亦不可泯。觀夫求端於天之策。治審所尙之疏。尙德緩刑之書。蕩滌

煩苛之奏。與夫先天要說之十事。奉天罪已之一詔。元祐修德爲治之十要。淳熙謹始自新之十目。皆於初政深致意焉。其與十漸之慮。五始之義。三卿序進授策之戒。指歸所在。其果無大相遠歟。夫人事有本末。物理有始終。王道之設施。固有先後。端本所以治末。謹始所以圖終。施之宜先。則不可以少後。皆治體所關甚大。不可以苟焉者。何衆說不能以皆一歟。朕奉天明命。嗣承祖宗大統。臨御以來。釐革弊政。委任舊臣。凡夫敬天法祖。修德勤政。求賢納諫。講學窮理。節財愛民諸事。惟日孜孜。次第舉行。取無逸中嘉靖殷邦之一語。建號紀元。方將體元居正。以求儷美詩書所稱帝王熙明之治。特進爾多士於廷。咨以慎初

之道。爾多士其尚酌古準今。稽經訂史。明本末之要。審先後之序。悉意敷陳。用輔朕維新之治。

對。臣聞帝王之御天下也。有治法。有心法。酌其因革。制其緩急。足以周天下之務。立天下之綱。是謂治法。根於躬行。原於心得。使其出之而有本。運之而不窮。是謂心法。治法不善。則施爲注措之間。乖謬舛錯。必無以成治。苟治法善矣。心法或未端焉。則科條雖具。品式雖詳。亦彌文粉飾。而未必徵之實事。勉強一時。而不能持於悠久。雖欲言治。皆苟而已。故心法存於內。以爲之本。治法施於外。以爲之用。本端而未治。體立而用行。斯爲治不易之常道也。况人君臨御之初。天命眷顧方新。人心嚮望方切。

治忽否泰之機。胥此焉繫。所以慎其初而圖其終者。可不加之意耶。是故得心法而舉治法。三代以上之所以善治也。心法不純而治法亦有所未備。三代以下之所以治不古若也。然則今日慎初之道。奚有外於是二法哉。欽惟皇帝陛下。睿哲天挺。仁孝夙成。龍潛藩邸之時。已繫元元之望。一旦龍飛虎變。御極當天。宵旰孜孜。勵精圖治。任耆舊之臣。釐積習之弊。天下之人。莫不延頸舉踵。觀政聽風。思見德化之成。臣以草茅首蒙賜對。雖至愚陋。不足仰承休德。而喜慶之深。敢不掇拾舊聞。對揚清問。之萬一。臣惟人君之治天下有機焉。識治勢者乘其機以爲之。則力不勞而功可成。所謂機者初是也。蓋臨御之初。好惡未著。

雖有邪佞之臣。卒然不敢售其奸。唯左右觀望。一有隙焉。即投以所好。人君惟好之欲也。於是溺其所可樂。忘其所可懼。而後彼得以肆。天下之事。將遂僨焉。以至於不可爲。誠自其初謹之。不墮於小人之計。小人亦洗心滌慮。唯正之趨矣。是故識其機者慎其初。不慎其初。不識其機也。識其機則國家由之而治。君子由之而進。世道由之而泰。不識其機則治者忽。進者退。泰者否矣。其關係豈小小哉。太甲初嗣位。伊尹告曰。今王嗣厥德。罔不在初。成王初營洛。召公告王。若生子罔不在厥初。生自貽哲命。自古人君臨御天下。率以慎初爲事。臣之賢者亦未嘗不以慎初之說告之也。臣請稽經訂史。用聖制所及者條陳之。舜攝

位在璿璣玉衡以齊七政。而觀天之道盡。類上帝禋六宗望山川徧羣神。而交神之禮舉。及其即位。詢四岳闢四門。明四目。達四聰。務進賢以決壅蔽之患。且進十二牧而歷以五事咨之。務用人以賴輔理之益。伊尹作伊訓。明言烈祖之成德。以訓太甲。蓋逆知其欲敗度。縱敗禮。顛覆湯之典刑。故以法祖爲說。高宗以交修命傳說。說告之曰。惟學遜志務時敏。厥修乃來。則以君德旣修。然後大臣可舉其職也。周公作無逸以訓成王。舉殷中宗高宗祖甲畏天愛民之事。欲其知小人之依。以爲祈天永命之本。成王朝廟聽政。思先人顧託之重。乃作訪落一詩。延羣臣以盡下情。率昭考以守家法。立政一書。周公戒成王以任用賢

才之道。始以宅俊爲不可忽。而終之以無誤庶獄爲重。使王尤知刑獄之可畏。必專有司牧夫之任。而不以己誤之也。若夫禹受命神宗。不旋踵會羣后。誓師征苗。康王率循大卞。召公進戒。首以張皇六師爲言。似若忽內而重外者。然聖人之治。固不因外以廢內。亦不因內而遺外。有苗弗率。民棄不保。禹承舜命。安得不征之。然班師振旅。誕敷文德。卒格于干羽。兩階之化。周至康王三葉矣。承平旣久。玩愒隨之。老臣愛君。得不以張皇六師爲戒。且張皇云者。亦國之常政。軍伍藏於井甸。陳法講於蒐獮。巡邊四征。寓於巡狩會同。儆軍實。閱器械。嚴紀律而已。非若後世守文者。以兵爲諱。喜功者。則又窮兵黷武之爲也。夫三代以

上之君臨御之初莫不急所先務其治法可謂舉矣至其心法之所存則尤致意焉是故人心惟危道心惟微惟精惟一允執厥中禹之祇承于帝也惟皇上帝降衷于民若有恆性克綏厥猷惟后湯之自任于己也武王之始克商也訪洪範于箕子初一日五行次二曰敬用五事次三曰農用八政次四曰協用五紀次五曰建用皇極次六曰乂用三德次七曰明用稽疑次八曰念用庶徵次九曰嚮用五福威用六極其始踐阼也又訪丹書於太公曰敬勝怠者吉怠勝敬者滅義勝欲者從欲勝義者凶退而几席觴豆刀劍戶牖莫不有銘夫武王之皇極敬勝義即成湯之綏猷即禹之中心法之相傳精神之相契有以開萬

世道學之淵源立政非此無以爲立之之本宰事非此無以爲宰之之要慎初之道莫有先於此者可以尋常政事目之哉自是而後若漢若唐若宋不足與於斯矣安馬上之習者不事詩書修玄默之德者崇尚黃老投戈講藝息馬論道矣溺心圖讖之說父事三老兄事五更矣專爲章句之習以至銳情經術而閨門慚德禮延文儒而聲色荒心曰心無邪曲顧任智術以成功曰重道崇儒至指道學以爲黨心法之傳寥乎未有聞也故其爲治法也或駁焉而不純或行焉而有所不盡然當時羣臣之論議則深有可取者董仲舒對策於武帝之初曰王者求端於天欲人君任德不任刑匡衡上疏於元帝之初曰治天下者

審所尚。欲朝廷崇禮而敦讓。宣帝刑名繩下。路溫舒以尚德緩刑。勸之。章帝承永平後。陳寵以蕩滌煩苛。勸之。漢之臣致意於新政者如此。惜乎其君無能以行之也。玄宗開元之初。姚崇以十事要說。曰政先仁恕。曰不倖邊功。曰法行自近。曰宦豎不與政。曰罷賦外之征。曰戚屬不任臺省。曰大臣接之以禮。曰羣臣得犯忌諱。曰絕營造。曰推鑿戒。德宗奉天之難。陸贄勸下罪己之詔。曰天譴於上而朕不寤。人怨於己而朕不知。痛心覲面罪實在予。使狂將悍卒聞之。無不感激揮涕。唐之臣致意於新政者如此。惜乎其君行之而不盡也。呂公著當哲宗之初。嘗上十事於朝。則畏天也。愛民也。修身也。講學也。任賢也。納諫也。薄歛

也。省刑也。去奢也。無逸也。朱熹當光宗之初。擬上十目於朝。則講學以正心。修身以齊家。遠便佞以近忠直。抑私恩以抗公道。明義理以絕神姦。擇師傅以輔皇儲。精選任以明體統。振綱紀以勵風俗。節財用以固邦本。修政事以攘夷狄。宋之臣致意於新政者如此。惜乎元祐行之而不終。淳熙擬之而未上。故當時之治。卒莫能底於善也。由諸臣之建白觀之。雖言人人殊。其視十漸五始三卿序進授策之戒指歸所在。亦無大相遠者。蓋魏徵十漸之慮。以太宗初寡欲而今市駿馬。初護民而今用民力。初役已而今縱欲。初親賢而今近奸。初賤異物而今進難得。初求士而今任好惡。初絕田獵而今事馳騁。初達羣情而今多間。

隔。初求治而今恃勢。初撫寧而今勞弊。所以慮不克終也。五始之義。則春秋之必書元年春王正月公卽位者。以元者氣之始。春者四時之始。王者受命之始。正月者政教之始。卽位者一國之始。苟况所謂三卿序進受策。則天子卽位。上卿進除患爲福之戒而授一策。中卿進慮事慮患之戒而授二策。下卿進敬戒無怠之戒而授三策。所以欲人君謹於始也。蓋與諸臣之所建。謹始圖終者一矣。夷考上下數千年間。君臣圖治之說。既有所謂心法。又有所謂治法。而其爲治法之說。又或天或祖。或君或民。或內或外。或彼或此。棼然其不能齊。何也。天下之理。固有大分而於其中。又各自有界限。必析之有以極其精而不亂。然後

合之有以盡其大而無餘。故以心法對治法言之。心法人事之本也。物理之始也。又於治法之中。以事之大且急者對事之小且緩者言之。大且急者。人事之本也。物理之始也。君人者欲端本以治末。謹始以圖終。其設施之序。心法固所當先。而治法之大且急者。亦奚容以或後。聖君賢臣。唯有見於此。故執中綏猷。洪範丹書。與夫典學之說。修身講學之說。正心齊家之說。直指乎心法之源。而其他政事之說。亦就治法之中。因其時之所宜。據其勢之所至。順其理之所在。指其大且急者言之也。又奚必其詞之同哉。臣竊觀陛下踐阼之初。責成輔臣。獎納臺諫。凡弊政之所當革者。革之無不盡。凡舊章之所當遵者。遵之無不篤。

其於敬天法祖修德勤政求賢納諫講學窮理節財愛民諸事。固次第舉行之矣。勵精之實。發於即位之一詔。中興之志。著於嘉靖之紀元。凡在覆載之間。稍有血氣之屬。莫不以殷宗周宣爲望。乃猶不自滿假。於聖制之終日。方將體元居正。以求儷美。詩書所稱帝王熙明之治。而欲臣等悉意敷陳。以輔維新之化。即此觀之。臣有以知陛下必爲殷宗周宣無疑矣。臣之所以爲獻者。亦惟願不失此機而已。何則。數年以來。法度廢弛。天下之事。已極於弊。陛下一起而新之。百官承德者日奮。人心望治者方切。此祈天永命之時。可以有爲之會也。乘此機以爲之。文去川決。殆無難者。在陛下加之意而已。近世人君。孰無願治之心。

然或卒不逮焉。豈皆力之不足。亦其初之不慎也。陛下欲求慎初之道。則心法治法。烏可不加意哉。是故精察一守以執中。肇修人紀以綏猷。遜志時敏以典學。建皇極以序九疇。戒怠欲之勝。敬義正心以修身。修身以齊家。則心法得之矣。克謹天戒。以畏天。監於成憲。以法祖。親賢遠姦。以致治。早朝晏罷。以勤政。明揚側陋。以求賢。虛懷受言。以納諫。節財以制國用。愛民以固邦本。慎刑憲以恤人冤。詰戎兵以防邊患。則治法得之矣。有心法以爲治法之本。有治法以爲心法之用。本末不差。先後有序。而謂美不儷於詩書。治不隆於熙洽。豈理也哉。慎初之道。如是而已。雖然。非初之難。而終之難也。陛下以慎初爲問。臣旣陳之矣。

至於圖終之說。臣敢復為陛下言之。易曰。天行健。君子以自強不息。天之行也。一日一周。而明日又一周。未有一時之息。健故也。唯其健也。故四時萬物。皆得順其序。遂其生。使君子自強之健。於天少不似焉。則幾成而復壞。未久而已息。何以成其治哉。然所謂健治者。非血氣之謂。又以心為之本。陛下誠求之心。日御經筵。講求至理。以學養此心。整齊嚴肅。主一無適。以敬存此心。延見公輔。親近儒臣。隨時便殿。時被顧問。以君子維持此心。則聖心湛然。義理為之主。而物欲不能奪其健。即乾矣。又何不終之足患哉。伏惟陛下深留聖意。以無失今日之機。以無負今日之望。以無忝今日改元之意。則生民幸甚。宗社幸甚。臣干冒天威。無任戰慄隕越之至。臣謹對。

廷琳按明史藝文志載有坊刻狀元策十二卷。我縣楊太僕是科對策。當載其中。惟未見傳本。昔閱定州王氏括齋

藏書目。列有舊鈔本曹鼎楊維聰王之棟三先生遺著一

冊。遂託武強賀君性存轉假以來。卷中所載太僕文。只此對策一首。無他著。然文亟精粹純正。頗可仰見太僕學識之深湛。宜其當時冠冕多士也。我縣歷次修志。於太僕文無一登載。想散佚久矣。得此狂喜。特願廣布縣中。傳錄多本。庶於鄉邦文獻。不無小補云。

我縣處燕京之南。列首善之域。歷來以道德事功著者。代

不乏人。其以科名冠殿廷多士者。數百年中。僅太僕兄弟二人。閒嘗披閱縣志。略見公之行事。至遺文則缺焉久矣。誠爲我縣文獻無徵之遺憾。今經賈君君玉搜得公當日對策一首。出以見示。捧讀之餘。爲之狂喜者久之。公之文不獨以詞章顯。其間援引前言往行。匡輔君德之功。堪與漢廷之賢良對策。後守媲美。賈君志學好古。此策著之於數百年以前。獨能輾轉求得之於數百年以後。其功爲不可沒已。寶琛賦性疏愚。忝在鄉後學之末。旣欽太僕之文章。更感賈君之孤意。先將此篇油印。以速流傳。嗣擬更付梓人。俾供衆覽云。縣後學陳寶琛謹識。

予世居固安之西南隅。去縣城遠。少年錮於章句。政變後復以教授蟄處京師。同鄉人士旣少。近接事冗。性情又未嘗博極羣書。鄉邦文獻。自慙一無所知。惟記童稚時聽里中故老稱說楊狀元軼事。然亦不過附會狀元以雪團真城隍神掌中。不使融化。呂仙先期爲題狀元及第匾額。種種無稽神話而已。賈君君玉前以應元首徐公之聘來京師。談及固安志書陋略。擬蒐集材料。備修改時採擇。嗣君玉隨徐公館於津。予亦漸留心鄉土掌故。然所得皆爲君玉所先知者。行復置之。乙丑之秋。君玉以所得楊太僕對策見寄。讀之狂喜。喜君玉之苦心搜羅。得之者多。不惟發

先賢之淹滯。廣後人之見聞。有光里乘已也。即株守一隅。束書不觀。譎陋如予者。竟得坐享其成。果我枵腹。私心之幸。尤不可言喻。且感且愧矣。敬題數語。誌不忘君玉之惠。我良多也。後學姚克恭謹識。

守朴趙公墓誌銘

嘉靖三十五年夏六月乙巳。守朴先生卒於山丹衛。先是公爲兵部尙書。論者斥其進爲逆鸞所引。謫戍山丹。旣卒。柩還其鄉。將以明年春三月庚申。葬於良鄉北郊太平莊之原。從先兆也。墓宜有銘。當得王公大人之筆。以爲之重。而罪廢之餘。禮主其減。謂維聰少嘗相知。仕嘗同僚。且有姻親之好。公弟國子生金來授簡焉。義不可辭。乃剟其大者如左。

公諱錦。字文卿。守朴其別號也。先世太平當塗人。高祖華。二曾祖永安。居采石。祖通。以例北徙。今爲良鄉人。考宣。號義菴。祖父俱以公貴。贈大中大夫。山西布政司右參政。祖母李氏。贈淑人。妣任氏。封太淑人。生二子。公其伯也。幼而好學。蚤著文譽。嘗隨後渠。崔公月湖。楊公游。月湖公以薛文清公讀書錄授之。自是潛心理學。舉正德八年鄉試。登十二年進士。授南京戶部浙江司主事。公司揚州鈔關。鎔銅爲櫃。竅而鑰之。所入旣多。則銷以儲庫。人不得而爲私焉。又創水竇於關梁之南。小舟可徑出入。得以免稅。迄今便之。陞署郎中。調南京吏部稽勳司郎中。入爲

兵部武庫司郎中。改武選司職方司郎中。大同軍變。戶部侍郎永年胡公奉命往平之。奏公爲佐。歸掌職方事。凡將領之賢否。邊塞之險平。糧儲之充耗。皆備訪而默識之。有所施行。無不允愜。大司馬倚重焉。由是趙郎中之名。譁於人口。繼爲大司馬疏言其專。復出爲南京戶部河南司郎中。陞溫州府知府。山東按察司副使。山西右參政。浙江按察使。擢右僉都御史。巡撫延綏。贊理軍務。道聞太夫人之喪而歸。服闋。改大同。有忌之者。論其不可用。冢宰力稱其賢。上竟用之。總帥周尙文者。老將也。不事掎克。得軍士心。而果於自用。性多偏執。公以體國爲念。不憚屈己與之交歡。然遇不可者。必盡忠告。周以爲怨。慮且將誤事。上

疏求退。改甘肅。甘肅遠在西陲。未幾考察巡撫。公名爲所指。罷居良鄉。家居略勢力。崇儉約。若寒素然。憂時感事。則每以致身爲念。門垣□□。多所題識。公廣陵有別墅。或勸之往。公依依不忍去。昔人云。窮達戀主。耕桑近郊。公之意蓋如此。公旣不肯忘世。世亦未肯釋公。嘉靖二十九年春。上用公爲巡撫。命下即日單車就道。兼程抵鎮。弔死問疾。恤孤掩骼。蒐卒簡將。不數月。人心遂定。上疏論兵機十六事。久任夏官。歷典邊鎮。兵機政要。閱歷有素。事至立決。無壅滯者。晨興入部。日晏方歸。不以寒暑少廢。司屬敬服。軍士感悅。以功廢一子錦衣衛百戶。加太子少保。公在甘肅大同。與仇鸞同事。入京之後。頗相乖忤。過從笑語。乃

人情之不免者。山丹之行。惟悼臣道之無成。仰聖恩之弘貸。無幾微見於顏色。嗚呼。豈惟公哉。蔡邕之於卓。龜山之於京。其不幸亦猶是也。公為人謙謹。每事從厚。尤友愛諸弟。俸入之餘。皆以委之。別無私藏。從弟金視之。如同出。以例為國子生。調恤家族姻黨。不惜勞費。酷好經史。閒居。手不釋卷。所著經義若干卷。日錄若干卷。詩文若干卷。卒年六十有九。配陳贈淑人。繼配張封淑人。女三。長適永清左衛指揮同知周佐。次適維聰弟之子文樾。固安庠生也。次適同邑監生張維厚弟銳子二。伯世官。即受廕者。先公卒。仲世祿。邇嗣前廕。公之行實。其紀載具於國史。稱述在於鄉評。一介書生。致位八座。雖老而荷戈。為國殞命。亦

其願也。孤魂萬里。識與不識。皆所痛惜。而况如維聰者哉。銘曰。於維先生。間氣之英。藝苑挺秀。理學研精。芥拾青紫。世網遂嬰。郎署允閱。藩臬荐更。三典邊鎮。再陟孤卿。徊翔中外。舍藏用行。硯發利刃。惟才之宏。忠實貫日。惟志之誠。一德匪懈。指天為正。溘死流亡。不怨不驚。太平之莊。鬱鬱佳城。卿雲瑞靄。耿耿常橫。右見良鄉縣志

□□□□□墓碑

右見文安縣志惜碑文未載

題尊經閣 有序

邑庠尊經閣。故仁王佛閣也。學佛者居之。後有石塔趙子

昂所書。正德初。太康劉公湜來宰是邑。逐僧毀塔。改爲尊經閣。人多稱之。然釋固異端。猶有知以禪律爲事者。吾儒爲聖人之徒。若但役志科目。而不知從事於身心之學。則五穀不熟。不知萑稗矣。請爲諸英俊勉之。

阿閣三重書百編。青衿白首此鑽研。兩河檻外清兼濁。阡陌宮前斷復連。北闕晴雲常五色。西山瑞靄亘千年。歸儒逃墨思曩迹。入室升堂俟後賢。

右見固安秦志藝文

謁林廟詩

清欽定續通志金石略曰。楊維聰過闕里詩。明嘉靖十五年撰。正書。現存。

驚風飄寒雨。秋杪淒重陰。徘徊魯故墟。榛莽成荒林。靈光亦已

廢。闕宮詎及今。巍然夫子宅。殿廡何崎嶇。往昔講禮徒。易世猶來臨。斯文信在茲。墜緒誰復尋。履烏化既久。絲竹無遺音。仰瞻數仞牆。惕厲感我心。

右見清孔繼汾闕里文獻考四十一

楊主事文裕

固安縣志選舉表。楊文裕。字順叔。西湖里人。太僕寺卿維聰子。隆慶四年舉人。考授中書。陞戶部主事。

江西通志職官表。楊文裕。字順叔。直隸固安縣舉人。明萬曆間任九江權使。

楊縣令案學

明崇禎固安秦志人物傳楊宋學字仲恭號協齋翰林院侍讀
維傑孫歲貢生文祿子萬曆十六年舉人授山西太平縣知縣
謫順德府教授轉陝西膚施縣知縣陞山東德府審理正

附錄

公舉楊協齋孝廉懿行應載縣志文固安縣儒學廩增附生
員李鳳池王熨劉日升等呈爲公舉孝廉以正人心以勵風
化事竊查鄉官楊宋學由戊子舉人辛丑副榜其高節懿行
闔縣共知祖榜眼父歲薦學問綽有淵源舉孝廉阻副車功
名終歸坎坷年甫七齡遽喪嚴君慕逾五十無間慈母居里
而立節潛修稜稜風範可表服官務立綱陳紀嘖嘖政聲長

留始以親老祿仕除山西太平知縣課農興學仁聞謳歌旋
以馭屬嚴峻改廣平教授尋轉陝西膚施知縣整凋飭敝豪
民懾伏禱雨輒應蠲糧屢申諸如煮粥救荒無非實政竟以
終餐難告遂坐左遷其在衡府審理也冷署蕭蕭承歡不衰
於孺子過庭疊疊式穀并嚴及弟姪猶且捐穀石以惠族人
助棺衾以恤僚友不因貧而干謁有司不恃貴而侮慢鄉曲
迨母以壽終盡禮盡情守苦塊而無違思樂思嗜依墓廬而
弗返嗣而再補德府由田邑侯之申請不休果爾七載公忠
荷各當道之優獎疊薦乃忽遭疾溘然謝世子七人席庠廡

店

按楊紹席楊紹店均於崇禎二
年城破殉難見縣志忠節傳

在庠以歲考遠離僅妻張氏率序

廕庠諸幼在側。樞甫歸而城破矣。幸棺無恙。不可謂非天之默有以佑之也。懇乞仁明老父師。遍採鄉紳。俯察里老。旌純忠以勵臣節。嘉孝行以彰子道。獎廉操以維頽風。伸正氣以扶公論。載在方冊。存留縣志。是社稷之光也。理合上呈。須至呈者。固安知縣秦士奇批。該故宦忠孝友愛。和睦仁慈。且廉直著於服官。任恤洽於同氣。士林之傑出。鄉紳之翹楚也。宜亟著志。以垂不朽。

蘇郎中民

固安縣志選舉表。蘇民字天民。西湖里人。明嘉靖元年舉人。五年進士。任刑部當從明實錄作工部主事員外郎郎中。

明國子監進士題名碑。嘉靖五年丙戌科。蘇民成第三甲第一百三十名進士。

明世宗實錄。嘉靖九年十一月庚戌。詔賞園丘郊勞官匠人員。陞工部主事蘇民為署員外郎。俱添注管事。

日下舊聞引嘉靖祀典。嘉靖九年正月。百官公議郊祀禮。主合祀天地而未嘗以古禮為非者。有主事楊麒。傅好禮。蘇民等共一百九十八人。

固安縣志封贈表。蘇瀾以子民貴。贈承德郎刑部署員外郎主事。妻吳氏贈安人。

曹主事濡

固安縣志選舉表曹濡字汝育西辛里人縣主簿鎰子嘉靖四
年舉人八年進士授山東諸城知縣陞戶部主事

明國子監進士題名碑嘉靖八年己丑科曹濡成第三甲第一
百五十二名進士

明世宗實錄嘉靖十八年八月丁未吏科都給事中薛廷寵陝
西道監察御史戴璟等以考察拾遺論劾戶部主事曹濡等二
十人各不職宜罷得旨令濡等七人閒住

固安縣志封贈表曹鎰任縣主簿以子濡貴贈承德部戶部廣
東司主事妻畢氏許氏皆封安人

高中丞澄

固安縣志選舉表高澄字肅卿通關廂人明嘉靖四年舉人八
年進士授行人充琉球副使賜一品服陞尙寶司丞光祿寺卿
會推陞都察院右副都御史巡撫河南

明國子監進士題名碑嘉靖八年己丑科高澄成第三甲第二
百一十三名進士

明世宗實錄嘉靖十一年五月癸亥遣吏科左給事中陳侃爲
正使行人司行人高澄爲副使往琉球封故中山王尙眞子清
爲中山王

又十七年八月甲子陞尙寶司司丞高澄爲光祿寺少卿

又是年九月恭上二聖冊寶光祿寺典簿張福進胙失誤爲禮

官所劾。奪光祿寺少卿彭黯俸兩月。高澄馮惠及寺丞竇一桂胡奎各一月。

又二十四年秋七月己巳。陞光祿寺少卿高澄為南京太僕寺少卿。

又二十八年二月甲戌。改南京太僕寺少卿高澄為太常寺少卿。提督四夷館。十二月丙申。陞提督四夷館太常寺少卿高澄為光祿寺卿。

又二十九年春正月。發太倉銀六萬兩。給光祿寺備用。以本寺卿高澄奏供應不充故也。

又三十年二月。光祿寺卿高澄等十三人各自陳乞罷。詔俱照

舊供職。九月。陞光祿寺卿高澄為都察院右副都御史。巡撫河南。

固安縣志封贈表。高大琳。以子澄貴。贈奉政大夫光祿寺少卿妻胡氏封宜人。妾陳氏贈宜人。

明高拱都察院右副都御史河南巡撫東玉高公墓誌銘。另載本編耆舊碑誌卷。

楊太僕遺著補遺

山東通志序

嘉靖癸巳夏五月。山東通志刻成。凡四十卷。爲目五十有二。附目十。總若干萬言。敘曰。山東古青兗之域。奄有齊魯。岱宗渤海。互其坤維。大庭爽鳩。流其德化。孔子孟軻。垂其道統。方岳之勝。視諸方爲最。矧當王畿之南。千里而近。藩輔之寄。視諸方爲尤重。夫正疆域。攷山川。辨名物。紀故實。以觀民風。以整吏治。莫大乎志。蓋在諸方皆弗可闕焉者。而况於方岳之勝。藩輔之重者乎。所部郡邑。間亦有志。然闕者居多。明興垂百七十年。未有通一方而彙爲全書者。謂非曠典與。嘉靖壬辰。憲副四明陸舉之。

氏以視學至。嘗得前視學余子華氏所爲志稿十二卷。嘉其有志於斯。而嫌其屬草於門人。未及定正。不無踵陋承譌。小得大遺之病。欲身任之。顧其事重。未能卒就。維時侍御菑莊方公來。按茲土。首詢及之。曰可少是哉。中丞靜庵袁公。實當撫臨。深以菑莊公之言爲然。謀是用協。迺因陸子之請。而亟可之。檄陸子主其事。大參四明陳魯南氏贊之。於是定例以正義。分門以聚類。挈綱以統目。選屬吏之有文學。與諸生之秀拔者。分任編摩。校讐之職。博求郡邑。旁採稗官。攜撫藝文。蒐漁淪逸。會源委。咀菁華。覈根據。從體要。酌豐約。考同異。割疑似。務該暢。由是事極鴻纖。理通皦昧。世括今昔。倬然勒成一家之言。彬彬乎可讀矣。

蓋其論著發揮之旨。刪訂補竄之功。多出於陸子之手。舊稿之存。十不能一。開局於壬辰夏五月。訖事於癸巳春三月。歷四時而一方之書。於是大備。吁亦勤矣。夫自八索九邱之書亡。而禹貢職方。嗣之有述。周禮大司徒之職。掌建邦之土地之圖。與其人民之數。小史掌邦國之志。奠繫世。辨昭穆。方輿之紀。先王重之。故周志鄭書。傳記可稽。秦雖無道。圖籍猶存。漢氏以來。輿地圖經。代各有作。金元之變。人文漸燼。我明御寓。一統是志。其大司徒掌建之意。與維茲通志。其亦小史所掌之意。與嗟乎。方輿之紀。先王所以重之者。豈將侈文軌。資博洽爲哉。辨封域。則保又存。考沿革。則興廢著。察形勝。則鑿誠昭。審風俗。則汗隆繫。計

戶口則息耗明。驗方物則貢賦經。覽山川則封濬寓。秩祀典則功德報。定官制則職守修。采人物則勸懲行。綜藝文則述作備。本之所以廣學。推之所以立政。申之足以贊業。垂之足以示遠。謂可以無作也哉。讀是書者。當以此意求之。茲舉也。濟南守楊撫。高唐判張寅。預有勞焉。臨淄令王一槐。高唐學正王應槐。萊蕪教諭劉應祥。實分任之。方伯邵君思抑。楊君秉節。陳君原習。憲使屠君安卿。實贊成之。維聰以運事役於京。不獲與執筆。後歸而覩其成也。故受命而爲之序。賜進士及第。大中大夫。山東布政使司左參政。前右春坊右中允。經筵講官。固安楊維聰撰。

右見山東舊通志卷首又新通志卷末

縣人劉君伯峰錄示

固安文獻志卷十四

耆舊事彙

明

蘇中丞志泉

祀鄉賢

蘇學博爾和

蘇中丞曾孫

張太僕思誠

張太守承敘

祀鄉賢

陶長史光寵

張介穆公允濟

祀鄉賢

傅太常好禮

祀鄉賢

傅茂才商衡

傅太常子

楊副使應中

侯教諭思義

侯孝廉奉職

侯教諭子

祖刺史志伊

祀鄉賢

李同知天祥

祀鄉賢

李縣令鳳鳴

李同知長子

李貢生鳳池

李同知次子

李茂才允超

李縣令子

固安文獻志卷十四

天津徐世昌鑒定

縣人賈廷琳謹編

耆舊事彙

明

蘇中丞志皋

明崇禎固安秦志人物傳蘇志皋字德明通關廂人嘉靖十年

舉人

鄉試第
三名

十一年進士授湖廣瀏陽知縣調江西進賢知縣被

徵以催科不及額陞刑部主事

疑有
訛字

員外郎郎中直隸廬鳳兵

備僉事為建開壩事陞分守宣府右參議為捷音事陞陝西潼

關兵備副使以宣府督餉不及謫河州知州以督撫兩察院會

保。陞涇州兵備僉事。二十九年推陞雁門等關兵備副使。歷陝西左參政。山西按察使。左布政使。三十三年推陞都察院右僉都御史。巡撫遼東。兼贊理軍務。考滿陞右副都御史。累蒙賞賚。四十四年纂輯邑志。實志泉創始之力。崇祀鄉賢祠。

清孫奇逢畿輔人物考。蘇中丞公志泉。固安人以進士起家。官至中丞。宦跡所至有聲。固安人亟稱之。曾著益智錄數百卷。該博有實用。高陽孫文正欲覓之不得。後聞其書歸楊都尉家。子弟武城宰。手錄其兵機纂數卷。後爲人借觀。其人卒於官。遂令此書并失。豈鬼神忌其洩造化之祕。而故護惜之耶。楚人文安之驚歎以爲勝於文獻通考。當以此言存中丞耳。

清孫承澤畿輔人物志。方城有蘇中丞名志泉者。宦跡所至有聲。曾著益智錄數百卷。該博有實用。其後人不能守。歸之楊都尉家。楚人文安之於都尉家見之。驚歎以爲勝於文獻通考。兵火後惜不存。余欲爲著一傳。了不得其梗概。尙俟知中丞者。又畿輔人物志序。向年坐固安楊都尉齋。出其縣蘇中丞所著益智錄數百卷。錯綜宏博。爲有用之書。竝言其宦蹟卓然。至今書帙灰燼。姓名亦復惘然。諸如此者。不知凡幾矣。

明錢謙益列朝詩集小傳。蘇志泉。嘉靖十一年進士。知瀏陽。進賢二縣。遷刑部主事。歷郎中。出爲僉事副使。皆宣府。潼關。涇州。衝邊要地。二十九年虜警。會推雁門兵備。歷陞布政使。以右僉

都御史巡撫遼東。陞右副都御史。志泉才情富麗。沾沾自喜。好作長短句。有寒村集。

〔清朱彝尊明詩綜小傳〕蘇志泉。字德明。固安人。嘉靖壬辰進士。除瀏陽知縣。徙進賢。徵授刑部主事。歷郎中。出爲僉事。遷副使。陞布政使。以僉都御史撫遼東。進右副都御史。有寒村枹罕二集。錢受之云。中丞才情富麗。沾沾自喜。

〔湖南通志官績傳〕蘇志泉。順天固安人。知瀏陽縣。力行保甲法。清田賦。禁淫祀。公私稱便。

〔蘭州府志名宦傳〕蘇志泉。固安人。嘉靖二十六年知河州。雖由左遷。未嘗忘事。時方飢饉。盜賊蠡起。破格賑濟。多所全活。獲盜

則重法治之。地方賴以安謐。卒祀名宦祠。

〔清孫星衍邠州志官屬傳〕蘇志泉。字德明。順天府固安人。壬辰進士。歷任整飭潼關兵備副史。加俸秩二級。恩賜煖耳金幣一十一次。嘉靖二十八年由謫官陞按察司僉事。專敕在州住劄。〔河南通志職官表〕蘇志泉。固安進士。明嘉靖中任河南按察司僉事。

〔明國子監進士題名碑〕嘉靖十一年壬辰科。蘇志泉成第三甲第六十四名進士。

〔明世宗實錄〕嘉靖二十四年十二月壬寅。查盤給事中李文進御史趙炳然奏。宣大二鎮邊餉。侵折數多。乞治經營諸臣之罪。

得旨奪見任巡撫曾銑詹榮及參議蘇志皋等俸三月。

〔又〕二十五年春正月。兵部查議防秋効勞有功人員。上曰。昨歲宣大山西虜不致犯。邊境無事。各鎮總撫巡等官防禦有功。特加敘錄。巡按御史谷嶠陳豪。參議蘇志皋李磐等。各賚銀幣有差。

〔又〕是年三月。總督宣大侍郎翁萬達奏大同邊宜修者。謂臣請城西陽河。而本兵不以爲然。臣惟修邊爲守邊也。不可守則不必修矣。新平堡北故有牆十里。今參議蘇志皋所築。在山巔。不可汲。是以臣欲改築于麓。爲易守。故且徑而省也。上如議。

〔又〕是年十一月。代府和川王府奉國將軍充灼等謀反。既伏誅。兵部請錄敘諸邊臣功。言參議李磐蘇志皋。僉事江南蒲澤。大同知府陳燿。通判于慧等。皆佐謀宣力。功之次也。

〔又〕是年十二月。宣府糧儲郎中丘珉奏。原任參議劉珂。郎中劉棟。出納不明。請下巡撫御史驗問。時巡按御史黃如桂亦追論棟等罪狀。因劾接管郎中褚寶。參議蘇志皋。不能改正宿弊。皆當究治。詔下巡按御史逮問。既而如桂勘報寶志皋不能防姦。釐弊亦宜量罰。上降寶志皋三級。調邊方用。

〔又〕二十八年六月辛丑。宣府修築松樹君子二堡成。巡按直隸御史王楠。勘上諸臣効勞功次。兵部覆奏。詔賜原任參議蘇志皋僉事程綬各銀十兩。紵絲一表裏。

又三十三年三月己酉。陞山西右布政使蘇志皋爲都察院右僉都御史。巡撫遼東。

又三十四年冬十月。山東巡按御史陳瓚言。虜騎深入遼東。而本鎮之兵。以督臣王忬徵調太多。單弱滋甚。總兵殷尙質。及巡撫蘇志皋。各假入援。分屯自保。遂使賊得乘間長驅。焚掠屠割。請罪尙質。而罷志皋。更詰忬。已忬與志皋等疏至。則歷敘各官斬獲之功。請褒錄。俱下兵部。覆言。忬調兵以衛內。原非可罪。尙質等屢陳兵寡。亦有可原。况有斬獲功。似亦可錄。第奏報互異。請下按臣勘奏。上從之。令尙質志皋姑策勵供職。以圖後效。

又三十五年十一月戊午。北虜打來孫等率衆十餘萬騎。深入遼東廣寧等處。總兵官殷尙質率遊擊閻懋官等禦之。虜衆不敵。尙質等死之。亡其卒千餘人。總督薊遼右都御史王忬以聞。且自劾調度無策。并論巡撫蘇志皋輕率寡謀之罪。兵部覆奏。志皋降俸二級。令策勵供職。忬奪俸三月。

又三十六年夏四月辛亥。陞巡撫遼東右僉都御史蘇志皋爲右副都御史。巡撫如故。以三年考滿。用優處邊臣例也。

又三十七年春正月庚辰。遼東守臣類奏。三十六年十月以後。官軍禦虜于饜陽等處。功次共斬首一百七十二級。上從議。廢總督王忬。及巡撫蘇志皋各一子爲國子生。

又是年三月乙亥。黜巡撫遼東都御史蘇志皋爲民。以去年虜

入遼陽廣寧。志皋不發兵救援。而妄報首功。剋減軍餉。爲給事中張益所劾也。

廷琳按我縣蘇中丞。蒞官所至。皆建樹勛績。賢名徧於士大夫。今竟爲給事中張益糾參去職。蓋是時姦相嚴嵩當國。以愛憎爲黜陟。後一年與中丞同事之王總督忬。且以忬權臣意。竟罹法網。則中丞之早日去職。優游林下。從容著書。身名完泰者。猶爲幸事也。

固安縣志封贈表蘇子良。以子志皋貴。贈朝議大夫山西布政使司右參議。妻宋氏封恭人。

又恩廕表蘇大生。志皋子。以父官廕光祿寺典簿。

蘇中丞遺著

今存碑記二首 序一首 詩九首

重修固安縣廟學記

右見縣志藝文另載本編金石文存卷

重修尊經閣記

右見崇禎固安秦志另載本編金石文存卷

嘉靖固安縣志自序

右見縣志卷首另載本編藝文敘錄卷

早朝奉天殿接詔

禁漏沈沈曉色遲。迴廊華月隱參差。玉階直接承明殿。銀漢遙通太液池。咫尺雲函頒聖詔。逶迤宮扇肅朝儀。微臣亦見天顏

喜未必長教近侍知。

右見朱彝尊明詩綜

雪夜襲虜

朔風利似刀。朔雪密如織。四山號虎兕。萬卒無生色。號令等風霆。直擣龍沙北。夜半縛呼韓。天明傳蓐食。

盱眙山館

山館雨初歇。村園菜正肥。摘花引寒蝶。冉冉過籬飛。

送楊虛樓還任饒陽

澹煙疏雨禁城秋。彰義門前古渡頭。欲把相思付流水。蘆溝日夜總悠悠。

初夏寄題隆興寺禪房

蒲萄引蔓棗開花。臺殿參差日影斜。一客不來雙燕語。老僧閒欲曬袈裟。

右詩四首見錢謙益列朝詩集

晚宿皈依寺

嘉靖己丑

風雨催行旆。郊墟徑路斜。林疏凝暮藹。天遠度歸鴉。入寺塵心息。逢僧梵語賒。夜深獨不寐。秉燭看曇華。

道經福嚴寺

嘉靖乙未

古寺關河近。荒城水國分。長風起天際。吹亂石梁雲。

獨遊長真觀

嘉靖乙未春

逢人便問長真觀。觀裏神仙定有無。聞道青牛過關去。松杉長護煉丹爐。

和唐胡曾黃金臺詩

欲覓燕臺已杳然。悠悠今古弔英賢。千金駿市歸何處。尚有餘

靈映碧天。

唐胡曾黃金臺詩云。北乘羸馬到燕然。此地何人復禮賢。欲問昭王無處所。黃金臺上草連天。

右詩四首見崇禎固安秦志

蘇學博爾和

固安秦志貞烈傳蘇爾和。字宇泰。廩生。副都御史志泉曾孫。素行孝友。賦性溫良。年十七入泮。九科不第。遂留意後學。募百餘金。重修尊經閣。崇禎二年清兵破固安城。不屈被害。年五十五。

張太僕思誠

固安縣志選舉表張思誠。字子修。西湖里人。嘉靖十六年舉人。十七年進士。任直隸吳縣知縣。擢南京刑科給事中。歷陞江西右參議。山西副使。行太僕寺卿。

江西通志職官表張思誠。字子修。順天固安籍。陝西吳縣人。嘉

靖壬辰當作戊戌進士。二十七年任江西副使。

明國子監進士題名碑嘉靖十七年戊戌科。張思誠成第三甲

第一百五名進士。

明世宗實錄嘉靖二十四年十二月甲寅。選授知縣張思誠等五人俱為給事中。思誠南京刑科。

又二十五年九月壬申。都察院覆南京刑科給事中張思誠條奏。臣等竊見在外問刑衙門。罔知明允。競爲深刻。如殺人驗傷互異。輒擬抵死。盜賊未明。竟坐強劫。被誣淹禁。不曰官不早決也。一斃於獄。則歸咎原告。比以誣告致死之條。積年攬役。不曰官相容隱也。一觸其怒。則搜剔隱過。按以久□衙門之律。擒捕私鹽者。未出行鹽地方。而概引越境。查盤倉糧者。不論多年。滯爛。而概引侵欺。上沽明察之譽。下懷觀望之心。妄相比附。逆氣充庭。誠有如思誠所言者。乞敕撫按官。今後司府州縣推獄。務合律例。毋得任情故入。久禁無辜。犯者逮問不宥。上曰。朝廷重惜民命。屢下詔旨。所司乃用法任情。動致冤濫。給事中所言。必

有指據。該院即行撫按。嚴加按覈。并會同吏部訪察。殘忍者俟大計時黜落。

又二十六年三月丁卯。南京給事中張思誠等。御史陳松等。劾奏巡按四川都御史張時徹。都察院副都御史今丁憂。端廷赦。各貪肆有跡。冒濫京堂。宜罷。章下吏部。以二臣事涉贓私。宜令各回籍聽勘。從之。

又是年八月甲辰。南京給事中張思誠。御史宋治。各論劾太子少保兵部尙書陳經庸。鄙不職。太子太保南京兵部尙書胡訓。衰老多病。俱宜罷免。經訓因自陳求退。得旨令致仕。經給驛歸。又是年九月丙戌。南京刑科給事中張思誠。劾奏新陞江淮巡

捕總兵官周于德。素行貪鄙。難勝重任。詔革任閑住。

固安縣志封贈表張永。以子思誠貴。贈朝議大夫江西布政使司右參議。妻辛氏贈恭人。

張太守承敘

固安秦志人物傳張承敘。字懷德。通關廂人。張禎曾孫。嘉靖十九年舉人。二十三年進士。授行人。歷任工部主事員外郎郎中。改調山東兗州府通判。歷陞直隸松江府同知。江西臨江知府。嘉靖三十八年為病乞休。吏部覆稱年力尚強。官守克優。暫准致仕。後病痊之日。有司具奏起用。給劄回籍。崇祀鄉賢祠。

明國子監進士題名碑嘉靖二十三年甲辰科張承敘成第三

甲第四十八名進士。

固安縣志封贈表張材任大使。以子承敘貴。贈承德郎工部虞衡司主事。妻侯氏封安人。

陶長史光寵

固安縣志選舉表陶光寵。明嘉靖三十七年舉人。陝西隆德知縣。陞山東兗州府通判。太原府忻州知州。晉府左長史。加正四品服俸。

畿輔通志列傳引山西通志陶光寵。固安人。萬歷初知忻州。寬和勤慎。其清丈田畝甚均。民德之。遷晉府長史。忻州士民時省問之。

張介穆公允濟

固安秦志人物傳張允濟字愛甫通關廂人海州吏目佳運子。嘉靖三十四年舉人。四十一年進士。授戶部主事。陞郎中。督理大同邊儲。降荆門州同知。轉兩淮運司判官。陞絳州知州。補鄭州知州。陞南京戶部員外郎。工部郎中。淮安府知府。山東布政司參政。浙江按察司按察使。右布政。陝西左布政。山東巡撫。都察院右僉都御史。四被恩綸。封中憲大夫。崇祀鄉賢祠。諡介穆。明國子監進士題名碑嘉靖四十一年壬戌科。張允濟成第二甲第四十三名進士。

河南通志職官表張允濟固安進士。萬歷元年任鄭州知州。

山東通志職官表張允濟直隸固安進士。任山東臨清關督鈔分司。

明神宗實錄萬曆十三年秋七月。淮安府知府張允濟陞服俸一級。與尙書楊兆王遴等各賞銀幣有差。

又十七年秋七月。陞山東右參政管淮安府事張允濟爲浙江按察使。整飭淮揚海防。

又十八年六月甲午。督理荒政給事中楊文舉。以賑荒事竣。薦舉効勞官員。命海防道等官張允濟等紀錄。

又十九年冬十月。時揚州風雨連日。湖淮漲溢。總理河道潘季馴上其事。工科都給事中楊其休。劾管河通判劉汝大州判張

九思等故違節制。海防道張允濟查覈疏虞。總理潘季馴俱宜同坐。部覆海防通判州判等官俱應議罰。潘季馴既屢次催督。宜速行道府。上緊備築。以勵後效。得旨。劉汝大等各罰俸三箇月。張允濟姑免究。冬十二月辛丑。以浙江按察使張允濟陞

陝西右布政使。

按此條陝西二字似衍蓋仍陞浙江右布政使明年始改調也

〔又〕二十二年冬十月庚申。以原任浙江右布政使張允濟調陝西。二十三年夏四月己未。陞山東右布政使張允濟爲山東巡撫。右僉都御史。

〔又〕二十四年五月。山東巡撫張允濟題留標兵三千。免其征調。照舊本處防海。章下兵部。九月。山東巡撫張允濟乞留班軍

准暫留防守。是月。山東巡撫張允濟奏。既欲防礦。並欲防倭。內指言陳增未下。吏科給事中戴士衡復疏內監招權。漸不可長。不報。是月壬子。山東巡撫張允濟巡按王立賢各陳地方艱苦之狀。乞罷開採。俱嚴旨切責。不允所奏。

〔又〕二十五年三月。山東巡撫張允濟奏各礦地方。但係上中。照舊開採。但係下等。即行停止。不報。是月。吏科給事中戴士衡疏請查覈沿邊吏不諳邊務者。部覆報可。于是調山東巡撫張允濟於腹地用。

〔明〕陳建皇明從信錄。萬歷四十五年正月。禮部遵五年議謚例。疏請應得謚諸臣。張允濟等共四十四人。彙請候旨。敕下翰林

院撰擬謚號

張介穆公遺著

今存奏議一首 碑記一首

條議防海事宜疏

一重將權以便統馭。一添兵將以備萊海。一復舊營以周控制。即墨西流社營增募官兵。復設守備一員。統練策應。一分防守以扼要地。一留班軍以壯聲勢。一討民折以供新餉。一并兵力以守險寨。青州塘頭寨西接天津。中有大海口。洱河等處。最為要害。原設官軍單弱可虞。議調樂安壽光二縣鄉兵各二百。共原軍五百名。合操防守。一復衛所以固藩籬。部議山東原無路將。不必添設大帥。即將副總兵管登萊青備倭參將事。萊州亦

不必添設遊擊。增募各兵。仍聽副總兵訓練。班軍戍邊以借留。餘皆如議報可。萬曆二十五年七月

右見明神宗實錄

重修固安縣學宮碑記

右見縣志藝文另載本編金石文存卷

傅太常好禮

明史傅好禮本傳。傅好禮字伯恭。固安人。萬曆二年進士。知涇

縣。按傅氏墓碑涇下俱有陽字治最入為御史。嘗陳時政。請節游宴。停內操。罷

外戚世封。止山林行幸。又上崇實杜漸諸疏。語皆剴直。巡按浙江。歲大祲。條上荒政。行部湖州。用便宜發漕折銀萬兩。易粟振

饑民。改按山東。泰安州同知張壽朋當貶秩。文選郎謝廷案用
 為永平推官。謂州同知六品。而推官七品也。好禮馳疏劾其非
 制。廷案坐停俸。壽朋改調。好禮尋謝病歸。召進光祿少卿。改太
 常。時稅使四出。海內騷然。二十六年冬。奸民張禮等偽為官吏。
 羣小百十人。分據近京要地。稅民間雜物。弗予捶至死。好禮亟
 論其害。因言自朝鮮用兵。當從清陳鶴明紀作幾民富者貧。貧者死。思亂
 已久。奈何又虐征。按明紀征下有之字國家縱貧。亦不當頭會箕歛。括細民
 續命之脂膏。况奸徒所得千萬。輸朝廷者什一耳。陛下何利為
 之。奏入。四日未報。復具疏請。帝大怒。傳旨鑄三級。出之外。大理
 卿吳定疏救。帝益怒。謫好禮大同廣昌典史。定鑄三級。調邊方。

言官復交章論救。斥定為民。既而帝思好禮言。下其疏。命廠衛
 嚴緝。逮禮等二十八人。詔獄。其害乃除。好禮之官未幾請急歸。
 家居十五年卒。天啟中贈太常卿。

固安秦志人物傳。傳好禮。字伯恭。馬慶里人。萬曆元年舉人。二
 年進士。陝西涇陽知縣。擢雲南山東諸道御史。請節游宴。停內
 操。裁戚畹。語皆切直。巡按浙江。歲大祲。動帑銀二萬兩。留漕精
 二萬石賑之。自陳擅發罪。上特宥之。遷光祿寺少卿。再遷翰林
 院提督四夷館。陞太常寺少卿。時權使四出。海內騷動。好禮抗
 疏言假官抽稅之害。四日不報。復具疏跪闕。下三日。神宗震怒。
 降廣昌典史。卒於官。此句誤既而上思好禮言。下其疏。誅姦民張

禮等二十八人。害乃除。天啟中贈太常寺卿。崇祀鄉賢祠。

清孫承澤畿輔人物志傳好禮。號約齋。固安縣人。萬歷二年進士。授涇縣知縣。以治行徵授雲南道御史。因事納忠。建白六事。曰君臣之情當通。曰奸欺之罪當誅。曰外戚之爵當停。曰內操之兵當罷。曰山陵之行當止。曰後宮之宴當節。不避齒馬投鼠之嫌。如尙實杜漸諸疏。曰勤講學。曰修實政。曰禁興作。曰復常朝。曰賤貨物。曰戒輕出。至請誅怙寵之中官。裁跋扈之戚畹。尤人所不敢言。奉命按浙。值大祲。動帑銀二萬。留糴糶萬石賑之。先發後聞。曰俟命至而發。民已溝壑矣。未幾陞僕少。丁內艱。起補四夷館太常少卿。時權使四出。海內騷動。遂抗疏言假官抽

稅之害。不報。更補牘跪闕下者三日。左右持之不起。神宗震怒。降廣昌縣典史。大小諸臣。交章伸救。皆斥降有差。上書其名於屏。示不復用。而中官又切恨之。遂家居十五年。屢起中格。巡按爲請卹典。吏部爲請謚廕。得贈太常寺卿。

清孫奇逢畿輔人物考傳太常公好禮。丁內艱。起補四夷館太常少卿。時權使四出。海內騷動。遂抗疏言都門咫尺。假官充斥。黃旗紛立。威劫勢奪。歲入內帑幾何。而數千百萬。盡入虎囊狼橐矣。疏上不報。於是跪闕三日。觸上震怒。羣璫又從旁陷之。禍幾不測。竟降廣昌典史。仍書其名於御屏。公歸田。布衣蔬食。蕭然若田叟。家亦清素。好急人危難。不近女謁三十年。精神矍鑠。

七裘之九。尚與相知者手談。徹夜不倦。飲少醺。輒吟堯夫安樂歌。武穆滿江紅以見意云。天啟朝總憲鄒元標等題覆。贈太常寺少卿。歲寒老人曰。吾邑去固安百里。童時即聞公名。繼而與固安人交。無不亟稱者。及欲往晤而公往矣。不能不恨觀面而失之。

明神宗實錄萬曆十四年夏四月甲戌。除補原任山東道御史傅好禮為監察御史。仍原道。

又十五年秋七月。浙江巡撫溫純。巡按傅好禮會題。嘉湖二府白糧船一百二十五隻。各關徵收鈔稅。及臨清帶磚。按明代各工所用城磚。每

年在臨清燒造一百萬箇。由糧船帶運。費銀約一千八百餘兩。議照漕糧事例免徵。戶

部覆奏。自萬曆十六年為始。嘉湖白糧船到關。躬親查驗。果所帶土宜止四十石。照原題免稅放行。如數外夾帶私貨。照漕船私貨事例。以一半入官。仍治其罪。其過稅銀。嘉興府於夫車官銀減徵湖州府於糧戶各免出辦。至於帶磚一節。壽宮用磚方急。相應照舊。待落成之日。每船量減四十塊。以二百塊著為定例。報可。

又十六年二月庚辰。巡按浙江御史傅好禮。劾副使吳遵晦。左布政使陶幼學。苑馬寺少卿戴鳳翔。招納投獻。蔑法欺公。事跡彰著。乞提問如法。詔許之。

又浙江巡按傅好禮。及巡撫溫純。俱以綜核吏治為任。而義烏

令熊秋芳在會薦疏中。純既遷。秋芳以變節敗。好禮自劾引罪。時純以戶部左侍郎。上疏與好禮分過。并乞連坐。有旨溫純照舊供職。以後有司初任修飾取名。薦後改節者。撫按官從公論劾。准簡舉例免究。不許畏避異同。故行庇護。六月湖州饑。巡按御史傅好禮動支漕折銀一萬兩賑濟。先發後奏。部覆免議。責令如數抵解。仍申敕擅動之罰。

又十九年十二月己酉。禮科給事中胡汝寧劾文選司郎中王教。力足以驅鷹犬。權足以壓堂官。如張一元。陳應芳。紛爭并謫調外。公論是應芳而非一元。乃一元陞光祿寺少卿。而應芳只陞僉事。蓋緣一元與教同鄉同年。使今日有如御史傅好禮之劾。謝廷竊則安能一日居朝廷之上乎。

又二十一年八月。陞孫鑛刑部左侍郎。傅好禮太僕寺少卿。

又二十六年冬十二月丁巳。太常寺少卿傅好禮降三級調外。再降雜職。大理寺卿吳定降三級調邊方。再罷爲民。好禮疏論近郊之內。假官抽稅。虐民辱國。有旨降調。定具疏救。并謫邊方。尋以科道連章論救。再罷定爲民。後復下好禮疏。著廠衛嚴拿假官張禮等二十八人。付鎮撫司考訊。

清谷應泰明史紀事本末。萬曆二十六年八月。太常寺少卿傅好禮言近郊假官抽稅。不報。越三日。好禮伏文華門求面對。上怒。降廣昌典史。大理寺卿吳定疏救削籍。而假官二十八人下

鎮撫司。

傅太常遺著

今存奏疏一首又略見前三四首
碑記四首可考者一首

乞罷斤同知張壽朋並究處郎中謝廷竊疏

接邸報原任泰安州同知張壽朋降永平府推官。臣不勝駭異。州同推官品級雖不同。然推官委任職掌。所關甚重。州同何敢較低昂也。壽朋原係部官。京察浮躁降外。又與本管喬同知彼此互毆。裂冠碎衣。其被降之由若此。該部當有以辨之。敢以名器私非人。視譚柱調黃州。喻均陞副使。殆有甚焉。乞將壽朋罷斥。並該司郎中謝廷竊究處。以儆將來。庶大小臣工有所懲勸矣。
萬曆十七年七月

右見明神宗實錄

重修知子營真武廟碑記

重建知子營藥王廟碑記

固安縣新置學田碑記

右碑三首均見縣志藝文另載本編金石文存卷

新建藥王廟碑記

右碑在固安北關另載本編金石文存卷

永清縣高七村興隆寺碑

右見畿輔通志文缺待訪

王蔡岩公異政錄引

夫上世爲民牧者。政不聞有所謂異也。茲異政錄之王公何耶。以公獨能白久冤之獄也。獄冤已久。公胡能白。術勝之也。辯冤而術可爲常法乎。曰此公不得已之心也。大凡獄貴慎初情。初情不慎而晦焉。乃文網無辜。陷之重辟。彼幸而脫焉者。歷時益久。計畫益深。參對不情之辭。布置安排。其利如鋸。訊之不得。刑之不勝。非出其不意。而鉤致其隱微。將何以令彼幸而脫焉者之伏其辜耶。此公不得已而用術也。允若茲。稱一訊立辯如濂溪。公可幾及矣。茲誠所謂異政也。奈何錄之。錄之者。非徒表見王公。其慮遠矣。書曰。與其殺不辜。寧失不經。古之治獄。求所以生之者。蓋如此。今之治獄者。類求所以死之矣。宜乎視人命若

草菅。而鞫冤大獄。漫不經心。海內誣陷蓋不少也。治獄者得是錄而存之。則旣死而生。寧復有誣陷者耶。故曰非徒表見王公。其慮遠矣。或曰。藉使不短蒿枝爲之奈何。吁。蒿枝乃筌蹄之設耳。王公固已有成算矣。世之治獄如王公者。可少乎哉。

右見保定縣志

附錄

〔明〕封贈涇陽縣知縣傅好禮父永昌爲文林郎文。敕曰。朕嘉人臣敬事之勞。則體念其顯親之志。故課績疏庸。緣子及父。所以廣孝而作忠也。爾原任湖廣黃州府廣濟縣廣濟驛驛丞傅永昌。乃陝西西安府涇陽縣知縣好禮之父。朴茂無華。

善良成性。服官有恪。種德惟深。爾子鬯譽名封。本爾之貽穀也。是用贈爾爲文林郎如子官。明命渙頒。幽原永耀。

〔明封贈涇陽知縣傅好禮母馮氏爲太孺人文〕敕曰。夫王事靡盬。不遑將母。人子之念。亦孔殷矣。國家逮下以仁。可無以遂其私願耶。爾馮氏乃陝西西安府涇陽縣知縣傅好禮之母。訓恪矜摯。饋嚴蘋藻。相夫以正。玉子于成。宜錫榮名。以旌賢淑。茲用封爾爲太孺人。祇承綸綍之華。益篤庭幃之慶。萬曆七年五月二十三日。

〔明晉封山東道監察御史傅好禮父永昌爲監察御史文〕敕曰。國家□鯁之臣。多本燕詒之善。蓋教忠有素。則移孝攸資。

推崇豈非義哉。爾原任湖廣黃州府廣濟縣廣濟驛驛丞贈文林郎陝西西安府涇陽縣知縣傅永昌。乃山東道監察御史好禮之父。簪纓世閥。詩禮名流。身雖絀於下僚。道實高乎末俗。有子昌緒。光子憲臺。滌訓嚴庭。馳榮寵命。是用加贈爾爲文林郎山東道監察御史。更舊秩以清華。服新恩於冥漠。〔明重封山東道監察御史傅好禮母馮氏爲太孺人文〕敕曰。士登膺仕而著大猷。寧詎父教力哉。母慈是並育矣。故勲恩當並逮之。爾封太孺人馮氏。乃山東道監察御史傅好禮之母。德秉肅雍。心存慈善。克相夫子。誕啟嗣賢。夙勤熊膽之規。竟振豸冠之譽。是用仍封爾爲太孺人。承顯渥以方隆。介遐

齡而益茂。萬曆十一年七月初九日。

右碑在知子營傅氏祖墓
縣人王九德訪錄

傅茂才商衡

固安秦志貞烈傳。傅商衡。字伯含。號平吾。太常寺卿。好禮子。慷慨居心。堅貞作骨。孝友稱於閭里。慈愛著於家庭。曾舉優行。崇禎二年。清兵破固安城。同子生員國樞。國梁。儒士國楠。俱死節。

楊副使應中

固安縣志選舉表。楊應中。宗沛子。明隆慶四年舉人。萬曆十一年進士。任山西高平知縣。歷陞戶部主事。員外郎。郎中。山西冀南道兵備副使。

明國子監進士題名碑。萬曆十一年癸未科。楊應中成第三甲。

第一百四十五名進士。

明神宗實錄。萬曆二十五年五月。簡戶部郎中楊應中為山西副使。

固安縣志封贈表。楊宗沛。以子應中貴。封中憲大夫。山西高平縣知縣。妻劉氏。贈孺人。

楊副使遺著 今存碑記一首

重修郭村弘仁寺碑記

右見縣志藝文另載本編金石文存卷

侯教諭思義

固安縣志選舉表。侯思義。萬曆年間貢生。任寧津。涿水縣訓導。

陞興濟縣教諭。

明李沾廣文侯公廉溪家傳沾與固安侯君石臣為天啟七年丁卯科同門。崇禎四年秋。余以補選寓長安。石臣過而問焉。一日出一帙涕欬向予曰。此先子生平譜也。倘蒙不棄而賜一言。感且不朽。余以世講誼弗忍辭。按狀公名思義。字介甫。號廉溪。固安西辛里人。四世祖端。以明經貳蕭縣五載。自辦千金以供任中薪水。不忍敲朴一民。民有侯佛之稱。後坐事罷歸。世有隱德。端生茂。茂生武。武生應舉。公父也。及公生聰慧異常。七歲入塾。所讀書過目不忘。十五應儒童試。馮仰琴按當即馮公子履明府大奇之。十九補縣學生員。彼時與兄鄭溪公溱。聯牀風雨。互相摩

勵。學使者歲試擢優等。明年為神廟。萬曆四年。鄭溪公領鄉荐。公亦以高等食廩餼。自是發憤益力。嘗閉門塞牖。飲且食亦手一編。吾伊之聲。不以寒暑閒。且素性仁厚。處宗族鄉黨。率以孝弟和睦為先。里豪王某者。數侮公。公弗校。後豪為公族以理質於官。勢危甚。公毅然排解之。得免於刑。王某感愧曰。我小人也。久在君子包容中矣。敢不啣結圖報。社友有妻亡不能具葬者。公捐廩一季助之。隣居陶氏母死無棺。公出粟代為易木。其他善行類如此。公屢躡場屋。同社有郭建牙何副郎辛司李諸公。謂郭公光復何公其智辛公調鼎也作孝廉時。每每同事鉛槧。無不以乘風破浪期公者。乃請公聯翩飛去。而公猶焚膏繼晷。咄咄以誦讀自雄也。二

十五年丁太公艱。哀毀骨立。益以顯親地下自矢。不幸連不得志。遂以明經謁選。四十年得分鐸寧津。履任後躬率諸生。步趨繩尺。嘗代權縣尹兩月。除印庫管鑰文移外。一切詞訟。悉委之捕廳。比謝事。即挈數十英才。結社課文。以期無負職守。旋丁內艱。歸門以外事。毫不與聞。嘗作庭訓以誡石臣曰。吾家祖父以來。不事生產。惟窗頭數卷書。便是弓冶箕裘。吾生平數困於有司之試。青雲之事。留與汝曹補之。四十四年補選涑水。值地方凋敝。人文否薄。公雖處冷宦。怡然自得。斥責豪生郭某之訟。許其師蔑棄禮法者。庠序肅然。嚴督石臣以學。由是聲譽蔚起。受知於邑宰洛陽許公。四十七年擢興濟諭方。束裝就道。遽以微

疾卒。是年十月二十八日也。歿之日囊無一金。賴許公捐俸。釀金以經紀其喪。由是得歸葬於邑之西原。嗟哉公也。一生困鬱。老就青氈。戚友輩咸悼公之豐於德而嗇於遇。以爲天道若弗可知者。豈意六七年後。石臣一躍而捷秋闈。聲稱藉甚。行且玉堂虛席矣。其所以揚公之潛德。而償公之夙願者。又寧有旣耶。先是公居涑水時。窘迫甚。一日目石臣文藝欣然曰。有子而才。何憂貧爲。今取其言觀之。若操左券。公亦可含笑地下矣。子二長。即石臣。次爲石卿。亦矯矯以文章自命。崇禎二年之變。在縣城殉難。沾與石臣以同年至厚。不敢以虛語炫飾。謹按生平行狀而爲之傳。亦家人父子之情話云爾。華亭李沾拜撰。

廷琳按右傳見崇禎固安秦志。惟篇過冗長。且語多俗濫。可厭。故康熙鄭志從刪。而舊志於鄉賢傳誌之文。登載者僅此一首。故錄之。而僭為刪節如右。又按李沾。以附馬士英。由太常少卿超擢左都御史。見御批通鑑輯覽。

侯孝廉奉職

固安縣志選舉表。侯奉職。字石臣。興濟縣教諭。思義子。天啟七年舉人。曾修補縣志。

明鹿善繼四書說約。門人侯奉職。字石臣。賈三槐。字正卿。楊光契。字惺民。楊光稷。字立民。均固安縣人。

廷琳按侯孝廉受業鹿忠節之門。文學優裕。見推當時。迄

今歲久。其言行無可詳考。姑列此二條。以俟知者補焉。

侯孝廉遺著

今存碑記二首 詩十首

固安縣黃侯築城記

右見崇禎固安秦志藝文另載本編金石文存卷

重建大辛莊關帝廟碑記

右見康熙固安鄭志藝文另載本編金石文存卷

固安十景時

序曰。十景依邑侯秦公限韻而作也。兩地各自擷管。遂有偶合大方之處。然亦不必重改。正以志意氣之同耳。

每從弔古想凌煙。極目高臺欲輾然。價重席珍誇郭隗。情深折節羨昭燕。捷蹄不共風霜沒。駿骨嘗隨草木芊。幾度揮毫題勝事。停杯夜坐燭花偏。
金臺市駿

盈盈一窟起鼉更。水國遙分星日明。琇砌層苔侵漢碧。雕欄倒影入波清。紋成龍綵搖光氣。浪捲淵泉動錦城。佇俟一聲平地起。翻飛何處不恢宏。

玉井飛龍

淳泓兩貯碧瀾清。湖底誰將皓魄擎。雙映銀河蟾影闊。平分夜景玉波瑩。東西一色搖芳樹。上下三輪漾錦萍。漫道廣寒霄漢裏。臨流酌得月華明。

雙湖印月

巍巍一閣映遙空。幾度登臨迥不同。手挽雲霞瞻望裏。身依霄漢笑談中。窗開紫氣祥煙渺。路接青虹瑞色叢。聞說蟾宮多勝地。此迴管取把源窮。

奎閣連虹

梧桐一葉報新秋。素派涓涓帶遠流。白練依回穿翠柳。晴波蕩漾點沙鷗。晚霞落照煙光集。曉日籠葱曙色收。自是村郊饒秀麗。白雲芳草共悠悠。

玉帶環流

何年地脈湧孤城。冽冽寒光映壁清。派接仙源松可煮。靈涵法水石堪烹。濯來天上星河現。飲去人間痼疾輕。每向醉餘乘興過。偶沾一勺解狂醒。

醴泉清冷

曙色曛曛燦日華。河濱映曉絳如紗。檣帆朝涉垂虹影。鷗鷺晨飛帶紫霞。每見遊人催鼓角。時瞻光怪弄鬚牙。臨流一望歡無極。欲詠新詩愧筆花。

清浦曉霞

野渡灘頭隴畔荒。雙雙舟子共鳴榔。蒼煙落漠連青草。衰柳淒迷帶夕陽。未覩田翁服耒耜。每聞漁父唱滄浪。滔滔不盡東流

急。今古同遊一釣航。桑乾古渡

芹藻池邊渙蚤春。開來靈竅接天垠。一泓學海盈堪放。半壁文江散得新。歎逝不妨徐問水。觀瀾須要早知津。宮牆自此通雲漢。育得魚龍跳泗濱。壁水活泉

孤村雨霽敞高臺。有客登臨弔古來。翠色籠葱依碧落。晴光掩映近蓬萊。騷人百斗情何極。壯士千秋志未灰。試問當年誰肯構。幾回清夢想奇才。崔臺晴眺

廷琳按各方志中。無不有八景詩。俗濫可厭。有識者每從刪汰。侯孝廉此詩。句法亦未能免俗。然鄉先正遺著。幸得流傳至今者。只有此數。去之亦覺可惜。所謂與其過而去

之。毋寧過而存之也。

祖刺史志伊

固安鄭志人物傳祖志伊。字起莘。通關廂人。萬曆十六年舉人。歷任山東濱州知州。四川茂州知州。崇祀鄉賢祠。舊志云。治軼文翁。名高靖節。惇倫孝友。孚子騫內外之稱。錫類解推。有仲淹橋梓之德。蓋當時請祀鄉賢呈中語。

又選舉表祖思智。以子志伊貴。封贈陝西鞏昌州通判。妻鄭氏封安人。

李同知天祥

固安秦志人物傳李天祥。字吉甫。南房里人。萬曆十六年舉人。

歷任山西山陰縣知縣。山東利津縣知縣。浙江杭州府同知。生茂宦蹟。死協鄉評。崇祀鄉賢祠。

附錄

〔浙江杭州府同知李公入祀鄉賢紀略〕順天府固安縣儒學廩增附生員祖思奇等呈。爲公舉應祀鄉賢。以從人望。以勵世風事。照得宮牆舊祀。惟考德以薦名賢。學校新評。敢徇資而拘顯晦。本縣已故鄉宦浙江杭州府同知李天祥。名留綰綬。雖非陟要登樞。論定蓋棺。允足服今傳後。論孝友則繼母弱弟。汶上原無閒言。論慈愛則一株五枝。燕山剩有庭訓。荒年賑急。惠沾幾井晨煙。除歲周貧。喜溢千門春色。宋朝殿闔

家瘟疫。金錢喪具全資。楊家惠歲遠莊田。文券息銀并返。新城邂逅。應憐老嫗之悲。旅邸慈祥。遂免鬻兒之苦。官銀完而加額。私家聚以祝天。此其生平大槩。表表在人者。闔學僉議。看得本官學術正大。行誼端方。家庭人道斯全。閭里物情共仰。誠先哲之流亞。而鉅典之應加者也。呈乞轉申上司。將本官崇祀鄉賢。式成昭報之公。用闡幽潛之德。等情具呈。本縣看得崇祀鄉賢。國家重典。必居官澤及於民。處家道行於身。輿論公評。衆咸推戴。乃可崇俎豆而列宮牆。隨具故牒。轉行儒學結查去後。續據闔縣鄉宦祖志伊等結。查得已故同知李天祥。歿歷三郡。始終清廉。奉養二親。竭力盡孝。處鄉仁厚。

咸稱其賢。閉門課子。罕見其面。筮仕雲中。則開荒賑恤。至今口碑足紀。繼仕齊杭。則吏畏民懷。於茲德政堪述。凡我士庶。慕義者無窮。頌法者罔閒。推重鄉評。實協輿論。可當祭祀之選。用增俎豆之輝。又據闔學生員祖思奇等結。查得已故同知李天祥。立心忠厚。制行端方。報本敦倫。中外稱其孝友。賑窮恤孤。閭里誦其仁慈。既無忝於生平。自可膺乎曠典。今奉再查。委應入祀鄉賢。並無違碍情弊。各具結。本學覆查相同。勘得同知李天祥。不知其治視其家。仁厚孚於鄉里。欲知其父視其子。孝友溢乎家庭。既據公評。宜推與祀。取具鄉宦師生結狀。見在等因。具由牒呈。本縣恐有不的。仍行鄉保里鄰

結查去後。續據南房村鄉保邵永春等結稱。查得同知李天祥。立心同青天白日。制行擬美玉精金。仁孝充滿梓里。德政克著朝端。吹孤嘯寡。疲癯爲之起舞。鋤強抑暴。孤兔盡爾潛蹤。生平姱節。未易殫述。沒後精神。宜崇曠典。又據趙家里里長尙希閔等結。查得同知李天祥。人品正大。操履端方。善始令終。閭里毫無訾議。出身加民。居官綽有賢聲。懿範允著於生前。優崇宜膺於身後。又據鄰佑李應登等結。查得同知李天祥。百行凜凜。一真恂恂。孝友施於家庭。溫和遍於閭里。桑梓叨再造之恩。宦遊播青天之頌。輿情大快。月旦推服。今奉行查。委應入祀鄉賢。並無違碍情弊。各具結到縣。除覆查相

同外。看得鄉宦李天祥。奮跡賢科。出仕守令。歷西晉東齊。在循良茂著。自持身待物。事事矩矱堪模。賑窮周急。全活者衆。秉公持正。雅化甚多。尤所難者。事繼母無異生慈。畿南久高其孝。析財產盡付於弟。方域共頌其友。生爲端人。沒稱賢士。雖位不酬德。官僅止於二府。然鄉以賢重。端宜祀於宮牆。等因緣由。到道據此。本道批仰霸州覆查結報去後。隨據霸州申稱。蒙此遵該本州看得鄉賢從祀。國家重典。隨經移文固安縣查結去後。續據該縣各具結前來。准此。該霸州知州楊結。勘得本宦月日允孚。並無他議。相應申請崇祀。以光俎豆等因。申詳到道據此。看得同知李天祥。孝友天成。慈祥性

植。政成兩地。田野闢而禮樂興。瑞藹一庭。孝於親而友於弟。且也捐金鬻子。有古人兼愛之風。發粟招流。追義士好施之誼。鄉評推重。輿論僉同。先經本縣申詳前來。覆經該州查結無異。相應呈請准其入祀。以酬令德者也等因。蒙按院孫批。本宦政績茂於兩地。孝友藹於一庭。生前既雅重鄉評。沒後宜追崇祀典。如議行。仍候各院詳行繳。又蒙撫院吳批。本宦居官居鄉。輿情推重。既經勘結明協。如議入祀。以昭風勸。仍候通示行繳。又蒙學院徐批。本宦生茂宦績。死協鄉評。論定入祀。諒亦無忝。准置主崇祀。此繳。爲此票行本縣官吏查照先今事理。一體遵照入祀施行。蒙此。遵將本宦擇日入祀賢

祠訖。擬合申報。維萬曆四十一年歲次甲寅七月辛亥朔越六日丙辰。順天府固安知縣孫延長。敢昭告於杭州府同知李公之靈。惟公賦性溫良。持身端介。蒞政則雲中渤海。久著賢能。居家則鄉黨宗族。咸稱孝友。位不酬德。識者惜其志之未竟。行足範俗。評者定其品之獨高。允宜從祀廟廷。以光俎豆。茲者穆卜吉日。敬庀牲犧。式陳明薦。神之聽之。歆茲血食。

李縣令鳳鳴

固安鄭志人物傳李鳳鳴。字立岡。號岐陽。杭州府同知天祥長子。萬曆三十一年舉人。孝友仁厚。冠於鄉評。一領賢書。兩司民社。其任介休也。步禱而甘雨隨車。鋤奸而兇頑怖膽。賑荒散粟。

流離無溝壑之悲。編審施粥。莞獨免饑寒之苦。碑傳萬口。頌滿千家。其任岳陽也。以凋敝山邑。行循良實政。翦儀賓之惡。而逋糧立起。不事敲扑。革羨耗之餘。而官解催徵。未聞賠累。闔邑稱爲慈母。一方目以青天。夫人劉氏死節。見列女志。

李貢生鳳池

固安鄭志篤行傳李鳳池。字元徵。杭州府同知天祥子。崇禎年間貢生。侃侃禔躬。恂恂接物。學政袁批。有行高月旦等語。

李茂才允超

固安鄭志貞烈傳李允超。號還初。岳陽知縣鳳鳴子。奉祀生。崇禎二年清兵破固安城。允超以身翼母劉氏。努力拒敵。被縛斷

頸剖腹而死。且攜四子俱罹凶刃。

附錄

明王業隆悼李本握方城故第二首燕雀無聲綠長苔。可憐

王謝舊亭臺。主人不識今何處。剩得黃花向客哀。原注李一母四子皆死於難

玉折蘭摧萱草霜。何人把筆問蒼蒼。不堪追憶前時事。重為

君家賦斷腸。原注余先有斷腸歌為固安劉生作 見崇禎固安秦志

傅太常事彙補遺一則

明熹宗實錄天啟二年六月吏部遵先帝遺詔。卹錄先朝遺忠。其以建言國本。降斥遐荒者為二等。量與贈官給誥敕。原任吏部員外郎顧憲成。太常寺少卿傅好禮。各贈太常寺卿。

固安文獻志卷十五

耆舊事彙

明

楊指揮繼

楊都尉父
印存遺像

楊學博春茂

楊都尉次兄
印存遺像

楊都尉春元

祀鄉賢
印存遺像

楊都督光夔

楊都尉長子

楊僉事光龍

楊都尉第五子

郭中丞光復

祀鄉賢

郭太守九圍

郭中丞子
祀鄉賢

明 指 揮 楊 公 繼 遺 像



金內監忠

冉都尉興讓

劉訓導九功

庫孝子天才

崔義士玉乾

于縣令進善

祀鄉賢

李教諭時康

祀鄉賢

邢孝廉垂標

李節愍公毓英

明 學博 楊公 春茂 遺像



明駙馬都尉楊春元遺像



明駙馬楊明宇先生遺像贊
烈烈都尉主尚榮昌巍峩甥館車服輝煌公睇富
貴藐若糝糠維忠維孝立身之綱庭幃侍養篤念
不忘明垂祖制主拜姑嫜據禮固爭批鱗抗章國
學示罰屈辱彌強羽翼光廟委曲周詳功鉅跡隱
國史弗彰孤貞爲性踽踽涼涼徧交賢哲鹿孫頡
頑解推故舊粗糲自嘗手扶植者禮義綱常父喪
莫奔累疏琅琅再遭母憂竟死毀傷嗚呼公乎名
教之坊孝弟無間曾閱齊光拜公遺墓大辛之莊
瞻公遺像正氣寒芒摹傳奕世榮我梓桑盧溝灑
森德並流長
縣後學賈廷琳拜撰

固安文獻志卷十五

天津徐世昌鑒定

縣人賈廷琳謹編

耆舊事彙

明

楊指揮繼

方城楊氏族譜楊繼。字紹庵。庠生。明駙馬都尉春元之父。官南城兵馬司副指揮。誥贈榮祿大夫。左柱國都督府左都督。

明神宗實錄萬曆三十七年秋七月。予駙馬楊春元父楊繼祭一壇。給地造墳。

又三十八年春正月辛丑。賜駙馬都尉楊春元故父楊繼贈文

林郎母李氏封孺人。從春元請也。

附錄

〔明諭祭駙馬都尉楊春元父楊繼文〕維萬曆三十七年歲次乙酉七月庚辰朔廿六日乙巳。皇帝遣禮部右侍郎兼翰林院侍讀學士吳道南。諭祭誥封戚畹南城兵馬副指揮敕贈文林郎楊繼。曰。惟爾視躬端慎。賦性真醇。振藻饗宮。分榮戚畹。渥承寵命。秩副司城。茂祉方膺。大招遽賦。特頒祭典。尙克祇承。

〔明諭祭駙馬都尉楊春元母李氏文〕維萬曆四十五年歲次丁巳五月甲子朔廿七日庚寅。皇帝遣禮部署部事右侍郎

兼翰林院侍讀學士何宗彥。諭祭駙馬都尉楊春元母已故授封孺人李氏文曰。惟爾毓秀高門。作嬪名閥。式昭令德。誕我館甥。好賢有白屋之風。守法擅朱門之譽。象賢負荷。皆爾之貽。方賴宜家。遽傳即世。蘭摧月隕。惋惜何勝。渥典用頒。爾靈其慰。
右碑在大辛莊楊氏祖墓
縣人賈士魁訪錄

楊學博春茂

〔方城楊氏族譜〕楊春茂庠生。駙馬都尉春元之次兄。

廷琳案楊學博之事蹟。今已無考。入清代後。以都尉之純孝至德。而子孫漸就式微。考學博二子。長光契。字惺民次光

稷。字立民當時皆遣受業。定興鹿忠節之門。詩書之澤。垂貽

者遠。故子孫蟬嫣繼起。成進士者六人。舉於鄉者二十餘人。列膠庠者不下一二百人。爲我縣清代第一望族。皆學博之裔也。今學博之遺像。楊氏子孫尙敬謹收藏。爰屬邑紳劉孝廉柱臣。銅名向楊氏子孫轉假。與楊指揮楊都尉楊檢討各像。同寄津門。影印入冊。不惟存鄉先正之典型。且以見楊氏之燕翼貽謀。蔚爲詩禮名族。其來有自云。

楊都尉春元

固安秦志孝友傳。楊春元。字仁甫。號明宇。西辛里人。尙榮昌大長公主。拜駙馬都尉。特進榮祿大夫。上柱國。貴而能孝。富而好禮。父卒於京。哀毀不勝。扶櫬歸葬。徒步百餘里。廬於墓側。居母

喪。七日不食。衣不解帶者三月。蟣蟲滿體。不一捫拾。竟至羸瘠而死。崇祀鄉賢祠。其家昆弟子姪。俱讀書守禮。謙謹不敢妄爲。清孫奇逢畿輔人物考。楊春元。號明宇。固安人。神廟時尙榮昌公主。孤貞爲性。風裁自砥。如公主拜舅姑之禮。駙馬坐公主之右。一一據祖制以爭。卽觸神皇帝之怒。罰國學習禮。多方以折之。弗恤也。務期得請而後已。羽翼光廟。委曲獨瘁。此其功固人所未及知。兩執親喪。一秉家禮。初請歸葬其父。封章伏闕。竟以誠而動天。再遭母喪。飲血榻苦。終以毀而滅性。平生不陳奇玩。不赴俗筵。架上無非聖賢之書。對客高談。首揭忠孝兩字。一任夫人以爲迂闊。人以爲執拗。人以爲矯情好名。春元恬焉不辭。

持益力。一時朝士之正人君子。無不願爲交懽者。沒數年。邑紳士請祀於學宮。學院左光斗批其牘云。都尉在朝廷。當是龍比一流。在聖門。可入曾閔之室。時以爲知言。按公之生平。誠好名。然所好者。忠孝節義之名。至於好孝之名。竟以毀而滅性。過誠過矣。誰能有此過者。得之戚畹。更難。

清孫奇逢夏峰集楊都君明宇行述。駙馬都尉楊公執母李孺人之喪。過毀而病。復以卹典疏屢留。憂苦增劇。遂不起。蓋死孝哉。公至性天植。先年丁父紹庵公艱。毀甚。謝御祭拜不能興。強興復仆。侍御王公孟震咨嗟感歎。以狀聞。求寬焉。既而請歸葬。十二疏未俞。遂伏闕。勺漿不入口。上大爲動。是時肢體面貌無

復人理。徼上恩得不死。而終以母死。死之日。薦紳先生。都人士。無不流淚。公以儒家子。承上選。尙嫡長公主。至貴倨矣。而讀書折節。好古行義。一洗貴戚之習。鄉國誦高誼者。或以俠義擬之。而實未盡公也。公家固安。值歲飢。出粟數百爲賑。邑庠三百人。各石焉。大城王生。弱冠以疑獄爲有力者所陷。擬大辟。有年矣。其妻號泣行草間。呼籲無路。公從旁聞其冤。不言而陰爲力。竟脫之。邑尉李光奎。按郭中丞石坊及縣志均作奎光此誤擬劣處有成議。而尉實賢。藉公力。轉擢鳳陽簿。其人抵鳳陽。未三月。即以養親棄官歸。可謂不負公矣。容城割耳節婦李。老矣。公餽以金。更月支粟。同邑賈生三槐。父喪廬墓。公合諸大夫表其門。其崇獎節孝。如不及。

亦氣類然爾。公既以孤意獨行。出曹偶之外。不結貂璫。不附權貴。唯樂從賢士大夫遊。聞某善士。即劄記之。苟可身當。不憚屢先。而恤緯有憂。雅與同志相期許。默運其扶陽抑陰之意。於行所無事之中。公真天下有心人也。其樂善不倦。如水火燥濕之不可假易。其執極不變。如地維天柱之不可撼搖。其深湛堅忍。不輕發。不中沮。如星宿之源。紆曲婉轉。徑按楊氏族譜作經百折而勢必東也。故事尚主者。夫婦舅姑之間。誠有如長樂王回之議。而太祖之制實不爾。公據祖制爭甚力。天子竟從其請。識者比之於虞淵取日。知言哉。蓋公目中本無富貴。故直行所見。即跡近亢氣近戇。而極重難返之勢。非如是烏克挽之。方奪俸習禮胄監。

時。粗糲自給。簞食外無他味。復值暑雨連月。官舍無寸隙可榻。層疊几案。手一卷坐於其上。不偃臥者十餘晝夜。蓋公每謂丈夫落地。須耐苦楚。自憐與人憐者。皆婦人也。故當時旁觀者爲公不堪。而不敢以响响之言進。即如近執母喪。實以七日不食。遂成脾病。親知執有病之儀。強以滋味。公佯諾終不御。卒以殞生。嗚呼。世所樂乎爲戚貴者何如。而公之生平。乃有窶夫賤隸所不能受之苦。甘之若飴。聞貴戚中以公素絕聲妓。匿妓招之。席半妓出。公趨歸不可留。主人笑謂何自苦乃爾。公曰。若謂吾苦。吾亦謂若苦。若謂若樂。吾亦謂吾樂。斯言也。其所自得深矣。蓋公資固超絕。而尊師學道。俱據實際。其童時受業師。與貴後

教習諸公俱嘉其有志。期以大業。公真不負其所學者乎。田儀部大年。公教習師也。歿而公製服為位。齋戒祭奠。有業師母孀居。為置腴田。使無憂老。於在三之義。何媿古人也。公以忠報國。以孝報親。以義方教子。堂中置萬卷。外無雜玩。性學經濟。外無雜書。賢士大夫外無雜交。綱常名教。外無雜言。入其門。即未接譚。而大雅之風。已泠然。噓人肌髓。即一戚臣。而隱然係斯世之望。為世道計。則公不宜死。而自公論。則死何憾焉。公素不諧俗。復死於過毀。悠悠之口。且飾中行之論。以病公。而過則過矣。誰能如公過者。

按楊氏族譜。此下有明朝跨歷前代。頭頭第一。復於甥館中。得楊君崛起。大破俗習。如威鳳孤鶩。可仰而不可羈。以振厲綱常。鳴國

公道化人文之盛。豈偶然哉。五十餘字。

公名春元。字仁甫。明字其號也。其子姓生。歿日

月。俱載誌中。不及贅。嗚呼。公之懿行高節。人人知之。而公之苦心深慮。非深相知者。恐未易窺也。余不佞。辱知於公者垂十餘年。亦特就其所習聞。習見者。率爾識之。非敢謂盡知公也。公束髮論交。幾遍海內。當更有締結超於尋常耳目之表。倘憐長君今日之哀誠。而賜之教。庶可以因語言而見乃父之精神。是其乞言意也。

明神宗實錄。萬曆二十三年四月。詔禮部擇在京年十四五歲。容止端莊。有家教者。充長公主駙馬之選。

又三十二年三月戊寅。大學士沈一貫等言。蒙發駙馬都尉楊春元本。傳出諭旨。詰責。并查教習官欽此。臣等看詳此本。言語

支離體裁錯亂。門名不識。禮度多違。責以慢忽。并及教師。本不爲過。但春元係皇上貴婿。尙主近十載。生子已四齡。而直欲棄職歸田。必其難堪之甚。再加詰責。恐傷至情。且閨中絮語。又難傳播外廷。竊維本朝家法。超越萬代。皇上但特賜密諭。俾令慰改。嚴戒府中內外。務遵禮法。毋致再有奏瀆。則盡善矣。望勿發科傳部。

〔又〕是月庚辰。大學士沈一貫等言。今日該文書官劉宣傳出聖諭。朕覽東廠所奏事件。駙馬楊春元不知何故。于二十八日小便青衣。朝府門行禮畢。坐用二人小轎。回原籍固安縣去訖。駙馬何官不奉明旨自離任。狂肆無禮。即差錦衣衛官趕伴回京。

奏請定奪。伊父教子無方。教習部官鮑應鰲訓示安在。都視職爲民。卿等可傳示遵行。欽此。臣等再三思之。朝廷之馭臣下。可以專用法。而馭中尉則宜兼用恩。蓋義無可絕。則法難盡行。情當曲體。則事宜委悉。若但追之使還。而不處之得所。可以結今日。未可以保來日也。觀春元此舉。棄富貴如敝屣。能繫其身。不能拘其心。夫親莫親仇儷。而不免於反目之嫌。積反目之久。至於觸之法。舍懿親而不顧。此其左右必有長舌爲之交搆。所漸積甚深。而所離間甚巧。安可不爲處也。臣等以爲春元既來之日。皇上尙宜推骨肉之至愛。肺腑之密情。詳察其府中內外用事不法之人。而一分別嚴處之。輕則更易其人。重則明正其罪。

然後離間之匪人可去。輔導之忠益得行。春元可遂好迷之願。公主可洽諧老之歡。而皇上釐降之初心不孤。顧復之永懷始釋。不宜遂置之弗慮而已也。家法國體關係匪細。

又四月乙酉。錦衣衛千戶李如林奏。訪駙馬楊春元已於三月三十日回府。奉旨楊春元今既自行來京還府。顯有畏懼省悟之意。姑著禮部伴送國子監。交付堂上官教習禮儀。百日具奏。又八月甲申。禮部署部事侍郎李廷機奏。駙馬楊春元悔過讀書。胄監之欽期已滿。聖意之釋然可知。惟是部臣鮑應鰲原任兵部武選司主事。去年差往江西。雖調儀制。補教習。實未到任。乞免溺職之罰。詔楊春元復任朝參。回府居住。鮑應鰲既奉差

委。將及一年。何尚未回。查明以聞。

又三十六年十一月甲辰。復駙馬都尉楊春元父楊繼。及教習鮑應鰲各原職。

又四十四年十一月。予駙馬都尉楊春元祭葬。

明沈德符野獲編。公生出降。例皆白屋。直至今上長女榮昌公主。選尚駙馬都尉楊春元。始復為衣冠之族云。榮昌為中宮王

氏出。按沈氏誤謂都尉為楊太僕後。實謬。故此條刪節錄之。

明沙門見月一夢漫言。崇禎七年。三昧和尚在北都弘戒。神宗

之女榮昌宮主。與駙馬楊公按是時楊都尉故已。久。此當指其諸子言。闔府皈依。遣使送

金襴紫僧伽黎三頂。一供和尚。一供香閣黎師。一供熏教授師。

至是熏師持此衣白和尚云。某恐不久辭世。懇將此榮昌宮主所供紫衣付見月。余涕淚盈襟拜受。

附錄

〔明誥誠公主文〕維萬曆二十五年歲次丁酉正月戊辰朔越十九日丙戌奉天承運皇帝制曰。朕惟我祖宗定制。女封爲公主。選配及時。禮也。爾爲朕女。今封爲榮昌公主。下嫁南城兵馬指揮司副指揮楊繼之子春元爲駙馬都尉。爾旣入楊氏之門。宜率婦道以奉舅姑。閨門整肅。內助罔愆。斯於父母生育之恩有光焉。爾惟欽哉。

〔明誥誠駙馬文〕奉天承運皇帝制曰。夫婦人之大倫。婚姻禮

之所重。帝女下嫁。必擇賢俊爲配。此古今之通義也。朕已封長女爲榮昌公主。今命爾楊春元爲駙馬都尉。爾宜循禮遵訓。修身齊家。毋慢毋驕。以稱朕親親之意。欽哉。萬曆二十五年正月十九日。

右碑在大辛莊楊氏祖墓
縣人賈士魁訪錄

〔明鹿善繼答楊明字書〕居今之世。孰有好善不倦如門下也者。客歲侍膝席。舉世俗張設惡套。一切革去。杯酒長檠。非忠孝節義不談。古色照鬚眉也。每與啟泰兄私論長安局面。漸不可言。何幸臭味有人。撐持是賴。且物色時髦。津津說項。即門下之留意於人才。知門下之有心於世道也。生自揣無似。不足備藥籠。旣承翦拂。亦不敢自外。聊附於請自隗始之義。

捧讀手札。兩腋習習。兒子化麟。亦承注念。古之人薄感恩而重知己。金石可泐。此誼難忘。行且使當世悠悠者。知風塵之外。別有一段古道交情。亦奇矣。見鹿忠節公認真草

又挽楊明宇都尉詩二首。咄怪繁華隊。何來清冷雲。聖朝高物色。甥館煥人文。感慨君親重。從容生死分。山陽掩耳過。有笛不堪聞。竟是執喪死。誰云滅性宜。蓋棺人品定。觀過寸心知。世爲時中誤。道從合處離。何如偏至者。猶近始生時。見

鹿忠節公無欲齋詩集

〔明鹿化麟祭楊都尉入祀鄉賢文〕維天啟三年秋八月之六日。明故駙馬都尉明宇楊公。以名行舉鄉賢。崇祀於方城之

學宮。蓋公論亦異數也。越日而金容孫奇逢。易陽王□□。范陽鹿化麟。邑人賈三槐。乃陳牲酌酒。合辭而告之曰。古亦有言。死而不朽。遺韻在心。流芬在口。嘗撫往事而對殘編。慨想乎忠臣孝子。義士仁人。貞夫信友。徒報忻慕之鞭。且低徊而歎吾生之不偶。然而英雄之間出。臭味之相投。其親也不介。其合也不謀。孰意卽在衣帶之芳洲。志行敦篤。近古罕儔。况更於豪華戚里。而得聖賢者流。維公之生。神凝骨峻。雅慕古人。獨標道韻。如俊鶻之擊空。何凡羽之敢近。所分者殊。爲難題。政可就之以破俗陣。當在甥館。風格自持。力復祖制。侃侃不移。雖觸帝威。談笑爭之。亦何辭乎。迂闊與執拗。莫不識奇。

男子之鬚眉。性秉孤貞。况親肺腑。羽翼先皇。委曲獨瘁。有心誓捧日之忠。無地灑伏蒲之淚。此其功固人所未及知。卽對鬼神而無愧。若夫人生一本。誰外劬勞。誰興哀於風木。誰負慟於蔚蒿。且色養志養之不備。又何襄事之足推敲。非大孝之孺慕。孰與挽夫薄凜。兩執親喪。古禮是鏡。鮮華丈夫。枯墨如艷。封章伏闕。竟以誠而動天。飲血塌苦。終以毀而滅性。蓋彼蒼欲爲綱常洗垢塵。特挺奇標以當功令。且也春風接物。折節親賢。北海之樽常舉。南州之榻特懸。品作獨醒。公固以一航而登彼岸。氣結同調。尤欲交四海有志之士而上此船。其扶陽抑陰之妙用。更可意會不可言宣。至於慷慨拯厄。勤

施不捲。憐范叔之裋袍。哀王孫之一飯。蓋接引之中。亦默行其激勸。玉之形穢。且令人畏。彥方之知。而高義可親。又爭誦信陵能急人之困。總公生平。寧方勿圓。不陳奇玩。不入俗筵。不邇聲色。不慕要權。非賢士大夫則客可謝。非忠孝節義則舌可卷。一任夫矯情好古之多指。獨長嘯而迥然。南面百城。書攤二酉。彼聖彼賢。我師我友。誰知百年之身。已作千秋之耦。俎豆宮牆。明馨且久。雲耶霧耶。髣髴乎與古之人。相比以肩。相携以手。令德自長。直道自彰。干城名教。安論存亡。始不無歎詫於年之不永。請觀今典刑猶在。且歸然若魯靈光。某等桑梓有緣。辱知最篤。憶風範之可儀。叩肝膽之相屬。令嗣

世美。彌章式穀。道義交情。敦於骨肉。問崇祀之輝煌。亟巾車而走趨。蓋既為世道生色。又自慰親見之賢於誦讀。倘不弃乎夙好。其來鑒此一束。見鹿化麟北海亭集

楊都督光夔

〔固安鄭志人物傳〕楊光夔。字允諧。駙馬都尉春元長子。授太子太師左都督。覃恩特進榮祿大夫。光夔雅善繼述。曾為楊左諸公屢侮逆璫。長安高其節義。至於忠孝禮義。俱有父風。

〔明神宗實錄〕萬曆四十六年十一月。准已故駙馬都尉楊春元長男楊光夔。錦衣衛指揮使銜。

〔明熹宗實錄〕天啟元年正月己卯。以恩詔加陞錦衣衛指揮使楊光夔為都指揮僉事。

〔清孫奇逢乙丙記事〕熹廟時。逆璫魏忠賢竊柄。誅殺異己。左僉院光斗。魏科都大中。同時被逮。左擬贓二萬。魏五千。立限嚴比。定興鹿太公。率同志者力為區處。共得三百餘兩。其高義者。則有王永吉之五金。楊光夔之五十金。余急付魏使北上。隨聞科都斃杖下二日矣。魏公子學泚踉蹌扶柩去。時為學泚下榻者。固安有賈三槐。定興有許顯達。皆取以為入都便路。左公出片紙於獄。令其僕囑仲兄面致光夔。意欲再為措處。暫免追比。仲兄急過商之。而光夔以其堂叔生員震宇。按楊氏族譜無震宇名。自震除者。為光夔之堂姪。餘

字二字音同致訛。堂叔亦應作堂姪為允。

扮作家人。送百七十金於二百里外。堂兄光契

腸亦熱。且慙惠光夔多方湊聚。而金無用處矣。

明茅元儀鹿忠節公集序。往予落拓長安酒人中。時天下新有大故。士大夫以及五侯七貴。競向余問兵。時楊都尉之子允諧亦時相過從。一日詣其家。遇一老先生。布袍蒼髭。如窮措大。舉動朴直。如田間父。迫視之。精光炯炯。非韋布中人也。徐訊之。知爲鹿伯順。談邊事侃侃無所避。遂與心盟。

楊都督遺著

今存奏疏一首 序一首

捐餉疏

後軍都督府左都督臣楊光夔謹題。爲微臣誼激國恥。憂切軍興。願輸微貲。以佐急需事。竊惟今日以一隅勝敗。爲全局安危。

愚智之所共知也。用必不容罷之兵。轉必不可缺之餉。軍餉一缺。軍心立變。亦愚智之所共知也。而近閱經臣與餉司開報匱乏之狀。司農與廷臣奏請危苦之詞。患既切于剝膚。悔恐類於噬臍。臣意皇上必且動色。必且寒心。必且盡發二十年權採之積。大振十餘萬貔貅之氣。此固事理之所必至。仁聖之所優爲者。中外臣工。敢佐下風。而臣又親臣也。與國共休戚者也。沐天家之雨露。恥事豪華。紹先世之箕裘。頗聞忠孝。憤逆酋詈天無忌。則恨氣填胸。聞軍需計日將窮。則徬徨終夜。自思自語。轉慮轉憂。未能以白面赴戎行。情願以黃金酬戰士。夫臣之清素。人所咸知也。節蓄於服食器用之間。貨變其家室粧奩之物。湊銀

五百供士半餐。此臣不自揣。竊比於毀家紓難之遺風。而求當夫先臣彌留之遺囑也。或謂涓滴幾何。無益緩急之數。又謂時雨將降。無勞桔槔之功。然多少各因其力。臣竭臣之力而已矣。君臣各盡其心。臣盡臣之心而已矣。語不云乎。天下皆亂。無有安國。一國皆亂。無有安家。一體不容橫分。萬全亟宜蚤計。今日之事。皇上固將以散財者爲守財。臣安得不以毀家者爲保家乎。除具題外。兌銀五百兩。交納太倉庫。解充遼餉。願將微物。爲內帑之前驅。先告征夫。以皇仁之續到。臣無任感憤激切之至。奉聖旨。該部知道。嗣蒙特賜敕曰。邇自逆酋匪茹。疆吏不戒。索賦轉饒。數年于茲。度支水衡。一切告匱。重以賚予將士。賑恤

流移。費出不貲。朕不靳帑金。累鉅百萬以佐之。時虞不繼。深疚朕懷。爾後軍都督府左都督楊光夔。乃能慨捐銀五百兩。以濟軍需。志激同讐。恥以賊遺君父。忠存滅虜。不遑更問室家。彼擁撲滿而忘國恤者。當爲汗顏。若借軍興以飽私橐者。能無褫魄。有臣如此。良用嘉歎。特賜璽書。命所司特爲建坊。仍具羊酒導送其門。以示朕褒獎至意。捐私益公。臣子急君之義。賞一勸百。朝廷礪世之權。爾其欽哉。天啟二年

右見崇禎固安秦志

贈賈正卿廬墓詩卷序

右係傳鈔本另載本編耆舊事彙第十六卷

附錄

〔明鹿善繼答楊允諧書〕逐臣自從去國。即散髮入林。尋釣遊之樂。迎大樸鍾元兩兄於江干蕭寺。下帷之暇。縱談古今。此懷殊不落莫。近復偕兩兄並同志者數人。泛舟於新安。水色襲襲。荷香撲面。烹鮮佐酌。歌詠互答。其樂忘死。聖恩之所以錫逐臣者侈矣。但回憶故人。遂如天上。不得把臂以共勝遊。爲悵悵耳。野夫近狀。可爲知己道者惟此。

見鹿忠節公認真草

〔清孫奇逢與楊允諧書〕弟入山六月有奇。幸不死於兵。然亡弟竟以病死。弟卽不死於病。而因於病者四十日。遂於亡弟之含歛一切。未得親視。迄今念之。猶慟欲死。亡弟彌留時。每

念仁兄爲生平鮑子。恨不握手一別。想知己聞之。定自泣然耳。弟方亡七日。姪婦又以病死。今寄兩柩於山陬。而舍姪母子俱以痛苦增病。兼之衣物牛畜俱被鹵掠。正未卜襄事於何日。每一回首。又不能不慟欲死也。道路阻塞。久缺音問。適弟復歸百樓。踉蹌抵寓。不及多敘。

見夏峯集

〔明鹿善繼讀楊允諧封事感而有作〕廟算誰操勝。天心未厭兵。虎蹲氛甚惡。燕寢意殊輕。弱冠朱門客。奇姿白雪情。報恩戈每枕。憂杞夢頻驚。犒士家貲毀。呼天諫草成。慨慷原本色。忠孝自家聲。雛鳳擬君子。人龍羨帝甥。聲名一日徧。蘭籍欲

分榮。

見無欲齋詩鈔

又白雪篇贈楊長公允諧初度正月十三雪滿天。飛花催赴玉人筵。當君初度兆豐年。和氣交通豈偶然。君家風骨自翩翾。每從局外結奇緣。俗塵不到玉壺邊。男子原操獨運權。賢豪倒屣奉周旋。憐才憂國意拳拳。毀家紓難慕昔賢。非曰能之願學焉。朱門冠蓋如雲煙。著鞭竟讓此君先。人依名教自生妍。事任癡心便可傳。詎是王孫性格偏。老翁當日本孤鶩。蘭堂讌客酒如泉。擬君俠骨又擬仙。奉祝以言不以錢。醉筆淋漓白雪篇。見同上

楊僉事光龍

方城楊氏族譜楊光龍。駙馬都尉春元第五子。縣志作第六子誤字允納。

明天啟間中軍都督府都督僉事。崇禎甲申之變。奉命巡緝京城。城陷。自投泡子河井中。家人徧求不得。後遇一僧告之。始知死所。明孫國救燕都游覽志。泡子河在崇文門之東。城角。前有長溪。後有廣澁。高堞環其東。天臺峙其北。

清王源居業堂集鞏都尉永固傳。與鞏都尉射賊有楊光陞者。駙馬都尉春元子。被甲馳突。左右射。路與都尉失。矢盡。投觀象臺下井中死。明謝肇淛五雜俎。京師城東偏有觀象臺。高五丈許。其上。有渾天儀一具。如世所圖。璇璣者。皆鑄銅為器。製作精巧。

明史外戚劉文炳傳。與鞏都尉永固同射賊楊光陞者。駙馬都尉子也。被甲馳突。左右射。與永固相失。矢盡。投觀象臺下井中死。

清孫奇逢日譜。順治七年二月二日。固安李四江過晤。故人謹

我之子。追憶往事。悲喜交集。得聞楊都尉家死難始末。入取節錄續集。

廷琳按都尉諸子姪。均取古代名臣之名以爲名。則王崑繩集及明史作光陞者。當係傳聞異詞。宜從縣志及楊氏家乘作光龍爲是。清汪有典史外誤亦同

郭中丞光復

固安秦志人物傳郭光復。字□□。萬曆十七年進士。授戶部主事。歷陞員外郎。郎中。揚州府知府。准徐兵備副使。山西右參政。調寧武道。陞左布政。四十二年陞都察院右副都御史。巡撫遼東。四十四年以死勤事。明神宗特旨郭光復盡瘁衛邊。忠勞可

憫。准與祭葬。贈兵部左侍郎。廕一子入監讀書。崇禎二年加贈正議大夫。崇祀鄉賢祠。

明神宗實錄萬曆三十三年九月。准各省督撫按奏山西冀寧道參政郭光復。調寧武道。四十年夏四月辛未。陞山西右布政郭光復爲本省左布政。

又四十二年十一月。遼東巡撫郭光復引病乞休。上曰。該鎮新罹虜警。邊務正殷。郭光復著照舊盡心任事。不允所辭。

又四十四年六月。巡撫遼東右副都御史郭光復卒。光復直隸固安人。已丑進士。由戶部主事歷今職。卒於任。禮部言光復忠誠真品。文□通才。英□愴乎龍沙。壯志酬于馬革。雖三品未經

考滿而遼左為諸邊極衝。應照已滿例。給祭全葬。以為邊吏勸從之。

明陳建皇明從信錄萬曆四十二年。奴兒哈赤按即清太祖益勾西虜。

圖北關。流聞不賣蜂蜜。以備糗糧。幾五六歲。志不在小。已而奴

酋復墾前罷耕地。開原參議薛國甫力主驅逐。會巡撫都御史

郭光復新蒞任。廉知通夷。佟養性。貫其重罪。令詐入奴反間。遣

備禦蕭伯芝申以文告。五月。隨統標兵赴遼陽巡閱。示虛聲。奴

兒哈赤遂遵諭退地定界。

明黃道周博物典彙奴酋歲貢蜜。兼開蜜市。自癸丑後不貢。至

丁巳。相傳虜煉蜜為糗糧。撫臺疑其事。未敢訟言於朝。密使遼

陽材官蕭子玉。

即從信錄所載之蕭伯芝

偽稱都督。銜命問故。子玉盛具儀仗。

東臨虜境。酋不郊迎。子玉大怒。詬虜曰。天使儼臨。而大都督不

出。是辱皇朝也。將歸問罪。奴酋聞之。懼然屬橐鞬。跣迎道左。供

具甚豐腆。子玉大喜。相與盡懽。徐致詰不貢市之命。酋從容對

曰。本部之蜜。猶天朝五穀也。五穀有不登之年。皇朝將誰是詰

耶。本部五年來花疎蜂死。是以不供。俟春花滿。釀熟蜂衙。當

復貢市如初。此瑣事耳。何煩聖慮。厚贈子玉。並轡而出。至別處

從馬上拍子玉肩笑曰。汝是遼陽無籍蕭子玉也。安得假稱都

督。臨我郊境。我非不能殺汝。奏之聖明。顧不忍貽天朝以辱耳。

為我致意撫臺。後毋再作欺事。子玉狼狽西奔。撫臺聞之。閉門

累日。中國每事貽笑遠人。安得不啟其輕侮之心哉。

銅山蕭一山清代通史。萬曆四十二年四月。明巡撫都御史郭光復新蒞任。潛使遼陽材官蕭伯芝。偽稱都督。至建州境。問不貢市之由。狼狽西奔。巡撫聞之。閉門累日。節錄

廷琳按郭中丞偽使蕭伯芝至建州境以取辱事。徵之兵部。覆郭公疏。知其事非盡子虛。惟黃公石齋謂自癸丑不貢至丁巳。密使材官蕭子玉問故云云。考丁巳為萬曆四十五年。是時郭公已於先一年卒於任所。則石齋所記。尙未盡合也。

固安縣志封贈表。郭維藩。以孫光復貴。贈中憲大夫。山西布政

使司右參政。妻王氏贈淑人。郭郊暨妻張氏。以子光復貴。封贈同上。

郭中丞遺著今存奏議四首 碑記二首 詩一首 佚其半 碑記可考者二首

詳陳建州女直強盛情形疏

祖宗朝。以女直種類歸欵。分置建州。建州即清始祖發祥之地。毛憐海西等衛。

各授指揮等官。萬曆初年。惟南關王台最强。自台故而其子猛

骨孛羅。與其孫歹商相殘。遂弱。奴酋清太祖名努爾哈齊。明人書作奴兒哈赤。故此稱奴酋者。即指清太祖

之祖教場。即清景祖。覺昌安。父他失。即清顯祖。塔克世。為我兵掩殺。有尼堪外蘭。搆明總兵李成梁

攻阿泰。阿泰妻為景祖女孫。故景祖李顯祖往救之。城破。為成梁兵所殺。奴酋亦孑然一孤雛也。時太祖方四歲。見博物典

彼時惟北關之逞加奴。仰加奴最强。遂日糾西虜。即海衛。以攻

殺南關為事。而我開鐵亦時被侵擾。十一年逞仰二奴被戮。而奴酋於是漸長。與二奴子卜寨。那林索羅角立矣。二十二年卜那二酋思報父讐。又日與南關相構。遂□戈以攻奴酋。卜酋即竟為奴酋所殺。而奴酋勢駸駸盛。比北關請卜酋屍。奴酋剖其半歸之。於是北關遂與奴酋為不共戴天之讐。二十六年那奠又攻猛酋。猛酋力不能支。因質妻子寄命於建寨者。幾二年。奴酋視猛酋為釜底魚。遂以計殺之。此二十八年事也。及我中國切責。欲問擅殺猛酋之罪。而革其市賞。奴酋因悔罪。許妻猛酋子吾兒。忽答以女。厚送之歸。中國原其悔罪。置不問。至三十一年。那酋與白羊骨又糾莊南搶殺吾酋。吾酋窮困投奴寨。自

後吾酋不還。而南關之救書屯寨地土人畜。遂盡為奴酋有矣。邇年以來。奴酋自稱恭順。每以北關戕殺南關為口實。而實以與為取。北關缺望於南關之不得。每以奴酋謀犯內地為口實。而依附願効其忠。自四十一年北關又收奴婿卜占台。妻之以女。堅不放歸。奴酋於是與北關深恨積怨。且其富強已非一日。每藉婚媾為名。種地為由。必欲將北關一鼓而吞。以為窺伺內地之漸。我南關既失。止靠北關如綫之藩籬。若再失守。則奴酋糾結西蒙。害可勝言哉。

萬曆四十二年正月。附兵部覆疏。今日籌邊。必以救北關為主。惟是奴酋反覆靡常。頃撫臣提兵

出塞。遣驛會修養。陸為問。謀遣備禦蕭伯芝為宣諭。諭之退地。則四十二年春復種。秋復則罷兵。而察其情形。實懷叵測。如以四十二年春復種。秋復收。必待來年然後已。其退地果真退乎。彼於金白二酋。既云老女婚。不與亦罷。又云若不與我。恐何盟誓。其罷兵果真罷乎。夫南關即不能遽復。而新種之地。必不

當令其再收。當今春復種時。即當蹂其田。奪其牛。誅其人。乃隱忍姑息。業已示怯。轉盼來春。垂涎有日。用兵剿逐。寧煩再計。乘其外寧。修我內治。如敵樓火器。急爲建置。城堡墩台。早爲修補。設守燎之軍夫。禁出邊之樵牧。稽查虛冒。移置將官。責北關以訓練之義。寬罪弁以使過之仁。挑選援兵。期得精壯。皆當聽撫臣以便宜。行事者也。上曰。該鎮制馭機宜。著撫臣便宜行事。務保萬全。

請速選兵備通判各官疏

寧前缺兵備官三年。雖代攝有人。然勢危情苦。今張國儒請告。該部當作缺另推。乞皇上速賜允發。若開原逼近宰煖。遼陽逼近抄花。俱缺通判。經年不見選除。乞併敕吏部。即擇邊才素優者。於急選大選推陞內。通令刻期到任。

萬曆四十三年

奏陳北關與建夷起釁情形疏

建夷近遵約束。北關先起釁端。據報北關白羊骨老女前已許

嫁奴酋。今又嫁西虜煖兔之子。是曲在北關矣。夫討賊當聲其罪。馭夷貴服其心。此時奴酋未見交通西虜。爲中國患。而金白二酋。以嫁女構釁。致我全遼不得一日安枕。茲仍仰鼻息於煖兔。又自恃兵力救援。可以抗衡奴酋。我何不就聽三酋穴中一鬪。按兵觀變。坐收制虎之功。已分發各路兵馬。聽各將自統。以爲聲援。倘奴酋必欲出兵。壓北關境上。我不妨出而宣諭。待其不遵約束。始奮精銳。腹背夾擊。各圖大創。臣前日謂以守救爲長策。羈縻爲權宜。剿戰爲因應。今日謬謂緩則用守救。急則用戰救。而剿救則必待萬不得已而後用之。總之使北關守救之利。吾中國不大受救之害而已。

萬曆四十四年七月 附巡按山東御史王雅量陳北關招釁情形疏。目前按

兵既撤。京運愆期。諸鎮有枵腹脫巾之虞。則餉當議。總兵官標下缺中軍。潘陽缺游擊。而撫臣所請。賀世賢張聰。皆未得俞旨。則人當議。至於行賞罰。殿最之權。責其成功。是在廟堂之聽。撫臣與撫臣之自效也。附兵部覆疏。撫臣謂緩則用守。救急則用戰。救深得進。止之機。而確然不能易者。按臣謂緩急輕重。宜聽撫臣之應變。夫兵機變。在呼吸。邊事難。以遙度。惟在撫臣。一力祖當。廟堂原不中制。至於共心。文武諸臣。責在同舟。必須協力共濟。上曰。這救援戰守機宜。便行督撫等官。悉心料理。臨期應變。一聽撫臣調度。務收全功。文武各官。都要協同任事。事定之後。分別功罪具奏。

酌議本折糧賦疏

遼左今歲旱災。而屯糧係軍餉。額數又難盡免。請將寧前一衛。邊冲地窄。災傷實有八分者。照上年事例。每豆一石。折銀二錢五分。穀一石。折銀一錢二分五釐。金復二衛。及廣寧等衛。災傷實有五分者。照例本折兼征。至海蓋二衛。并宣遼及東寧等衛。

災傷只有三分者。似難議折。其應納本色糧米者聽。萬曆四年八月

右疏四首同見明神宗實錄

固安縣重修城隍廟記

固安縣剏修重隄暨龍王廟碑記

右碑二首同見縣志藝文另載本編金石文存卷

固安縣重修學宮碑

右碑在學宮戟門東側文已泐存字無幾

固安知縣孫侯重修儒學記

右碑當在學署左右文缺待訪

桑乾水漲詩十一韻

按是詩秦志刊於名宦孫延長傳後即缺後六七韻今仍之

嗟嗟方城遭水堯十年九見桑乾改昏墊深谷頓爲陵。澎湃桑田盡變海。蕭條廬舍竈無煙。男婦嗷嗷共籲天。晝扳螻蟻樹頭立。夜逐蝦蟆屋上眠。無奈牆倒屋成沼。老幼半作溝中殍。啼饑園內無半飽。

右見崇禎固安秦志

郭太守九圍

固安鄭志人物傳郭九圍。遼東巡撫光復子。初任都察院照磨。歷任右府都事。中府經歷。刑部四川司員外郎。貴州司郎中。陞貴陽府知府。崇祀鄉賢祠。

郭太守遺著

今存碑記一首

重修憫忠寺記

奉議大夫刑部貴州清吏司郎中郭九圍撰

丁卯科鄉進士侯奉職書丹

戊辰選貢中已卯科副榜周綿曆篆額

都城古蘭若。不可勝數。然一語及憫忠寺。兒童走卒。無不知之。初不知其爲崇福寺。考之記載。憫忠肇自唐。崇福迺今朝之賜額也。夫唐以憫忠名者。其義何居。相傳唐太宗征高麗時。收戰士遺骸。築爲京觀。又傳爲焚經臺。迄今臺基尙峙。先是萬曆初年間。有住持號琢山。法名明玉。禮賢好客。四方士紳。上公車及謁選者。率多投止。一時登高第。爲名公巨卿。踵相接也。無何傳

未易代。迺式微甚。比有老衲。號一天法名周暹者。號自如法名妙性者。號定菴法名道準者。共證菩提。不忍以選佛場淪爲荒草。因倡議鳩功庀材。輦灰於山。因甃於陶。爲鼎新之舉。一時金碧輝煌。煥然改觀。又僧衆戒律精嚴。鐘聲佛號。達旦不輟。都人士時來皈依遊觀。布金飯僧者。絡繹不絕。夫此招提之幾毀而復興者。獨一二老衲之力哉。從來地之興廢不常。亦猶人之生死輪迴也。乃今梵宇摩空。頗稱勝地。而兩廊僧衆。日益削弱。大殿日就傾圮。或者曰。氣數使然。幸有鄉僧守拙法名德通。卽定菴弟子也。年近七十。戒行爲衆僧冠。且恐四大歸空。一切將不去。慨然發心。告諸檀那。更自捐資。余亦隨意布施。作平等因緣。

歲在甲戌。重修大佛寶殿。天王寶殿。凡破瓦頽垣。靡不整葺。如初。今歲己亥。如三世諸佛。兩壁支佛。觀音大悲。以至十八羅漢。四天王。悉金其容。嚴其相。各還唐相本來面目。余每過而問焉。觀其成功。因憶其師弟後先善果。不覺鼓掌喜曰。人靈乎。地靈乎。抑佛菩薩之靈乎。總之興廢有時存焉。時待人以興。人乘時以靈。而佛菩薩固不生不滅。又不可以興廢論也。余刑名俗吏。不能文。但念先中丞居停之所。不佞且結社論文于斯。頗悉顛末。屈指其興廢狀。以記其事。至詞之工拙。則非所計耳。

大明崇禎十四年歲次辛巳仲春月吉立

右碑在北京南城法源寺

金內監忠

明劉若愚酌中志金忠字敏恕固安人萬曆六年選入歷陞文書房太監博學能書善琴自稱迂拙子守備鳳陽時曾著御世仁風一書刻之

明神宗實錄萬曆四十二年張差梃擊之案上慎重大獄而諸臣奏益急於是遣文書官金忠宣諭內閣後又遣金忠捧出聖諭

冉都尉興讓

明神宗實錄萬曆三十六年七月辛亥皇第一女選尙駙馬冉興讓

明史公主傳壽寧公主神宗女萬曆三十七年下嫁冉興讓主爲神宗所愛命五日一來朝恩澤異他主崇禎時洛陽失守莊烈帝命興讓同太監王裕民給事中葉高標往慰福世子於河北都城陷興讓死於賊

明劉若愚酌中志冉都尉興讓固安人壽寧公主選駙馬時顧姓者二人冉姓者一人時正暑熱御前親選之日兩顧白石大簪極細亮帽髮可以鑑香氣襲人衣服楚楚而冉衣不求鮮戴圓羅帽兢兢叩拜不敢仰視神宗隔簾向鄭貴妃指而目之卒選中興讓實重其老成也

明沈德符野獲編公主下降例遣老宮人掌閣中事名管家婆

無論蔑視駙馬加奴隸。即貴主舉動。每為所制。選尚以後。必捐數萬金徧賂內外。始得講伉儷之好。壬子之秋。今上愛女壽陽

按寧

公主為鄭貴妃所出者。選冉興讓尚之。相歡已久。偶月夕。

公主宣駙馬入。而管家婆名梁盈女者。方與所耦宦官趙

按實錄作彭

進朝酣飲。不及稟白。盈女大怒。乘醉扶冉無算。驅之令出。以公主勸解。并詈及之。公主悲忿不欲生。次辰奔訴於母妃。不知盈女已先膚懇。增飾諸穢語。母妃怒甚。拒不許謁。冉君具疏入朝。則昨日酣飲宦官。已結其黨數十人。羣摔冉於內廷。衣冠破壞。血肉狼籍。狂走出長安門。其儀從輿馬。又先筆散。冉蓬跣歸府第。正欲再草疏。嚴旨已下。詰責甚厲。褫其蟒玉。送國學省愆。三

日不獲再奏。公主亦含忍獨還。彼梁盈女者。僅取回另差而已。內官之羣毆駙馬者。不問也。

清嚴有禧。漱華隨筆。萬曆壬子。內監梁進朝毆駙馬都尉冉德

讓

與當作讓

於府中。公主倉皇往救。進朝罵詈。至今公主跪謝。既而

復毆於朝門。吏科曹于沐疏劾婦寺橫恣已極。懇乞速正典刑。不報。德讓八日三疏。皆不得達。蓋緣巨璫盧受李恩用事。進朝賄以金寶。是以多方阻絕。駙馬掛冠而逃。東廠以聞。上大怒。下旨切責。奪其父職為民。

明神宗實錄。萬曆四十年秋八月。命錦衣衛官訪尋駙馬冉興讓。伴回請旨。仍褫興讓父官職。奪教習主事賈之鳳俸一年。興

讓以被掌家宮人梁盈女。內官彭進朝等毆辱具奏。上命中官盧受問狀。進朝等羣訴之於東安門內。之鳳以聞。公主三奏。皆不得達。上怒。繫其家人。中宮傳旨詰責。禮臣及科臣請上召問公主。正羣小之罪。不報。興讓乃掛冠長安左門去。給事中范濟世言。駙馬上之婿也。無故而辱。則何人不可辱。公主上之愛女也。控訴不得上聞。則何人可以上聞。總之皇上靜攝有年。聖子神孫。不能常侍膝下。宮中禮法森嚴。固所以防微杜漸。而情意闊絕。亦易於起釁生讒。故義莫重於夫婦。而宋仁被惑於閹文。應情莫真於母子。而曹后見構於任守忠。不可不亟塞其源也。時臺省勳戚。俱以爲言。至是上覽東廠奏事。見興讓去。愈益怒。

遂有是命。輔臣言戚臣蒙恩重。擅行非是。聖裁允當。臣可無言。惟是駙馬廷辱萬目共睹。若置不問。紀法陵夷。非所以服人心。重國體。乞重加懲戒。後科臣復合詞以請。而翁憲祥言駙馬已蒙嚴諭。兇惡未聞處分。可見兩旬以來。其入御覽者。東廠之事件耳。諸臣章奏。達不達皆未可知。壅蔽已甚。處置失平。俱不報。又萬曆四十六年十一月甲辰。駙馬都尉冉興讓。乞復其父母。逢陽兵馬指揮職銜。

明光宗實錄。泰昌元年十一月。駙馬都尉冉興讓。爲其父冉逢陽乞復兵馬指揮職銜。許之。

廷琳案冉都尉姓名。我縣舊志不載。迄今縣境亦毫無遺。

蹟可尋。其果爲我縣人否。無從確定。竊疑劉若愚酌中志。謂冉爲我縣人者。蓋誤以楊都尉之籍貫。屬之於冉耳。然繆氏順天府志。即從劉若愚之言。列冉都尉於我縣。茲編姑仍之。以廣前聞焉。

劉訓導九功

固安秦志篤行傳劉九功。字禹績。孝城村人。任任邱縣訓導。在鄉時勤學好施。有通州指揮應襲高保。乞食於本村。病倒。業無起色。九功扶至家中。養病月餘。病愈。助以資斧旋里。山東平度州張存仁。入京尋親未遇。饑寒難忍。在村號泣半夜。九功哀其窮而收之。給以衣食。迨春暖乃給路費使歸。山東青州府張道士。偶遭時疾。臥本村關聖廟。九功遣人朝暮供食。撫養完全。乃給衣費啟行。道士叩頭泣別。卽此全活三命。毫無吝色。近世可謂難矣。

庫孝子天才

固安秦志孝友傳庫天才。西內村人。素性篤孝。母王氏于天啟三年病故。廬墓三載。每日思親。仰天號泣不止。生員蘇爾和等公舉縣令王。申請本道周。給匾旌獎。曰孝行可風。

崔義士玉乾

固安鄭志篤行傳崔玉乾。馬申莊人。有宛平武某乘驛挾貲南行。至本村遺一囊。玉乾就拾之而覺重。揣知財貨也。大聲招呼。

固安文獻志
其人已前馳不及聞矣。因取寘室中。秘不令家人知。次年正月。武回復過本村。已無意於復得。玉乾方堅待之。引其人相與印證。良是。卽以原囊還之。武且驚且拜。願與之平分。玉乾笑曰。若待爾來平分。何如全得。仍留一飯而去。知縣秦士奇訪知覈實。申詳本道。匾旌之。仍給冠帶。優免終身差徭。

于縣令進善

固安秦志貞烈傳。于進善。徐溝知縣彥英子。萬曆二十二年舉人。任河南柘城知縣。力田課子。崇禎二年。固安城陷。勢逼。語妻楊氏曰。勇不能拒。義難受辱。自縊死。楊氏並女及孫女甥女孫婦皆隨縊。崇祀鄉賢祠。

柘城縣志。于進善。順天固安舉人。萬曆三十六年任柘城知縣。

河南通志
職官表同

李教諭時康

固安鄭志忠節傳。李時康。監察御史。鸞之後。萬曆時貢生。歷任山東武城縣訓導。陞內黃縣教諭。年七十八歲。崇禎二年。清兵破固安城。與夫人陳氏罵不絕口。同被殺。崇祀鄉賢祠。

邢孝廉垂標

固安鄭志文翰傳。邢垂標。字君建。天啟四年舉人。安貧好學。爲闔邑所推重。曾修補縣志。

李節愍公毓英

固安文獻志

卷十五

晉書事彙

李時康

邢垂標

一一十九

趙莊賈氏

无問齋

齋

固安鄭志忠節傳李毓英恩貢生。任武昌通判。崇禎十六年獻賊渡江陷武昌。毓英闔門自縊死。

清吳偉業綏寇紀畧崇禎十六年五月二十九日。流賊張獻忠攻武昌城。城破。通判李毓英全家自經。

清敕編勝朝殉節諸臣錄李毓英固安人。任武昌通判。城破毓英闔門自經。本朝賜諡節愍。

清陳克家明紀補張獻忠陷武昌。致仕大學士賀逢聖投河死。攝江夏縣長史徐學顏為賊支解。通判李毓英。武昌知縣鄒逢

吉皆死。

郭中丞遺著補遺

自序一首 凡例七則

兵機纂自序

方今國家夷虜交訌。一時謀臣策士。欲請長纓而繫單于之頸者。誰不哆口而譚曰。兵法兵法。顧法一也。趙奢方用之以挫強秦。而解闕與之圍。其子趙括不能踵用之。遂致大敗長平。坑卒四十萬。噫。此非法之有時而效不效也。所繇機之能用不能用。故也。夫機者何。昔轅氏畫井田之法。而以乾坤艮巽水火金木。還象好奇正。故其陰符經云。天發殺機。龍蛇起陸。人發殺機。天地反覆。天人合發。萬化定基。厥後太公略之為韜。則取義於四時之榮長歛藏。文王周孔演之為易。則取象於卦爻之坎下坤

上。其間陰陽變化。或以奇爲正。或以正爲奇。奇正相生。循環無端。儻所稱兵機非耶。顧機之資藉在法。而運用在心。心也者。所以妙其法與機於不窮者也。故戰守攻取之間。有時而何以師出以律。堂堂正正。不撼如山。不謂膠固。有時而用示以不能。能以退爲進。以瑕爲堅。以譟爲靜。不謂虛擾。有時而用閒用疑。用誘。飽使之餓。逸使之勞。安使之動。不謂誑詐。何者。□因形而制變。兵因機而制變。自然之理也。第機一耳。吾握之人且竊之。吾匿之人且窺之。是又人與吾之所共兼以爲利者也。故善用者。必使機之常爲吾用。而不爲人用。謀人而人不吾知。愚人而人不吾識。乘人而人不吾覺。致人而人不吾逃。後人

而人不吾先。玩弄於掌股之間。展轉於呼吸之際。以致搏挽陰陽。驅使思神。鞭策艸木。無窮如天地。不渴如江河。斯其爲神於兵機者哉。古未有不知法而能用兵。不知機而能用兵。不能用法與機而能爲將者也。昔霍嫫姚不學古法。惟曰臨敵制勝。在方略何如。張巡敢戰。亦不過使兵識將意。將識兵情。噫。此其所以能善用兵而爲古名將也。與。不佞復書生也。法且未知。曷機之足云。顧自束髮時。嘗誦慕余邑中丞蘇寒村公益智錄。稍窺其津筏。以先後承乏淮揚。俱當海氛告亟。每鰓鰓選材官。勤統練。以爲綢繆計。因彙子史及韜鈴諸書參閱之。凡古今將略與兵法合者。一一彙括其精要。條分縷析。錄而授之梓。旣成用以

頒布諸將士。諸將士多知兵者。儻按迹而求其略。因略而倣其法。神而明之。變而通之。庶幾哉進乎機矣。故不揣而謬名之曰兵機纂。萬曆歲次己亥仲夏之吉。淮徐兵備道山東按察司副使郭光復撰於彭城公署。

兵機纂凡例

一談兵機至玄且悉者。無如春秋左傳。及武經七書。但春秋左傳言人與事而不言法。武經七書言法而不言人與事。且篇什浩繁。所以覽者未易得其要領。不佞不知兵。每即正余邑先達中丞蘇寒村公益智錄。併旁採諸書。因謬纂爲是編。凡卷八。目百六十有奇。每日凡例。先經傳證以言。次子史實以

人。次兵法斷以理。將書縷析。大都皆古人已試而有驗之變事。非徒沾沾空言者比。韜鈴家於此合而觀之。庶易爲見解。而兵機一開卷自在吾目中矣。

一纂輯羣書頗多。惟摘其緊切兵機者錄之。中間爲刪潤一二字句。其原書本文不必全錄。蓋取其事核。不取其詞文也。
一每日如漢時人。首條書一漢字。餘代仿此。中間世次先後。不無稍有參次。亦以目錄繁多。不及一一致詳耳。仍俟訂正。
一纂內有一事一意。而人各言之。不厭詳載者。以海上豪傑所見略同。亦以備參攷耳。

一如文同而各目類所載。有彼此互見者。以事相發明。不厭重

錄也。

一事實與目錄有意相背戾。仍採入者。蓋善否兼書。用備臨時鑒戒云。

一是纂自春秋戰國。以至我國朝。凡英君將將。名將將兵機宜大略。亦可謂略括無遺矣。知兵者儻閱是纂而細心體會。閒時每暗自籌畫。布置於胸中。臨敵試而用之。未有不得手應心。出奇制勝者。雖然。此猶兵家筌蹄也。若夫神明變化。則又存乎其人耳。

廷琳案郭中丞所著兵機纂八卷。共十六冊。刊於明萬曆二十七年。我縣人久無知者。今蘇州可園內圖書館藏有其書。爰屬友人江君杏溪借鈔此序。及凡例。亟補印卷末。尙冀吾鄉人士。合力接訪。倘得相遇。重刊問世。俾鄉先正僅存之著述。不至終蕪沒於天壤。是廷琳所切禱者也。

固安文獻志卷十六目錄

耆舊事彙

清

賈孝子三槐

卜太僕祖

卜善士近義

卜太僕兆麟

卜參議景超

卜太僕長子

卜侍御峻超

卜太僕次子

卜教授大川

卜太僕孫

卜貢生大醇

楊縣令寬學

劉主事源澄

張縣令應科 附祖睿哲

辛縣令樂舜

劉老民尙清

隨孝子宗印 附張進寶 寇進忠

吳孝子春

田孝子士魁

宋孝子印奇 附李九祥 楊直政 孫延增及弟延英 李思聰

石國學廷柏 附王珂 邵鈞 王建基 曹諤

高茂才際可

于茂才觀海

張處士顯

馬善士倫 附子獻圖 色克圖 文玉

劉義士宏道 附張世福 王老肥

王教諭灝

王教諭永昭

唐同知慶餘 附李維明

劉義士學志

曹中翰江

曹茂才松齡

曹茂才鶴齡

固安文獻志卷十六

天津徐世昌鑒定

縣人賈廷琳謹編

耆舊事彙

清

賈孝子三槐

清孫奇逢夏峰集題賈正卿篤行君子卷固安賈正卿樸實醇篤。白頭不失赤子之心。從余遊四十餘年。歷貧富患難流離死生而素心不改。初念益堅。所稱有恒者。殆其人歟。弱冠時兩經廬墓。孝行著聞。楊明字都君揚於朝。一時賢士大夫。如湯君兆京。左君光斗。周君起元。皆器重之。最後肄業江村鹿伯順之門。

同人嘉其孝題詩盈卷蜀人陳盟冠之曰篤行君子未付正卿
忽爲人竊去後劉君若宰復題之崇禎十五年正卿攜卷吏隱
安慶弔浮丘公墓會甲申兵亂糜爛土地人民正卿面帶刀痕
深半寸妻李烈死次子被掠事定官各任職正卿素聞守身之
義與一僕徒步歸來與余話死生流離狀慟尙殷殷也順治六
年其卷復失余因簡伯順認真草仁卿北海亭集暨余與吾弟
啟美稿中所存者仍彙爲卷以俟後之君子續爲詠歌噫一卷
也忽成忽失豈鬼神祕惜不輕以君子予若人然予知若人甚
晰微而顯闇而章誠自不可掩惡知前兩經遺失者非所以待
大闡發於今日乎

孫夏峰年譜明萬曆四十年徵君寓京師孝子賈三槐來受學
三槐字正卿固安人兩廬父母墓質過魯先生卒成就之天
啟五年左浮丘魏廓園相繼逮下鎮撫司左之弟光明魏之子
學泚各相從時爲學泚下榻者固安有賈三槐定興有許顯達
皆取以爲入都便路崇禎十三年徵君在百樓按百樓爲徵君弟子
定興耿極之里名鹿盡心洗心杜越張果中鹿善治賈三槐陳鏗各攜家相依皆
環雲鶴軒書聲相接先生暇則視諸子習射於東園當嘯聚肆
劫之時鄰近村落皆焚掠一空百樓獨得安枕

明鹿忠節公年譜萬曆四十二年門人始進先生寓講學於授
徒以行繼往開來之志是時杜君異越張于度果中賈正卿三

槐王大冲燁輩接踵來。先生顧而樂之。朝夕提命。亶亶不倦。四十四年。賈正卿以母喪廬墓。同門生將往慰。先生代為言曰。正卿廬墓。聞者異之。然正卿質朴近魯。博綜未遑。蓋模心非模古也。不學不慮。孟氏刻畫此良心。寧直達之天下。實達之萬世。此往古來今所不能異同之脈。而情予智刃所不盡剷除之根。毅然前往。直致其知。若正卿者。勇過孟賁遠矣。

徐世昌大清畿輔先哲師儒傳。賈三槐。字正卿。固安諸生。弱冠時。兩廬親墓。都尉楊春元揚於朝。一時賢士大夫。左光斗周起元湯兆京皆器重之。後從其母命。受業於定興鹿善繼之門。明萬曆四十年。奇逢寓京師。三槐復來執弟子禮。

按正卿公先廬父墓。楊都尉異之。延致京。

即。俾從夏峯受學。後二年始從忠節遊。又二年更廬。世墓。傳中叙次年月尚未合。

質性魯鈍。發憤為學。歷經貧富

患難流離。死生而初志益堅。從奇逢四十年。卒學成名立而去。奇逢所稱樸實醇篤。白頭不失赤子之心者也。天啟五年。左魏之難。兩家子弟皆下榻其家。崇禎十五年。為吏安慶。甲申兵亂。賊刃之傷其面。妻李死於難。次子被掠去。事定復其官。不就。攜一僕徒步歸。奇逢為題篤行君子卷贈之。

賈廷琳族遠祖正卿公傳略。公諱三槐。字正卿。固安賈氏。先世為隆慶州望族。明永樂初。詔徙富民實北平。始祖諱敬。因徙居順天府固安縣之王龍村。傳七世至公。父諱時道。生子七人。公於次為六。幼失學。然天性肫篤。敦行孝弟。發於至誠。年二十餘

遭父喪。哀感迫切。喪葬一遵古禮。挈同母弟三。近廬於墓所。三年。當是時。賈孝子之名。震畿內。鄉邑大夫。輜軒使者。表廬樹楔。羣歎異之。同縣駙馬都尉楊公春元。尤以綱維名教爲己任。特章聞於朝。並延致京邸。勗之曰。子立身無愧古人。然以力田終。非吾子事也。更爲延師授業。公因益發憤爲學。努力以期有成。一時賢士大夫。如周公起元。湯公兆京輩。皆相引重。而桐城左忠毅公光斗。尤以國士目公。時容城孫徵君奇逢。寓京師。楊公更屬公往受業。徵君以其質性近魯。時時有以啟發之。是歲明萬曆四十年也。越二年。定興鹿忠節公善繼。以擅發金花銀事歸里。倡道江村。公復奉母命往問業。與同門定興杜徵君越。新

城張公果中輩。朝夕切磋。同門喜曰。吾輩躬逢正卿。觀感之益。較得之詩書者。不啻什倍。四十四年。再丁母郝氏憂。復廬於墓所。同門一再視於壠上。忠節公并代爲序贈之。且稱其毅然前往。直致其知。勇過孟賁遠矣。其爲師門推服如此。是年楊公逝世。天啟三年秋。崇祀本縣鄉賢祠。公偕孫徵君及忠節之子化麟。同往致祭。蓋楊公之所以玉成乎公。及公之克成其學。以仰報知己者。蓋各爲千載所僅見云。後與弟三。近偕應學使者試。同補縣學生員。諸同學各爲詩文以章之。當天啟五六年間。逆奄魏忠賢荼毒善類。一時名賢。如左忠毅魏忠節諸君子。皆逮下詔獄。徵君與忠節父鹿太公。既倡義聲於范陽。而公與相應。

和兩家子弟。如魏公子學泚輩。每潛往都門。皆下榻公家。取以爲入都便路。雖古人廣柳覆壁。何以加焉。崇禎十三年。徵君避亂定興之百樓。公偕諸同學各攜家相從。環雲鶴軒以居。絃誦之聲不輟。暇則習射東圃。當兵燹焚掠之餘。百樓一村獨晏然。十五年。就某官於安慶。至則往弔左忠毅墓。低徊毅魄。感念知己。盡焉以傷。會甲申兵亂。爲賊所刃傷。面帶刀痕寸許。妻李氏烈死。次子亦被掠散失。清朝定鼎。凡前代各官皆復職。公義重守身。棄官獨攜一僕徒步歸。歸仍從徵君遊。徵君嘗曰。正卿樸實醇篤。白頭不失赤子之心。從余遊四十餘年。歷貧富患難流離死生而素心不改。初念益堅。所稱有恒者。殆其人歟。先是忠

節門人嘉公孝行。贈詩文累卷。蜀人陳盟題之曰。篤行君子。卷忽失去。後劉太史若宰復題之。迨順治六年。卷又失去。徵君更爲輯成。篤行君子卷授焉。賈氏自數世以來。家道富厚而嚴肅。閨門之內。凜如官府。公父沒。家事一稟諸兄。兄或安坐。弟數人以次鵠侍。命之再三。然後坐。有過失。面叱之。咸怡然順受。無忤容。諸媳之事母也亦然。母或外歸。諸媳偕來。問起居。爭理衣裘。以爲笑樂。其家教爲遐邇人士所不及云。子二。長連捷。次被掠。失名。孫四。榜選售增。兒子程言。亦廬其親墓。竟殞廬居。光緒元年。定興鹿氏祀忠節諸賢弟子於江村聚賢堂。公與焉。族遠孫賈廷琳曰。鹿忠節有言。孫啟泰弟兄兩廬親墓。不數年

而正卿兄弟繼之。百里之間。名行相望。蓋天實爲綱常一洗垢塵云。嗟乎。如忠節言。當日公聲望之表著。爲何如哉。乃迄今三百年。夏峰氏之姓名。昭如日星。而公則名字翳如。里黨後進。幾無知者。即其本支孫子。詢之亦或惘然。吁可慨已。余府主前元首徐公。撰畿輔先哲傳。幸得列傳師儒。並蒙手賜重書篤行君子匾額。以表厥宅里。凡我同族子姓。沒存均有餘榮矣。然先哲傳於公之事蹟。叙述尙多未備。廷琳故詳參忠節徵君。及杜紫峰鹿仁卿諸家集。與公之本支譜牒。及定興志。更爲此傳。以示禩世子孫。仰追前列。庶有遵循。而共思無忝焉。

附錄

〔明鹿善繼代門人贈賈正卿廬墓序〕固安賈正卿父喪廬墓。遠近知其孝。服除遊啟泰孫先生之門。已而復從吾伯順先生遊。吾輩相與朝夕。即不煩言說。而真情至性。已泠然襲人腑擣人腸矣。歲之丙辰。正卿復以母喪廬墓。吾輩往問之。擬乞先生一言。而又值先生以雞骨廢蓼莪也。又何敢以是言請。因共竊取先生平昔之意。而湊爲詞曰。正卿廬墓。聞者異之。詩書所載。何以加焉。然正卿質樸近魯。博綜未遑。蓋模心非模古也。即異之者。亦各自有當於心。非謂其當於古也。不學不慮。孟氏刻畫此良心者至矣。寧直達之天下。實達之萬世。此往古來今所不能異同之脈。而情智刃所不盡剗除。

之根也。有能於倫理中無愧此良者。卽以古人目之。而其實非藉古以重。特爲傷今志慨耳。人之不古。惟其不人也。人而不爲古何憾。人而不爲人。可不深長思哉。仁者人也。親親爲大。考諸喪禮。飲酒食肉。復寢在旣禫之後。而以觀於今何如也。如以儀節無當禮意。食稻衣錦。尼父於宰予有深恨焉。彼所謂稻錦在期以外。猶以爲是無三年之愛於父母。而以觀於今又何如耶。則今人之所謂三年。猶不敢當宰予之一面。尙何言哉。然吾不謂不學不慮之言。至今遂不靈也。嘗見食稻衣錦者。□□囿於習俗。無不安之意。而微窺其際。實不能甘。夫不甘卽不安之芽。特世教衰而迷於其故耳。大要今與

古之不相及。總是流俗之權重。而良心不能自現。卽實抱其不安者。於將達未達之際。四顧流俗。而反若以變禮爲自羞也。當是時。毅然前往。直致其知。不□孤懸之竅中。被茅塞。若正卿者。勇過孟賁遠矣。先生以躬行勵吾曹。每口實正卿。不啻說項。吾輩而躬逢正卿。不敢不自謂有緣也。觀感之益。較得之詩書者。不啻什倍。蕭蕭原野。鬱鬱松楸。棲遲於風淒雨苦之中。奠獻於兔擾猿啼之際。行道指目。無不斷腸。矧吾輩素服先生之訓者哉。先是孫先生兩廬其親墓。不數年而正卿繼之。百里之間。名行相望。蓋天實爲綱常一洗垢塵。士生斯時。而猶然與波俱逝。恬不動於耳目。罪比泛常。當加等矣。

因筆諸絹□以志勸勉云

見鹿忠節公謚真草

明鹿化麟贈賈正卿序始吾黨未交正卿則已知有賈生云。爲人孝友。執親之喪。築室於壠上。兩楸霜柏。攜弟手一編吟誦其旁。當是時百里內外無不知賈孝子也。既而吾黨二三兄弟。從家夫子講菽聚星館中。遠近之士。爭僦屋環江畔以居。忽有負笈來者。則正卿實承母氏之命而來問業。吾黨數年所神交之人。乃今見之。正卿具忠信之資。於文事未能當下。了。了。彼固樂就人。吾黨亦愛其篤雅。爭披衷以告。亡何正卿再奉母氏之諱以歸。吾黨一再視於壠上。松花作茗。籬菜爲羹。數年所神交之地。又且見之。今歲督學舉茂才。正卿與

弟俱居上列。吾黨之士。且卜期舉杯以志喜。余乃颺言曰。正卿今日而發跡泮水乎哉。觀於正卿而知進德修業。皆屬自立。且歎暴棄者真難自解也。夫人忽忽生平。從何下手。不從大頭腦提掇。則因循潦倒。志不立而事亦不成。自揣生平。無一善狀。以堅其不自愛之計。藉口於非世所指名。以便其不肖之心。於是日用之場。無所不爭。獨於德業一途。甘爲人後。豈知志一立而賦資之敏鈍。向學之蚤暮。皆可不論哉。故世有翩翩美少。機警勝人。拈筆爲文。動成氣格。旁觀者無不期其一息千里。而忽焉墮落。不見可畏。徒見可增。此暴棄之羞。不待言者。閒有愧岐嶷之未畀。而以難自諉。遂絕望於青雲。

恨韶令之空過。而以壯自灰。遂蹉跎於白首。人或代爲置解。可未減其暴棄。不知其無志則同也。若吾正卿。非所稱受質。近魯而發憤已遲者乎。當其徘徊墓側。泣露悲煙。聊伴詩書。以抒孝思。先靈固若啟之矣。當其奉命執經。間關問業。瞻雲增感。映雪爲勞。母氏固若開之矣。當其尋章少意。析義多疑。慚問難之常勤。恐舉似之易倦。正卿亦自苦之矣。當其吾伊中夜。人休勿休。臥榻在旁。睡魔相侮。而迴旋拍案。猛於懸梁。慷慨引杯。痛於刺股。吾黨亦共憐之矣。當其書劍頻移。生產半落。路以窮而忽轉。機以漸而將靈。鬼神亦欲通之矣。今則筆奮一朝。功收三戰。色光芹藻。萼振棣棠。回首十年。造物亦

且酬之矣。向使正卿非從孝弟立脚。何所憑以自愛。或逐波流甚。則墮坑塹。安能以發憤成名。又使正卿而少年慧質。纔一伏案。便唾手飛鳴。亦無從見攻苦之功。顯丈夫之色。聖賢之言曰。集義言積累也。曰。孝弟爲仁之本。言根器也。曰。愚必明。柔必強。言百倍之志氣也。學者而不甘暴棄之差。則正卿固左證耳。雖然。吾黨又聞之矣。昔有與渾沌友善者。愛之急。而慮其不慧。相與日鑿一竅。渾沌死傷。正卿之忠信。不減渾沌。吾黨對之。自愧其儻忽。然吾黨愛渾沌。不忍鑿也。倘亦有以鑿行其愛者乎。願正卿善保之。此則吾黨二三兄弟。愛莫爲助之義云。然正卿之發憤也。實本於都尉楊君明宇。楊君

爲正卿同里人。雖居貴介。愛談品流。生平赴義若渴。聞正卿孝行。延見之。更從容勸學。適館授粲。勤劬無倦。正卿感其意。摩厲以須。問業江村。亦楊君導之也。非與人爲善之君子乎。言念斯人。輒爲三歎。

見北海亭集

〔明楊光夔贈賈正卿詩卷序〕在昔盛時。以三物論士。其法近實。說者謂得修行之士居多。一變屢變爲詞賦爲制舉業。其法寢備。說者謂性靈埋沒於辭章。志氣薰灼於功利。擷春華而忘秋實。遂不無古今之慨。余獨以爲不然。三物論士。束天下之精神才術於一途。其將焉往。彼檢押自好者。夫獨無售世之心乎。採春華幾虛矣。而真正卿學術。豈不藉此標性天

之韻。總之論人到真處。何分古今。千古名教。時爲託宿之蘧廬。唯淳然生於無所驅。油然動於不容已。斯其人不徒向當世之功令著脚跟。乃可語真行誼。則近得之吾邑賈正卿氏。正卿木彊人也。且幼而失學。獨能力行孝弟。執親之喪。確遵古禮。相繼廬墓者六年。先君慕其姓字。致之京邸。從容謂曰。子立身無愧古人。顧以力田終非子事也。讀書有益。曷圖之。因爲延師且授粲焉。更爲之延譽於縉紳先生。以作其氣。當是鄉邑大夫。輜車使者。表廬樹楔。所爲推異之者。不一。賈孝子之名。藉藉在人口頰間。正卿旣以行爲人所推。又以先君左右勸讀者甚力。益發憤下帷。慷慨負笈。叩鹿乾岳。孫鍾元

兩先生之門而請受教。顧以天質樸魯。矻矻終日。省記爲難。每當疑義互析時。尤極憤悱。旁觀者共憐之。或謂先君曰。斯人名姓既爲有道所賞識。立寵以子衿易事耳。何必強苦以伊吾。先君曰。否否。斯人眞品也。生平政不宜有一事之不眞。夫文縛而行不逮。行修而文不逮。僥倖進取。均冒也。吾願其步步踏實。彼有志者何難事成乎。至今日學力精勤。天償功苦。正卿與其弟且聯翩花萼。補博士弟子。回首十年甘苦之味。誰與知之。而先君不及見矣。余既幸正卿之有成。且以先君一日之雅。始終無負。因序其概。以俟鉅公長者。倘辱珠玉。即是提挈。或亦錫類之仁所不吝也。見舊鈔本

〔清孫奇逢贈賈正卿詩〕回首居廬日。楸松六度春。終天千載恨。孺慕百年身。容貌驚時眼。肝腸見古人。對君機巧盡。薄俗

可歸眞。

見夏峯集

〔明鹿化麟人日賈正卿侯秉虔楊惺民過訪得星字〕春風到草亭。煙柳故青青。花鳥輝人日。江湖動客星。慚余乘下澤。看爾起南溟。莫訝空山寂。丁丁尙可聽。見北海亭集

〔又雨夜同茅止生賈正卿宿太平寺二首〕風雨空山裏。驚聽一夜秋。臺荒餘落木。牖淺挂飛流。咫尺僧寮遠。微茫客夢愁。乾坤何處穩。藏壑有孤舟。此地經行慣。從來未解鞍。不因歸路阻。誰識客窗寒。雨襲懸燈暗。風高靜梵殘。有人殊念我。

炙酒已相看。

見同上

清杜越賈正卿歸里醉臥不及握別二詩志恨幾日愁添問別筵。更堪雪色送遙天。可因鄰釀能縛客。自懊牀頭吏部眠。元擬幼安能痛飲。千秋誰分說河梁。總緣僵雪耽高臥。肯爲伊人故態狂。

見紫峯集

又賈正卿廬墓卷。日月驚丸跳。松楸愼并深。溪山偏映骨。天地得無心。卷裏秋煙廠。原頭暮雨侵。阿咸嗔滅性。餘毀怯遺襟。

原注猶子程言

踵事竟殞廬居

見同上

又正卿廬墓卷久缺。附名值官安慶。題此當驪歌云。爾卅載高堂夢裏真。秋煙遺築迥風塵。誰憐清白承先意。聊倚孤蓬

泗水春。白髮青衫百不干。龍池剛道一彈冠。不因化碧堪

憑弔。縱是蓮花幕亦寒。

原注郡忠臣左光斗國士目君

見同上

卜善士進義

固安鄭志篤行傳。卜進義。字近樓。公主府人。天性樂善。度量過人。慷慨好施予。而獨不喜浮屠。每歲捐穀數百石。以賑貧乏。或以券相質。輒笑而焚之。曰。吾原非責償也。遠近待以舉火者。指不勝屈。秋成時。田禾被人攫取。無所計較。有某姓負債累百。將鬻其女。進義代納。使之完聚。嘗遇人盜伐園木。聞丁丁聲而遠避之。恐慙愧驚墮。仁慈寬厚。一方重之。壽八十二。子宋儒。孫兆麟。曾孫景超。峻超。漢超。粵超。皆貴顯。僉以爲積德之報云。

固安文獻志
幾輔通志列傳下進義。字近樓。慷慨好施予。每歲捐穀數百石。以濟貧者。或以券質。笑而遣之。有某姓者。負債累百。索逋者盈門。計無所出。將鬻女。進義心憫之。爲償其逋。宅邊樹園一區。有伐其枝者。聞聲輒趨避。懼其見而慚也。秋收時。或攫其田間禾。知之不與較。其仁厚類此。年八十有二卒。

卜太僕兆麟

固安縣志選舉表下兆麟。字麒生。澄清坊人。明崇禎十五年舉人。十六年進士。清順治二年授直隸獲鹿縣知縣。准廕一姪入監讀書。薦剡六上。行取授兵部主事。歷陞員外郎。郎中。太僕寺少卿。因公註誤。降三級調外用。補廣東市舶提舉。司提舉。山東

萊州府同知。康熙七年致仕。

固安縣志封贈表下宋儒。庠生。以子兆麟貴。誥贈奉政大夫兵部職方清吏司郎中。妻王氏。誥贈宜人。

卜參議景超

固安鄭志人物傳下景超。字其旋。萊州府同知兆麟長子。康熙十一年舉人。十八年進士。由四川安縣知縣。授戶部主事。陞員外郎。改調禮部郎中。提督貴州學政。後補雲南永昌道參議。廉靜謙和。博洽著述。凡歷官所至。教育人士。無間蒙養。

四川通志名宦傳下景超。順天固安人。康熙十八年進士。二十三年知四川安縣。平訟獄。免徭役。募民開墾。悉心撫字。在任八

年行取授主事。遷郎中。出爲雲南永昌道參議。所至以廉能稱。

卜參議遺著

今存碑記一首 序一首

修三元禪林碑記

右碑今在古城另載本編金石文存卷

白田鄭氏譜序

從來源遠流長。萬里沛滄溟之澤。根深枝茂。千章聳若木之榮。物理固然。人事彌烈。是以楚靈均之稱苗裔。衍自高陽。蘇明允之叙本支。勒諸亭石。蓋祖功宗德。家乘與國史並隆。而子燕孫詒。啟後借承先俱重。倘非誌牒。安辨箕裘。粵聞白田鄭氏世業詩書。傳家忠厚。不交世俗。岐南之高節羣推。自許功名。子直之

芳聲可慕。聿修厥德。宜乎瓜瓞綿綿。長發其祥。故爾芝蘭奕奕。但歲月滄桑之屢變。舊譜漸荒。况宗支子姓之日繁。新猷難泯。必賴後賢之仁孝。續緒維慤。始彰先烈之崢嶸。流傳斯久。伏維蕉溪老父。臺性真以摯。情深而文。天有瑞雲。儼若當年仁表。草名書帶。居然今日康成。布政先賢。念欲爲忠臣。必求爲孝子。紹庭遠望。期不負家學。乃無負官箴。爰尋墜緒之茫茫。緯以宏詞之纚纚。類分十四。行行星日輝煌。義蘊萬千。字字珠璣。潔潤典則首錄。不讓柳河東之家規。圖譜最詳。何殊遷太史之世紀。本源先分衍。親殺攸序。準乎九經。封蔭次知非。恩寵思酬。本諸三省。懿行弗替。允矣地義天經。異政長留。大哉上致下澤。覘書香

濟濟三途並奮盛世風雲。存駢散纍纍。半職各沾王家升斗。由書種以及闡教。一經傳德。率資畫荻熊丸。自著述以逮讚揚。萬丈騰光。允足家絃戶誦。既無微之弗載。且有美之必書。遵鼻祖于始遷。數十世之垂統。詒謀瞭如指掌。歷耳孫而下引。幾萬輩之紹聞。繩武惕然警心。從茲孝悌益篤。于無窮。抑且麻蔭相承。于有永。所當瑤編玉軸。珍重比于球圖。錦襲牙籤。榮光昭于雲漢者也。景超顓預寡學。弇鄙少文。聽尙書履聲。羨世德之裔必貴。觀巨君制作。知敦族之報寢昌。敬贅駢言竊媿蛩吟之響細。濫塵典冊。聊附驥尾而名彰爾。康熙四十八年己丑仲夏上浣。

右見康熙固安鄭志藝文

卜侍御峻超

固安縣志選舉表卜峻超。字仲升。萊州府同知兆麟次子。康熙十一年拔貢生。十七年舉人。二十一年進士。考授中書。轉內閣典籍。陞戶部主事。員外郎。江西道御史。巡視北城。協理江南道。巡視福建鹽課。差滿巡視中城。

福建鹽法志職官表卜峻超。順天固安進士。康熙四十年任福建巡鹽監察御史。

卜教授大川

固安縣選舉表卜大川。雍正十年舉人。十一年進士。任大名府學教授。

鹽山賈恩紘直隸通志卜大川。乾隆元年丙辰科進士。見國子監清進士題名碑。舊志謂雍正十一年進士誤。

卜教授遺著 今存詩一首

如意

摩挲須問意何如。到手元憑自展舒。敲擊不煩斜在抱。指揮無定半籠祛。歡遊易酒尋燈後。嘆笑窺雞柱頰餘。事與心違常八九。頭銜雖美卻成虛。

右見穆得元漸于集附良朋惠寄

卜貢生大醇

清陶樑畿輔詩傳卜大醇固安人。貢生。

固安縣志選舉表卜大醇道光間歲貢。

卜貢生遺著 今存詩二首

秋意

山川生爽氣。秋意動遙空。雁宿臨池月。琴鳴隔牖風。千家試砧杵。一葉下梧桐。白露依稀墜。團團蘭桂叢。

秋興

老圃秋將晚。閒亭對夕陽。黃花一夜雨。紅葉半林霜。燕去風簾冷。鴻來夢澤長。沿溪數株柳。不耐舞腰涼。

右詩二首見畿輔詩傳

楊縣令寬學

固安鄭志文翰傳楊寬學。順治二年歲貢生。善屬文。嘗修邑志。亦擅書名。授陝西扶風縣知縣。年九十七卒。

劉主事源澄

固安鄭志選舉表劉源澄。順治五年舉人。九年進士。任陝西合水知縣。陞戶部雲南司主事。理鳳陽倉儲。兼管正陽關稅務。典廣東鄉試。

清貢舉考略劉源澄。字劍津。固安人。順治九年壬辰科進士。授戶部主事。康熙八年己酉科廣東鄉試副主考。

又封贈表劉餘慶。以子源澄貴。贈文林郎合水縣知縣。妻吳氏贈孺人。

劉主事遺著

今存詩二首

元日新晴

元朝元日靜年芳。青帝青郊詠載陽。窟宅龍文春欲動。雲霄鳩羽暖將翔。東南大海風煙靜。西北高天日月光。瑞靄卿叢占史奏。太平天子自垂裳。

寄兄子璟

按選舉表劉璟順治十一年恩貢。任山西高平知縣。陞陝西蘭州知州。

割雞游刃在高平。又喜旌陽夾鹿行。數月汝稱真刺史。十年吾自舊琴聲。斗牛五夜須看劍。春水三江可濯纓。從此青雲當萬里。區區安飽又何營。

右詩二首見縣志藝文

張縣令應科

附祖睿哲

固安縣志選舉表張應科字顯之當渠里人順治八年舉人十年進士廣東合浦縣知縣

廣東名宦傳張應科直隸固安人順治十六年進士十八年令合浦蒞任三載清廉剛直實心爲民康熙元年遷界竭力維護保全實繁

合浦縣志名宦傳張應科順天固安人順治己亥進士十八年知合浦縣事蒞任三載清廉剛直實心爲民康熙元年內差遷界竭力維持保全甚多解組歸日士民扳轅涕泣不忍言別且祝之曰張公再來是天有眼使非有得於人心者烏能如此

興化縣志名宦傳祖睿哲順天固安人康熙元年任興化典史守官清慎陞福建巡檢

廷琳按祖巡檢姓名及仕蹟縣志均失載

辛縣令樂舜

固安鄭志人物傳辛樂舜字紹唐康熙八年舉人九年進士授江西南康知縣卒於官循績懋著邑紳爲之勒石建祠

南康縣志名宦傳辛樂舜直隸固安進士康熙十九年任知縣捐修學宮二十年十月卒於官人甚思之

劉老民尙清

固安縣藝文志固安知縣徐天德巡幸紀事康熙三十三年歲

在甲戌暮春之朔。皇上幸霸州。回鑾道經東安北寺堡。固安西化莊老民劉尙清。扶杖往觀。跪迎道左。上見之大喜。問年齒幾何。尙清以生于明萬曆十八年對。上嘉其百有四歲。出白鏹賜之。復命侍衛大臣送歸本村。令備錄姓名年庚。及子若孫等名。垂紀國史。以傳後來。嗣駐蹕禮賢莊。又命侍衛大臣賚捧御帽御裘。暨皇長子三子四子頒賜衣服靴鞮。思此田間野老。得覲天顏。遇至奇也。聖天子眷顧頻切。賚予有加。恩至渥也。皇仁廣被。白叟蒙庥。壽國壽民。卜年卜世。運至昌隆。而風至淳古也。微臣謬膺司牧。遭際熙時。爰建百歲之坊。用紀一時之盛。不揣愚昧。系以贊詞。

粵稽邃古。民氣樸魯。飲鑿食耕。安於井伍。養老介眉。可封比戶。維我皇清。熙皞復覩。其仁如天。覆冒下土。減賦蠲租。秋助春補。宵旰靡寧。咨詢疾苦。咫尺龍顏。觀者如堵。百歲愚氓。匍匐拜舞。恩賚頻加。冠裳黻黼。人瑞國祥。福歸聖主。華祝侈三。箕疇備五。於萬斯年。受天之祜。

固安知縣鄭善述曰。按是歲御道未出固安境。乃有百餘歲老人。越境瞻仰。遽荷天恩。賞賚紀名。傳爲盛事。不可謂非固安之佳話也。

隨孝子宗印

附張進寶

寇進忠

固安鄭志孝友傳。隨宗印。東洋屯人。親歿廬墓二年。縣令張安

世賜匾旌獎。

〔畿輔通志列傳〕隨宗印。固安人。親歿廬墓三年。孺慕終身。士論翕然。

〔固安鄭志孝友傳〕張進寶。官莊人。年十四父卒。家貧。爲人傭以贍母弟。比弟長。竭蹶爲娶室。進寶竟鰥居終身。前令有孝友天篤之額。

〔畿輔通志列傳〕張進寶。固安人。天性孝友。年十四父歿。弟幼。進寶傭於人。得值以養弟。泊弟長。積餘貲爲之授室。而自鰥居終身。人以為難。

〔固安鄭志孝友傳〕寇進忠。弟進孝。廂藍旗人。駐防固安。性友愛。室中妯娌不睦。常欲析居。絕不爲惑。每聞口角。進忠輒呼天泣曰。妻可續娶。弟不可復得。吾寧無婦。不傷手足也。婦亦感化。前令旌以匾額。曰友恭化室。

吳孝子春

〔固安陳志孝友傳〕吳春。圈頭村人。丐者曰瞽。因妻與母不和。遂棄妻子。令異居。而已與弟奉母居。弟爲人傭。春丐乞。自食粗惡。以善者奉母。二十年不變。後得二子。家頗饒裕。人以為孝之所

致。亦見順天府志先賢傳

〔畿輔通志列傳〕吳春。固安人。病瞽。有妻不得於其母。遂屏妻子。令異居。而自與弟奉母。弟傭力富家。春行乞於市。得食則供母。

已取惡者。二十年如一日。雖甚饑不敢先嘗。後舉二子。人以為純孝所致。

田孝子士魁

固安陳志孝友傳。田士魁。蔡家村人。十歲失怙。號痛幾絕。母慰之曰。兒不為吾慮耶。哭乃止。自是每號泣不敢令母知也。家貧力耕奉母。母病篤。刺臂血和藥進。病頓愈。逾年母喪。哀毀三年。未嘗有笑容。幼未讀書。粗習古人詩句。即於父忌日感賦云。生時未及養。祭物何堪獻。晨昏莫報恩。永作終天恨。蓋天性語也。鄉人劉進才等具其行于縣署。縣令朱瑞金給匾旌之。子發庠生。孫書年廩生。

又見順天府志先賢傳

畿輔通志列傳。田士魁。固安人。十歲失父。哀號幾絕。母慰之曰。兒不為吾慮耶。哭乃止。自是飲泣不敢令母知。家貧力耕奉母。母病。刲臂和藥以進。病尋愈。逾年母歿。持喪三年。毀瘠踰禮。士魁幼未嘗學。及長。粗通章句。於父母忌日。感賦云。生時未及養。祭物何堪獻。晨昏莫報恩。永作終天恨。蓋至性語也。

廷琳按該村田氏。立有極大石坊。為我縣中鉅蹟。昔年頻過往其下。忘記即為孝子立否。姑誌此以俟考。

宋孝子印奇

附李九祥及弟延英

楊直政李思聰

孫延增侯壽善

固安鄭志孝友傳。宋印奇。馬莊里人。母病每夜禱天。願以身代。

刲股進母。病頓愈。

按畿輔通志作李印奇誤

固安文獻志
又李九祥。禮讓店人。母疾百藥不瘳。割股以進。三日卽愈。縣令陳祝升給旌。

又楊直政。固城村人。母病劇。割股療親。尋愈。縣令管承忠給旌。又孫延增。弟延英。宮村鎮人。母王氏。苦節三十餘載。患疾醫藥罔效。延增兄弟默禱于天。同心割股。疾卽大愈。縣令張安世給匾旌獎。

畿輔通志列傳孫延增。固安人。母王孀居三十餘載。奉事維謹。務盡其歡。母疾幾不治。延增與弟延英默禱於天。同割臂肉以進。疾忽愈。縣令旌之。

固安鄭志孝友傳李思聰。張村人。母尚氏疾篤。割股立愈。縣令

張給匾旌獎。

固安陳志孝友傳侯盡善。母疾篤。割臂肉作羹以進。母疾頓愈。附錄

固安舊志孝友傳論道以中庸爲貴。如志中割脅刺臂割肘割股。乃賢者過之之事。不可奉爲常法。蓋謂割肉啖親。倘或因傷致殞。必重父母思子之痛。卽幸而不死。亦足傷親情也。然孝子愛親。何所不至。當親疾危篤。苟有足以致其愈者。雖粉骨碎身而亦爲之。又何有于其脅其臂其肘其股哉。且其至誠惻怛。原不計其身之死。而但求其親之生。亦安知其爲過耶。夫以肌膚之痛而不暇顧。則其平日之竭力事親也可。

知。今人好貨財私妻子。每至父母而輒恠。聞孝子刺臂割股。必有深悔其爲而不可以爲人者。薑桂大黃。其性雖偏。然足以起大寒大熱之疾。厥功甚鉅。孝子之奇行。亦猶是也。自元哈都赤以下諸人。孝雖過中。而足以感發人心。聞者莫不興起。嗚呼。是足以千古矣。

石國學廷柏

附王珂

邵鈞

王建基

曹諤

固安陳志篤行傳。石廷柏。桃源村人。監生。乾隆初立義學。聘名師。招村人入塾誦讀。

又王珂。小營村人。監生。施地二十畝。爲村中公費。

又邵鈞。廩生。孝友忠誠。每施惠不問其人姓字。交友必擇善類。

閭里稱善人焉。

又王建基。好善樂施。厚於戚黨。終身不倦。

又曹諤。監生。蒲頭村人。縣令吳給急公樂輸匾額。

高茂才際可

固安陳志篤行傳。高際可。字會侯。增廣生。世居北關。嘉慶十八年。教匪林清之變。畿輔戒嚴。知縣何貞召際可辦理防堵軍務。事竣。奏准給急公好義匾額。道光七年。勸捐義倉穀石。紳民皆信其公正。樂於輸將。直隸總督那彥成給睦義勤公匾額。子然熙孫承恩承惠承憲俱庠生。一門孝友。爲邑人所推重。

于茂才觀海

固安陳志篤行傳于觀海。外河村人。嘉慶年間廩生。品行端方。學業優博。醫卜星相之書莫不通曉。家甚寒素。養親獨能曲盡其孝。親喪哀毀骨立。葬後每祭必涕泣。凡動靜語默一無或苟。皆以功過格自律。年四十餘卒。鄉人至今思之。

畿輔黃志列傳于觀海。固安人。嘉慶初諸生。家貧讀書養親。旁及醫卜星相之術。無不通曉。居親喪哀毀骨立。每祭必涕泣。平生立身以功過格自律。年四十餘卒。

張處士顯

固安陳志篤行傳張顯。門鐵營村人。安分守禮。出言必信。道光初河決歲饑。顯出藏粟減價散糶。不足則謀于有力者以貸。村人又爲人排難解紛。里人賴以息訟。子樹基字小岐。道光二十六年舉人。樹勳庠生。

馬善士倫

附子獻圖

色克圖

文玉

固安陳志篤行傳馬倫。柳泉村人。謹厚好施予。初居河北馬家村。其族有居柳泉村者。家素封。無子。招倫嗣焉。倫卒。河北兄弟欲分其產。將訟之官。親鄰皆爲不平。倫子獻圖曰。骨肉爭訟非厚道也。與之千緡。其家世寬厚類如此。鄉里有善人之稱。咸豐四年署固安知縣。陳崇砥捕蝗履其鄉。見蝗食禾稼。獨馬氏之田無蝗。異之。以積善餘慶旌其門。

又色克圖。鑲紅旗人。駐防固安。原任防守尉。懿言矩步。有古長

固安文獻志

者之風。
又文玉。字琢如。性行粹美。精岐黃術。爲人療病。概不受謝。其曾孫慶祥。咸豐五年舉人。現官刑部主事。

劉義士宏道

附張世福

王老肥

固安陳志篤行傳。劉宏道。庠生宏量弟。乾隆二年在村外道中拾銀百餘兩。攜赴縣堂呈官。以待覓者。縣令韓國瓚賜拾金不昧匾額。

又張世福。知子營人。家貧。一日晚出。拾路遺錢票數紙。計大錢一百千文。歸告其母。母曰。如有人尋問。當還之。次日聞係本鎮義興號所遺。悉還之。謝之數金。力辭不受。

又王老肥。性鈍口吃。一日能行三百里。家貧務農。遇集市賣麪營生。嘗拾市上銀七兩餘。遺者哭尋於道。老肥趨問。失銀數符。悉還之。

畿輔通志列傳。劉宏道。固安人。乾隆二年在村外拾遺金。獻諸官。官旌其門。又張世福者。夜行拾遺金。歸以奉母。母曰。我家故貧。遺者暴失財。必有性命憂。盍返諸。世福謹受教。又王老肥者。家貧事農業。嘗拾市上遺金。遺者倉皇失色。老肥趨問。如其數予之。其人以數金謝。力辭不受。

王教諭灝

咸豐固安陳志文翰傳。王灝。字白水。號素濤。雍正七年己酉科

副貢生。少有文譽。性恬淡。尚氣節。前令鄭善述王者輔。皆設榻待之。而未嘗干以私也。嘗課徒東安。主人遺以妓。灝正色拒之。家徒壁立。晏如也。乾隆二十九年。選深澤縣教諭。卒於任。

王教諭遺著

今存詩二首

和左緘三暮春對雨書懷

香泥輕踏步休辭。覓句尋芳兩得之。柳外畫眉煙作黛。花邊織錦雨爲絲。戲吞新水魚喁亂。慣剪濃雲燕羽差。漫道留春春不住。一春美景盡歸詩。

人日立春

日滿松牀景色新。易年未幾又交春。盡收粟烈還天地。重布陽和與世人。歲月頻增仍故我。辛盤尚可敬嘉賓。醉時取鏡閒相對。春在朱顏且脫巾。

右詩二首見穆得元漸于集附良朋惠寄

附錄

清穆得元寄王白水二十韻客館詩思澀。端由久索居。春園誰秉燭。冬雪獨乘驢。酒可經旬斷。棋仍到手疏。四時空獻景。滿架但陳書。賞析憑惟友。推敲剩有余。詎關才已盡。只覺興無餘。硯匣時時合。奚囊每每虛。尋僧持竹杖。覓客遣柴車。在處無知己。令人頓憶渠。登樓常眺望。對月復躊躇。露白驚鴻雁。池清索鯉魚。神馳摩詰里。夢造右軍廬。流水南還北。浮雲

國朝文獻志
捲更舒。余懷長渺渺。君意豈如如。益壽強加飯。驅愁漫臥蓀。
課徒延道德。教子廣名譽。律老應添細。心雄不減初。孤峯千
里峙。兩地百般胥。鳥語留簷久。蘭香入座徐。何時聯好會。酬
倡永相於。見漸子集

又和白水秋夜吟。月落枕常欹。花開燭漸短。良夜迢迢足抽
思。欲賦卻休無所感。羨君天賜筆姿奇。又手能成數韻詩。入
室古人應把臂。望風流輩走如馳。東籬曾辱步屐過。風月無
邊人兩個。沾得酒來爲詩鉤。吟得詩成爲酒佐。爾時箕踞復
科頭。目中那辨有全牛。捉筆水流花爭發。擲筆風捲霧同收。
珠璣錯落紙上走。唐宋集中問誰有。即如昨者寄新詞。貂完

眞個難續狗。而我才減作詩艱。况復詩高難仰攀。蒙君相邀
不相棄。每每拉我闖詩關。燈下步詩詩已就。欲寄詩篇重話
舊。莫學阮籍哭途窮。諺云苦心天不負。君不見灤西草堂空
數椽。杜公眞如不繫船。高學應須勝許渾。那是湖邊二頃田。

見同上

又送王廣文白水之任深澤。君去矣。我思之。思君不見君。各
在天一涯。方城之陽松柏孤。濱水城中桃李腴。墨池雨未澤
萬物。腹笥經已訓諸儒。翹首望君至。禾正油油木蒼翠。此行
君兮應得意。到官莫忘尺書寄。每當秋風起兮鴻雁飛。我正

思君君須記。

見同上

又寄王廣文白水故人相隔久。近况復何如。正有南來雁。堪傳北地書。碧煙春野合。落月夜庭虛。勞我神馳處。已臨摩詰廬。見同上

王教諭永昭

固安縣志選舉表王永昭。曲溝鎮人。乾隆三十六年舉人。授樂亭縣學教諭。

清史夢蘭樂亭縣志王永昭。固安舉人。乾隆五十四年任樂亭縣教諭。

王教諭遺著

今存詩十一首錄七首

詠雪二首用東坡北堂題壁韻

天花散處影纖纖。積素凝寒氣最嚴。柳陌非春偏舞絮。梅林不
鼎自調鹽。江心釣叟蓑兼笠。驢背詩人帽折簷。余亦學吟呵凍
管。寒窗試解兔毫尖。
紛紛繞屋噪飢鴉。戶外稀來長者車。窮巷蕭條人臥雪。寒林點
綴樹生花。詩尋灞岸添幽興。賦就梁園擅大家。再疊北堂書壁
韻。還將雙手幾回叉。

詠風花雪月四首

飄南發北又西東。一氣吹噓遍太空。萬里江河須破浪。何當乘
得此長風。

洛陽千頃鬪繁華。共道芳菲未有加。爭及文章生色處。連篇爛

漫筆生花。

歷亂寒空飛玉屑。飄林妬煞梅花潔。古今多少素心人。清白由來一片雪。

皎皎冰輪升海碣。團團水鏡明天闕。不須道術學梯雲。願駕仙槎重泛月。

奉和蘇思泉府尹曉出古北口用原韻

屹屹雄關野望通。加衣振轡傲西風。一輪曉旭融人意。百道流泉沁客衷。柳色啣來濃淡綠。楓林染就淺深紅。愧當好景匆匆去。辜負秋山態不窮。

右詩七首見穆得元漸于集附良朋惠寄

唐同知慶餘 附李維明

固安陳志文翰傳唐慶餘字裕亭乾隆五十一年副貢生。五十四年舉人。著有授受存愚。增補左傳類對賦管韞山侍御弟子也。任河南許州州判。陞睢州州同知。

徐世昌大清畿輔書徵小傳略同

又李維明道光二十七年歲貢生。厚重寡言。耽讀好問。著有詩書禮三經便蒙。及四書訓便蒙等書。

劉義士學志

固安鄉土志任恤傳劉學志字伯仁北小營村人同治六年旱雹鄉民飢窘惻然憫之捐穀數百石給同村與鄰村之困乏者。逮豐歲食粟者相約貸還概不受鄉人感之私共鐫送齒德兼

優匾額彰其美。

曹中翰江

曹樹殷七世祖岷源公家傳曹江字岷源固安曹氏宗老傳聞先世自延慶州遷此年代久遠莫能徵也世居縣治東北之曹興莊康熙中移居固安城東門內明故始祖諱平始祖妣氏段祖諱某邑廩生父諱某碑石譜牒殘缺失考母氏侯繼母氏王家世業儒父兄弟二人父居次伯父某十三歲入邑庠有子准字徐又母氏侯與伯母同胞姊妹又爲同堂姊妹同心同德一門雍穆當時稱之公年十二喪母事繼母盡孝養清初近畿各縣地經圈占家業因之零落父幼時棄儒業經營生計望子姪

輩力學尤切公發憤讀書凡六經史漢性理古文無不探討中康熙二十六年丁卯科舉人銓授滑縣教諭四十六年丁父憂四十七年春營新阡於縣城東南伐石樹碑備誌其詳至今二百餘年得略知先代世次者賴有此也五十三年邑令鄭善述續修邑志公時以候選中書在籍參預其事弟洵雍正元年癸卯科舉人堂弟淮鄉舉後不久逝世堂姪運以康熙五十三年甲午科舉人任宣化府懷安縣教諭陞授湖北荊州府公安縣知縣調煩漢川縣兄弟叔姪先後同登鄉榜一時稱盛公兄弟四人子幾人不可考孫昌齡邑庠生厥後家漸衰落移徙無定至公之曾孫人驥又遷居曹興莊故里焉

國朝文獻志
七世孫樹殷曰。余家發迹。自岷源公始。其畫像爲叔祖房奉祀。不謹失傳。栗主又因年深。傳粉剝落。字蹟無存。惜哉。惜哉。惟公所書南張華關帝廟碑。字畫完好如新。余每瞻謁其下。流連不忍去。茲謹就墓碑邑志暨傳聞各事。綴拾其大略著於篇。以示後世子孫。勿忘先德之所自云。

廷琳案是稿及後詩稿寄示稍遲。故續印於此。

曹茂才松齡

固安曹氏家乘曹松齡。字頊年。乾隆時縣學生。

曹茂才遺著

今存詩十九首錄十三首另見三首

永定河二首

黃河如帶繞孤城。拍岸波濤入夢驚。礪土立能肥萬頃。水籤常是遞三更。風搖駭浪扁舟坼。灘擁流沙堤堰平。若問滄桑曾幾度。年年四月一澄清。

驚濤無際共天長。翠柳金堤範森茫。浩浩魚龍憑浪湧。滔滔沙石與流忙。波聲偏趁風聲壯。水色遙連日色黃。未作明時舟楫用。門前慚愧對汪洋。

春夜聞雁

嘹唳入長空。隨陽雁北征。社前春尚冷。簾外雨初晴。影泛紗窗迴。音涵玉漏清。穿雲千理遠。叫月一輪明。古壁鐙方暗。高樓夢未成。何緣桃李月。天際作秋聲。

春柳

碧柳嫩於絲。風流張緒姿。綠煙迷粉蝶。金穗縮黃鸝。眼細隨風展。腰纖帶雨欹。尋芳駐馬處。折取最柔枝。

仲春雪

昨夜流雲星宿稀。曉來四望雪霏霏。征鴻暗訝霜毫重。舞蝶應羞粉翅微。竹徑融泥埋砌草。松軒積素冷苔衣。化工為兆豐年瑞。頻散瓊華壯帝畿。

詠菊二首

老圃花開不及春。素枝霜彩倍精神。偶然風動東籬影。疑是知

音送酒人。白菊

冷豔紛披作態時。東來佳氣繞疏籬。寒花不共秋容淡。偏向霜

前組綬垂。紫菊

麥浪

郊原一帶碧油油。麥浪參差沒雉頭。未得黃雲鋪繡野。且看綠水蕩平疇。風聲誤認波聲壯。鋤影偏疑棹影稠。莫把綸竿閒悵望。箇中何處有鱗遊。力田十年頻遭旱潦

同宗周午後訪陳資始先生

結伴訪知音。庭槐漸轉陰。詩成芳草暗。坐久落花深。攻錯他山益。儀型此日心。明朝肯惠顧。隄畔共行吟。

琬兒病

獨把鎗花取次敲。娟娟涼月下桐梢。都緣天性相關處。病眼更殘睫未交。

疊韻答蘇漢章

千載東坡有後身。風流瀟灑半天真。共知書畫成雙璧。誰信弓刀敵萬人。絲竹有時同遣興。棋歌無技不超倫。多才莫嘆終沈滯。此去龍門待化鱗。

雨中謁陳少府

北四工縣丞

天際雨濛濛。登臨興不窮。沙隄秋色裏。寒署暮煙中。土瘠民情古。官閒野望通。牀頭新釀熟。留客醉春風。

秋晚野望

荒原獨徙倚。縱目亦晴空。秋水平林外。寒鴉落照中。灩灩菘葉露。瑟瑟麥苗風。早歲忘機事。前途任化工。

曹茂才鶴齡

固安曹氏家乘。曹鶴齡。字鳴九。乾隆時縣學生。

曹茂才遺著

今存詩二首

地界老柳

分疆畫界計何深。陌上亭亭古木森。常令楚秦同守分。不教虞芮暗相侵。枝柔那禁披朝露。幹老偏宜趁暮陰。寄語東君多護惜。風霜幾度到而今。

植柳青田慮已深。亭亭界畫自嚴森。祇將老幹千年在。不許貪

夫半點侵。雨葉經春還作態。風條踈地尙垂陰。可憐初種人何往。空見當時樹至今。

劉主事事彙補遺二條

〔甘肅通志名宦傳〕劉源澄。直隸固安人。由進士順治十年知甘肅合水縣。寬嚴並濟。輸納愈於曩時。修葺城垣。塹壕。人畏其法。無有不如期立至者。

〔清法式善清祕述聞〕康熙八年己酉科廣東鄉試正考官禮部郎中陳景仁。字靜山。浙江山陰人。己亥進士。副考官戶部主事劉源澄。字劍津。順天固安人。壬辰進士。四書題。予一以貫之一句。人道敏政一句。禮下取於民一句。取中解元藍焯。大埔人。

張處士事彙補遺

附錄

〔清封博野縣教諭張樹基父顯爲修職郎文制曰。任使需才。稱職志在官之美。馳驅奏效。報功膺錫類之仁。惟爾張顯。迺直隸博野縣教諭張樹基之父。雅尙素風。長迎善氣。弓冶克勤於庭訓。箕裘不裕夫家聲。茲以覃恩贈爾爲修職郎。錫之救命。於戲。肇顯揚之盛事。國典非私。酬燕翼之深情。臣心彌

勵。

〔清封博野縣教諭張樹基母劉氏爲孺人文制曰。奉職無愆。懋著勤勞之績。致身有自。宜酬鞠育之恩。爾劉氏迺直隸博

野縣教諭張樹基之母。淑範宜家。令儀昌後。早相夫而教子。俾移孝以作忠。茲以覃恩贈爾爲八品孺人。於戲賁象服之端嚴。誕膺鉅典。錫龍章之渙汗。允播徽音。

〔清〕封博野縣教諭張樹基生母夏氏爲孺人文制曰羣工師濟。旣懋績之克昭。母氏劬勞。渙明綸而必及爾。夏氏迺直隸博野縣教諭張樹基之生母。婦職能襄。母儀並著。助內協無非之度。課子成有用之材。茲以覃恩贈爾爲八品孺人。於戲膺闔內之殊榮。用酬顧復。沐天家之曠典。爰賁幽潛。光緒五

年三月初三日。

右碑在門鐵管張氏墓
賈錫琛訪錄

固安文獻志卷十七目錄

耆舊事彙

清

楊明經廕餘

楊都尉孫

楊訓導之暄

楊學博立孫

楊檢討秀

楊訓導長子
印存遺像

楊縣令燧

楊訓導第五子

楊刺史煥

楊縣令燭

楊縣令國華

楊刺史長子
印存遺像

楊縣令輝燦

楊太守國翰

楊太守承洪祖

楊太守承湛

印存遺像并手蹟

楊太守靖

楊太守承湛長子
印存遺像并手蹟


楊處士潔

楊教諭步蟾

穆訓導得元

張縣令世桐

清翰林院檢討楊公秀遺像



清檢討楊掄升先生像詩

挹先生之貌溫潤而和平
窺先生之神冲澹而清明
昔鰲禁珥筆今誰山授經
浮雲閱變態久客無俗營
學與年俱劭身依道日亨
士望比儀鳳人瞻同景星
羣岳宗泰岱衆水趨東溟
知仁宜樂壽餘事陶豪英
康成書帶草瑞應叢階楹
太液昌文運達材培國楨
玉皇香案吏緋魚帝所旌
敢規簡傲士而沾隱逸名
吉月必朝服聖者垂前型
韡哉稽古力覽圖榮桓榮
乾隆三十一年丙戌長至日
里旬奉題

掄翁年伯大人尊照卽政

年姪薛宁廷拜稿

右詩在原像上端紙已壞損去十二字今補岱衆

水趨宜樂壽康成書太國等字未知合否

民國十七年夏六月 縣後學賈廷琳敬識

清 天 等 縣 知 縣 楊 國 華 遺 像



清署江寧等府知府楊公承湛遺像



清署蘇州府知府楊靖公遺像



楊太守仙先生墨蹟

然賢德之
意固倚有
操持富貴之
事豈能為之
損益若夫在
貧賤之辱而
有無以弄於
命一朝居家
際之先而後
後知貴狀
元將美之
賦負德果
才自遠方為
素上始一而
至不守士
而不知龍
德能而得苟
時

楊太守綬先先生墨蹟

建安之初五言勝韻文帝陳思縱博以
 騁帝王徐應剡望敏而爭馳并憐風月
 柳池充迷思禁敘酣安涼既以任氣為
 以使才造懷宿事不求纖密之巧馳辭
 競惟取昭晰之能此其所同也乃王怡明道
 詩難仙心何晏之徒率多浮淺唯恐清
 峻既之遠深故結標焉若乃應璩言一獨立
 不懼詳清義負亦魏之遺直也晉世群才
 稍入輕綺張潘左陸比肩待衡采緝於正
 始乃柔於建安或析文以為好或流靡以
 自研此其大畧也江左篇製滿乎元凡華美
 雕采而辭趣一揆莫與爭雄所以景純併
 篇擬拔而為後矣宋初文詠體有因革在
 先皆退而山水方滋優采百字之偶多價一
 句之奇先結下天友之段日群并

固安文獻志卷十七

天津徐世昌鑒定

縣人賈廷琳謹編

耆舊事彙

清

楊明經廕餘

固安陳志篤行傳楊廕餘康熙三十一年歲貢生耿介勤學教
育多功曾修補縣志

又戚畹傳楊廕餘字生之駙馬都尉春元孫都督同知光日子
任錦衣衛都指揮同知

楊訓導之體

固安文獻志

卷十七

耆舊事彙

楊廕餘

楊之體

趙莊賈氏无悶齋

固安陳志人物傳楊之暲字子陽庠生春茂之玄孫親喪哀毀骨立殯葬如禮生平不言人過而能周窮乏雍正五年由廩生舉賢良方正授廣寧訓導廣寧紳士鮮嗜學之暲捐重貲興黌宇循序教誨生徒賴以鼓舞當事服其才議薦之力辭

楊檢討秀

固安縣志選舉表楊秀賢良方正之暲長子雍正七年舉鄉試第一名八年成進士授翰林院庶吉士擢檢討陞侍講

皇朝詞林典故楊秀字掄升順天固安人雍正八年庚戌科進士散館授檢討

方城楊氏族譜楊秀之暲長子字掄升號素庵又號容齋雍正己酉科解元庚戌科聯捷進士初任翰林院庶吉士再任翰林院檢討

楊檢討遺著

今存序一首

碑記可考者一首

方城楊氏族譜序

萬物本乎天人本乎祖尊祖故敬宗敬宗故收族家有系譜所以崇本原聯同姓也關係豈淺鮮哉吾家得姓受氏自唐叔虞封少子為楊侯始後著望於弘農而占籍洛中林慮則起於東

晉時。歷千有餘年。世遠弗詳。迨元至正間。值兵變。遠祖林州公。以義勇倡於鄉。保護村落。朝廷嘉其功。授以顯職。明洪武時。北略燕趙。我本邑始祖。因扈駕卜居固安城西南大辛莊。積德行仁。椒實繁衍。至七世都尉公尙主。而我楊遂爲固安望族矣。嗣後爵秩赫奕。科甲聯綿。列庠序者近百人。皆祖宗歷代積累。臻茲遐福也。第族大戶繁。現今在城在鄉。散處離居。常經年不相謀面。從前舊譜係抄本。因遭回祿遺失。無憑稽考。以故孫重祖諱。姪重叔諱者。往往不乏。余惴惴焉。惟渙軼是懼。再從弟燭令山西。欲出養廉所餘。鐫譜以垂永久。余與再從兄煥。因族祖潔圃所錄草本。詳加釐訂。壽諸梨棗。刷印成書。廣給族人。斯譜旣成。世次朗而宗派昭。不但命名知所避忌。凡隸是譜者。咸思木本水源之義。篤恩誼。敦禮讓。勿以少陵長。勿以卑犯尊。而貴賤貧富。尤斷乎莫相軒輊焉。至於爲士爲農。人人各宜自愛。務期存心忠厚。行事端謹。出言誠實。而非道非義之爲。避之如仇。則守身卽以事親。事親卽以尊祖。俾世世子孫。有所觀法。永似續於不替。以綿我祖宗無疆之慶。是則余修譜之志也夫。峇乾隆四年歲在己未五月穀旦。十二世孫秀謹序。

右見楊氏族譜

重修固安縣廟學記

右碑在學宮戟門外西側今已泐存字無幾

附錄

〔清〕贈翰林院檢討楊秀祖琰爲徵仕郎文制曰。寵渥朝章。錫類不遺於一命。祥開家慶。馳恩爰及夫重闈。爾楊琰乃翰林院檢討楊秀之祖父。弓裘衍澤。瓜瓞綿麻。作述相承。再世式彰其祖武。淵源有自。一經早裕。夫孫謀。茲以覃恩。馳贈爾爲徵仕郎翰林院檢討。錫之救命。於戲。舊德弘昭。用廣顯揚之志。新綸特賚。永增泉壤之光。

〔清〕贈翰林院檢討楊秀祖母張氏爲孺人文制曰。禮由義起。弘孝治於中閨。命自天申。賁榮施於大母。爾翰林院檢討楊秀之祖母張氏。德懋蘭儀。光生槐蔭。珩璜作則。式垂淑慎。

之型。荇藻流芬。不振光昌之緒。茲以覃恩。馳贈爾爲孺人。於戲。鸞書煥采。合彤史以揚麻。象服增輝。荷雲章而永慶。雍正十三年九月初三日。

〔清〕封贈翰林院檢討楊秀父之暄爲徵仕郎文制曰。宣猷服采。中朝抒報最之忱。錫類推恩。休命示酌庸之典。爾楊之暄。乃翰林院檢討楊秀之父。令德踐修。義方夙著。詩書啟後。用彰式穀之風。弓冶傳家。克作教忠之則。茲以覃恩。封爾爲徵仕郎翰林院檢討。錫之救命。於戲。篤生杞梓之材。功歸庭訓。不煥絲綸之色。榮播天章。

〔清〕封贈翰林院檢討楊秀母齊氏爲孺人文制曰。壺教凝祥。

懋嘉猷於朝。寧國常布惠。揚休命於庭闈。爾翰林院檢討楊秀之母齊氏。勤慎宜家。賢明訓後。相夫以順。含內美於珩璜。鞠子有成。樹良材於楨幹。茲以覃恩。封爾為孺人。於戲。昭茲令善之聲。榮施勿替。食爾劬勞之報。慶典攸隆。雍正十三年九月初三日。

右語數四首同見楊氏族譜

楊縣令燧

固安縣志選舉表楊燧。賢良方正之暉第五子。雍正七年舉人。乾隆二年進士。官山東新城海豐長清三縣知縣。江南山陽知縣。

山東通志名宦傳楊燧。直隸固安人。進士。乾隆四年知新城縣。

改軍張開為壩。以杜啟閉之弊。重修桑公隄。立涵洞以防衝決之患。邑人勒碑紀其事。

又職官表楊燧。乾隆六年任海豐知縣。

方城楊氏族譜楊燧之暉第五子。字秉陶。號啟亭。又號淇園。雍正七年己酉科舉人。十三年考授內閣中書。管司局正字事。乾隆二年丁巳科進士。特簡山東濟南府新城縣知縣。

楊刺史燧

固安縣志選舉表楊燧。雍正四年舉人。十一年進士。任河南許州直隸州知州。

方城楊氏族譜楊燧。庠生之旺第二子。字輝斗。號邃庵。雍正丙

午科舉人。癸丑科進士。現任湖北岳池縣知縣。

河南通志職官表楊煥順天固安進士。乾隆七年任唐縣知縣。十一年任夏邑知縣。十四年任許州知州。

附錄

〔清〕贈岳池縣知縣楊煥繼祖母劉氏爲孺人文。制曰。嘉績聿隆於報最。弈世蒙庥。慈徽載著於貤封。重闡襲慶。爾乃原任四川順慶府岳池縣知縣楊煥之繼祖母劉氏。珩瑀傳芳。蘋蘩濟美。溯貽謀於閩則。繼美益彰。弘錫類於朝章。推恩並厚。茲以覃恩。貤贈爾爲孺人。於戲。鸞書賁彩。普昭一體之榮。施。馬鬣揚休。永表重泉之遺澤。

〔清〕封贈岳池縣知縣楊煥父之旺爲文林郎文。制曰。求治在親民之吏。端重循良。教忠勵資。敬之忱。聿隆褒獎。爾楊之旺。乃原任四川順慶府岳池縣知縣楊煥之父。禔躬淳厚。垂訓端嚴。業可開先。式穀乃宣猷之本。澤堪啟後。貽謀裕作。牧之方。茲以覃恩。封爾爲文林郎。四川順慶府岳池縣知縣。錫之救命。於戲。克承清白之風。嘉茲報政。用慰顯揚之志。畀以殊榮。

〔清〕封贈岳池縣知縣楊煥母劉氏爲孺人文。制曰。朝廷重民社之司。功推循吏。臣子凜水淵之操。教本慈幃。爾原任四川順慶府岳池縣知縣楊煥之母劉氏。淑慎其儀。柔嘉維則。宣

訓詞於朝夕。不忘育子之勤。集慶澤於門閭。式被自天之寵。茲以覃恩。贈爾為孺人。於戲。仰酬顧復之恩。勉思撫字。載煥絲綸之色。永賁幽潛。乾隆二年三月初六日。

右同見楊氏族譜

楊縣令燭

固安縣志選舉表。楊燭。雍正四年舉人。八年進士。山西繁峙陽曲夏縣。河南扶溝。山東單費棲霞等縣知縣。

山東通志職官表。楊燭。固安進士。乾隆十五年任單縣。二十年。至二十二年任費縣。二十六年至二十九年任棲霞等縣知縣。方城楊氏族譜。楊燭。增廣生之暹子。字玉調。號泰三。雍正四年丙午科舉人。八年庚戌科進士。初任山西繁峙縣知縣。於乾隆

二年調繁夏縣知縣。於乾隆五年調繁陽曲縣知縣。

楊縣令遺著

今存序跋一首

方城楊氏族譜弁言

夫家之有譜。猶國之有史也。國無史則續承統緒。紀月編年。無所考究。家無譜則子姓繁衍。支分派別。無所釐訂。譜之所繫大矣哉。吾宗楊氏始於周。蕃於漢晉。歷唐宋而至元明。著名顯職。兼復尚主。爵秩崇高。遂為方城望族。至我朝定鼎以來。科甲蟬聯。祖功宗德遠矣。第戶大族繁。從前舊譜。慘遭楚炬。遂致散漫無紀。燭弱冠時。即欲增訂譜系。乃以庚戌之役。命往山右。風塵鞅掌。案牘盈几。志焉未逮。已未春。嫡堂兄煥。再從兄秀。因族祖

潔圃手錄草本。相與釐訂。考核詳明。告竣後。念燭向有鐫刻之意。夏仲郵寄南安官署。燭挑燈讀之。若凡例。若恩卹。若碑記。若行略。若世圖。若世表。無不較如列眉。犁然在目。燭不揣鄙陋。校讐魚豕。鳩工劖劂。印刷成帙。徧送族人。俾各敦孝友。睦婣任卹。保世滋大。以備輜軒之採風。則我祖宗詒謀之大。垂蔭之宏。藉是以不朽。因譜成謬。則數言於簡端。皆乾隆四年冬月下澣四日。十二世孫燭敬誌。

右見楊氏族譜

附錄

〔清〕贈繁峙縣知縣楊燭祖瑛爲文林郎文。制曰。考績報循

良之最。用獎臣勞。推恩溯積累之遺。載揚祖澤。爾楊瑛乃署山西代州繁峙縣知縣。楊燭之祖父。錫光有慶。樹德務滋。嗣清白之芳聲。澤留再世。衍弓裘之令緒。祜篤一堂。茲以覃恩。賜贈爾爲文林郎。山西代州繁峙縣知縣。錫之救命。於戲。聿修念祖。膺茂典而益勵新猷。有穀貽孫。發幽光而不彰潛德。〔清〕贈繁峙縣知縣楊燭前祖母王氏爲孺人文。制曰。册府酬庸。聿著人臣之懋績。德門輯祉。式昭大母之芳徽。爾署山西代州繁峙縣知縣。楊燭之前祖母王氏。箴誠揚芬。珩璜表德。職勤內助。宜家久著。其賢聲。澤裕後昆。錫類式承。乎嘉命。茲以覃恩。賜贈爾爲孺人。於戲。播徽音於彤管。壺範彌光。膺

異數於紫泥。天庥永劭。

〔清〕贈繁峙縣知縣楊燭繼祖母趙氏爲孺人文。制曰：嘉績聿隆於報最。奕世蒙庥。慈徽載著於貤封。重闈襲慶。爾署山西代州繁峙縣知縣楊燭之祖母趙氏。珩瑀傳芳。蘋蘩濟美。溯貽謀於閩則。繼美益彰。弘錫類於朝章。推恩並厚。茲以覃恩。貤贈爾爲孺人。於戲。鸞書賁彩。普昭一體之榮施。馬鬣揚休。永表重泉之遺澤。雍正十三年九月初三日。

〔清〕封贈繁峙縣知縣楊燭父之暹爲文林郎文。制曰：求治在親民之吏。端重循良。教忠勵資敬之忱。聿隆褒獎。爾楊之暹乃署山西代州繁峙縣知縣楊燭之父。禔躬淳厚。垂訓端嚴。

業可開先。式穀乃宣猷之本。澤堪啟後。貽謀裕作牧之方。茲以覃恩。贈爾爲文林郎。署山西代州繁峙縣知縣。錫之救命於戲。克承清白之風。嘉茲報政。用慰顯揚之志。昭乃遺謨。

〔清〕封贈繁峙縣知縣楊燭母邵氏爲孺人文。制曰：朝廷重民社之司。功推循吏。臣子凜冰淵之操。教本慈幃。爾署山西代州繁峙縣知縣楊燭之母邵氏。淑慎其儀。柔嘉維則。宣訓詞於朝夕。不忘育子之勤。集慶澤於門閭。式被自天之寵。茲以覃恩。封爾爲孺人。於戲。仰酬顧復之恩。勉思撫字。載煥絲綸之色。用慰劬勞。雍正十三年九月初三日。

同見楊氏族譜

楊縣令國華

固安縣志選舉表楊國華。乾隆六年舉人。任浙江天台蕭山嘉善秀水江西分宜知縣。

方城楊氏族譜補載楊國華。字青籙。許州知州煥長子。乾隆六年辛酉科舉人。歷任浙江天台蕭山嘉善秀水。江西安義弋陽新建浮梁宜春分宜星子等縣知縣。丙子科浙江鄉試同考官。戊子科江西鄉試同考官。

附錄

傳經圖題詠。竟日胡牀坐竹陰。半攤書史半橫琴。何人寫就傳經照。者是平生一片心。把卷牀頭尙小年。文情詩興一篇篇。競言生子當如此。不負秋陰課讀堅。奉題青翁老父

臺傳經小照治弟崔謨拜稿。

又先生才如切玉刀。案牘剖決分毫毛。公退之餘經一卷。綠筠深處課兒曹。古人治經以經世。後儒車轍嗟阻滯。先生治術本治經。此意拳拳期子弟。清風一榻清復清。琴含靜趣竹無聲。豁然直與古人會。勃勃天機起妙英。青翁老父臺屬題。鏡亭徐澄。

又緩帶何冲融。科頭殊喂囁。納涼坐午陰。襪襪漫投止。清風來故人。披拂聊凭几。愛竹常思王。拜石似懷米。嚙嗜雛鳳聲。已向高岡起。傾耳欲忘言。琴書亦寄耳。誰將凡鳥題。展卷欽彼美。請歌有斐篇。還復誦樂只。烏兔弄雙丸。旋轉理可測。

畫長淨世氛。淡薄化胸臆。人事多滄桑。方寸參消息。海水浩茫茫。神山渺難即。賤子行負薪。迺在北山北。昨者接南薰。一爲嘯植。始信卷中仙。爲我開顏色。好持千里懷。遠鑒良駒德。治弟白水林有席。

[又]試才地無小。庚桑畏壘耳。治譜徑寸心。兩漢循良是。披圖誰掃素。虎頭進乎技。精神動合真。慘澹經營裏。手執一片玉。溫良坐書史。世上任炎涼。素蘊無渣滓。介石聳峻嶒。薰風竹根起。鳴琴多餘閒。一經自課子。我識畫中人。心知畫中指。奈乏陽春曲。無能歌有斐。治弟鳳水趙被拜藁。

[又]唯天曠故高。唯地厚能蓄。人生天地間。云誰多踳跼。所以豁達胸。隨境罔盈縮。傳詩傳禮總。傳芳積產積金空。積俗無須廣廈萬千間。不羨繁葩競穠郁。質營幾箇任參差。塊石玲瓏起且伏。位置有權宜。欄杆三五曲。偷得撫字。片時閒。憇來諦聽兒孫讀。兒孫讀罷議橫生。叮寧還是塵俱撲。但得奇書諳誦有傳人。琴古不妨彈調獨。對公道貌味公神。貌雍雍兮神穆穆。平生長物百不攜。遮莫磷淄一片玉。君不見見騏驥千里踏晴雲。電掣風騰誰繼躅。又不見鳳凰萬仞摩青穹。樊籠世網難拘束。聞而意已驚。既見心誠服。若從吏事探良循。只今越水吳山尙尸祝。邇來穀我婦子到洪都。樂只棠甘又蔀屋。但有清白心。夢魂爲往復。用答乎主知。因貽後昆福。幾看

瑤砌繞琪花。甬皇歷歷生新馥。里句書塵青翁老父臺尊

照治晚生吳梧拜藁

右傳經圖今藏楊氏後裔
縣訓劉孝廉柱臣借示

楊縣令輝燦

固安縣志選舉表楊輝燦乾隆三十六年舉人任山東利津泗水魚臺陝西褒城西鄉咸陽等縣知縣

山東通志職官表楊輝燦固安舉人乾隆四十七年任泗水五十年任魚臺等知縣

附錄

清池贈泗水縣知縣楊輝燦兄賡楓為文林郎文制曰委質策名榮既膺夫簪紱克家續緒光必逮乎門閭爾監生楊賡

楓乃原任山東袁州府泗水縣知縣楊輝燦之兄道足持躬情殷訓弟經傳詩禮青緇揚雁序之輝慶篤芝蘭丹綵煥龍章之麗芳徽永懋新典宜頒茲以覃恩馳贈爾為文林郎錫之救命於戲被章服以增榮聿顯友恭之義承絲綸而無忝彌彰善慶之風

清池贈泗水縣知縣楊輝燦嫂劉氏為孺人文制曰教佐義方內則允彰夫懿範榮敷閨闈朝恩宜體乎私情爾劉氏乃原任山東兗州府泗水縣知縣楊輝燦之嫂貞淑性成徽柔道協身嫻姆訓聿儲卓犖之材志稟慈微用衍熾昌之緒不昭淑慎特賁絲綸茲以覃恩馳贈爾為孺人於戲龍章式煥

令儀著美于當時。象服欽承名德益彰于奕葉。乾隆五十年

正月初一日。

右誥勅今藏楊氏後裔
劉孝廉柱臣借示

楊太守國翰

固安縣志選舉表楊國翰。乾隆九年舉人。山西安邑寧鄉山東博平知縣。陞直隸州知州。

山東通志職官表楊國翰。直隸固安舉人。乾隆二十九年。至三十一年任山東博平縣知縣。三十九年。四十年任平度州知州。鄉賢楊綬臣先生傳略曾祖國翰。字晴川。舉乾隆甲子孝廉。歷官山西安邑寧鄉山東博平等縣知縣。廣西永康州山東平度州山西霍州直隸州知州。平陽府知府。

楊太守遺著

今存詩一首

柏井驛題壁

回首西風思悄然。南天門掛斗牛邊。條峰望斷浮雲蔽。汾水聲迴驚夢捐。歷歷芳田遵禹甸。重重嵐路趨堯天。而今未問升沈事。且喜十年衣錦還。

此先高祖晴川公乾隆二十七年任山西安邑。秩滿歸里題壁之作。先曾祖未齋公書於紈扇。因得保存。緬懷高曾規矩。穆然神往矣。民國十七年上巳。玄孫楊憲恭注。

右詩楊君淑泉寄示

楊太守承湛

徐世昌大清畿輔先哲賢能傳楊承湛字閔仙固安人。家貧力學。夕就帳中。然鐙自課。頂爲之墨。嘉慶九年舉於鄉。十六年成進士。以知縣分江蘇補靖江。以母憂歸。服闋再補靖江。調南匯。南匯濱海。西連申江。幹河最要者。曰閘港。潮汐往來。歲患淤墊。自乾隆四十年以往。久失修。宰斯土者。憚費鉅役。重浚而塞者。屢矣。道光二年夏旱。江潮不至。浸成災。承湛下車。親蒞各鄉。周覽形勢。慨然曰。地方首務。其在斯乎。力請上官疏濬之。晨出暮歸。賞勤懲惰。歷五十餘日。濬河三千數百丈。深廣逾昔時。工既竣。海水盛漲。兼颶風。民居卒無恙。鄉人額手交慶曰。楊侯活我。設祠祀之。竝刊碑樹隄上。八年調元和。逾年擢海門同知。未赴。

遭父喪北歸。縣人思之。值其誕辰。繪鶴南飛圖。賦詩賡和。承湛次韻。有北向哀鴻方戢影。南飛孤鶴尙祈年之句。服闋再補海門同知。調蘇州府海防同知。青浦民因漕糧聚鬩。數千人圍縣署。大吏以承湛有德於南匯。而青浦其接壤也。檄之往。承湛攜兩僕。棹小舟。易肩輿入城。衆擁輿不得進。告以委員姓氏。曰。是前宰南匯之楊侯耶。曰然。衆謹呼曰。楊侯來。吾曹事得白矣。相率散去。承湛訊得其狀。治其倡首數人。餘悉不問。衆帖然。歷攝川沙同知。常州松江江寧知府。政績卓然。卒年六十五。

南匯縣志官績傳楊承湛字閔仙道光二年任南匯縣事。首減白銀價。尤留意水利。浚閘港。周浦塘。皆按程課工。身自董治。必

如式乃已。厥後民賴其利三十年。

蔡綸楊侯督濬開港紀略開港爲吾縣東南各圖團蓄洩要河。潮汐往來積沙易淤。道光二年夏亢旱。浦潮不至。支河盡涸。仲秋楊侯承湛蒞任。訪民間利病。慨然曰。水利至要務也。曷可稍緩。申詳大憲。於正月二十日築壩。至三月十三日工竣。共計河身三千二百十二丈。濬土七萬三千餘方。侯一餐而出。自辰至酉。徒步數十里。口授指畫。勤者獎。惰者懲。從前業佃之偷減差徭之隱庇。匪棍之包攬。咸懾息不敢逞。民始憚其嚴。繼服其明。終樂其勤懇誠篤。而恍然於一勞之可永逸也。某氏按云。是河開濬深闊。歷二十餘年尙賴其利。

南匯縣志道光三年知縣楊承湛濬開港。及北都台浦洪福橋港包家橋港。五年又濬周浦塘。深闊通利。民沾其澤。

先賢楊綬臣先生傳略綬臣先生本生父諱承湛。字閬仙。舉嘉慶甲子孝廉。辛未成進士。歷官江蘇靖江南匯元和等縣知縣。海門川沙同知。署常州松江江寧等府知府。充道光辛巳壬午江南鄉試同考官。

又閬仙公於蘇州盤門新橋河沿之半片巷。闢治廣宅百餘楹。極亭臺花木之勝。道光二十三年。庭前忽產靈芝三株。是年綬臣先生即中試第三十七名舉人。公喜而題其室曰芝秀草堂。宅內有旁屋十三間。以居戚族之貧乏無依者。而飲食起居。一

固安文獻志
律待遇從未豐已薄人。當日合宅親丁戚族及僕役媼婢等共達八十餘人之多。可稱廣廈大庇矣。公好爲詩。遺稿散佚。先生蒐輯手鈔成一卷。顏曰芝秀草堂劫餘草。公宰南漚。浚治閘港。最有聲。會風災。居戶賴是獲免漂沒。活民無算。旋丁父憂。去任。數載後。邑人思之。彌篤。值公誕辰。紳士李吟香仿宋代慶祝蘇長公故事。繪鶴南飛圖。賦詩唱和。裒然成冊。公和韻有北向哀鴻方戢影。南飛孤鶴尙祈年之句。去官雖久。感人之深如此。

楊太守靖

固安縣志選舉表楊靖。字青士。道光二十三年舉人。

先賢楊綬臣先生傳略先生諱靖。字綬臣。晚號瓠叟。順天固安

縣人。由附生中式清道光二十三年癸卯科舉人。充覺羅官學教習。咸豐三年癸丑科特試內閣中書。入閣行走。四年補缺。充國史館分校。本衙門撰文。委署侍讀。八年俸滿。特分江蘇。以同知補用。九年充己未科並補行乙卯科江南鄉試同考官。十年署理蘇州府知府。兼督辦團練。籌畫軍事。鎮撫得宜。十一年保升知府。特旨賞戴花翎。同治初年。歷充如皋絲捐局總辦等差。十二年充海運津局會辦。保加三品銜。旋充蘇城保甲局會辦。光緒以後。歷充淞滬釐捐局總辦。海運滬局總辦等差。以勞績保升道員。遇缺題奏。特加二品頂戴。庚寅辛卯間署理鎮江府知府。公正廉明。謹慎勤勞。愛人以德。治獄如神。凡地方公益。以

及各項慈善事業。無不捐廉提倡。竭力維持。民到於今稱之。先生好學之大儒也。愛才若渴。識力尤高。充同考官時。凡所薦舉。皆江南佳士。至今門下桃李。盡爲廉能之吏。其守鎮江也。下車伊始。首先課士。以觀文風。寶晉書院考試月課。以文字雅正。事理通達者列前茅。榜發。皆潤州知名士也。賞拔不虛。邑人傳爲美談。今諸士或著作等身。或高位顯達。樂得英才。先生有焉。先生秉性和平。宅心寬厚。而治家極嚴。內外肅然。事親至孝。出必告。返必面。無論寒暑。必盛服入見。不命之坐。不敢坐。不命之退。不敢退。循循然有禮焉。同父兄弟三人。先生居長。次諱翊。字贊臣。次諱昱。改名同炳。字耀卿。怡怡一門。友愛甚篤。先生視

諸姪輩如己子。同一待遇。毫無差異。教養以至成人。歷久而勿懈。今皆馳譽政途矣。先生曾祖諱國翰。字晴川。舉乾隆甲子孝廉。官至平陽知府。祖諱賡颺。字未齋。以川餉軍糧勞績。叙鹽提舉。父諱承澍。字菱田。以知縣銓選。本生父諱承湛。字閔仙。復舉嘉慶甲子孝廉。辛未成進士。官至常州江寧等府知府。胞叔諱逢春。原名承範。字洪士。又舉同治甲子孝廉。歷官河南襄城等知縣。均工詩善書。時人爲之語曰。祖孫科名三甲子。父子守令兩江南。一時傳爲佳話。且先生四世伯祖恭餘公。於順治戊子舉孝廉以來。世世相承。罔或有替。益見德門科第之盛。先生祖未齋公。少負奇氣。至性過人。長而工書善射。喜爲慈善事。

遇貧乏與急難者。必竭力資助。而後愉快。事後取所積契券。悉焚之。先生仰承家訓。忠厚相傳。凡戚友有借貸者。求無不允。或署借券至。先生輒當衆并喚諸子來前。示而燬之。曰。爾曹不可希望索債。若恃索債度日。是無志也。焚此以絕爾曹之望。人貴自立。爾曹勉旃。戚友見之。更爲驚感。先生善述祖志。此即仁孝之一端。清季仕宦子弟。每以納粟得官。先生嘗諭諸子曰。余家科第連綿。已二百餘載矣。爾曹宜自勵。須由考試得官。毋使前緒中墜也。又曰。余家爲關西後裔。世守四知之誠。清白吏子孫。固已然矣。子孫清白吏。尤其要焉。爾曹子孫。宜恪守毋或忘。告戒諄諄。垂爲家箴。其他嘉言懿行。未可殫述。先生父閬仙公

宰靖江。先生生於任所。故以靖爲名。而字綬臣。迨公守毗陵。先生已舉孝廉。年僅二十三。巍科早掇。足徵善讀父書。先生工八法。酷似顏魯公。名聞大江南北。尤善飲。求書者以佳釀獻。輒對客揮毫。且曰。昔揚子雲草太玄。有載酒問字者。此固吾家故事也。其豪雅如是。蘇州鎮江名山大川。古蹟勝境。皆有先生所題之聯匾在焉。先生仕蘇凡三十六年。初爲合肥李文忠公撫蘇時所賞識。後爲南皮張文達公撫蘇時所倚重。蘇州之直隸會館。即拙政園故址。亭榭池塘。竹石花木。風景至爲幽勝。南皮創其議。先生任其事。而南皮以政務殷繁。無暇握管。先生書法與之相似。故館中所懸之匾額聯對。凡題子青相國之名多出

自先生所書。鎮江金山之至游堂。有子青相國所贈一額。亦先生代題者也。蘇鎮等處。搢紳諸家。凡求得先生一聯一扇者。皆視同拱璧。寶而藏之。先生好爲詩古文辭。有稿若干卷。名曰五石瓠齋集。取莊子五石之瓠大而無用之意。謙詞也。故晚年自號瓠叟。又自鐫有一小印。文曰薇省郎官。蘇州太守。每於所著詩文。所書聯扇。以此小印印之。先生故於蘇城。有某君挽曰。顏魯公政事文章。爲書名所掩。韋蘇州風流儒雅。以詩酒自娛。此可想見先生一生胸襟之坦白。品學之清高矣。先生生於道光元年辛巳四月二十日。故於光緒十九年癸巳。享壽七十有三。元配何氏。賢慧能詩。有留春無計。因春瘦之佳句。附錄

於五石瓠齋集中。繼配胡氏。仁慈知禮。生子三。長寶書。

字玉森。更名濤。字潤。

齋官江蘇知縣。次子鴻書。

字子儀。更名憲。號淑皋。

光緒壬寅補科優貢。官金

壇縣知事。充國務院諮議。三子鳳書。歷充州縣錢幕。

贊曰。先生上承厚澤。下貽遠謀。明德之後。必有達人。文子文孫。或著述傳世。或幕席蜚聲。或專脩工業。或研求科學。胥趨身於文明學業之中。而哲嗣淑臬大令。由考試得官。公正廉明。謹慎勤勞。愛人以德。治獄如神。一如父風。近今列席中樞。參預國政。仕宦顯達。未可限量。諸哲孫頭角崢嶸。濟濟多才。先生之清德。後嗣之食報。千百世家庭幸福之長。其有涯乎。

楊太守遺著

今存墓誌銘一首。序二首。可考者一首。詩八卷。三百餘首。錄四十五首。

銘一首

序二首

可考者一首

詩八卷

三百餘首錄

固安文獻志

卷十七

耆舊事彙 楊靖

十九

趙莊賈氏无悶齋

蘇州府海防同知署江寧府知府閔仙府君墓誌銘

右楊氏後裔家藏原鈔本另載本編耆舊碑誌卷

五石瓠齋詩稿自序

僕十歲始學爲詩。然未敢爲父師知也。則竊吮筆墨而識之。十四師指階下秋海棠命賦。操觚立就。師譽之。私心益喜。益學爲詩。間與同學友相倡和。亦彙而存之。道光癸卯年二十三。秋捷歸。則舉少時所爲詩。淘汰而纂削之。十留其三。名之曰卬角集。是後六上春官。來往於燕趙齊魯江浙皖豫之間。多感喟唏噓之作。曰公車集。咸豐三年癸丑。倬直薇省。珥筆之暇。吟興益豪。曰紅藥集。戊午出外爲軍司馬。兩載之間。得詩凡若干首。曰聽

鼓集。而總彙其前後曰卷石山房詩存。咸豐十年蘇城之陷。先人遺書數萬卷。悉遭兵燹。拙詩亦燬焉。同治二年城復。復歸於蘇。每憶舊作。輒筆錄之。全章斷句。十不得一。暇更足成。曰燼餘草。續以近歲之作。曰磨盾集。刻鵠集。芸香集。鏡吹集。鼓吹集。石請集。易其總名曰五石瓠齋詩稿。綜若干首。古來詩集之最富者。曰香山自寫詩文藏之名勝。前後七十五卷。詩筆大小三千八百四十首。陸放翁詩初編四十卷。再編通前八十五卷。凡四千數百首。可謂多矣。然其傳世初不僅係乎多也。古來以淹貫稱者。劉歆總羣書而奏其七略。左思作三都而紙貴洛陽。可謂博矣。然其傳世亦不僅在乎博也。或曰如子所言。得毋爲空疎

寡學者所藉口乎。予曰不然。詩以寫吾性情。而使媿雅者不敢議吾之俗。博奧者不敢議吾之陋。沈雄者研鍊者不敢議吾之薄。且易則取精華而棄糟粕。其詩之醇乎。是非余所敢希也。是則余所心慕也。遂書而自序於簡端。同治十有三年甲戌。綬臣楊靖自序。

五石瓠齋詩稿後序

士君子不得以其所學見諸行事。而徒欲以風雲月露之詞。傳於後世。抑末矣。漆園叟曰。名者實之賓也。吾將爲名乎。雖然。名之傳不傳。亦正未易言也。三百篇思婦勞人之什。當日祇以抒其胸臆。並姓名不著。非靳傳之久遠也。而千百世之下。尊之爲

經。家絃而戶誦之。陶淵明栗里歸來。或飯不足也。而三杯之後。長歌短詠。不加藻飾。至今奉爲圭臬。楓落吳江冷。因全集藏拙。而雋語獨留。重陽風雨。爲催租人敗興。而隻句遂著。此皆無意於傳而傳者也。鉅卿偉人。名流碩彥。彫肝毓腎。錯采鏤金。哀然大集。疊案盈尺。不轉瞬而蝨殘鼠齧。舉其名字。未有知者。吁可慨已。亦有零編斷簡。冷落市攤。遇知音者。百錢購去。補殘校謬。壽之梨棗。死灰復然。枯木重春。名之傳不傳。蓋亦有數存焉。而非人之所能爲也。僕老矣。安仁拙宦。已無伏櫪之思。吟詠一道。自維譴陋。難質大雅。亦如春鳥秋蟲。時至自鳴。所以彙而鈔之者。徒以數十年離合悲歡之跡。零落過半。存此區區。於風濤雨

晦之餘。舊夢重尋。自怡自歎而已。他日用覆醬瓿。所不計也。光緒十有一年乙酉長夏重鈔再序。瓠窠時年六十有五。

常熟曾氏明瑟山莊集序

右係楊君淑泉惠函示及文缺

贈戈石林

臧雪樓曰。盛唐之節。沈宋之道。

有女班姬慧。無兒伯道傷。漸看彫兩鬢。何以慰高堂。蘭弱不禁露。桐孤易感霜。年年壓金線。作嫁為誰忙。

乞假南歸渡江

時金陵潤州俱未復。楊見山峴曰。京口一聯。神似新城。臧雪樓曰。收句從老杜萬方頻送喜。母乃聖躬勞得來。不

見痕際。

慙此辭鷓鴣。中流擊楫還。氛迷京口樹。雲斷秣陵關。日月催人

老。風塵媿我閑。捷書今送喜。誰侍紫宸班。

秋懷

楊見山曰。極似少陵。

秋懷忽不懌。極目渺愁予。蓬梗天涯恨。觚棱曉夢虛。近惟詩是遣。常恐酒難除。十歲終貽悔。奔波誤讀書。

右詩三首見五石瓠齋詩稿一燼餘草

樂府鏡歌四首

晉書樂志曰。漢時有短簫鏡歌之樂。其曲有上之回戰城南。南巫山高思悲翁等凡二十餘名。列於鼓吹。多序戰陣之

事。及魏受命。改其十二曲。使繆襲為詞。改上之回為克官渡。戰城南為定武功。巫山高為屠柳城。思悲翁為戰滎陽。以時事地名為題。仿為四章。以歌武功。

克嘉定

楊見山曰。西涯樂府。又曰。四首不必規撫字句。而音節自然。入古。夫惟大雅卓爾。不羣。固知仿肖妃呼豨口吻。真笨伯也。

克嘉定。發新劄。將卒精銳如雷霆。一擊賊膽破。三日不得醒。前時官軍若豚鼠。聞賊輒退見賊奔。臨淮壁壘嚴。旌旗色一新。逆

國朝文獻志
曾未敢小嘗試。大起悍衆思并吞。初戰賊鋒挫。再接賊壘平。追
奔逐北亡其魂。萬民懽呼額手頌。計日擒渠掃穴歌功成。

戰江口

三江口。扼我吭。黠賊悍衆來奮爭。三王併力。併力忘釁心。旌矛
蔽野。毒氛彗雲。磨牙獠獠思噬人。我軍當之心不驚。以寡禦衆。
計定而氣沈。一鼓衆心奮。再鼓嚴令申。十盪十抉賊勢崩。批亢
擣虛倒戈奔。江波流血屍山屯。計功論賞不自有其勳。日奉天
子之威靈。

收吳郡

收吳郡。吳郡千年錦繡城。一朝陷作逆渠窟。虺蛇晝遊豺虎蹲。

湖山何清雄。負隅堅且深。公輸之攻功難歲月成。桓桓隴西公。
恩威布。智勇沈。將士志一而力并。先翦其羽翼。繼攻其心腹。復
我疆宇王路平。襁負歸來。婦子欣欣。殺人救人王者兵。

復毘陵

復毘陵。破竹勢已成。更遇頑梗。抗我威棱。將士飲血。骸骨相拄
撐。我公身督戰。號令重申明。遊魚釜底終難勝。順者崩角逆尸
橫。拔歸瘡痍千萬人。殘黎何子遺。愁苦幸更生。似聞切切語。我
公戢武方施仁。

擣衣曲

楊見山曰。秋風能千里。羌無故實。自然獨有千古。非鍊鍊者所能夢到。

清怨耿遙夜。含情擣秋砧。秋風能千里。不敢送君聽。君聽能斷

腸更令傷妾心。殷勤寄衣使。休言此夜情。

企喻歌

楊見山曰。齊梁大語。

朝炊刁斗食。夜抱寶刀眠。壯氣噓作虹。中宵長亘天。駿馬常苦羈。健兒常苦飢。蹀躞風塵下。長鳴秋葉飛。

長信宮

楊見山曰。初唐。

明月一以照。庭宇生光輝。自來長信宮。秋陰常淒其。微軀亦何惜。高寒難久虧。願為下土冒。掃此雲霧霏。

小遊仙十首

吳約盒博曰。各有寄託。偶儻可喜。楊見山曰。唐賈三昧。

柯爛棋方一局圓。壺中日月自緜延。滄桑三見塵生海。卻道麻姑尚少年。

駕鶴驂鸞謁帝居。龍吟虎嘯滿清虛。琴高仙去猶凡品。獨坐人間赤鯉魚。

朱鳥窗前許竊窺。憐才王母笑舒眉。仙厨不少胡麻飯。方朔如何令苦飢。

流電方看笑口開。無端威震忽驚雷。天公喜怒真難測。未許凡人解得來。

到底天公解愛才。謫仙猶許住蓬萊。夜郎一自長流去。應悔塵寰醉酒杯。

廣寒仙會舞霓裳。衆樂聲高夜氣涼。多事玉環私記譜。那從天上學宮商。

十二樓頭靚曉粧。吹簫遊戲白雲鄉。仙人亦自殊勞逸。織女機絲夜夜忙。

仙桂香飄滿帝都。廣寒宮殿嫩寒初。只知天上春常在。亦有秋風到玉除。

曾聞劉阮偶仙姝。弄玉吹簫事有無。天上果然無禁束。姮娥何事影常孤。

璇宮夜織錦初成。爛漫雲霞五色明。休怪人間矜一第。由來天上重科名。

擬古贈答詩二首

楊見山曰。起四句直上規十九首矣。

男兒生懸弧。四海猶比鄰。握手悲歧路。念此平生親。恩愛傷契

闊。欲語不得伸。征鳥爲我翔。驪駒爲哀鳴。子歸無我念。軀名善自珍。相期同白首。石泐志不泯。去去復歸來。相見雜悲欣。不記傾蓋時。誼舊情如新。願爲連理樹。無爲秋天雲。

西風何蕭條。吹我行子衣。行子去不顧。想見心中悲。可憐心則悲。歡笑猶昔時。不見陽鳥迅。頽光忽崦嵫。壽命會有盡。功名不可爲。我有百斛酒。清冽甘如飴。留待子歸來。相與斟酌之。毋忘夙夕約。路隔心不睽。羣飛尋巢鳥。日夕歸安枝。

右詩十九首見五石瓠齋詩稿二鏡吹集

木青山人詩草題詞

楊見山曰。神似寒郊。

耽吟李長吉。溷迹趙邠卿。心苦少歡語。才高多雅聲。卷餘滄海

氣氛靜闔閭。城無恙。家山在。奚囊句好賡。

月夜聞笳圖

楊見山曰。收筆高岑佳境。

萬馬不鳴天近曉。西風獵獵笳聲裊。鐵騎前山正合圍。憑陵殺氣迷秋草。元龍意氣湖海豪。跳身履虎窺其巢。歸來聚米畫形勢。借箸前籌空爾曹。功成幕府論勳績。爛額焦頭稱上客。長揖軍門彈鋏歌。倚樹臨風自岸幘。榻來筮仕申江濱。酒酣抵掌更談兵。忽聞鬻粟城頭發。枵觸中宵萬里情。

獨遊洽隱園

楊見山曰。神似四靈。

奇峯寫雲勢。老樹學龍拏。叢竹濃鋪影。幽蘭淡著花。懷人依落日。餘興寄流霞。惟有多情月。相隨更到家。

亡室何恭人不嫻吟詠而流覽者多時有好句去春感賦

小令有留春無計因春瘦之句清明上冢悼成一絕

留春無計因春瘦。往歲人憐覓句愁。今日何堪春似舊。萋萋芳草滿山邱。

右詩四首見五石瓠齋詩稿三磨盾集

夜泊新安

楊見山曰。可入瀛奎律髓。吳約齋曰。清新俊逸。

帆背銜新月。船唇拂野花。篙迴驚宿鷺。棹急趁歸鴉。亂定村初復。年豐酒易賒。莫辭行役苦。小醉傍山家。

擬李義山

莊中白忠誠曰。西崑名綺豔。多有所指。雖上法少。陵實深得風人之旨者。擬作迷離。倘不讓玉谿生一步。

漫擬乘槎太液池。王喬飛鳥早相期。身難隱豹時方泰。技學屠

龍悔已遲。曉夢迷離。防蜨幻。春工辛苦。問花知。呢喃莫怪梁間燕。多少癡鶯喚醒時。

閒述擬放翁

楊見山曰。置之劍南集中。不辨緒葉。吳約齋曰。得放翁之神。

水國蕭疎紅蓼殘。忘機魚鳥亦相安。臥遊新製瓜皮艇。充隱還成筍箨冠。撫劍每增豪俠感。供花權當美人看。平生無補人間世。學圃聊分稼穡難。

右詩三首見五石瓠齋詩稿四刻鵠集

五人墓

吳約齋曰。胎息自古。楊見山曰。古樂府佳境。臧雪樓曰。血篇但叙當日情事。不加議論。以末一句結出全神。以上字字皆有握拳透

爪之勢。真畫龍點睛手也。而先生之性情胸襟。亦於是手見。

堂堂幕府闍寺奴。忠義乃在市井徒。一朝奮擊衆情怒。千秋留

得五人墓。緹騎何洶洶。銀鐙手擲聲琤琮。威燄薰灼生祠崇。小人何知魏上公。萬姓伏。緹騎怒。萬姓怒。緹騎伏。還汝銀鐙噪且逐。一羣豺與狼。斯須飛血肉。上公聞之心膽縮。兇燄爲此遽收束。飛章告變伊何人。窮治五人亡其身。惜哉當日何不一場決。殺徒紛紜。廷琳案五人之事。至今無不痛詈蘇撫毛一鷺爲闖黨者。然考明實錄。載毛與巡按徐吉所同上之封章。於蘇民則矜矜多方保全。於緹騎則嘗其因需索而激變。並非一味殘殺蘇民以媚權閹者可比。不知千百

送人之衡州

臧雪樓曰。當與龍標方駕齊驅。楊見山曰。只絕句二十八字。而章法句法字法。純乎唐音。允推壓卷之作。吳約齋曰。氣韻超邁。

十幅蒲帆楚客舟。江亭風葉助離愁。寄書莫倚南飛雁。聲斷衡

陽浦上秋

金陵曉發

楊見山曰。一起與大江流日夜。並有千古百戰十字。粹然唐音。潮聲警殘夢。可入摘句圖。收亦不辭。四十賢人。不著一屠沽兒矣。

國朝文獻志

卷十七

著舊事彙 楊靖

一十七

趙莊賈氏无悶齋

雄城瞰石頭。日夜大江流。百戰此餘壘。六朝同一邱。潮聲警殘夢。山色帶平疇。破曉挂帆去。好風來送舟。

逡巡曲送友之洛陽

楊見山曰。神似太白。

酒盡復逡巡。清歌送遠人。請看洛陽市。無復昔時塵。弱柳能延日。餘花解殿春。相思更相望。江上有歸鱗。

右詩四首見五石瓠齋詩稿五芸香集

旅館醉賦

楊見山曰。選樓為句。

修途及三春。旅懷耿秋思。行行殊未已。暮倦且停轡。時鳥喉新簧。繁葩媚幽致。如何遊子心。不與春風被。勉言酌清酒。酣歌發紆意。歌成變徵音。聽者感嘘噓。鬱志無歡聲。早為離心醉。

响嘷碑

莊中白曰。橫空盤硬語。直可平視昌黎。楊見山曰。此體創於中唐。近代金石家專肆此派。其實本不可廢。不過不必專以此見也。作者

運實于虛。典竅之中。庸淵雅緒。不必以摹韓始為善好。吳約齋曰。妥則排稟。摹韓便似韓。

唐堯草昧天地荒。妖魅白日紛縱橫。天生聖禹秉符瑞。豢龍押虎日月光。刊山導水到南服。衡嶽作鎮尊炎疆。紀功响嘷辟不若。大書深刻巔崖旁。奇文倒薤匹符篆。作隊鸞鳳爭迴翔。孫祢科斗祖卦畫。繆結龍蛇昭雲章。風雨不蝕日不鑠。丁甲所護神所防。蠹空綿歷數千載。劫火辟易莫敢傷。好事摹拓遺此本。神完字足光輝煌。舌橋目瞪不可讀。魂驚膽悸徒徬徨。古人好古拘咫尺。周宣獵碣詮釋詳。日昧巨寶誰過問。坐令萬古成痴盲。不如贗物巧模鑄。商盤周鼎侈揆張。或者神蹟天所祕。苞符未

許俗子量。撫摩終日。二歎息。寶山枉入空回橋。

閨怨

吳約齋曰。清嚴淒惋。語妙含蓄。楊見山曰。起似四傑。收似仲初。

春風樓外花發時。春風樓上曉鶯啼。鶯花有信隨春至。客子春來胡未歸。對鏡慵妝弄金爵。恰見釵頭雙鳳索。手拈釵鳳暗傷神。試點油花向天卜。吉兆庚庚神有靈。眉梢喜色動盈盈。下階獨向花間立。剝啄何人側耳聽。

右詩三首見五石瓠齋詩稿六鼓吹集

漁洋秋柳詞。感福王而作也。漁洋先世世襲簪纓。位高祿重。漁洋入國朝。掇魏科。登臚仕。去明亡未久。睠睠故國之思。不能自己。當時或遇舊人。或談舊事。或聞天寶宮人流落。

民間皆不可知。詩作於涕上。而起句先標明白下。其旨可見。中間帝子公孫。皆有所指。青荷黃竹。桃葉桃根。或指宮人。梁園愁侶。則指舊人。幽情蓄念。不敢質言。故借秋柳以寄意。低徊悽惋。使讀者不覺唏噓之無從。予前有續貂之作。祇借秋柳寫一時之感。茲更擬四章。專明漁洋旨趣。仍

用原韻。

莊中白曰。纏綿悠揚。感唱無盡。大有新城風韻。

金城眺罷愴芳魂。濃蔭曾依舊戟門。飛絮隨風悽斷夢。柔條和雨拭啼痕。甘瓜誰種青門路。離黍空傷獨夜村。休向嬋娟鬪眉嫵。細腰宮裏事難論。

隋隄誰與唱繁霜。憔悴青蒲共晚塘。喬木風煙悽玉壘。故槐門

第憶青箱。江頭蹀躞思遺老。杜宇悲啼感蜀王。悵望永豐殘照裏。更無人說大功坊。

蛺蝶香銷舊舞衣。靈和宮殿是耶非。雲眠太液春波杳。宿閣前星曉夢稀。去國斷鴻江驛宿。辭秋旅燕謝庭飛。門前五樹柴桑種。彭澤高風願已違。

蘭擘蕙怨絕堪憐。披拂長條已化煙。板渚傷心歌絮絮。琅邪大道恨綿綿。六朝金粉同陳迹。一色青旗異昔年。莫更言愁向司馬。龍池夢繞五雲邊。

右詩四首見五石瓠齋詩稿七石請集

落葉四首和洗蕉老人原韻

喬柯接葉舊巢鶯。寥落無端愴序清。幾夜霜華催晚景。四山風雨動秋聲。飄零大樹將軍去。蔽芾甘棠父老情。颯颯哀吟礎響答。驚迴孤雁悵南行。

補隙山光日夕佳。衆峰競秀若安排。黃花繞圃堪娛晚。紅樹千雲好放懷。豁達一庭添氣爽。掃除三徑把愁埋。歲寒松柏長葱蒨。恰對前楹手種槐。

幽窗忽見月華臨。每憶森森夏日陰。高幹舊承穠露早。交柯遠蔭大雲沈。謝庭柳絮吟懷逸。南國蘋蘩禮意深。畫荻傳經辛苦夜。歐陽讀罷感秋心。

花時珍重護金鈴。愛惜春光坐小亭。物變候驚霜信報。山棲愁

向酒邊聽蕉心尚捲經堪寫柿葉供書筆不停愧我先零蒲柳質勉將華語駐頽齡

僧文高小像

獨立絕塵想曠然超九鴻無眼耳鼻舌四大皆虛空百丈須彌山拾納芥子中古今渺瞬息萬劫環無窮藐躬已懸疣胡乃贅一童矧茲身外身負累巨虛蚤乞師下轉語妙諦開愚蒙上人豎一指覺悟參天龍莊嚴千萬像那介我佛胸秋潭各有月圓靈自昭融

右詩五首見五石瓠齋詩稿八倦羽集

以上各詩楊君淑舉代選

楊處士潔

固安陳志文翰傳楊潔字蓮修性穎異好誦讀年逾七旬猶不釋卷亦工書畫

畿輔通志列傳引永清志楊潔字蓮修固安人善屬文父官閩

中

按縣志楊維語乾隆十七年舉人曾官福建永福安等縣知縣疑即爲處士之父

潔爲閩產父歿後潔自閩歸

田園廬舍悉爲族黨侵蝕介然不與爭寄食戚家日以詩畫自娛晚構草堂數椽僅蔽風雨處之泊如也

清劉仲篋耆舊詩序楊布衣蓮修先生名潔固安人流寓於永清遂家焉明駙馬都尉春元其先世也父官閩中先生生於任所父卒羈留數載始歸途次值高宗純皇帝南巡凡輿區名都皆大興工作而餘杭之湖壩一帶爲尤勝先生徜徉其間者累

月。當是時世運昇平。湖山生色。先生以名家世胄。畫船簫鼓。吟嘯留連。以抒其蘊蓄。雖鐵崖子不是過也。歸後廬舍田園盡爲族黨所侵沒。先生介不與爭。寄跡於戚舊間。日以詩畫自娛。晚歲構草草堂。茅屋數椽。僅避風雨。環堵蕭然。先生泊如也。與先兄詩橋爲文字交。爲之賦草堂歌以紀其事。先生次子號古愚。亦善畫。頗能承其家學云。

廷琳按楊處士晚家永清。與其縣劉詩橋癡雲兩先生爲文字交。當在道光中年。我縣咸豐中纂志。距處士時代甚邇。乃所爲小傳。只寥寥數語。且於姓上誤刊邵字。遂令處士誤蒙他姓。不知當日何以疏忽至此。迨光緒中修順天

府志。又不加詳察。誤以處士爲明季人。列之明代隱逸傳。

有此兩誤。而處士之姓字。愈沈埋無人知矣。

近人陳去病所著明遺民錄亦誤載之

廷琳既得詩橋癡雲兩先生所贈處士詩。爰錄入編中。以存處士梗概。又惜處士所著詩集。屢次託友朋尋訪。竟無從得。殊爲缺憾云。

楊處士遺著

今存詩二首

七十自述

不聞金經不鍊丹。都將人事付天緣。安貧守拙從吾分。也過浮生七十年。

右見永清劉仲篋耆舊詩注

過三蘇祠

按蘇公洵曾授文安縣主簿。故今文安縣屬蘇橋鎮有老泉祠。而二子亦祠祀焉。然當日老泉實未嘗履任至此。此詩疑即處士過

蘇橋鎮作也

三蘇未到此。乃有三蘇祠。安石惠卿生同時。當世人民羞道之。嗚呼丈夫立身好自持。君不見三蘇祠。

右詩係永清劉君雲孫即劉仲儀先生之孫得之張君鶴皋口述者

附錄

〔清劉伯埴草草堂歌贈楊蓮翁〕人家三五荒城東。亂鴉噪樹蟬吟空。碧蘆嫋嫋搖清風。茅椽三五縛當中。中有高人把卷讀。讀盡少年成老翁。翁是於今隱者流。襟懷颯爽凌清秋。撐腸拄腹富書史。詩情畫格高無儔。學成不肯拾青紫。汗漫

翻為萬里遊。萬里遊。良不惡。颶風瘴雨潭州泊。深箐煙暝搏山魍。黑浪雲愁揖海若。豈必防身倚長劍。生平俠氣森磅礴。忽憶西湖北。走越挂帆卻看揚州月。半壁江山筆底收。笑探奚囊驚突兀。歸來賣畫長安陌。掉頭不作侯門客。村居漸喜人不識。春深草長幽人宅。啼鳥聲聲喚晝眠。孤吟坐對晴窗碧。世人囂囂我獨默。誰歟晤語呼子墨。身外浮雲一笑看。草名堂良亦得。噫嘻人間萬事俱草草。風簫過耳鴻印爪。子雲之亭蔓草荒。浣花舊迹風煙杳。惟有琅琅身後名。到今更比當時好。翁今已著等身稿。懸知舉世珍鴻寶。翁與此堂俱不老。嗚呼翁與此堂俱不老。

見舊鈔本鶴巢詩集現為余无悶齋所藏

清劉仲篋者舊詩詠楊布衣蓮翁瀟灑楊蓮翁吾鄉老詩伯
畫派擬倪黃詞源挹元白先生名家子仕宦盈臺閣獨以松
鶴姿棲遲老巖壑予年方弱冠問字時相索適值草堂成先
生新卜宅天然好隱廬四面風塵隔柴門欵水隅茅屋偃林
薄榆柳蔭軒楹桃李護籬落幽窗置疎檣兩扉少丹牖矮几
播殘書四壁無圻堊高張無絃琴清唳孤棲鶴藜牀坐已穿
竹杖方未削皤然白髮翁風骨自超卓形貌頗清癯精神彌
矍鑠倒屣相承迎雅不輕稚弱媿媿述生平傾吐無捍格先
生爲予言往跡渾如昨年方二十時萬里曾爲客八閩吾舊
游維揚及吳越蜀岡探晚梅虎邱弄秋月錢塘曉乘潮西湖

春待泊白嶽松石奇巖瀨江山邈炎嶠瘴癘深溟海波濤惡
十年汗漫遊揚州夢已覺翻然返故園廬敞無棲託寄迹戚
舊間努力日勤學毫素抒性靈詩書濯魂魄生計苦蕭條情
懷甘落寞人事付天緣浮生七十適見先生七十自述身健而心閒世

間清福澤壯哉先生遊清矣先生格無何邁微疾了不事醫
藥依枕囑兒孫汝曹毋驚愕吾今委形去渾若風吹蕻詩卷
寄中麓畫稿貯囊橐緘識好收藏毋使蠹魚咋詩人楊蓮翁
五字銘吾爵至今墓木拱樹石尙闕略豈無綿薄力念之心
慚作詩成抱膝吟老梅花始著幽香沁肝脾至味耐咀嚼默
契歲寒心相期會冥漠

見舊鈔本著舊詩

楊教諭步蟾

固安陳志文翰傳楊步蟾字桂山號秋浦嘉慶三年舉人授交河縣教諭性嗜學湛深經史課士先孝友而後文章嘗曰士人首重立品次重經術舍此不講徒以揣摩之技弋取科名非務實者所尚也知縣唐維釗稱其學問深醇制行高潔無愧士林楷模。

穆訓導得元

固安陳志文翰傳穆得元字東軒天性孝友與人無忿爭事好讀書著詩集數卷知縣李光理稱其有盛唐諸老遺風童試時聘署中閱卷。按聘署中閱卷乃陳公瑞李公光理也詳見下。餽以米辭不受以廩貢選延

慶州訓導以作養人才為任舉孫金度優行士論翕然嘉慶六年恩賜舉人七年會試恩賜國子監學正

畿輔通志列傳穆得元字東軒天性孝友好讀書與貢生卜大醇俱以能詩聞著有漸于集三卷。按當官延慶州訓導。

穆寶巖漸于集跋先祖東軒公係吾曾祖崑山公第四子也生於雍正八年幼而穎異出入孝弟言行謹信里中嘖嘖咸歎異之好讀書日四行下年十二三興之所至即能榻管為詩十五

入縣學十九食廩餼教諭戈公錦泉。按戈名雲巖景州人乾隆元年舉人十二年間任固安教諭舊志

載失薦舉優行按鄉土志謂乾隆間應鴻博未卜選考鴻博試在乾隆元年東軒

於學使者及試而未錄也。本縣童試知縣陳公。按縣志名琮迎吾祖閱

卷。往返再三始就。及事竣。贈以米二十石。不受。其後李公鄒公

按李名光。理安徽廬江人。鄒名試。湖北漢陽人。

履任。俱待以客禮。嘗索詩稿。而吾祖窮年兀

兀。日以筆硯爲事。絕不干以私。雖值嚴寒盛暑。未嘗頃刻廢學。博通經史子集。旁及地理醫書畫法。而於詩尤苦心孤詣。所集諸家詩不下百餘種。各加手校。有疑義必精覈之。在國子監肄業時。屢冠諸生。修道堂朱公語同寅曰。此無雙士也。及鄉試。屢薦不第。識者咸嘆惜焉。家素貧。以硯田餬口。遇貧乏者。脩金不取。尤善誨人。遠近受業者數百人。一經陶成。率成知名士。即士之未列門牆者。亦無不以吾祖爲依歸也。然生平謙謹和平。不炫已長。不揭人短。故雖學問淹博。而猶循循乎如下學。然晚年

官延慶州教職。地極清苦。而吾祖清潔自矢。年俸外絕無妄思。更爲因材施教。鼓舞獎勵。文風蒸蒸日上。門生孫金度等相繼登第。在官六載。大計考語云。力健政勤。守堅才裕。宣化守蘇公王公口北道索公。皆相推重。常有詩唱和焉。嘉慶六年辛酉科鄉試。恩賜舉人。七年會試。恩賜學正。八年正月卒于官署。年七十有四。官民遠近。無不焚香叩奠。靈輿歸。護送數十里外。吾祖學行之感人。大率類此。所著有四書文詞賦序傳若干卷。皆精湛切當。不襲詞華。而於詩尤得宋元及本朝諸大家神髓。顧以貧不能問梓。謹藏篋中廿餘年。有吾父執友崔香圃。孝廉名蘭者。亦吾祖門下士也。懼遺稿久而散失。會同執友馮孝廉順等。

捐貲付刊。謹選登各體詩三百餘首。成漸于集四卷。而當時與吾祖酬答諸友之詩。舊額曰良朋惠寄。亦附刊焉。方今國家以經義取士。次及於詩。鼓吹休明。聲律固駸駸乎駕唐而軼宋也。今香圃先生釀貲梓行是集。上以鳴一代人文之盛。下以公梓里同人之好。而且使吾祖畢生著述。得以信今傳後也。其惠我穆氏。豈有涯哉。道光七年孟春。孫男寶巖敬跋。

穆訓導遺者

今存賦一首 詩三百餘首 錄二十首 附見他卷五首

振足賦

思振足於天衢兮。季女贈余以綠華。乘姑射之雲氣兮。挽滄海之飛霞。結瓊瑤之玉佩兮。衣龍綠之寶紗。渴則漱石髓以如膏。兮。饑則餐棗實而如瓜。引洪崖爲知己兮。借橘史爲一家。朝發軔於縣圃兮。夕周覽乎天涯。俟遊觀之旣倦兮。徐焉駐足於山了。

右見漸于集四

題畫二首

斷嶺遙分翠。參差怪石連。人蹤不到處。流水自潺湲。青山深復深。雜樹遮山麓。山麓樹罅中。彷彿見茅屋。

官舍閒吟

邱壑平生志。宦遊仍在山。起居青靄裏。出入翠微間。槐繞官衙綠。花當講席殷。課餘無別事。門趁夕陽關。

官舍夜吟

廣文官獨冷。此地恰相宜。塞近迎寒早。山深得月遲。課書頻翦燭。看劍幾傾卮。吾自尋吾樂。良宵一詠詩。

土木道中口號

漠漠平沙迴。蕭森古木秋。荒煙連遠戍。野水入閒流。故壘何時壞。殘垣不復修。幸逢太平日。禾黍滿田疇。

夜坐

夜坐驚秋早。高齋雨過涼。半鉤斜月影。一段晚花香。爽借風爲扇。柔憐露浥裳。此中有佳趣。得意可能忘。

春晚

一歲春將歇。幽齋興不違。掃花香上帚。折柳絮沾衣。靜喜鶯留久。閒宜客到稀。有時詩得句。高唱發天機。

夏日即事

近因幽興極。全與世情疏。掃徑苔凝帚。耘花蝶避鋤。爐煙看裊篆。鼎沸聽盤車。倦臥時成夢。人來送異書。

歲杪

客館虛留滯。驚心又一年。髮增愁裏雪。硯廢病中田。柳色偷春早。梅花得氣先。此般新意象。入望自悠然。

題李樵舊居

繫馬閒庭下。徘徊望落暉。新花紅自豔。蔓草綠偏肥。壁上琴如

同安文獻志
舊人間世已非。吟成誰共賞。愁坐釣魚磯。

舟行平洋淀口號三首

輕搖柔櫓入平洋。一片虛明瀲灩光。綠樹陰重茅屋凸。人家宛在鏡中央。

紅蓮花似出方諸。艇子輕搖入畫圖。欸乃聲驚鳧鷖起。飛飛遙趁半蒼蘆。

帆影聯翩掛夕陽。纔過柳岸復菱塘。遊人莫說西湖好。佳景何曾定在杭。

桃花

何處清香作陣來。桃園似錦正花開。鶯穿樹底梭如織。燕掠枝

頭翦欲裁。黃襯柳絲金裊裊。白兼梨蕊雪皚皚。韶光引我豪遊興。醉月還應夜舉杯。

春晚雨後曉行口號

春郊雨後畫難成。信馬騰騰趁曉行。翠綰柳絲煙穗重。紅滋花面露珠瑩。遙遙瑞靄周遭合。淡淡香颺斷續生。更喜插犂今未晚。隔林時有叱牛聲。

遣興

未許幽齋語坐忘。怡情且自任徜徉。愛邀明月疎栽竹。貪看青山短築牆。雨過柳塘添嫩翠。風穿花徑帶微香。箇中滋味如堪領。省讀南華內外章。

山村有景定如何。綠凸雲鬟幾萬螺。馬踏花蹊香裏度。人穿松樹畫中過。峰頭點白浮圖遠。石面皴紅古寺多。况是韶光春正媚。登臨恰好趁晴和。

山村

陟西山

寒山枕西郊。岡巒幻奇狀。迴伏勢如龍。矢矯難爲像。我來尋異迹。縱步襟懷暢。怪石猛獸形。突出森相向。枯松俯長溪。根盤掛疊嶂。冰泮泉聲響。水與石相宕。鬱紆造山巔。萬里窮一望。大哉造化功。生物豈有量。憶昔夢西湖。目極神蕩漾。今我陟西山。高踞羣峰上。山水信壯觀。達人任放浪。性本愛邱壑。斯遊詎能忘。

極目

緩步步郊原。極目高秋景。蒼煙林外斷。平瀉夕陽影。簟覆綠微茫。野分麥萬井。遙天髻髮鬢。碧聳參差嶺。小溪略約橫。佇立心神靜。披鏡窺游魚。水清露千內。乾坤晚愈妍。次第呈佳境。盡收入畫圖。恐禿山中穎。

思歸

淵明昔移宅。爲就素心人。賞奇兼析疑。樂事得其真。余家方城南。倚山負水濱。榆柳綠匝牆。苔痕翠覆茵。春秋足佳日。求友實勞神。乃者有王生。卜居一何新。廬宇遙相望。於我若比鄰。昔是舊知己。今復近相親。何事余西來。硯田羈此身。相思輒不遂。幾

許負良辰。過門誰相呼。有酒誰同斟。日夕惟獨坐。所對壁上琴。古人有曠懷。我輩何沈沈。行將歸故里。把臂共入林。

右詩二十首同見漸于集內官舍夜吟夏日卽事二首又見清陶樑畿輔詩傳

張縣令世桐

固安陳志篤行傳。張世桐。字樹屏。乾隆五十九年副貢。由教習選江蘇。陽湖知縣。俸滿告歸。其品學高潔。爲邑人所推重。武進陽湖合志名宦傳。張士桐。字樹屏。直隸固安人。副貢生。任陽湖知縣。嘗濬南運河。護城河北塘河。

張縣令遺著

今存碑記一首

詩一首

重修三大士庵碑記

右碑在固安縣治西北另載本編金石文存卷

題錢斗南賑廠圖

天道本難窮。秋成不盡豐。凶荒民失所。調劑賴人工。司牧堂懸明古鏡。救荒何憂無美政。請糧施粥力能爲。那堪胥役貪殘性。蠅趨鼠竊如卮漏。呼蹴沾汗等飼獸。有口不思同嗜心。救民反致戕民壽。斗南錢子勵清操。屈身刀筆隸庫曹。歲值旱荒司施粥。但懷剔弊不辭勞。無法有弊畫難周。弊剔法疎弊總留。公今不使毫髮易。便宜尙待細心籌。凌寒鵠立忍調飢。滌釜燃薪愁蹙遲。不是勞心預經畫。煢煢徒自費嗟咨。錢子奉公無玩愒。能

固安文獻志
教反否成康泰。畫圖立約告來人。共體皇恩俾霽霈。

固安陳志云。嘉慶二十二年固安秋旱。西南一帶大饑。縣令詳明上憲。奏撥漕米二千石。於被災村莊適中之區。煮粥設廠施賑。以鄉紳士司其事。時錢君斗南實司管庫。凡三閱月。日擊災黎。繪圖于冊而爲之說。名流題詠。佳篇甚夥。

廷琳按錢斗南名錫魁。在當日不過戶書等末職。而居心仁慈。能使實惠及人。實可嘉尚。迺順天府志。見固安職官表內有姓錢名缺未刻者。便臆斷爲錫魁。將其名填入固安知縣表中。至官師志更爲錫魁立一專傳。謂其于嘉慶二十二年知固安縣。因歲旱設廠賑饑云云。考傳中語皆

藍本於張縣令此詩。而於詩之全文則未寓目。不知當日何以鹵莽至此。又按錫魁工山水。余村伴書草堂李氏藏其所繪扇面。筆墨甚爲超逸云。

右詩見固安陳志藝文

楊太守靖遺著補遺

像贊一首

詩一首

翰林院庶吉士寧州知州張公孝時像贊

是何氣象。河嶽之靈。是何骨幹。金石之精。是何儀度。詩書之英。千秋萬世兮。惟師保之如臨。

光緒五年秋九月

右見清張孝時筠心堂存稿卷首

和先曾祖晴川公安邑任滿柏井驛題壁原韻

歸裝琴鶴意。悠然旅館愁。心到酒邊。報最致成留去思。惠民福在不唐捐。琳瑯珍重貽孫子。簪笏連綿感帝天。百卅年來傳四世。殘牋一幀擬珠還。

右詩楊君淑皋錄示五石瓠齋詩稿未載

固安文獻志卷十八目錄

耆舊事彙

清

王總戎普

印存遺像

王縣令文煥

王總戎第三子

高主政釗

高國學鑑

高主政弟

趙明經錫純

萬國學三錫

萬國學湘林

萬國學三錫孫

賈公

諱

光明

孫男廷琳敬錄

曹明經飭

李國學培源

李明經父

李茂才滌源

李明經族叔

李明經仲瑄

文茂才藻翔

朱處士琳

魏明經聯芳


李明經芳園

印存遺像

石武孝廉蘊芳

王茂才芬

清河北鎮總兵王公普遺像



清拔貢生李公芳園遺像



固安文獻志卷十八

天津徐世昌鑒定

縣人賈廷琳謹編

耆舊事彙

清

王總戎普

徐世昌大清畿輔先哲名將傳王普。字德輝。固安人。乾隆六年授永定河外委。補把總。會河決落職。投江南營。辦理天妃閘閘官事務。累遷至文登營副將。三十九年以事鐫二秩。逆匪王倫擾壽張臨清堂邑陽穀諸處。山東巡撫徐績督兵剿之不利。檄普至東昌。九月七日戰賊於臨清周家店。身為士卒先戰六時。

國朝文獻志
斬捕過當。賊不支始退走。疏聞以參將用。適將軍舒赫德額駙拉旺多爾濟兵繼至。會戰臨清。殲賊殆盡。臨清平復。副將銜。連擊諸郡賊皆潰走。普易裝梳捕民間匿匪。四閱月全境肅清。詔以總兵用。賞花翎。授河標副將。四十九年擢河南河北鎮總兵。十月入覲。問王倫事對甚悉。抵任獎勵將弁。教練士卒。不職者禡之。老弱技疏者汰之。一時賞罰嚴明。軍政肅然。五十一年伊陽奸民秦國棟聚衆戕官。聞警馳往。未至賊竄走。以是註部議。先是賊起。邑民受迫挾。多附之者。至是皆遠遁。普下令悉招之歸。伊人尸祝之。普轄衛輝彰德諸地。凡九營。益以時簡閱而訓練之。嚴束士卒。有縱馬傷田間一禾者。輒鞭責之不貸。公餘訪

漢孝子丁蘭郭巨明趙烈女諸墓。明季王丁二忠祠。爲勒石表彰之。以勵民俗。五十五年上八旬萬壽。特詔復原官。召見賜食品等物。並御書福字玉如意。五十七年患目疾致仕歸。又四年卒於家。年七十有一。

固安鄉土志名將傳王普。固安城西丞相莊人。乾隆六年隸永定河營外委。尋補把總。後投江南河營。任外河効用把總。遞陞至文登營副將。尋以別案鐫秩歸省。王倫之亂。壽張臨清堂邑陽穀等處滋擾。莫敢嬰其鋒。九月巡撫徐績自東昌發六百里檄檄公。公即日啟行赴敵。與賊戰於臨清之周家店。自辰至午。賊勢猖獗。公督戰益力。身先士卒。殊死戰。斬馘無算。至晚賊退。

陞用參將。會將軍舒赫德、七額駙拉旺多爾濟兵繼至。公隨二公連日與賊戰臨清。殲斃殆盡。臨清平。諸郡尙擾。公率所部兵潛至。出不意擊之。賊潰散。多匿民間。爲再擾計。公改裝緝捕。在壽張等處。凡四閱月。肅清。巡撫徐績以公素得軍心。奏聞。詔以總兵陞用。換頭品頂戴。賞戴花翎。改任河標副將。四十九年授河南河北鎮總兵。十月入都。召見。問臨清情形。公逐條奏對。十一月回任。賞罰嚴明。申約紀律。軍政肅然。伊陽奸民秦國樑聚衆戕官劫犯。公勦撫兼施。善良被脅者深感其德。所轄衛輝彰德河南開封陝州嵩縣王祿店與本標左右共九營。按時簡閱。公飭訪求遺蹟。得漢孝子丁蘭郭巨之墓。明趙烈女之墓。女字某氏。未婚。

而婿逝。女矢貞。歸婿家。孝舅姑。

明季王丁二忠祠。

王諱漢。任河南巡撫。死於劉超之難。丁諱秦。任河內令。賊將劉方亮圍懷慶。城陷。死之。

又於修武得漢獻帝陵寢。勒石以誌。五十五年因純皇帝八旬慶典入賀。召見訓誨周詳。賞賜有差。五十七年乞休。四年卒於家。年七十一。按聖武配王倫。臨清之變。於公職績不詳。茲據王氏家乘。並邑故老舊聞。叙錄其概。子文勳。文昭。文煥。

王總戎自叙。王普。字德輝。固安人也。自乾隆六年在永定河營

効力。至十一年拔補外委把總。十五年永定河三工漫溢。罪誤

革職。在保定聽候審訊。至十六年經欽差兵部尙書舒公按名赫。諡文。

審結省釋。嗣於乾隆十七年赴江南投營効力。以圖進身。

蕭蕭行李。子身獨往。茫茫前途。際遇難期。及到江南。至七月投

外河營効力。十八年蒙大學士總河高公。按名斌。諡文定。拔補外河營把

總派在河庫道李公處聽候差委。適本年九月間河決張家馬路。高中堂李河庫均因之革職卸事。余功名之念已灰。欲回里另圖奮身之計。尚書舒公同白公按名鍾山。正德旗人。世居通州。諡莊恪。奉命赴江南查辦河務。即余前在保定。以河務曾經二公審訊。得邀省釋者也。及往謁見。二公俱相待甚優。隨到高埧。令見總河策公。一見蒙委代理天妃閘閘官事務。事竣尚書舒公旋京。白公放江南副總河。留余在轅聽差。相待更優。十九年四月白公陞山東總河。將予咨部帶往河東教習椿埽。二十年正月初四日。委署左營把總。十月實授中營把總。二十一年拔補濟寧衛南汎河掌印千總。二十八年五月蒙總河張公按名師。載儀封進士。諡愨敬。題補黃運河

營守備。至三十一年十月。蒙總河李公按名清時。安溪進士。題陞濟寧城守

營都司。三十四年四月。蒙總河吳公按名嗣爵。錢塘進士。題署河標右營游

擊。三十六年蒙總河姚公按名立德。仁和人。東撫徐公按名績。正藍旗舉人。會題陞山

東撫標參將。三十八年蒙東撫徐公登鎮夏公按名攀龍。浙江人。會題陞

文登營副將。三十九年八月初三日。因高雲從案內革職。發交

東撫徐公審問。八月十六日審訊覆奏。奉到廷寄再問。八月二

十六日逆匪王倫在壽張縣作亂滋擾。徐公帶兵起身勦賊。嗣

於九月初四日。自東昌發六百里札諭。調予赴軍營。於九月初

五日到東昌。初七日跟隨徐公在臨清之周家店。同賊力戰一

日。賊勢猖獗。性命已置度外。惟思設法禦賊。旋經徐公奏請京

兵來東。予復蒙徐公保奏以素得兵心。調赴軍營出力自効。仰蒙皇上天恩。賞給參將職銜。帶兵勦賊。俟事竣之後。視其出力如何。另行奏聞。此後跟隨將軍舒公七額駙。按名拉旺多爾濟。連日在軍營接仗。勦滅逆匪事竣。蒙將軍舒公保奏。於四十年二月初九日。奉特旨。河東河標副將着王普補授。在河標河協歷任十載。此任內與次子華林。按名文昭。字如愚。捐納從九。修做東堤工竣。引見以知縣補用。三子惠林。按名文煥。詳見下。以從九職銜。修做工段竣事。引見以知縣補用。至四十九年。又蒙皇上天恩。特放河北鎮總兵。到任以來。冰兢自矢。對於地方防務。時時勤慎。故該地之民。垂碑紀念。稱頌不忘焉。按後公次子華林。宦遊河南。任魯山縣事。

其後裔世居固安城南之獨流村。三子惠林。宦遊山東。任惠民縣事。其後裔世居固安城西之丞相莊。至今尚稱縣中閥閱舊

族云。

右稿獨流王君效先寄示

王縣令文煥

固安縣志選舉表王文煥。山東惠民知縣。

惠民縣志名宦傳王文煥。順天固安人。道光十九年知惠民縣。日行詞訟。隨審隨結。嘗曰。雀鼠之爭。無大冤抑。縱少失意。不愈於稽羈案下。為胥役剝蝕耶。曩者差車取給於民。往往一車之費。擾及四境。至是首蠲免之。凡事之累民者。悉從裁革。由是力役粟米之征。為其所令。無不順從。蓋其愛民之心。信之者深也。

〔山東通志職官表〕王文煥。順天固安人。道光十五年任泗水知縣。

〔固安縣丞相莊王氏家乘〕王文煥。河南河北鎮總兵普第三子。字菱湖。由監生遵衡工例。捐納從九品。分發簽掣山東。歷署嘉祥萊陽金鄉等縣。典史臨清州吏目。嘉慶十八年教匪之亂。公奉委馳檄赴保定。城閉不得入。後以繩繫檄上。得驗實始啟局。上官甚慰勞之。並詢沿途匪勢。人皆爲公危。後以勦獲荷澤縣逆匪王夢元。得旨儘先補用。二十四年調補濟南府司獄。汰獄卒。弊立減。囚皆德公。道光七年荷澤大盜李三知黨百六十餘人掠擾。公奉委勦緝。易服改裝。兩月悉擒獲無逸漏。累以考績

陞知惠民縣事。抵任見案牘如山積。逐一審訊。兩月結百六十餘案。多所平反。朔望詣鄉里。宣講聖諭。召鄉紳耆舊。詢風俗。問民疾苦。曉示百姓。諄諄若家人。有訟者。先勸導之。奸猾者治之。如法。豪華胥吏。皆爲斂迹。歷年漏規。與溢征銀二千餘兩。言於上官。悉開除之。蒞任五年。二十二年以親老告終養。未果。二十三年託病引退。百姓知之。詣上官乞留。不可。瀕行百姓送公者。遮道。公各勉以當盡孝思。當務農業。勿事欺凌。勿干國法等語。衆益感泣。不獲行。後請留其烏爲遺愛。二十六年丁母憂。哀毀骨立。喪葬皆如古禮。服闋。上官敦迫赴省。輒以未痊謝。三十年以疾卒於里。年七十七。公貌偉聲宏。與人談笑。隔院聞之。語頗

了了。生平精敏。慷慨好施與。能急人患難。而性情平易。無宦氣。故鄉人至今思慕。

高主政釗

固安縣鄉土志任恤傳高釗。字小鋒。渠溝鎮人。由廩貢生奏賞戶部主事。天性謹厚。樂善好施。歲饑散粟爲食。待餓。全活者無算。鄉鄰感德。上官贈爲善獲福匾額。子潤生光緒十五年進士。授翰林院檢討。現官江南道監察御史。

鹽山唐烜高主政傳主政姓高氏。諱釗。字小鋒。順天固安縣人。祖大鵬。邑庠生。性忼慨。篤交遊。以扶危救急。義聲震鄉里。父瑞和。拔貢生。官贊皇縣教諭。讀書耆古。博學能文。以贊皇士習陋。

教無可施。鬱鬱不自得。未及任滿卒於官。主政公持喪歸。教其幼弟讀。仍自習舉業。應京兆試。凡二次不售。遂棄讀學耕。先是公自弱冠遊於庠。爲文以枕經菲史。沈博絕麗。著備饗序間。至是應鄉舉。初試薦而未中。再試則三場皆中式。已擬魁選。及拆卷朱墨互勘。因二場春秋題下。漏書某公某年字樣。復見黜。公領遺卷聞其故。喟然曰。人言科名得失均有命。其信然矣。自是不復應舉。未幾遭母喪。泣血三年。盡哀盡禮。鄉人以學行聞之。學使舉孝廉方正。公堅辭不就。試乃具題獎訓導銜。時捻梟各匪相繼起。鄉鎮皆奉檄辦團練。衆推公爲練長。公慨捐鉅款。修防禦。旋獎五品頂戴。亦辭不受。會大旱。歲洊饑。公前後出穀數

百石。唱義振。並設粥廠於所居渠溝鎮之通衢。近鎮十數邨。貧困老弱皆就食。凡兩載。全活者無算。時爲同治六年丁卯。其秋大雨雹。郡司馬勘災過境。忽停輿。趣召鄉保問之曰。吾巡行逾百里。田中禾稼皆摧敗。獨此鄉一田。互數十畝。穎粟特茂。無少損。田主何人。操何術爲防。乃能若此。鄉保遽應曰。官不知邪。此吾鄉高貢生田也。郡司馬於是瞿然而驚。既而躍然喜曰。高公名吾聞之久矣。特不謂雹不傷稼之事。古有其語。今乃實有其徵也。遂趨旅舍。手書爲善獲福四大字。竝爲叙詳述顛末。命召工刊刻。曰。以此旌高公門。且以示世人。天道福善之說。爲不誣也。越日郡司馬還輿過縣城。語之縣令。縣令固久亦傾慕公。嘗

刊推食芳徽匾額。具儀仗親送之門。行將列公善行請旌獎。及聞郡司馬言。乃合詞疏公前後諸善狀。白大府。大府遂上其事於朝。朝士亦多慕公名。因聯銜奏保。得旨以主事用。公仍欲辭。保者皆曰。此君恩不可負也。乃就職。籤分戶部浙江司。時長戶部者皆一時權要。爭欲致公門下。屢示以意。公陽爲不喻。其悒者。在部數年。除因公相見外。無攀談。無私謁。同官或微諷之。亦不答。退食之暇。惟課子讀書。齋前種竹數十竿。榜其門曰癖竹。以示澹於宦情。且志在避俗意。由是同官以爲傲。多不樂與游。公亦以事多拂意。嘗艱然謂子潤生曰。古言通經致用。學問之道。本大可有爲。惟一爲司員。則俯仰隨人。不能逕行己志。尙不

如鄉居作事。可以獨斷獨行也。爾異日或登仕版。必擇清要可自立者爲之。勿復如我今日。旅進旅退。少自異。即騰笑竦譙也。又公篤于兄弟。嘗教子讀史記。至張釋之傳。輒太息曰。釋之恐以久宦減兄產。今吾浮沈郎署。亦將以久宦減弟產。汝宜早自立。慎勿俟父歿後。又累汝叔父也。蓋公一生孝友任卹。不汲汲於名利類如此。其生平剛介自持。勇於任事。而恥於趨勢。對人嘖笑。未嘗苟其卒也。晨起盥漱畢。整衣坐廳事。容色肅然。瞑目端跏。無疾而逝。鄉人得凶耗。不期而會者數百人。相與備靈輿。列鹵部。於喪歸時。恭迎四十里外。麇聚縣城北之永定河干。縣宰並爲除館舍。於城南關停輿受弔。盡一晝夜。翼日始相將送。

歸里。及葬時。盛况復然。至今鄉里間。銘功誦德。仍稱道弗衰云。配畢淑人。尤賢明。善訓子。事具公家乘。及墓表。又公嘉言懿行。亦尙彙。茲不備書。書其犖犖大者。以志景慕。

論曰。烜與主政公子潤生。春秋兩試。皆同榜。竝同出鄞。張肖菴先生門下。且同壻海豐楊氏。爲亞兄弟。故於公生平知之最詳。嘗讀公行述。仰見公篤行亮節。人知矜式。其所表見。皆不虛矣。它姑無論。尤異者。電不傷稼一事。彰彰在人耳目。豈天之報施善人。果如是其不爽邪。又公暮年。以在官未竟所故。嘗戒子異日仕宦。非清要職。勿就。兼有密訓。謂本朝曆數將終。務潔身自愛。慎勿事二姓。墜家聲也。今其言皆驗。於戲。斯亦奇矣。

案唐君此傳。撰於民國五年丙辰。係因潤生堅拒洪憲議員之召。談及密訓。有感而作。厥後洪憲敗。人或傳潤生之先見。而罕有知爲守先訓者。訖今追念及之。潛然泣下。輒不覺百端之交集矣。戊辰春二月子潤生附注。

固安縣渠溝鎮高氏阡表另載本編耆舊碑誌卷

高主政遺著今存詩六章

京居詠懷凡六章章四句

第一 卜式章 明志也

卜式輸家半。急公非獵名。勉拜中郎賜。夙夜彌屏營。

第二 淵明章 避囂也

淵明喜咏菊。東坡好看竹。但使能醫俗。甯可食無肉。

第三 李白章 遠權要也

李白本奇士。荊州何足論。惜哉粲蓮舌。豔說登龍門。

第四 釋之章 念兄弟也

釋之困郎署。久宦徒耗產。家有紫荆榮。奈何戀豆棧。

第五 志士章 思鄉也

志士悲樵驥。壯夫恥轅駒。何如脫羈鞵。常羊還故吾。

第六 廡仕章 訓子也

廡仕疇不羨。清德須自矜。箕絕陳彭年。銜署一條冰。

右詩爲先嚴捐館之前數月。手書於歲寒三友之花箋。諄諄

相示。令切記勿忘。見背後謹藏舊書篋內。庚子一炬。竟化灰塵。嚮嘗深自痛恨。既不能光大先業。併此一箋手澤。亦不能慎爲保守。畱示子孫。今承鄉人采訪。特爲追錄。尤不覺汗淚之交下也。嘻。戊辰春子潤生附記。

附錄

順天府南路同知蕭履中書贈高小鋒君爲善獲福匾額叙文。丁卯夏旱。魃爲虐。厥後得雨。播種已遲。以故歉收成災之處甚多。秋末余赴南路勘災。行次固安之渠溝鎮。邨外傷於雹。禾稼皆無存。獨高小鋒君田內。穎粟特茂。無少摧敗。心異之。詢諸土人。僉曰。高公夙好行善。前因旱故。特蠲米石。開設月穀日。

高國學鑑

固安鄉土志任恤傳高鑑。字寶光。戶部主事釗弟。天性孝友。行誼克副。乃兄志望。兄沒家中匱。其姪潤生幼而好讀。爲之延名宿以資教導。凡一切有用書籍。不憚重費購之。俾廣其學識。後其姪入詞林。乃欣然曰。吾今可對寡兄矣。其周急濟貧。人至今稱之。子潤民。廩貢生。鴻臚寺序班。

高氏新阡表另載本編耆舊碑誌卷

趙明經錫純

固安鄉士志任恤傳趙錫純字熙甫沙河口人廩貢生嘗問學

於新城王重三先生振綱

先生為咸豐名進士與曾文正為同年文正督直隸延主講蓮池書院

貌雄偉

急人患難不避艱險蓋儒而俠者也咸同間髮捻各逆方猖獗

先生與同里劉茂才炳文倡辦南鄉團練製槍械刀矛數百件

礮數十尊合眾排演同治六年梟匪之亂由新城犯固安避其

鋒繞道馬莊鎮東竄永清界縣西南諸村得無恙新固之交迤

南境有土賊乘南方多事蠢然思動結眾劫掠先生率勇勦獲

匪首稟請縣令楊公應梅立照新章置之法僧忠親王率兵南

下經縣境聞而嘉之奏獎六品銜新城巨盜王三為一方患先

生率勇隨縣令余公汝修往勦格斃之直隸總督劉公長佑方

駐兵馬莊鎮先生布衣往謁大為所器願攜之行以親老不果

並閱視所練鄉勇首肯者再先生佐歷任縣令理公務如創書

院查荒地皆義舉獨扛無所顧避縣令莊公允端初履任疑其

武斷硃諭特嚴公署出入界限蓋為先生發也先生年餘不入

縣城並絕口不問公事既而莊公訪其賢且傑會見之於馬莊

鎮舉凡弭盜詰奸胥資其力後因公被誣以毆傷人命訟先生

於部府牒下役人趣提質到門先生素業教讀前後受業者百

數十人時方為生徒詳削課藝坦如也卒畢其事出門登車去

了無憂色其鎮定有如此者事旋解光緒三年深冀河間等屬

大荒旱。先生倡捐米粟。設粥廠待餓者。登簿者幾三千人。皆賴以全活。四年又設粥廠。先生即於是年染時疫卒。年五十八。當縣令余公之初辦團練也。簡舉縣中文士有聞望者數十人。以資助理。而才守兼具者卒鮮。獨先生魄力沈雄。且心境廉敏。使獲馳驅於曾胡羅左諸公麾下。其勳名事業。豈不足銘彝鼎而震寰區。乃竟限於一鄉一隅。莫從竟其學。拓其才。爲可惜也。

萬國學三錫

固安鄉土志任恤傳萬三錫。字顯相。城南三十里萬家莊人。國學生。忠厚宅心。耕讀教家。遇邑中興辦善舉。無不樂爲贊助。有山東海豐縣孫義者。在京以井租爲業。某年臥病萬家莊村旁。

三錫見之。舁至家。爲之延醫購藥。調養旬餘。痊愈。拜三錫爲義父。始去。嗣後每年赴京回里。必繞道萬家莊看視。多攜帶海中異種魚蝦。及同治十二年三錫病故。孫義親至。伏棺痛哭而去。以故邑人多兩稱之。三錫第三孫執樞。光緒十九年舉人。第五孫執機。第六孫執桂。曾孫燾炬。皆諸生。稱爲縣中望族云。

萬國學湘林

固安鄉土志任恤傳萬湘林。字紫潮。三錫長孫也。國學生。忠厚一遵祖訓。鄉中急難。多恃以排解。教子尤勤。光緒十六年固安大水。災之重爲數十年所僅見。湘林倡爲合村出字代購穀米數百石。捐得應利二三千緡。鄉人恃以生存。其後附近數十村。

均聞而仿辦。賴以全活者無算。長子煦二十三年拔貢生。充省議員。諸子及孫列庠序者復數人。人多以爲行善之報云。

賈公

諱

光明

孫男廷琳敬錄

豐城毛慶蕃固安賈月塘先生家傳。光緒三十年夏。余督理永定河事。蒞固安。聞教諭陸君慶格言。縣人賈生廷琳。博學善屬文。可造材也。因延見之。嗣余承乏直隸藩司。電招之來。督其講求古今實學。迨後余提學江蘇。布政甘肅。兼權陝甘督篆。賈生左右追陪。情逾骨肉。一日嘗戲謂賈生。吾與子其先並無淵源。然一旦邂逅及子。而余教誨子玉成子之心。比吾家之子弟。尤爲密切。竟不識其何以然。豈非子之先德。有醇德懿行。冥冥中

潛爲之感格乎。賈生於是言其鄉人。亦每以彼之舉優行。及與余相遇。皆由其祖若父積德之所致。且詳陳曰。先王父月塘公逝世時。廷琳方七歲。愚昧無知。但見前後來弔者數百人。無不痛哭失聲。若悼喪其親者。及葬復來哭如初。蓋先王父賦性端凝。氣象嚴正。言笑希簡。動履有恒。生平言表行坊。久爲閭里所矜式。德之及人者深。故人之感之者衆也。自年十九入原籍霸州庠後。即課徒四方。殆將終身。所學自羣經及馬班諸史。宋司馬氏通鑑。古今稗官雜說。宋元人詞曲。與夫醫藥星命諸書。莫不精研力索。提要鉤玄。錄爲專冊。高逾尺許。用示學者軌轍。而於醫學尤精。生平所活人不可計數。手輯醫書。成脈理證治方

劑鍼灸各門。精要豁達。使人研習。夙昔於制舉文致力極深。歲科試每列異等。而數奇。秋試屢薦未售。僅以增廣生終。凡假館所至。終日爲諸生講解。無倦容。以身作則。杖履尊嚴。門牆敬畏。每有相從二三年。終身基礎已確立者。晚年館穀所積。家漸充裕。辭歸故里。頤養。多有再三邀重履講席者。見同里劉生鳳池。聰慧善讀。家貧如洗。招之來親教導之。終歲不受其贄脩分文。遂獲成名于時。迨後廷琳讀書時。家遽中落。劉先生復親教廷琳。一如曩昔。以酬先王父之大德焉。夫此日廷琳之獲執贄於吾師門下。并稍稍忝竊時名。微吾王父生平積德累行。隱而弗曜。且手纂輯諸書。俾廷琳童年得資博識。又預教劉先生成名。

爲廷琳異日得讀書地。曷由致是哉。先王父生平義行尙多。惜廷琳生晚。未獲備知。倘蒙吾師軫恤寒族。撰爲家傳。以示鄉人。而傳奕世。家嚴與廷琳等感且不朽。余諾焉。遂就賈生所述。敘次爲先生家傳。先生諱光明。字月堂。先世由霸州香營。遷居固安南趙莊。故先生仍入霸州學。生於嘉慶二十年八月十四日。故於光緒十四年十二月十七日。春秋七十有四。夫人張氏。佐先生創成家業。禮法秩然。見推里黨。生於嘉慶十九年八月十三日。故於光緒二十二年四月二十七日。年八十有三。子一芳。芝。性至孝。事親無不至。獨傳先生醫學鍼灸一科。神效一方。無與比者。以義俠著稱里中。光緒十六年歲大饑。爲人多擔負債。

事貧者始得保全。然力率不能償。遂變產代償。坐足家業。遽傾。遠近往往以五爺呼之。而不名。孫三。廷魁。廷掄。皆習農業。廷琳。光緒丙午科優貢生。從余遊。今供職陝甘督署。大清宣統元年。歲次己酉。秋九月。豐城毛慶蕃謹撰。

徐世昌清故增廣生月塘賈君墓表。另載本編耆舊碑誌卷。

縣人萬煦業師賈月塘韓月橋兩先生傳。煦自七歲時。隨從叔。

子衡子鈞襄宸鏡愚四公後。同受業於本縣張允升。

字旭東。賈師同里人。善山水。精

科張青來

黃堡人。長於學。大書。

霸縣周鴻儒三先生之門。其時尙渾渾無

所知。亦不識先生學如何優。教如何善。今已不復能追爲記述矣。其後受益最深者。爲侍教於賈月堂先生三年。韓月橋先生

六年。月堂先生諱光明。居本縣南趙莊。增廣生。屢試高等。以數奇未獲博科第。論者惜焉。性端嚴。品方正。無一刻不循禮法。寡言笑。雖一介不苟取。且博極羣書。兼精醫卜。來塾時。煦年十二。凡四子書及五經與漢唐詩古文辭。講解凡數周。他日略識各書道理者。實基於此。月橋先生諱皎如。北莊人。家世讀書。師尤嗜學。由廩生中。道光二十六年副貢生。咸豐五年舉人。爲同縣劉孝廉牲。

字菊齋。道光二十三年舉人。官趙州學正。

新城王進士振綱。趙貢生基復。高弟。善書法。嫻制藝。門下列膠庠。舉秋試者凡數百人。光緒九年。煦以縣試第一入學。又二年。歲試以第一。食廩餼。二十三年。以選拔貢成均。徵兩先生教授力。烏克及此。厥後同縣高棗坡師。教

以漢儒經訓小學。寧河高曦亭師。教以宋明朱陸語錄。與夫乙巳年赴日本考察教育。丙午年補習歐西法政。中間之討論。明清掌故。旁覽曾左諸書。或聞於永清王子惠師。或受自豐城毛實君師。而實皆由於童年。受月堂月橋兩先生教育之賜也。月堂先生孫廷琳。博學能文。有聲於時。月橋先生子三。均力農。今已式微。古人一飯之德。沒齒弗忘。而况兩師之教。益於煦者。實有以端蒙養而植始基者哉。嗟嗟。時至今日。師道不講久矣。古所謂師嚴道尊之訓。誰復知之耶。於是慨焉而爲兩先生傳。

先王父月塘公遺著

今存詩十首

題河間苗仙露漢專唐瓦

築館延儒溯獻王。餘區二十久荒涼。遺蹤若并無專瓦。故址誰猶識漢唐。蜀道殘碑埋宿雨。長陵萋草帶秋霜。苗君好古搜遺寶。留得毛經一綫長。

里居偶吟

五十年來苦訓蒙。今朝始得出樊籠。兒孫笑語娛心意。不枉爲人一世中。觀書偶倦即高眠。眠足閒行故宅邊。夢蝶莊生情栩栩。逍遙自在度餘年。

一身筋力未全衰。觀劇何妨屢屢來。世態炎涼皆似劇。有誰冷眼愴中懷。

閒遊別自有心情。不計程途緩緩行。乘興獨吟還獨嘯。任人呼我做癡生。

高步青雲志未酬。聊從書館覓蠅頭。蠅頭幾許吾生老。得失雞蟲念總休。

不命巾車不棹舟。興來野外任遨遊。天寬地闊多歡暢。手種桑麻綠遍疇。

七旬已過尙康強。聽唱前村日日忙。朝往暮歸人莫笑。顛狂能得且顛狂。

一家聚首即陶然。豈必兒孫跨竈賢。往日離鄉背井久。回頭猶記夢魂牽。

不求富貴不憂貧。第一人間自在身。檢點手鈔書尺許。傳家聊種讀書因。

廷琳案先王父雜著詩文。晚年多自付灰燼。所留存者只此。至末首云云。惜廷琳等駑駘性成。不能上繩祖武。今展讀遺著。殊覺有慙負荷云。

曹明經飭

賈廷琳同縣曹雲樵先生小傳。先生姓曹氏。諱飭。字子端。號雲樵。吾縣城西中公由人。清舉人。內閣中書諱江之五世孫。咸豐中由固安城內遷焉。同治十一年歲貢生。候選訓導。生平質直和易。言動篤誠。藹然儒者。人莫不樂近之。家貧以教讀終其身。

及門就學者極衆。率發名成業以去。性喜吟詠。多深造自得之語。著有雲樵老人遺詩一冊藏于家。光緒二十年卒。春秋七十有八。孫樹殷。年十四應縣試。縣令謝裕楷奇其才。錄爲第一。逾年食廩餼。光緒二十九年舉于鄉。民國中歷任江西九江蓮花等縣知事。所至以儒吏稱。人謂皆先生積善累行之所致云。

廷琳按雲樵先生孫硯齋孝廉。與余昔年同受業於豐城。毛實君先生之門。維時廷琳年方逾冠。曹無知識。硯齋詩文奇肆。博學多通。廷琳雖在友列。而心殊敬憚。隱取以爲師資。厥後南北分馳。歷二十年。蹤跡未得合并。今年纂我縣文獻志。硯齋函札往還。殷勤指示。裨益弘多。並得稍聞

雲樵先生言行之梗概。謹擬爲此傳。以存先正典型。且以見硯齋學識之閎博。今日爲吾縣人士所僅見。其家學之淵源。於此可微窺一斑云。

曹明經遺著

今存詩稿一冊錄十一首

李瀛仙明府重任固安賦以誌喜六首

并序

同治二年秋七月。瀛仙明府二次下車之日。萬民慰說。四境歡呼。咸謂善政善教。業已見之於前。爲國爲民。必能踵之於後。旣恤商而愛民。亦安良而除暴。兼之廣延道學。雅意衡文。作養人才。殷心課士。記當卸篆之初。卽有再來之慶。今也果符人願。實出天心。名言莫罄。爰歌俚語數章。額

頌良殷。聊作漁陽一曲。愧非白雪之詞。擬學巴人之唱。

快覩烝黎笑口開。循良父母又重來。三年黍雨留遺愛。百里棠陰本舊栽。作令羣推經濟手。讀書不負棟梁才。花香燕寢秋風爽。看取廉聲達上台。

德政寬嚴仰大儒。喜教合浦復還珠。漫云舊尹仍新尹。差信今吾即故吾。父老據誠齊雀躍。兒童瞻拜各鳧趨。福星再照方城地。緣幸三生果不誣。

可卜於今訟不繁。官清差慰鈍兒孫。撫綏不藉桁楊力。感戴真同骨肉恩。此日錦城重蹟著。他年史冊早名存。高風無媿循良選。酌兕宜稱介壽尊。

昔年花縣政初成。四境歡然有頌聲。才拜清風仙吏去。又敷霖雨庶民迎。廉明宜試繁難缺。竹帛曾標幹濟名。堪羨我公還愛士。半爲司牧半文衡。

遙指鄉關遠隔秦。燕臺政績復回春。安民即具安邦略。聽訟能希無訟神。廣布仁恩真學問。不矜權術大經綸。文章報國非虛語。霽月光風最可人。

循吏賢聲播士林。再來依舊費慈心。登龍文字明於錦。鳴鳳詩篇雅叶琴。廣藝蕙蘭光上席。多栽桃李結重陰。醲恩渥甚誠難寫。翹首崇墀再四吟。

桑乾河隄晚眺

閒步上金隄。登臨日已西。白雲凝不散。時有暮鴉啼。

方城竹枝詞四首

光緒十五年
清明節作

沙圍村落柳圍城。輻輳人煙樂太平。好是日斜閒處望。一犁春雨叱牛耕。

桃含宿雨柳含煙。畫出詩人得意天。更喜桑麻還蔽野。民風質

樸使君賢。

時謝大令裕楷
治吾縣有善政。

清明時節好風光。攜榼提壺祭掃忙。焚罷紙錢澆罷酒。梨雲樹下話斜陽。

南北通衢一坦途。桑乾古渡舊時呼。而今時過滄桑改。不見當年印月湖。

右詩十一首曹君硯齋錄示

李國學培源

固安鄉土志任恤傳。李培源字濬泉。貢監生。南趙各莊人。資性英爽。慷慨好施予。整齊其里四十年。無賭博風。同治十年永定河決。奔注牯牛河。幾潰溢。先生率衆護堤。自出米麪供食。無吝色。又捐義田十餘畝。爲其村永遠差徭費。鄉人感之。公送望重一鄉。匾額。子仲瑄字薛頊。光緒八年副貢生。篤孝克繼乃父志。甚爲鄉人稱云。

廷琳按李濬泉先生爲余同里人。性嚴正。言笑不苟。鄉人在其旁無敢偶肆者。同治初。余村最貧瘠。諸宵小結黨滋

擾良善者不得安。先生力與相持。將尤桀驚者逐之遠村。嚴禁賭博。迄今歷六十餘年。鄉人守其成規。無敢以蒲博相戲者。而風俗蒸蒸。男務農商。女佐內職。勤勞樸實。家給人足。羣推爲遠近各村之冠。且家室和平。近十餘年來。無一鼠牙雀角之爭。到訟廳者。涉公務者或有之。至箇人與箇人相訟事則無有也。皆先生有以啟其端。而里人蔣君樹義等。相與竭力維持。遇事排解。始克有此效果耳。所望後之人篤念前人。倡導整齊之不易。而勿墮其成功。跂予望之矣。

李茂才滌源

賈廷琳同里李鑑塘先生事略。先生姓李氏。諱滌源。字鑑塘。余

同里南趙莊人。廷琳年十五六時。先生館於都門。每歲時歸里。廷琳猶及見之。今墓木已拱。名字翳如。州里間已無復能知先生者矣。然先生天性篤厚。博學多能。有其才有其學。而無其遇。遂令義行弗彰。身名埋沒。誠可悲也。今幸先生諸子。雖不能讀父書。尙能篋存其詩文雜著。守而弗失。今夏余長子錫琛。就其家蒐采叢殘各稿。賫致津門。廷琳披尋讀之。多俊逸可喜。且每有就正於先祖父月塘公之作。遂錄存若干首。因略次其事狀。以存先生之梗概。先生生於道光二十四年十一月二十六日。祖萬春。父慶瀾。皆諸生。先生受業庭幃。年二十一入邑庠。爾後迭假館於鄉里都門各處。垂三十年。在京日受學於任邱邊子。

雅先生門。講求詩古文辭。又嘗從劉芥舟先生學習繪事。雅擅
眞行書。兼精篆刻。才名藉甚。然數奇。屢試未得一第。生平喜交
遊。輕財重義。世罕其儔。安徽潛山縣徐慶雲者。以武職赴京。嘗
道經吾里。先生與暢談。深相契合。邀至家。結金石交。後徐在都
困苦。先生迭爲變產以扶濟之。坐是家有田百三十畝。輾轉罄
盡。及徐統所部兵。攻擊金陵粵寇。以失主帥意無功。左遷甘肅
蘆塘營遊擊。屢邀先生至其署相助。先生卒謝不往。而終年假
館如故。徐嘗命其子資金四百入都。以償昔所假者。不過十之
一耳。先生亦不肯受。悉數爲購冠帶以貽之。故徐銜感甚。光緒
二十五年六月十六日。以瘍疾卒於家。春秋五十有六。徐聞赴

悼痛。親來余里。撫棺慟哭以去。又有霸州王澤普者。以捐納武
職。請先生貸他富室多金。後王竟負心。不肯償。先生不得已以
已產代償之。後與王涉訟。霸州牧陳公閱先生稟牘。奇其才。並
令在堂賦詩。先生立成一絕以獻。陳公嘉歎。贈書籍多種。卒批
飭令王歸欵結案。先生以重義氣故。晚年家貧如洗。子迺賡等
遂無力讀書。論者惜之。又先生在京日。交遊甚廣。與人唱和詩
詞頗多。皆不存。其他義行。子孫已不能舉其辭。故不備載云。

李茂才遺著

今存鴻雪集詩稿一冊錄二十首

韓琴蘇硯歌

固安鄉土志曰。王龍韓氏。爲唐昌黎文公後。雍乾間自浙徙固
安。卜居王龍村。擅醫術。藏有文公手製琴。與宋蘇長公饋韓

魏公硯。珍
爲世寶焉。

我聞歷代法物萃名都。家家什襲藏雲樹。窮鄉之士徒望古。如
從行潦撈珊瑚。藝苑流傳大手筆。馬班而後惟韓蘇。二公文章
冠百代。泰山北斗垂型模。後儒亦可羹牆見。遇諸想像疑模糊。
一琴一硯忽在眼。快如滄海獲遺珠。有操可讀銘可辨。龍池年
月諒不誣。安絃磨墨興飛越。當年韵事恍與俱。誰抱此琴隨南
海。誰捧此硯侍西湖。古調獨彈潮鱷徙。醉筆橫掃杭妓娛。數百
年來幾兵燹。鬼神呵護極辛劬。難比湯盤與禹鼎。差勝玉印珍
婕妤。錢塘真瑤人藏河間苗生性嗜古。漢磚唐瓦拾壘墟。此為褐
夫初懷玉。但有瓊玖無瑾瑜。苗名學植號仙錄有漢磚唐瓦按苗先露
名夔此原注作學植或係當日原名今已無
人知何似君家守先澤。昌黎眉山一室居。興來摩挲與古會。湘

娥顧盼龍賓趨。至寶豈可百金易。吁嗟乎桑乾俗吏空覬覦。有

金求售者
韓公却之

捕趨織行

秋聲滿院桐陰老。濃綠深深變芳草。多情趨織良夜鳴。金屏翠
幙驚寒早。嚶嚶唧唧含清商。依稀玉笛翻伊涼。微物偏能解人
意。隔窗催織憂無裳。如何雅韻傳時晦。幽人往往心乎愛。提籠
著屐何處尋。偃僂循牆開草昧。自知微細防多端。壁居穴處隨
遇安。蝨蟲妙有避人知。材取王孫良獨難。相邀佳侶窮剔搽。豆
籬屢過行荒邱。拔茅發伏見頭角。勢當覆手身難抽。色青背闊
斯為最。張牙振羽聲洪大。逢場樂鬪秦俗同。勝負須分朝夕會。

近牀有意伴長吟。音如金玉無遐心。急管哀絲同感觸。悲歌慷慨豪情深。人生天地須行樂。一物一名俱有託。箇中佳趣自參詳。豈效傳經賈秋壑。

廷琳案宋賈似道有蟲經一卷為論促織之專書

弔天津知縣謝忠愍公子澄二首

蠻荆蠶起逼津門。獨著青衫振虎賁。苦戰不知身蹉跌。竟教千載哭忠魂。

衆志驚惶一戰豪。可憐碧血染奔濤。英雄自古多危難。猶想丹心日月高。

題報恩寺井二首

有序

明師克京師。危學士素投報恩寺井。僧大梓出之曰。君知

國史。君死則國史亡矣。乃降。

精藍古井渺寒流。報國捐軀孰與侔。忠憤一腔危學士。可憐轉念誤千秋。

國變方將大節伸。紫衣饒舌累成仁。一從世罕王炎午。多少偷生藉口臣。

謁精忠廟觀燒秦檜二首

有序

京師精忠廟祀宋岳武穆。每歲正月。必瘞作鉅公狀。炙石炭於腹中。名曰燒秦檜。亦鑄鐵像跪祠前意也。

武穆祠前像鑄秦。千秋公忿總難伸。陶形更被焚如慘。一樣臍

燈燦爛陳

爛額焦頭亦快哉。赫然火判漫相猜。年年社會人如海。惜少清涼居士來。

弔古戰場

氣慘風悲太寂寥。不知何日息征徭。月明故壘魂安在。雨打寒沙骨亦銷。

金陵戍三首

夜半猿聲隔嶺頭。月明猶憶六朝秋。空將千載離鄉恨。付與秦淮日夜流。

壯志期成報國謀。萊衣未戲雪盈頭。可憐終夜潺湲水。不與離人滌客愁。

旗旗搖落故鄉秋。望斷征衣寄總休。幾度西風寒透骨。夢中疑是古涼州。

題墨菊圖

隱逸何心入畫圖。秋光冷淡影形孤。多情繪得東籬態。爲問淵明愛也無。

夏日訪友

秦世餘腥已久灰。如何吾道等塵埃。休嗤教讀成羈客。猶得偷閒訪友來。

和春閨怨原韻

入夢鶯聲百轉柔。泪痕團作水晶毬。畫欄倚遍驚春晚。獨對天

邊月一鉤

雪後逢旅人

四顧漫漫雪載塗。不知驢背有詩無。他時睡味甜于蜜。盡日離情苦似茶。作客竟教寒至此。因人唯計熱何如。栖遑相遇誰相識。回首關山萬里餘。

秋日即景

多情惟欲挽光陰。佳景相招直到今。竹總當風難折節。葵非向日不傾心。夢魂約蝶尋花宿。詩句隨蟬抱樹吟。秋思百端誰與訴。冥鴻雲路是知音。

雪後旅情

晚風吹雪暗長途。一片歸心倏有無。投宿影孤茅店月。強餐腸

斷稻鄉鱸。雲鬢倒亂羞窺鏡。翠被單寒怯解襦。那識客情易惆

悵。曉鐘聞罷又啼烏。

雲鬢一聯。係向聞某旅邸題壁句。今因客情感觸。遂足成之。

題貞女服闋殉葬

正氣氤氳接帝京。曲全坤德使人驚。青年待嫁甘冥配。黃髮銜悲感竭誠。杯土幾時埋節孝。瑤池千載照心情。世風益厚多貞潔。合遣神巫鼓吹迎。

初秋曉霽

悠悠清夢誤黃梁。曉起空庭怯嫩涼。夜雨暗滋金鳳藥。秋風新送玉簪香。雲開雁路詩情遠。山入雞窗畫意長。景物何須甘寂

寔呼朋把酒話農桑。

右詩二十首同見鴻雪集遺稿

李明經仲瑄

順天府志選舉表李友杗。固安人。光緒八年壬午科副貢生。

賈廷琳同里李薛煥先生事狀先生諱仲瑄。字薛煥。一字筱泉。吾同里南趙莊人。光緒八年壬午科副貢生。榜名友杗。字琴堂。後因讀明薛文清公讀書錄。景慕其學。遂改焉。先世居固安城南尚各莊。清康熙中徙居吾里。世以資雄。歷數百年弗衰。父諱培源。字濬泉。國學生。嚴毅剛果。有功於梓里甚鉅。詳見固安鄉土志。先生生於咸豐六年十月十二日。少多疾病。就傳後同學

者十許人。皆聰穎善讀。先生獨艱於記誦。用是益刻苦自勵。父濬泉公亦督責綦嚴。兢兢悚惕。負牆不敢一刻弛。所延致者。率皆鄉國名師。俾廣其業。光緒八年。與同縣高棗坡先生潤生。同中是科副貢生。自是交益篤。學益進。後高公成進士。入詞林。而先生屢試不第。遂絕意進取。嘗以儒者獨善其身。既無名位。以兼善天下。必先以擴其善於鄉邑始。當某歲大饑。請於父濬泉公。備錢數百緡。以貸里中困乏者。弗責之償。濬泉公嘗指腴田十一畝。代村人納一切差徭費。後因費日廣。而租穀不足給。先生推廣先志。更指腴田三十畝。以益之。迄今兵燹連年。人多蕩析。而我村人永遠不復受差徭之苦累者。皆食先生之厚賜於

無窮也。先大夫瑞符公。曾爲之呈請縣署立案。並赴都門。乞文於高公。募坡。撰李氏義田碑記。以章顯之。乃今日無知者。以先生之捐助義田。由先大夫愆惠之力而成。則于先生善承先志。孜孜爲善之素心。豈不悖哉。先生家有負郭田千數百畝。以十之八九佃與里人之貧無產者。每歲租穀。比他富室率減一倍。且於秋成後。方始收納子孫。至今尙謹循其法。弗敢輒易。每歲時令節。凡里中篤好者。困乏者。孀孤者。酒食殽果。紛然投贈。歷久不衰。先生誠可謂性命於善。而恢宏其解推之量者矣。生平事親篤孝。母劉太夫人染沈疴。先生躬侍湯藥。不解帶者數十日。母服未闋。父濬泉公繼患風痺。不良動履。先生入供食飲。出

操几杖。愉愉孝養。歷六七年如一日。嘗購今日所謂人力車者。輓其父遨遊里閭。以爲笑樂。每出環觀者濟濟。莫不歎羨焉。先生有姊一。適永清李家口趙氏。家落貧窶。先生按月給以薪米。終其身。沒更身任葬事。族叔諱清源者。家貧。停其祖母柩十餘年。母柩六七年。力不能葬。先生資助之。俾安宅兆。又嘗獨力創修祖塋。植松柏數百株。築垣墉數百丈。豐碑祭案。以次畢立。至里中三義財神等祠。今日整潔如新者。皆先生重修之力也。光緒二十六年。拳民肇亂。聯軍入京。天子西狩。先生憂憤甚。適濬泉公於是年八月逝世。益哀毀慘怛。誓以身殉君父。先大夫及諸友朋。每曲喻以解之。明年和議成。亂事弭。先生鬱憤殉世之

志乃稍弛焉。性極和藹。與人交莫不親若昆弟。故每出里中兒童僕圉。率尾於後。以相懽噓。其樂易有如此者。卒於宣統三年冬十月。年五十有六。子一則沆。剛果復如其祖。女一適霸州台山韓書英。孫一文海。

同里賈廷琳曰。先生性喜典墳。每節縮衣食。購致羣籍。貯滿數屋。廷琳幼讀時。家貧無書。先生與先大夫誼至厚。而弟畜廷琳。每有討論。輒以衆籍資焉。及豐城毛實君師延見廷琳於永定河道署。頗訝其聞見不似鄉曲士。詢其何所得書。則以先生時常借閱對。翌日毛師遂傳命訂期延見。先生卒謝不往。其澹於世情如此。今逝世忽忽已十七八年。而誌銘未具。懿行將湮。故

就粗所知於先生者。撰爲事狀。以示世人。語所謂鄉先生沒而可祀於社者。先生殆其人歟。自先生沒。而吾鄉孝友睦婣任恤之風。掃地以盡。此廷琳每低徊軌範。輒慨慕於無窮也。

縣人高潤生李氏義田碑記另載本編金石文存卷

文茂才藻翔

固安鄉土志文學傳文藻翔。字蔚丞。祖家塲人。廩膳生。父鑄

原名

祥慶

由御史任湖南岳州府知府。藻翔在署讀書。頗涉經史。而不喜屬文。然性警悟。樂籌筆筭。凡中西算學家言。多所研究。著有籌算律呂辨證若干卷刊行。光緒庚子拳匪之亂。殉難于通州。

文茂才遺著

今存序一首

律呂新書淺釋自序

庖犧畫卦。爰作九九之術。以合六爻之變。暨於黃帝。神而明之。陰陽以協。律呂以調。故韶咸夏武。相繼而作。自暴秦焚書。樂經散軼。九章六律。更渺不相涉矣。漢儒掇拾煨燼。僅存樂記數語。自後雖發明律呂。代有傳人。然於圍徑之長短。累黍之縱橫。僅用徑一圍三之古率。略爲詮解。求其縝密詳明者。卒不可得。國朝定鼎以來。遠人慕化。海外奇書。捆載而至。咸同之際。海禁大開。各省大吏。奉文創建學堂。延攬西士。競翻譯歐洲典籍。因之算學天學格致諸書。以次印行。雖其中踳駁不倫。而幾何原本十五卷。實足補六經所未備。惜彼族務於富強。僅求微積。與管

晏商韓相近。以致習西學者。亦攘臂而務權利。抵掌而談製造。又何暇以曲線之精深。闡律呂之秘奧哉。聞有一二精進之士。考尺度之廣狹。驗節奏之疾徐。而語言不詳。支離強合。無怪學者考鐘律之精微。每望洋而興歎。余留心術學。十有餘年。而重惜律呂算學。歧而爲二。思有以引近之。適家大人權攝江西鹽篆。隨侍衙齋。俗務頗尠。因取御纂性理精義所載律呂新書。詳爲撰擬。雖云度數之末。而以六律正五音之理。亦隳括無遺矣。至於辭句之淺質。體例之參差。見哂高明。所不計也。光緒丙申律中大呂之月。固安蔚丞文藻翔自序。

右見原書刊本

附錄

〔石念慈文君蔚承律呂新書淺釋序〕自黃帝斷嶰谷之竹以諧鳳鳴。因之三分損益。隔八相生。而陽律陰呂。於是乎定。夫律呂者。占之氣候。所以探造化之微。施之廟堂。所以昭中和之德。驗之人心。所以徵性情之蘊。此中之理。自極精微。無與乎數算也。而度量權衡。實生於是。故布黍而知長短。廣狹。累黍而識多寡。輕重。莫非準黃鐘之管。以爲率。則黃鐘實數算之權輿。六律即九章之根本。歟。自秦火而後。樂經散軼。後儒之發明律呂者。僅以徑一圍三。略爲詮解。殊未得其密率。其習算諸家。雖各句深索。新義日出。而數典忘祖。又鮮有究

心律呂。取成書而詳爲釐訂者。文君蔚承。績學淵懿。殫精九數。著律呂新書淺釋。以正古率。徑一圍三之誤。法不外開方。數則得其密率。俾推算者知本於黃鐘。調律者不爽於古尺。隸首伶倫。合爲一家。洵前賢之功臣。後學之筌蹄也。夫光緒二十二年。歲在柔兆涸灘大呂之月。羅田敬臣石念慈謹敘。

見原書刊本

朱處士琳

蓬萊王養年固安朱良璧先生傳略先生諱琳字良璧。固安城南南宋村人。生三歲喪母。繼母徐視如己出。鞠育恩勤。稱於里黨。年十三。父復逝世。因家業繁冗。楛柱乏人。不得已棄學歸農。

非其志也。先生性孝友，事親敬長，鄉里無閒言。居心尤仁恕，遇急難解，推無吝色。清同治六年京畿大旱，繼以雹災，情奇重，比戶多乏食。先生家存積穀數十石，罄所有悉以周濟貧乏者，或署券來，先生立火之，全活者不計其數。自以早年失學，有暇輒把卷誦讀，故於醫卜農圃書畫奕棊，無不兼通，以多才藝見稱於時。生於道光二十三年正月十一日，故於光緒二十八年十二月十三日，享年六十。妻平氏，子二：長建勳，武庠生；平生無遽言愠色，孝弟慈和，根於天性。次建業，文庠生，接人處事，公而無私，所行事無不可對人言者。要皆有先生風焉。孫炳離，炳文，皆高等小學校畢業。余與炳離爲文字交，故稔聞先生行誼，棊詳，遂不辭譎陋而爲之傳。

廷琳按先生次子建業，字潤南，處鄉極和厚，每爲人排難解紛，不遺餘力。鄉人公送德隆望重匾額，以誌感戴。與廷琳相友有年，去歲更申以婚姻，以其女字余次子錫珪。此後當益加親厚焉。

魏明經聯芳

賈廷琳同年魏菊峰先生傳略。魏先生諱聯芳，字菊峰，其村曰林城鋪，距余村只二里許。父元俊，字彥軒，縣學生。先生少日貧甚，彥軒翁教授鄉里，先生相依館舍，日食粗糲，益奮勉向學，刻苦倍于恒人。弱冠後入庠序，繼食廩餼，以善制舉文負聲于時。

每屆歲科試及書院課試輒列高等光緒中寧河高熙亭師

恩諡文通官至太常寺卿清季主講陝西存古學堂廷琳自甘省往還數次謁見深蒙寵愛國葦後退隱處臺屢賜以手書殷殷勸勉以耆儒主

講吾縣方城書院振興儒術尤雅重先生時先生每歲假館都

中往來師門亦最久稱高足焉顧先生文所誼雖深然數奇屢

試棘圍終不售廷琳十二三歲時從業師劉翰臣

職貢民國九年春卒年五十一先生讀書於村東佛寺之古柏山房先生每歲時

由京歸里必數數來塾中縱談文藝窮日夜不厭廷琳竊從旁

得聞所未聞心樂甚先生亦獨偉視余愛如弟蓋翰臣師本先

生弟子而先生父彥軒翁則又先大父月塘公弟子也故先生

不以小門生相視而以弟畜焉一日詢余何字對以童年無有

先生遂為製字君玉朋輩中遂競以君玉字余後廷琳瀏覽各

書得自漢至清末古今字君玉者四十餘人遂輯為君玉字考

一卷以備遺忘然亦可見先生學業之有本源矣某年歲科試

先生名第一逾年再試翰臣師第一又後年先生復第一再後

年廷琳忝第一三人者迭膺首選如循環然事雖箋箋不足道

然亦不可非一時佳話也先生既終不得志於有司年屆五十

始錄取光緒三十二年丙午科優貢生廷琳亦忝預焉明年朝

考後先生以府經歷就職奉天到省方數月一日覺體微不適

自往藥肆尋醫猝傾倒遂卒於某藥肆門鄉友永清孟巡按憲

彝時方官奉天太守釀金返其櫬於家光緒三十三年冬月某

固安文獻志
日也。生於咸豐七年正月。春秋五十有一。子一某。篋室出。所著有固安物產志二卷。爲廷琳所藏。又有筆記一冊藏於某。

李明經芳園

縣人王尙義香圃李先生事略。吾縣近數十年來。言文學道德。清廉刻苦。必於香圃李先生首屈一指焉。先生諱芳園。外河村李氏。香圃其字也。光緒十一年乙酉科拔貢生。居恒莊敬自持。氣象嚴整。而接人誠慤虛和。人自畏而親之。生平一言一動。無不合於禮法。尤嗜義理心性之書。兼通子平星相諸術。家貧設帳課徒。所至以身教而不以言教。從之遊者。率多以品學著聞。而韋煥亭先生炳文。德器粹然。以善教冠於吾縣。尤爲先生高

足弟子也。有清白經庚子變後。改科舉。興學校。藉圖自強。先生於光緒二十九年出任地方學務。創興城鄉各校。一切務求實際。而不事外觀。雖形似簡略。然每年爲全縣節省浮費。不可以數計。較之隣縣務觀瞻而揮金錢若土芥。鄉民受無窮之累者。相去不可以道里計。維時豐城毛實君先生慶蕃。以名儒督理永定河道事。性喜陶淑人才。振興儒術。爲歷來河臣之冠。嘗訪縣人善讀書學業可期深造者於先生。先生因推轂劉孝廉峙。萬選拔煦。韋茂才炳文。曹孝廉樹殷。賈明經廷琳。及尙義等六人。迨毛先生陞任直隸布政使。羅致我縣諸人於藩署儲才館。講求身心經濟一切有用之學。厥後多獲成名於時。皆先生前

此推荐之力也。宣統元年曾赴日本考察學制。深有心得。歸國後益加勤勉。徧閱縣屬四鄉小學。雖當深冬嚴寒。炎夏酷暑。先生隻身策蹇。僕僕道途。其勤勞有爲少壯人所不堪者。而先生獨樂此不疲。蓋先生每爲一事。無不本至誠心。果毅力。以貫澈始終。初不因艱險而或輟止也。三年在吏部簽選鹽大使。分發河東。適武漢變起。未及赴省。仍接理本縣教育事。民國八年因積勞歲久。感受寒溼。以癱瘓脚疾卒於家。春秋七十有一。聞者無論識與不識。皆歎息曰。我縣端人宿學。從此逝矣。相與悼痛者累日。則先生德澤入人之深。從可知矣。子二。長杏林。業儒。次英林。高等警務畢業生。

李明經遺著

今存詩三首

赴日本考察學制舟中口占

萬里浮槎海國秋。爲參學制赴瀛洲。中邦枉被空文誤。禮失翻教向野求。

良友同舟最有情。雄談四座快生平。漫云橫海波濤險。破浪乘風壯此行。

島嶼蒼茫眼界開。水天一碧淨無埃。神山隱約雲端現。想像今番換骨來。

右詩載李明經東遊日記王君喻齋錄示

石武孝廉蘊芳

〔縣人朱建業香圃石公傳略〕石蘊芳。字香圃。無爲莊人。先世居新城縣韓村營。其曾祖徙居固安之無爲莊。今爲該村望族。公幼讀書。長棄文就武。入武庠。中光緒元年乙亥科武舉人。誥授武騎校尉。性篤厚。孝親敬長。將以至誠。里有紛爭者。爲之分辨。曲直。勿使涉訟。有困乏者。爲之推解衣食。俾免凍餒。自奉亟儉。約而待人。則極篤厚。因是義聲動乎遐邇。語公姓字。雖婦孺亦多知者。鄉鄰公送干城望重。方正和平。各區額以頌其德。子弟有習武事者。多喜列公門牆。以受教誨焉。公生於咸豐四年。故於民國十五年。年七十有三。妻張氏。賢淑識大體。生子五。長毓琦。武庠生。次毓珩。國學生。三毓瑛。縣議會參事。四毓珂。精醫術。盛。家業豐亨。人皆謂公積德之報云。

王茂才芬

縣人賈士魁業師王香國先生行狀。先生諱芬。字香國。姓王氏。縣城西南公由人。與士魁同里閭。世有潛德。先生喜讀書。冥心孤往。不逐時好。爲文質直無雕飾。弱冠有聲庠序間。而尤以書法稱於時。積書畫多種。蚤夜寢饋其中。每於稠人廣坐。輒取所藏與共欣賞。先生生時。父適齋公已先沒。比三歲生母又見背。而孝友性成。年稍長。推所以事父母者。以事祖父母及嫡母。皆

能曲當親意。以博其懽。及沒喪葬皆盡禮。生平喜談諧。與人言輒以機警勝。人多敬服之。性篤厚而愛人。廉於財而施予無所惜。赴人急難不待請。爲人決曲直。皆心說誠服。有爭論者。輒於先生取決而不聞於官。鄉里有事。爲設方略。或倡爲之事。罔不濟。由是遠近宗仰。識與不識。咸以先生爲矜式焉。民國十二年。被選爲縣議會議長。縣中諸事。一惟先生裁決。是聽。遇事獨持大體。議論侃侃。必使言之可行。行之可久。究民情。僞達之官。損益官所施。爲推之民。以助成縣中善政。先生文學品望。尤爲吾鄉冠。故一時人士。多暱就而親敬之。門庭濟濟。無白丁。從政門內。教子孫以條法。男婦長幼。各執所業。家人數十口。率皆循循。

規矩。有過面叱之。咸怡然順受。無忤容。其家教之嚴整如此。今年夏六月。以疾卒於里第。春秋六十。配趙氏。先先生卒。繼配丁氏。子四。潤章。憲章。守章。爲章。女三。孫四。孫女六。烏乎。方今舉世競尙新文化。後進少年。率多厭薄老成。以爲不足稱道。抑惡知樸學如先生。乃世所急需。而里黨教化。所急賴以維持者耶。今先生既逝。哲人其萎。異日陵谷變遷。恐遂湮沒而無聞。故謹撰次事狀。以詔來世。後之觀於斯文者。果有追溯先正之遺風餘韻。低徊反復。而不忍釋者乎。蓋非士魁之所敢知也。民國十七年秋七月。門人賈士魁敬述。

王總戎事彙補遺二條

清王先謙東華續錄乾隆三十九年秋七月丁丑諭軍機大臣等。太監高雲從洩漏道府記載一案。昨審訊高雲從。供有高雲龍在臨清州當長隨。今覆審高雲從。據供並不認識臨清州知州。係託曾押貢到天津之參將王普懇祈將伊弟高雲龍帶往山東。尋覓跟官等語。王普身為武職大員。乃敢與太監認識。聽其屬託。將伊弟代薦長隨。殊屬不堪。著傳諭山東巡撫徐績。即將王普革職。嚴審確情具奏。將此由六百里發諭令知之。

又。是月己卯諭。向來內外各官奏事。設有奏事處官員接遞。轉交奏事太監進呈。所以使宦寺人等不得與外人交接。乃奏事官員日久懈弛。致有山東隨至天津之參將王普與太監高雲從認識屬託。高雲從不過寫字處下賤太監。何得與外省參將相識。則是太監等與外廷官員在宮門覲面交談。大概可知。高雲從著即處斬。

廷琳案乾隆中太監高雲從一案。輾轉牽連大臣自侍郎。蔣賜棨以下。被重罪者數十人。而以一長隨故。山東大小各官。被重罪者亦衆。我縣王總戎猶其案中罪名較輕者也。蓋高宗意在整飭朝綱。故借此以興大獄。使宦寺等杜口不敢談禁中事。後又因諸臣無他大過。各從寬宥云。

曹明經事彙補遺一條

衡水劉乃晟雲樵老人家傳。曹飭字子端。號雲樵。清舉人。內閣

中書江之五世孫。曾祖諱昌齡。祖諱人驥。字德良。父諱汝桂。皆縣學生。妣氏趙。世居縣治東北之曹興莊。爲固安著姓。清康熙時。永定河改道。厥後北岸時有決口。田畝沙淤。家道中落。咸豐初。河患彌甚。十年庚申。徙居縣西之中公。由迄今六十餘年矣。七齡時。受學於祖考德良公。性聰穎。異常童。德良公督課之。嚴加訓迪。入學後。有聲黌序間。十試鄉闈。不售。同治十一年歲貢生。候選訓導。生平質直和易。言動篤誠。藹然儒者。人莫不喜近之。家境蕭條。以教讀終其身。及門就學者極衆。從不計及脩脯之厚薄。家貧者尤誘掖不遺餘力。率發名成業。以去。至今里黨稱道焉。性孝友。爲幼弟純授室成家。扶植之數十年如一日。喜

吟詠。胸懷恬淡。多自得語。著有雲樵老人遺詩一冊。藏於家。光緒二十年九月卒。年七十有七。子光第。字杏橋。縣學生。居鄉急公好義。人多敬之。年七十卒。無子。以弟榮第之子樹殷兼祧。孫樹殷。年十五。應縣試。縣令謝裕楷奇其才。拔置冠軍。逾年科試。優等食餼。光緒二十九年。舉於鄉。民國中。歷任江西蓮花九江等縣。所至以勤廉稱。人謂其祖積德之所致云。昔姚文公序馮氏三世遺文。五世儒仕。鬱爲清風素望之家者。百四十有八年。庶幾古之世德。今曹氏自中書公崛起於先。兩弟前後舉於鄉。姪以孝廉宰鄂之公安漢川。政績卓著。中書公七世孫樹殷。與乃晟同官贛省。相處較久。考其家世。繩繩繼繼。十餘世書香不

絕視姚氏所稱年數。殆已倍之。嗚呼。其可風已。

李警院天翼事彙補遺一條

見卷十

金史循吏傳論初辟舉法行。縣官甚多得人。餘如興平令師夔。臨潼令武天禎。長社令李天翼等十六人。皆清慎才敏。極一時之選。而能扶持百年將傾之祚者。亦曰吏得其人故也。

楊檢討秀事彙補遺一條

見卷十七

清法式善清祕述聞雍正七年己酉科順天鄉試。取中解元楊秀。字掄升。固安人。正考官禮部侍郎鄂爾奇。鑲藍旗人。副考官兵部侍郎楊汝穀。懷寧人。四書題。參乎吾道一節。天地位焉一句。如七十子至無思不服一段。

固安文獻志卷十九目錄

耆舊碑誌

唐故益州大都督府功曹參軍事張君 立 嗣 墓誌銘

唐處士張君 景之 墓誌銘

唐孝廉張君 慶之 墓誌銘

唐將仕郎張君 敬之 墓誌銘

唐故朝散大夫著作郎張府君 湣 墓誌銘

唐故太中大夫新定郡太守張公 肅 墓誌銘

唐故豫州鄆城縣丞張君 孚 墓誌

唐故河南府參軍范陽張府君 軫 墓誌銘

唐故河南府參軍張君 軫 妻邵氏合祔誌

唐故秀士張君 熙 墓誌

唐故文貞公曾孫故穀城縣令張公 燠 墓誌銘

周故通道館學士張府君 弋 墓誌銘

唐處士張府君 恪 墓誌

唐贈丹州刺史張府君 臨 神道碑

唐張府君 臨 墓誌

唐故開府儀同三司左丞相燕國公張公 說 墓誌銘

唐故幽州都督河北節度使燕國文貞張公 說 遺愛頌

唐衛尉卿洪州都督張公 休 遺愛碑頌

固安文獻志卷十九

天津徐世昌鑒定

縣人賈廷琳謹編

耆舊碑誌

固安古代賢哲見於史籍者肇自魏晉以降而碑誌無傳。至唐漢陽王張柬之。燕國公張說均為張司空之苗裔。故道光中所出漢陽王一家之誌石十一種。及張燕公集中撰其先世諸誌。莫不載為方城人。自是吾鄉往哲。碑誌一門。始有可考見。茲以著錄于編。而他書及石本之傳播者。亦並列焉。我縣有明一代。人文極盛。然舊志於碑誌類。向未收載一文。欲考諸先正之前言往行。

每苦無可憑藉。竊所歎惋。入清代來。縣中仕宦科名。頗爲衰歇。由於崇禎二年城破之役。衣冠士族。率已慘戮無餘。以故士氣凋蕪。歷數百載。迄未能復。雖時代甚邇。而誌銘之傳世者無多。大抵北方習俗。重實行不事虛文。往往聲名震耀一世之人。而身後誌銘弗具。事狀無徵。誠有如萬季野所歎爲無可如何者。有志之士欲數典而稽厥祖。揚世德之清芬。作後學之矩矱。尙安所假手乎。廷琳不揣樛昧。年來百方摭集。於耆舊事彙外。更輯爲碑誌二卷。自恨咫聞尺見。缺漏孔多。所願梓里諸君。或家乘所流傳。或貞珉所鐫刻。源源錄示。纂列編中。

裨吾鄉數千載之潛德幽光。永昭垂於禩業。並熟聞於海內淹雅大君子之前。而章顯之。是則廷琳所禱祀以求者也。民國十四年秋七月。

唐故益州大都督府功曹參軍事張君墓誌銘

并序

司元大夫李行廉撰

府君諱立弼。字神匡。范陽方城人也。閥閱遊宦之資。詳之碣文別傳。五歲而孤。志學伏膺於大儒谷那律。律爲諫議大夫。紬書秘府。府君以明經擢第。隨律典校墳籍。八儒分眇。五墨殊途。劉歆析九流之區域。鄭默辯三閣之同異。五十五部。卅四家。訪寧朔之新書。禮窮莊敬。覽南陽之統論。易盡精微。緘寶秘文。委曹

前記。並登靈府。一以貫之。逸思煙迴。清颺霞舉。言同神遇。理叶而成。七徙職爲益州府功曹參軍事。以賢良徵。入甲科。未拜職。以龍朔元季五十九。終於洛陽。春秋五十有五。夫人吳興丘氏。以永昌三季九三。終於私第。春秋七十有九。東之識不遠。稟質愚昧。趨詩禮之訓。承顧復之恩。早預微班。驅馳賤役。自禍蒼昊。諸弟皆幼。夫人勞斷織之訓。深噬指之慈。刻心提耳。孜孜不倦。今蘭發玉暉。多從化往。唯東與晦。僅存喘息。三復規誠。萬古不追。奉夫人遺誨。使改卜新塋。府君先定南山。今移與夫人合葬於安養縣西相城里之平原。府君友人司元大夫李行廉撰銘。東之等不敢改易。謹刊李銘。以存不朽。其銘曰。

廷尉名卿。東阿良相。積慶鍾美。清徽遐暢。顯允哲人。克標令望。憲章顏冉。牢籠舒向。氣芳蘭芷。價重璵璠。望之逾肅。即之也溫。高情舉。逸調霞軒。彫章綺合。縟藻繁。爰鳳筮仕。彈冠奉檄。式佐名邦。盤根遽析。乃昇州部。平反著績。孰謂蹄涔。能申海擊。濯纓金狄。主吏銅梁。善立惟敬。謙道以光。白生虛室。穎曜錐囊。焚林佇秀。遠應明敷。縱掉江波。觀光洛浦。調高文囿。思盈書圃。擢第金門。淪軀泉戶。未終千。俄成萬古。弔賓絮酒。貞龜卜筮。風急長原。雲伍荒墟。佳成莫啟。幼挺永閔。立石圖徽。芳塵不墜。

〔清〕與存唐襄陽郡張氏墓碑。跋于守襄郡之壬寅春。席子介石。于田勝間得古碑三石。又于臨漢門外得三石。剔苔檢讀。櫛以示予。一爲故唐功曹參軍張公玄弼。

洎夫人邱氏合葬墓誌銘。蓋漢陽王柬之父母也。一爲處士景之。則漢陽王之弟。一爲新定太守。則漢陽王猶子。其豫州鄆縣丞。河南府參軍。軫二碑。一丁鳳。

即墓志所云安養縣相城里之平原。洲屢爲襄水所蓄。不復辨邱壘矣。今六石尙置樊城之跨鶴樓。予以王有故宅在城外二里許。後改爲衍恩寺。康熙間太守丹會一祀王于其中。因名張公祠。則此石移置公祠。庶下爲是。嗟古者尙共寶之。道光二十二年識。

清席方麟跋樊城郭西三里許。今之長豐洲。古屬安養縣。唐漢陽王張公東之祖墓在焉。嘉慶間漢水橫斷。十餘年中。內圯者十餘里。道光元年。土人得唐時夏侯夫人梁君嘉運二誌石於水濱。士林寶之。今年二月。掃先祖墓。尋視新淤舊地。平野見誌石八片。詢之居人。十許年前。得於頽岸。三遷而後至此。磷心竊愛之。恐其再沒風沙。而艱於移運。屢商同志。始踵前約。是日。以他事過襄。又見三石於臨漢門外。讀其文。皆張氏壘中故物。問所自。則亦今日。月中漁夫得之北岸。以待售者。亟購之歸。安置跨鶴樓。誌銘篆蓋。共得石十一片。其字不名一體。皆可臨榻。長豐洲廣袤數十里。其中墓石何止千百。而先後出諸水者。僅此數片。又皆張氏一門之物。又皆爲麟見而集之。是可異也。道光二十二年七月。記。壬寅二月。余初見河南府參軍諱軫一石。瞥眼相過。寶光煥然。如新發。次日視之。仍如常石。此一奇也。次獲新定太守肅暨參軍軫與夫人曹參軍立弼暨沙彌漫封埋尺餘。鄉人漫指其處。一掘即是。此二奇也。再獲益州功曹參軍立弼暨沙彌漫封埋尺餘。鄉人漫指其處。一掘即是。此二奇也。再獲益州功曹參軍立弼暨沙彌漫封埋尺餘。鄉人漫也。戊申所獲孝廉慶之秀士諱黠。穀城縣令諱曠。三人導之使西。而遇斯石。此三奇也。

而已。酉所獲將仕郎敬之一石。河伯風伯。若或爲助。不先不後。不入他手。此四奇也。其中篆蓋或先誌銘而出。或後誌銘而出。上下十餘年。相去十餘里。合之若符。均爲一家故物。則又奇中之奇者焉。張氏聚族而葬。其後更有出者。不可得知。獨惜王之長子著作郎諱漪一石。爲廣西臨桂孝廉唐子實購去。海豐吳子苾方伯。爲余轉求而不獲。此其闕陷之處。又余之不幸也。

清陸增祥八瓊室金石補正。右張立弼誌。今在襄陽張公祠。張氏諸誌。先後出土。余得其全拓本。合而讀之。世系表多闕。譌。統係於此。以資補正。立弼曾祖宏策。梁岳陽王諮議參軍。祖玠。後周宣納上士。隋巴州錄事參軍。父則。隋比陽澄陽二令。立弼六子。長東之。字孟將。相武后中。宗漢陽王諡文貞。贈司徒。次景之。字仲陽。次慶之。字仲遠。次失名。次敬之。字叔賽。將仕郎。次晦之。左率府兵曹參軍。東之二子。長漪。著作郎。次嶧。漪四子。長孚。字孟信。郾城縣丞。次恣。左補闕。次騷。荆府倉曹參軍。次軫。字季心。河南府參軍。孚字子縉。紹改名縉。縉子迪。嶧二子。長愿。吳郡太守。江東道採訪使。次點。字子敬。愿八子。照。殿中侍御史。第八子。曠。字繼明。穀城令。曠子珣。珣景之子。嶠。嶠子遜。晦之子。肅。字肅。新定太守。肅子回。又表載東城之子。有晉州刺史。珣者。以珣等名例之。當是東之之孫行。又載漪之子。有某戶部郎中。異大理評事者。亦誤。據誌。無是二子也。又載有名縉者。當即曠之誤耳。

清陸增祥孫藝風堂集跋。志云。閱遊宦之資。詳之禍文。別傳。則立弼固。有墓碑。此其埋諸土中者也。谷那律新舊書有傳。魏州昌樂人。嘗爲國子博士。遷諫議大夫。

兼弘文館學士。卅四家四十作卅。與上五十五部為對。欠一字。古人不拘拘於是也。蓋撰文尚在玄弼於是也。蓋即竇字。箱類。與篋同義。委蕙疑即委宛。撰文者李行廉。蓋撰文尚在玄弼於是也。南山之時。故無一語及其夫人。道移與夫人合葬。仍用前銘。而來之自加序文。故云東之等不敢改易。謹刊李銘也。觀此又可知序文為東之所撰矣。永昌無三年。故永昌三年即天授二年辛卯。夫人卒於辛卯九月。葬於十一月。時用周正。以十一月為明年正月也。武后以天授元年改國號曰周。志書永昌不書天授。標題稱唐不稱周。東之誅武復唐之意。已蓋於此時矣。

右見拓本又清陸增祥八瓊室金石補正四十

唐處士張君墓誌銘

并序

君諱景之。字仲陽。功曹府君之第二子也。沉默少言。博涉史傳。每慕於陵仲子之為人。好稼穡。樂名教。家無擔石之儲。晏如也。不應州郡之辟。專以琴書自娛。春秋卅有四。以唐之咸亨四季十二^⑤十二^⑥卒於家。子嶠。志學而孤。俯逮成立。而不悔禍。俄

隨怛化。嗣孫逃。歲在垂髫。奠醑攸託。惇釐孀藐。遞相憑附。固乃哀纏中外。痛傷心目。者焉。余與晦之。以為小季雖遽。大暮同歸。松城合兆。蒸蒸有寄。乃以大周而稔之三季^⑤六^⑥。改卜先墳於安養縣之西相城里。移諸兄弟。並窆於新塋之內。青鳥効吉。白楸速朽。惟堯典與孝經。共而長而壘久。乃為銘曰。念彼生涯。循茲怛化。川有閱水。無停駕。共惜小季。同歸大夜。令範將煙霞俱遠。儀形與炎涼並謝。痛萬始之不留。獨汎瀾而長喏。

〔藝風堂集〕跋景之漢陽王東之之弟。志稱功曹府君者。即玄弼也。云移諸兄弟。並窆於新塋之內者。謂慶之敬之也。景之及其子嶠孫逃。均可補世系表之闕。此志

即東之所撰。玄弼志云。惟東與晦。僅存喘息。此云余與晦之。以是知之。天授三年正月。即二年十一月。時用周正也。後二志同。

右見同上

唐孝廉張君墓誌銘

并序

君諱慶之。字仲遠。功曹府君之第三子也。儀形簡秀。風神峻整。引義望於胷懷。轉山泉於襟袖。泛覽流略。尤明左氏。州辟孝廉。不赴。燒金未救。夢珠徵禍。春秋卅有二。以唐之咸亨四季十七。卒於家。以大周而移之三季。六。與妻京兆杜氏。同改窆於安養縣西相城里。君孝友之行。冠絕等夷。仁恕之情。超邁羣輩。而伯道不嗣。仲宣無後。彼蒼者而孰云報施。援翰雪泣。用銘幽礎。其詞曰。

山以玉暉。水因珠媚。我有明哲。蒸蒸日上。蒸蒸匪匱。彼美仲兮。其心貞愿。贈瓊化泣。移舟遂遠。漢流東注。驕岫西盤。棗野風急。鵠原寒。扣櫬遺車。惟兄惟弟。誰云不痛。永絕遺體。

〔藝風堂集跋慶之亦東之弟。世系表亦不載。慶之辟孝廉不赴。而志蓋仍題孝廉。非實也。〕

右見同上

唐將仕郎張君墓誌銘

并序

君諱敬之。字叔謩。功曹府君之第五子也。耿介不羣。文藻貫世。年十一。中書舍人王德本聞其俊材。當時有制舉而下奇佚。召與相見。賦城上烏。勒歸飛二字。仍遣七步成篇。君借書於手。不盈跬息。其詩曰。靈臺自可依。爰止竟何歸。祇由城上冷。故向輪飛。王公嗟味。乃推為舉首。文昌以其季幼。第不入科。以門蔭

補成均生高第。稭將仕郎。非其好也。遂與諸兄紬校經史。專以述作為務。唐咸亨四季七⑤十六⑥卒於家。春秋廿五。大周而稭之三季⑦⑧六⑨。改窆於安養縣西相城里。君未及婚娶。胤嗣永絕。著書無荷戟之童。刻石闕鸞環之女。執奠惟弟紀德乃兄。撫櫬操觚。號咷橫集。其辭曰。

楊童不秀。顏子未質。妙跡參微。神機入室。嗟爾貞懿。才高漢佚。夢蛟翻紙。雕龍散筆。一其陳車夜動。馬帳晨開。議深白觀。言窮紫臺。禍徵斷石。悲纏贈懷。道存金素。書留玉杯。二其漾池東驚。驕山南拒。燭乘埋隨。連城碎楚。蕭颺風隧。蒼茫⑩緒。仲兮叔兮。胡寧忍予。三其

藝風堂集跋敬之亦來之弟。表亦不載。又按立弼志云。惟來與晦。僅存喘息。此志云。執奠惟弟紀德乃兄。則晦之乃敬之之弟。其四兄何名。無從考矣。云紀德云操觚。則此亦東之所撰也。

右見同上

唐故朝散大夫著作郎張府君墓誌銘 并序

姪子愿述

君諱漪。字若水。范陽方城人。四代祖策。從後梁宣帝入西魏。子孫遂家襄陽焉。隨禮陽令諱則府君之曾孫。皇都督安隨郢沔四州諸軍事安州刺史諱玄弼府君之嫡孫。特進中書令漢陽王諱東之府君之冢子。天縱明達。家傳孝友。質而能史。文而不華。周舉成均。進士擢第。上聖曆封事。一命懷州武陟尉。後應長

材廣度科。再轉洛州登封主簿。紉肅畿甸。望雄臺省。累遷左補闕。擢惟樊侯。緝我袞職。而狡童怙寵。碩人之高。多士側目。莫之敢指。君疾彼蠹政。上害苗書。帝嘉其言。且未能用。除著作佐郎。恩示累加。實遠之也。尋而盜有巨力。將生大變。故我王父昇堂。秉鈞。剿其凶邪。有以興復。狐鼠何有。城社惟艱。蓋老智謨之少。壯決之內。有獻納。外則糾合。匡定之力。君參半焉。洎王父錫券受封。恩欲別開君邑。王父辭曰。天飛聖也。利見時也。臣且饕竊。漪何力之有焉。帝曰。曩在春闈。嘗見卿子。敢言時事。朕實拒之。今乃同昇諸公。果集是績。真其兆也。卿奚讓焉。對曰。同室協謀。父子偕邑。非典也。父執政。子開封。重嫌也。恩實天啟。人謂臣何。

頓首固辭。然後迺已。於是稍加朝散。授大著作。循厥資也。爾後王辭廟堂。恩拜本郡。君表乞扶持。采蘭樊沔。無幾而太妃薨。棘人變變。哀毀滅性。未卒哭。終於倚廬。嗚呼痛哉。壯年卅有七。君不承烈光。克稟彝訓。虎變詞囿。翰飛天衢。自祖及身。皆秀才觀國。遙源巨浪。三葉一枝。故七涖官秩。六承恩拜。而典要有禮。變通適宜。所居之政。皆爲後式。雖光塵混物。而雅素恒真。口絕薰味。心多禪悅。非夫體合道而行。中權歟。是蓄希聲。將登大用。天實冥昧。降此鞠凶。凡百君子。靡不震悼。夫人成紀郡君李氏。皇朝瀛州司法參軍昭信之女也。洵淑且都。柔嘉惟則。詠采蘋而服禮。示斷機而流訓。隙有犇駟。淖無藏山。以開元廿年十一月

廿五日。寢疾。但化於靖安里之私館。春秋六十二。越明年孟冬。月才生魄。與君合窆於相城舊塋。王墳之甲。從先也。子孚。忠。軫。軫。歷荆府倉曹。軫。參河府軍事。不幸早世。先夫人云亡。孚。鄜。城縣丞。忠。邠王府掾。白華半落。綵衣長罷。陟屺奚望。風枝結哀。愿不天。早歲無怙。伯父垂訓。嚴君若存。惇生孤藐。以至成立。恩深罔極。思報無階。茹血申哀。務傳家政。禮也。銘曰。在昔雲雷。邁屯華夏。王祖伯父。克勤宗社。翼戴飛龍。肅清天下。君臣一合。名器無假。讒搆于朝。忠弃于野。惟伯扶持。除官告罷。太妃俄薨。血淚交灑。荼苦過制。因淪大雅。今則有之。古所無也。未諡忠孝。空瑩松楸。非斯慟乎。孰可悲□。

清陸增祥跋右張漪墓誌并篆蓋。余先得篆蓋。知著作郎之為漪。而誌石藏桂林。唐氏無由覓其樹本。唐氏有名秉廉者。以大令官於湘。詢之。則子實即其從兄也。

因介大令。轉索得之。而銘蓋俱全矣。誌首行有姪子愿。述字。是撰文者為張愿。漪之從子也。新唐書張柬之傳。以愿為東之子。宰相世系表。以愿為漪之子。二者互異。而皆誤也。漪四子。表。失載。字名。此誌敘先世云。四代祖策。從後梁宣帝入西魏。表作弘策。誌僅言策者。避太子弘諱。猶袁弘機之稱袁機也。漪舉長材。廣度科。

見於玉海。終唐二世。膺是選者。只漪一人。誌云。被童怙寵。云盜有巨力。云勳其凶邪。有以興復。即誅之。張事。致東之。引疾在神龍元年。傳云。漪以著作佐郎。侍父襄陽。誌云。表乞扶持。與史昭合。惟據誌已授大著作。而傳猶稱佐郎。是史之誤。誌云。無幾而太妃薨。又云。未卒。哭終於倚廬。是漪之卒。當在立宗初年。此誌立於開元。

廿一年者。因其夫人李氏合葬而追述之也。

藝風堂集跋。唐張漪墓誌。按舊書傳云。東之特授襄州刺史。又拜其子漪為著作郎。令隨父之任。東之至襄州。有鄉親舊交。抵罪者。必深文致法。無所縱舍。子漪侍以立功。每見諸少長。不以禮接。時議以為不能易荆楚之剽性焉。此志云。疾。君。靈。上。害。苗。書。是。漪。亦。錄。錚。錚。有。聲。者。向。非。此。志。之。顯。於。後。代。漪。亦。徒。有。惡。名。矣。

右見八瓊室金石補正五十四拓本未見

唐故太中大夫守新定郡太守張公墓誌銘

并序

公諱肫。字肫。其先范陽人也。馬渡丹陽。龍戰河洛。煙塵北擁。冠冕南遷。今爲襄陽人也。曾祖則。隨阬陽縣令。祖玄弼。皇益州功曹參軍。贈安州都督。父晦之。桂方正字左率府兵曹參軍。伯父柬之。中書令漢陽郡王。贈越州都督。扶危宗社。勳庸太常。初。公父早亡。伯父進養。諸呂殄滅。大漢分珪。茅土錫封。奏公授職。詔授荊州參軍。後韋氏臨政。虺變爲蛇。公授撫州參軍。累貶也。又試太子通事舍人。來復也。又授將作監主簿。再太子僕寺丞。太子文學。檢察浮費。司供輿馬。黃中有理。堂上拊頭。轉定州司馬。邢州長史。朝散大夫。涇州別駕。鶴來辭海。朱紱加榮。輿舊見題。佩刀是贈。又拜梁州刺史。涪陵郡太守。零陵郡太守。臨川郡太

守。新定郡太守。蜀山雲平。非無叱馭。湖水天浸。豈憚洪波。江南聽采菱之詞。成中和之曲。新安逢江水見底。比清鏡豈如。太夫人韋氏。安府戶曹玄寶之女。封馮翊縣太君。子貴也。板輿侍奉。豈獨長蕙。東征有詞。何慙舊賦。公稟休和之氣。降山岳之靈。忠孝事於君親。愷悌施於邦國。惜其大位未繼。泉路溘隨。以天寶十載六月廿四日。遇疾薨於新定郡官舍。春秋五十有六。諸侯之禮。國典備儀。道路有瑞鹿隨車。黎人悲父母奚若。夫人隴西李氏。隴西郡君。夫榮也。刑部尙書乾祐之孫。相州堯城縣令昭禮之女。中書令昭德之姪女。能事組紉。明閱詩禮。令德贊於從職。淑善穆於宗親。天平降災。殞斯貞麗。以開元廿一年八月三

日先公而亡。以天寶十二載八月廿六日合葬於臨漢縣平原。禮也。嗣子回等。纒纒棘容。哀哀相次。迺馨香其實錄。將刊刻於正詞。銘曰。

猗公命氏。偉乎邈遐。勳庸列土。繼體分葩。世業弘大。忠孝淳嘉。官政多歷。斯紱光華。沂海可詠。專城累加。天道不憖。梁木空嗟。一其夫人隴西。實惟公族。尚書祖理。中書伯錄。體德柔順。瑤姿令淑。如月之皎。如鵑之育。內則事姑。齊詩在祿。誰謂奉倩。先悲瘞玉。二其嗣子纒纒。幾不滅性。稟孝純至。執容瘠病。哀號泣血。象設惟命。母訓義方。慎終善令。女也摧毀。施於莊敬。樹斯文於不朽。紀勳業而貞正。三其

〔藝風堂集跋〕志叙拙之先世云。曾祖則。隋阡陽縣令。與世系表及張滄志解。滄陽令者不同。張曠志又稱比陽。滄陽二縣令。蓋先令比陽。後令滄陽。此稱阡陽。於例不合。此字古人作比。後人加阜傍耳。又云。父晦之桂方正字。左率府兵曹參軍。世系表失載。東之贈越州都督。亦不見於史傳。當是後來追贈。或即在賜諡文貞時也。又云。嗣子回等。則拙之子不獨一回。故銘詞內有如鵑之育語。然不可考矣。

右見拓本又八瓊室金石補正五十八

唐故豫州鄆城縣丞張君墓誌 并序

姪繹述

君諱孚。字孟信。其先范陽方城人也。曾祖玄弼。益府功曹。贈安隨郢沔四州諸軍事安州刺史。祖東之。特進中書令漢陽郡王。父滄。朝散大夫著作郎。公著作之元子。幼而明敏。長復剛斷。年十八。以門資齋郎常選。甘而孤。神龍後。讒諛間。豐家遇屯剝。今

上登極。昭洗舊冤。合門長幼。悉皆拜職。君授隨州司倉參軍。泉貨是司。出納惟允。邦君坐嘯。邑吏行謠。旋屬按察劉商。有怨先子。誣以他事。免君職焉。君曾無愠容。退返初服。婆娑里閭。不以屑懷。無何五嶺塵飛。將軍授鉞。決勝之策。君能贊謀。獻捷之辰。疇庸是最。棄瑕錄用。復拜豫州鄆城縣丞焉。此縣陳宋之衝。淮河之會。舟車輻委。寇盜肩隨。君正色臨人。剛腸疾惡。奸豪股栗。伏竄他境。而渠魁十輩。猶離跂於其間。君乃設捕伏之科。正繩愆之准。擒之匪日。聚以殲旃。藿蒲中清。犬不夜吠。復丁家艱。去職。以開元廿八年六月十四日。遘疾終於故里私第。春秋五十有八。夫人呼延氏。故亳州鄆縣令謀之女。備習禮法。潔羞蘋藻。

事姑以孝。訓子能慈。後公喪。十四日終於私寢。嗣子洮。既及壯年。先秋徂謝。孫迪承其祀焉。詞曰。

餘慶未已。厥生君子。位不充量。沒恨泉裏。其夫人禮則。當時見

美。同穴茲辰。徽音用紀。其二

藝風堂集跋地理志鄆城屬許州。此志云豫州鄆城縣者長慶元年始以鄆城隸許州也。

右見拓本又八瓊室金石補正五十六

唐故河南府參軍范陽張府君墓誌銘 并序

呂巖說撰

君諱軫。字季心。其先范陽方城人也。九世祖貞。仕宋南徙。五世祖策。隨梁北歸。寓居襄陽。因為此土舊族。先考漪。朝散大夫。著

作郎。大父諱柬之。特進中書令漢陽郡王。曾大父諱玄弼。益府功曹。贈都督安隨郢沔四州諸軍事安州刺史。皆諸侯之選。朝廷之良矣。君著作府君之第四子也。孩而歧嶷。十而穎亮。卓犖機鑒。汪洋德聲。人難其才。共許遠大。年九歲。以母氏宿願。固請爲沙門。自削髮。緇流持衣紺宇。內求三藏之實。外綜六經之微。蹈其玄編。得其深趣。蓋以爲攝慧乘者。良己以弘物。知理道者。徒義以適權。况乎祖之謀孫。初聞遺旨。兄之誠弟。再有忠告者哉。所以曳長裾。遊太學。不諂不黷。爲寵爲光。尋以進士甲科。拜河南府參軍事。叅彼都輦。萬方是則。分茲俸邑。四海能均。雖曹參以獄市留心。魯肅以困倉濟友。未稱於古也。春秋世有六。以

開元廿年六月五日。因調遘疾。終於洛陽陶化里之私第。禍霑霜露。顏回之才不幸。歎興蒞几。孫楚之涕無從。越開元廿一年十月十六日。改祔于本郡安養縣相城里先祖之舊域。禮焉。君立身謙和。爲性孝友。兄弟溫如也。鄉黨穆如也。始以甘脆寧奉。至行樂於晨昏。終以醇醪養閑。深仁絕於羶血。斯志固不可得而言已。嗣子縉紹等。風訓有紀。義方成素。其在哀疚。遠近傷之。巖秩自衡。閩道由襄。漢撫嵇孤。以映咽。跂楊塚而遲迴。漬絮非馨。柔毫可奠。永惟陵谷。無媿丹青。詞曰。

堂堂乎張。川岳降神。文華經國。孝友謀身。我才以通。我命以屯。三魂爲主。四體爲賓。古樹蒼蒼。幽火燐燐。冥漠千世。悲涼萬春。

樊鄧之郊。周楚之津。紀此立石。知予故人。

藝風堂集跋此志稱軫官河南府參軍與世系表合編字不見於今字書蓋即扁之俗體為龍為光即詩之為龍為光也詩長發何天之龍箋云當作龍即其證佐

右見拓本又八瓊室金石補正五十四

唐故河南府參軍張君妻邵氏合祔誌

鄉貢進士丁鳳撰

君諱軫字季心其先范陽方城人也曾祖玄弼皇秀才擢第拜長安尉益府功曹贈都督安隨郢沔四州諸軍事安州刺史祖東之秀才擢第宗社艱難時危反正特進中書令監修國史上柱國漢陽郡王本州□史食封七百戶碩德金章勳庸茂績傳諸國史備列先碑父漪秀才擢第朝散大夫著作郎佐父潛謀

能安漢室建策除呂獻議如昌功亞朱虛侍歸疎受君則著作之第四子聰含誕孕慶積公忠體峻晴峰神高秋色傅母罷乳羶腥靡嘗岐嶷有成詩書便覽往昔中宗復辟邪黨構端大父被奪鳳池歸來典郡見君性不食肉幼及成童奏為梵苑沙門配居龍興精舍載雖及紀材必為時君謂釋門之道也祈沒後之因儒門之教也救當今之弊修惠狹於善己濟世博於蒼生返初服於巾簪捨緇流而冠帶屬天波昭滌祖廟立宗支子從班大才誰繼喟然曰吾當擅鴻筆取青紫即胄太學擢秀才無何拜河南府參軍以秀才有後也况官參河尹攝綰府曹墳籍文竟儒宗墨客虛心待士散俸歸仁餘慶未融斯文乃喪味不

知宍。以逮于終。以開元廿年六月五日。遭疾不祿於洛陽陶化里私第。春秋卅六。嗚呼。知音者莫不云。變風雅之篇什。稟江山之清潤。方經國而可大。尚沈跡而未光。痛昭世之早辭。乃邦家之殄瘁。有集三卷行於代。夫人安陽邵氏。備佩針管。修整組紉。事姑側聽於雞鳴。作嬪潔羞於苜蓿。訓子得義方之蠱。孀居存師傅之儀。早歲專德於公宮。晚載修心於釋典。以天寶四載六月十七日。寢疾終於故里私第。享年卅有九。越天寶六載十月十二日。合祔於安養縣相城里先祖之舊塋。禮也。嗣子曰繹曰縉。纓纓相撫。哀哀相次。愷悌孝友。問禮言詩。既積學而含章。亦高墉而射隼。女也事夫終遠。弄瓦存卑。相對悲號。皇皇孺慕。將

題實錄。用叙哀詞。銘曰。

軒轅垂裳。支裔分張。子孫范陽。奕葉全昌。從官遷徙。茅社金章。

一其猗歟君子。炳靈代起。文章官徵。弱歲異此。不食於肉。歸於釋

子。二其翻飛國庠。擢秀明敷。繼業聯芳。參卿洛陽。嗟乎中折。梁壤

人亡。三其夫人婉德。禮全內則。母儀柔克。嗣子食國。驅馳文墨。呱

呱相向。銘誌將勒。四其

〔藝風堂集跋〕張軫志已編錄。此其夫人合葬之志也。叙軫事蹟。兩志略同。惟前志云進士甲科。此志云擢秀才為異耳。前志云。嗣子縉。紹等。此志云。嗣子曰縉。曰縉。南子吳越春秋諸書。本州下缺一字。據史知是刺字。

右見拓本又八瓊室金石補正五十七

唐故秀士張君墓誌 并序

君諱點。字子敬。其先范陽方城人也。軒轅錫族。司空分派。繁衍光大。自北徂南。九代祖貞。從西晉入東晉。六代祖策。去西魏自南齊。遷宦奔葉。因家樊沔。祖漢陽郡王中書令東之。佐命元勳。建封立廟。服器有具。子孫其昌。父嶧。則王之第二子。君則王之第七孫。渥洼躡足。有權奇也。丹穴絳羽。異鸞翥也。學詩學禮。舞象舞籥。克孝克溫。日肅日厚。成童未冠。遭疾而終。誰與聰明。不假眉壽。先天二年八月十六日。瘞于私第。時年十七。開元廿一年十月十六日。改殯于安養縣西。祔先墳。禮也。祔祖廟。祭也。嗚呼哀哉。君之兄。駕部郎中。愿。痛慕跖之不祿。悲涕泗之無從。銘曰。

陟彼先塋。東西墜之。伊何君子。左右位之。成童備德。痛幽閔之。棠棣之華。上春墜之。

藝風堂集跋張點名世系表不載志敘先世云九代祖貞從西晉入東晉據世系表所載點之九代祖名與不名貞又別無名貞者此與表異張軫志亦云九世祖貞仕宋南徙軫於點為同祖昆弟疑表有誤然此云入東晉彼云仕宋所述又復異辭據表所載仕宋為濮陽太守者名次惠於點與軫為八世祖亦不脗合闕疑耳可

右見拓本又入瓊室金石補正五十四

唐故文貞公曾孫故穀城縣令張公墓誌銘 并序

鄉貢進士崔歸美撰

節度討擊副使屈賁書并篆

公諱曠。字繼明。范陽方城人也。漢功臣留侯之後。五代祖策。梁

岳陽王諮議參軍。贈持節蔡州諸軍事。蔡州刺史。諮議生玠。爲周宣納上士。隋巴州錄事參軍。參軍生則。隋比陽澧陽二縣令。高祖立弼。唐長安縣尉益府功曹參軍。贈都督安隨沔郢四州諸軍事。安州刺史。曾祖東之。故特進中書令。監修國史。上柱國。漢陽郡王。贈司徒。配享中宗庭厝。祖名嶧。高道不仕。考諱愿。皇駕部郎中。曹婺等十一州刺史。吳郡太守。兼江南東道廿四州採訪黜陟使。自岳陽至于採訪。皆累葉重光。弈世載德。或補天之績。或黜陟幽明。嘉祉未泯。遂生我公。公卽採訪之第八子也。起家以門蔭。解褐補太常寺奉禮郎。旋授左武衛兵曹參軍。貞元中。皇帝追先帝舊臣子孫。以答功績。遂進補右神武軍錄事

參軍。在昔高宗。外戚擅權。密構神器。滔天之禍。如火燎原。區宇版蕩。上慘下贖。荆棘道路。人思息肩。天未移運。碣降元老。洎產祿潰計。皇綱荐紉。鯨鯢曝鰓。祥慶委積。公竟以非罪中禍。謫竄遐裔。景公千駟。無德而稱。夷齊首陽。萬古嘉歎。公嘗念先祖有大功於國。寵被一門。裂土分茅。綸翰盈篋。身歿之後。名謚蔑然。決意挺行。懷表詣闕。志誠幽贊。達于聰明。匍匐雪涕。帝用增歎。迺降明詔。自宰臣已下。集議行跡。謚爲文貞。五王同時。賴公之力也。朝廷嘉其憤激。抗表極論。可謂孝子孝孫。弓裘不墜。遂特授襄州穀城縣令。其在邑也。彈琴靜理。高視雲水。仁以變俗。德以臨下。吏不敢欺。盜不犯境。舉直措枉。黔首欽服。西門在鄴子

至太常。而復寓於河東之族人。君即太常卿隆之曾孫。徵君子犯之孫。河東從事俊之子。性倜儻。尚氣節。能引弓六鈞。命中百步。車服出入。擬於封君。州里頗患之。君乃勵操強學。不出門者十餘年。探道觀奧。鬱爲淵藪。周武帝聞之。徵爲通道館學士。既入隋而面其國。高尚厥志。終於山廬。嘗言夷齊清者非達。伯鸞曠者非中。優哉游哉。吾不與也。夫人某氏。少而嫠居。長而喪子。流離世故。窮盡艱危。持攜女姓。託身禪宇。實有高行之烈。隱居之風。未遑歸葬。有志不就。遺恨終天。降及曾孫。追申情禮。景龍三年歲次己酉十月十六日。克葬曾王父曾王母於河東之普救原。成先志也。銘曰。

皇矣烈祖。才雄氣武。不值漢高。空思萬戶。一旦折節。十年學古。高步華光。飛纓書府。昔有周處。斬蛟契虎。易暴以儒。異代同矩。周命旣沒。鼎遷于隋。仕於二姓。君子不爲。昭昭盛德。百代之規。右見張燕公集二十二

唐處士張府君墓誌

孫張說撰

府君諱恪。其先晉人。晉有張老。韓有開地。漢有留侯。侯八代孫皓。爲司空。司空子宇。爲北平太守。遭漢亂離。家於范陽。至玄孫華。復爲晉司空。遇難。子孫南渡。其處者或寓於蒲坂。周齊間有歸者。因徙焉。君晉司空十一代孫也。曾祖徵。君諱子犯。祖河東

從事諱俊。父通道館學士諱弋。德音遺範。詳諸家牒。君孤紹單門。傍無兄弟。苗而不秀。未仕而卒。道未融於邦國。位未揚於王庭。故老之口浸遠。好事之書又闕。是後生不得預聞焉。哀哉。嗣子晉州洪洞丞隲。襁褓衰麻。育於舅氏。夫人隴西董氏。常州長史雄之女也。早年守義。唯鞠一子。嚴而有檢。勤而善訓。成先人之不烈。貽後嗣之積善。徵太夫人德。則張氏幾將墜焉。開耀元年十二月二十七日。終於鄜城縣世婦馮氏之別業。春秋七十有二。先君之違世也。太夫人在堂。大門在殯。日月逾邁。有志未從。是諸孫疾焉。若履淵谷。以景龍三年歲次己酉冬十月二十六日。克葬王父王母於蒲坂東司空之村。成先志也。銘曰。

綿綿王父。續我靈基。幼而植德。人莫知之。烈烈王母。克明克類。教成鸞子。光我族嗣。中條之北。大河之東。邱陵桑梓。鬱鬱崇崇。千年啟室。百歲來同。永維先志。欽成厥終。

右見同上

唐贈丹州刺史先府君神道碑

子張說撰

府君諱隲。字成隲。范陽方城人也。張祖曰揮。帝軒之胤。肇勳茲木。錫姓上矣。詩有卿士孝友。史有留侯世家八葉。至東漢司空皓。公子字北平太守。始居范陽。四葉至西晉司空華。公子躉散騎常侍。乃僑江左。昆孫太常。復歸河洛。故河東有司空砦。洛陽

有散騎里。後司空至府君十二代。不失仁義矣。王父諱弋。周通道館學士。考諱恪。無祿早世。府君熒生遺育。四代單緒。家世尙儒。不及伯魚之訓。外祖爲理。遂讀皋陶之書。以明法歷。饒陽長子二尉。介休主簿。洪洞丞。以所願乎下事乎上。以所願乎上交乎下。反身與人。何往不順。臺選貞白。覆囚山南。人謂是行有典刑矣。昊天不弔。年五十二。調露元年十二月乙卯。捐背於縣廨。夫人長樂縣太君馮氏。父威藍田丞。敬修法度。踐涉圖史。顧復幼孤。將就成立。家道不殞。夫人是賴。享年七十二。傾背於東都康俗里第。光珪說不天。夙遭閔凶。又集荼蓼。先王制禮。不敢從滅。以景龍二年七月己酉。安厝於萬安山陽。祔從周制也。惟先

公不祿。俸不奉親。不機杼不資身。僚舊無雞黍之接。况其非類乎。族姻無魚菽之受。况其人吏乎。是全其高而善其獨也。過四十。始閱六籍。觀詩得之厚。觀書得之恒。觀樂得之和。觀禮得之別。觀春秋得之正。觀易得之元。曰君子多乎哉。事斯一言而已矣。每誦道記。三復三寶。曰至人之心。有以垂世。又聞之太夫人云。吾有子五十載。非其疾無一日之憂。太夫人亦云。吾事夫子三十年。耳無忤聲。目無暴色。先君之違世也。其憂戀者。尊門在殯歟。聖善在堂歟。我諸孤無日敢忘。及王母終養。二祖封崇。亦尙克家成遺訓矣。若夫安親孝也。宜家義也。翼子慈也。軌跡隱乎含光。故當代罕耀。馨香發乎潛德。故明神終勞。先大夫久而

益榮沒而不朽。蓋此景雲二年。天子嘉侍臣之匪躬。念前人之
蘊德。二月乙巳詔曰。故官某。毓德高邁。藏器下僚。代載儒雅。家
傳清白。河東佐邑。長不欺之風。山南覆囚。溢無冤之聽。徂謝永
久。邱墳不飾。啟茲令胤。貞事先朝。宜崇追遠之恩。以表揚名之
志。可贈使持節丹州刺史。王澤漏乎泉壤。國禮崇乎宗廟。漢帝
論士。恨不見李牧之爲人。曾子思親。泣無逮楚王之厚祿。道存
運往。痛矣餘悲。緬存前哲之所以聞無聲於四海。視不見於百
代者。匪銘頌歟。桓麟蔡邕。其則不遠。嗚呼。霜露交積。松檟滋深。
兄弟永懷。相顧將老。胡伯虎豈敢掩大人之清。陳季方何足知
家君之德。小子銜恤。非曰能文。莫假辭於他者。務傳信於我也。

銘曰。

猗嚴考。用玄妙。體太和。竭高志。貞夫一。戒其多。孝於親。正於家。
刑于訓。清厥心。晦厥跡。畏厥聞。寶如何。其謙儉。孝慈。皇哉褒德。
永世有詞。

右見張燕公集二十

先府君墓誌

子張說撰

府君諱隲。字成隲。姓張氏。其先晉人也。晉分家世相韓。韓滅留
侯爲漢謀主。至字爲范陽太守。因居其郡。及華博物亞聖。爲晉
司空。君司空十二代孫也。曾祖諱俊。河事從事。大父諱弋。字嵩

之。通道館學士。考諱恪。未仕卽世。先君四歲早孤。單門莞立。宗祀之不絕如綫。府君襍裋衰麻。鞠育舅氏。而炳太和之純嘏。爍遠慶之洪胤。庇身禮樂。發言忠信。小無不誠。大無不慎。終日乾乾。遠於悔悛。靈根顛而還植。祖德墜而復振。加以好學不倦。聞一反三。道機玄鍵。罔不幽探。外王父大理丞某。重世爲士。君傳其憲章。博施精理。年十九。明法擢第。解褐饒陽尉。丁王母憂。去職。夫人少而守義。老而無子。因心創巨。事不忍言。喪紀之數。加人一等。服闋。調長子尉。換介休主簿。洪洞丞。太夫人在堂。官求便近。故累徙而不進也。內清淨以化人。外平反以悅親。不樂歸美而喜隱德。故下車無赫赫之聲。所去有遺愛之戀。有命差覆。

囚山南。輜軒所歷。全濟甚衆。君以律有違經背禮。著妨難十九篇。書奏。帝下有司而刪定之。官黨同妬異。竟寢其議。道之將廢也。與命也。臧倉其如命何。調露元年秋。奉使晉陽。遇疾輦歸。藥禱無降。冬十二月大漸。九日乙卯。弃背於縣廨。春秋五十有二。光珪說不天。總角在疚。明年春。奉輜藁葬於河東。賴夫人撫養孤藐。躬加訓授。男集文雅。女工組繡。姻不失親。官復其舊。景龍元年秋。封長樂縣太君。夫人故藍田丞威之女也。享年七十有二。是歲十一月戊申。傾背於東都康俗里第。於戲哀哉。靡瞻靡依。何怙何恃。二年七月己酉。克葬我先公。夫人合祔焉。從周制也。初。議葬。小子夢度景於萬安山南孤堆東峯之下。時淮南宏

國文獻志

按即新唐書方伎傳之浮屠泓

相地曰。是山為華蓋。崗為蟠龍。龍者大人之德。孤者王侯之稱。卜夢協兆。何善如之。乃定墳塋。剏宅茲所。小子銜恤。誌之幽礎。係曰。

欽若古訓。時惟皇考。翁和三光。希聖二老。清有世業。儉為身寶。彌綸典憲。思緝王道。佐彼四邑。人用不擾。生我曷後。弃我曷早。閔余髫髮。遭家不造。鳴鳩在桑。其子在棘。母氏聖善。示我顯德。命服天朝。封邑舊國。榮未卒歲。哀已匝域。泣血思親。昊天罔極。孤之華蓋。土龍蟠連。崗四繞帶。林巒朝日。吐耀遠峯。攢微風夕。發過蕙蘭。石室固護。泉火寒。衆靈幽謁。奉神歡。壽宮深靜。永閑安。

右見張燕公集二十二

唐故開府儀同三司行尚書左丞相燕國公贈太師張公墓誌

銘

并序

張九齡撰

大唐有天下。一百一十三年。開元十有八載。龍集庚午歲。十二月戊申。開府儀同三司行尚書左丞相燕國公薨於位。享年六十四。嗚呼哀哉。皇帝悼焉。素服舉哀。廢朝三日。乃下制贈太師。蓋師傅之舊。恩禮有加也。詔葬先遠。喪事有日。又特賜御詞。表章琬琰。公義有忘身之勇。忠為社稷之衛。文武可憲之政。公侯作壽之勳。皆已昭昭於天文。雖與日月爭光可矣。

公諱說字道濟。范陽方城人。晉司空壯武公之裔孫。周通道館學士諱弋府君之曾孫。贈慶州都督諱恪府君之孫。贈丹州刺史刑部尚書諱隲府君之季子。自上世積慶。及公而祥發。神明所府。道德爲樞。生以寧齊。幼而休祥。鷹揚虎視。英偉磊落。越在諸生之中。已有絕雲霓之望矣。初天后稱制。舉郡國賢良。公時大知名。拔乎其萃者也。起家太子校書。迄於左丞相。官政四十有一。而人臣之位極矣。尚書國之理本。公悉更之。中書朝之樞密。公亟掌之。休聲與偕。升降數四。守正而見逐者一。遇坎而左遷者二。其餘總戎於外。爲國作藩。所平除者。惟幽并。秉節鉞而已。至若三登左右丞相。三作中書令。唐興以來。朝佐莫比。蓋聖

賢之運有會。師臣之道欲行人。雖求多我。每餘地馨香之發。敷聞自久。宜其翊戴聖后。師範百寮。功烈過於如神。德聲出於咸一。此固與版築崛起屠釣作合之類。亦云異也。公志玄遠而情高亮。未嘗自異。會節乃有立。何所不可。體道以爲宗。既定國於一言。亦保身之大雅。其於經理世務。雜以軍國。決事如流。應物如響。紛綸輻輳。其猶指掌。及夫先聖微旨。稽古未傳。缺文必補。墜禮咸甄。與經籍爲笙篳。於朝廷爲粉澤。固不可詳而載也。始公之從事。實以懿文。而風雅陵夷。已數百年矣。時多吏議。擯落文人。庸引雕蟲。沮我勝氣。丘明有恥。子雲不爲。乃未知宗匠所作。三霸盡在。及公大用。激昂後來。天將以公爲木鐸矣。斯文豈

喪而今也則亡。嗚呼。克生以輔時。而臣道不究。致用以利物。而人將安仰。土撫床以念往。下輟相而哀至。復見之於公焉。太常議行。謚曰文貞。二十年秋八月甲申。遷窆於萬安山之陽。燕國夫人元氏祔焉。夫人故尚書左丞相武陵公懷慎之女也。動爲柔範。皆可師訓。及公之貴。連姻帝室。雖處榮盛。若非在己。內執謙下。外睦親疏。古之賢明。未始兼有。開元十九年三月壬戌。薨於東都康俗里第。享年六十四。長子均。中書舍人。次曰埴。駙馬都尉衛尉卿。季曰埴。符寶郎。泣血在疚。皆我公之有後也。嗚呼。立堂永閔。何事春秋。幽篆斯在。亦云不朽而已。銘曰。天有密命。滋液百寶。時無大賢。誰與明道。我公允叶。我德孔昭。

翰飛戾天。羽儀清朝。功遂身謝。名由實美。言而有立。古無不死。南山之下。詔葬於茲。後之與歸。惟我太師。

右見張曲江集

唐故幽州都督河北節度使燕國文貞張公遺愛頌

并序

孫逖撰

有唐開府儀同三司行尚書左丞贈太師燕國文貞公。諱說。字道濟。張氏。聖文神武皇帝佐命之臣也。開元六祀宅于幽朔。及公既歿。御撰豐碑。以爲用公於是邦。當革敝之舉。訊彼故老。徵於前事。有以見聖人之情見於辭矣。夫渤海之北。有山戎焉。乍臣乍驕。或息或縱。鎮之以大府。府有都督。威之以大軍。軍有節

度二者之任。萬邦之屏。彌縫其闕。必在宗臣。曩者天冊之初。王尚書不反命。則我天后以納言狄公領之。先天之際。孫將軍不振旅。則我睿宗以太尉宋公爲之。洎涇口之役。薛公小岷。後數稔傷痍未平。易置諸將。少有稱者。則我皇帝注意於文貞公。社稷之固。生民之傑。伊昔徇節。未嘗顧身。面折二豎。辯邪正於君側。首謀四凶。決安危於天下。勇於義。力於忠。雖有賁育。不能奪已。自受命處此。聲振殊俗。終公之代。不敢進邊。聖人金城。其在是矣。先是公之未至也。軍實耗歎。邊儲匱少。帑藏乏中人之產。革車無百駟之羣。將欲豐之。不其難也。公問以謠俗。因而化之。命十人採銅於黃山。使興鼓鑄之利。命杼人斬木於燕岳。使通

林麓之財。命圉人市駿於兩蕃。使頒質馬之政。命廩人搜粟於塞下。使循平糴之法。物有其官。官贍其事。如川之至。以莫不增。一年而財用肅給。二年而蓄聚饒羨。軍聲武備。百倍於往時矣。猶以爲不一勞者不久逸。不暫費者不永寧。旣庶且富。人可用也。於是塹山澤。起亭障。塞雞鳴之阨。守阜陵之衝。遮大厦之路。距盧龍之口。延袤千里。橫絕一方。以順天地之心。且爲華夷之限。命下之日。修塞之後。人到于今。賴焉。夫戎逃遠却。暴禁矣。貨食滋至。財豐矣。封守以固。人安矣。師徒不勞。兵戢矣。武有七德。我其四焉。坐致必勝之道。以銷未形之患。是公之深計遠慮所致也。初公之大用。實以詞宗。雖亟持國鈞。而未執兵柄。及台揆

中廢。荆衡外牧。上將復由。因以爲將。惟幽都克慎厥始。惟太原克和厥中。惟朔方克成厥終。三駕而時靡有爭。絲是復踐中樞之任矣。文武爲憲。斯之謂歟。喬岳告成。遂登仲虺之相。金華念舊。仍遵尙父之師。高朗令終。固其宜也。昔周有張仲。是稱孝友。漢有留侯。見推籌畫。太守飛聲於朔野。司空邁績於西晉。及公之貴。世德其昌。光于祖考。則慶州都督。刑部尙書。追孝於前烈。友于兄弟。則國子祭酒。懷州刺史。致美於當代。施於祚胤。則兵部侍郎。駙馬都尉。續戎於後葉。人臣尊寵。舉集其門。豈伊朱綸之盛。方繼緇衣之好。辯其譜系。范陽之大族也。敘其封略。燕國之名都也。徽其政理。幽州之良牧也。美數多矣。斯人之德與夫

班伯之榮。故郡買臣之驚。守邸蓋不侔矣。薊縣父老某乙等。感之所致。久而益思。遠訴不才。追書盛德。徽音已隔。空悲梁木之歌。碑頌猶存。應墮峴山之淚。仍係辭曰。

聖出賢覩。爲師爲輔。大國宗文。殊方畏武。帝謂幽朔。人思鎮撫。受命再瞻。聿來茲土。謀猷旣壯。闕漏咸補。守固邦寧。財豐人聚。四牡旣駕。三邊無侮。又何與之。玄袞及黼。范陽宗邑。燕垂守宇。德被塞翁。恩深召父。琢彼遺愛。傳於終古。貞石不騫。薊丘之下。

〔清〕黃彭年《畿輔通志》金石略案其頌曰。貞石不騫。薊邱之下。前人說薊邱即今都城。勝門外土阜是。則原石在此可知。又案碑之題銜書諡與官。乃卒後追立也。

右見文苑英華

唐衛尉卿洪州都督張公遺愛碑頌

并序

崔祐甫撰

今天子終諒闇易月之期不言。既言之日。詢于師保輔弼之臣。曰。將以國之明。燭震下土。俾兆人康乂。有道哉。四臣曰。莫如擇賢而司牧之。雖欲不理。不可得也。上曰。用賢何先。四臣曰。莫先於幽遠蠻貊之邦爲急也。即日命王人遽以制書。就拜衛尉卿兼洪州都督張公爲御史中丞。廣州刺史。嶺南節度經略觀察等使。既踰月而遽屈于洪。洪之耆老發悖。商販漁釣。百類千品。周聲奪魄于野于廛。咸曰。寧取我裳而裂之。寧取我廩而焚之。父也天只。胡爲奪我之君。中丞受命而南。舟不及汎。馬不及秣。國人懷慕之罔極。曰。清塵遠矣。君不顧矣。鬱陶之思何用哉。盍

用於揚名頌德乎。故吏兵曹參軍張擢。法曹參軍豫章縣令鄭鋒。建昌縣令盧惟瑾。新吳縣令鄔賁。州人東冶府果毅劉容。耆壽喻乾相等討論之。衆僉曰。允於心。曰。自昔爲政者。知清之可以長人也。而清者稀。豈不欲清。欲牽之也。欲之所行。不廉不儉。爲之舟輿也。清之不立。肆奢崇貨爲之鑽鑿也。於是撤其帷帳。薦蓐之具。便於身悅於目者二百餘物。歸之有司。減其俸錢。稍食月幾十萬。實於軍府。此皆前政之所督觀而封己者。我則推而遠之。於是公儀之義申。平仲之規見矣。二之日謀於衆曰。昔曹參去齊。以獄市爲寄。以爲擾於獄者。輕重人之命。煩於市者。耗殫人之生。苟鞭笞桁楊之無度。侵牟肆奪之不改。是國家以

章綬印璽毒蒼生也。豈致理哉。於是平百貨之貴賤。議刑罰之等衰。使其貪不下殘。忿不私逞。韓子求環而不可。使人袒背而無傷。夫然噬嗑之象成。行葦之恩溥矣。三之日謀於野。曰不稼不穡。民天安仰。載馳載驅。王命所急。吾觀是邦。農野未闢。傳置未修。豈不以使役無期。供億失序。儻野有餓殍。賓不如歸。亦諸侯之恥也。於是減承城更卒幾三千。歸之隴畝。而擊柝之守無闕焉。賦豪墾財數百萬。賙于館餼。而含糗之徒不知也。其卒也不公之吏。畱以爲廝。其財也。不法之臣。受以潤屋。我皆用之於愛人活國也。於是阜藩之望崇。多大之儀備矣。從政三日。州人愛之如父母。承之如松柏。夫婦耕織之暇。無他懼。惟懼公速遷。

其餘煦嫗孕育。發於中而形於言。損其身而益於物。可以激頹俗。慰窮甍者。豈勝道哉。祐甫山東鄙人。不好妄飾。凡所聞見。務存實錄。故採拾而書之。公名休。字祥。幽州范陽縣人。有晉司空茂先之遠裔也。曾祖汲。易州長史。祖選。幽州固安縣丞。考價。贈齊州司馬。公起家石亭別將。自是爲縣令。軍司馬。州長史。各一入爲天子友。儲君臣。雖假以寵名。而跡實戎索。受命爲范陽節度安祿山判官。祿山以大權大寵。外示忠而內謀逆。太上皇推赤心而勿疑。敢有閒之者死。蹈虎尾。犯龍鱗。公密言其戎狄豺狼。不可厭也。當是時也。視鼎鑊如歸焉。神之聽之。是與正直。周旋鋒鏑之下。出入寇讐之間。而能終保元吉。漸于貴仕。進退存

亡而不失其正。其惟張公乎。又牧豪舒潤三州而及此。昔張黃門庭珪牧此州。甚得人譽。張丞相九齡次之。逮府君又有裕焉。故邦人有三張之目。頌者美盛德之形容。非魯僖公仲山甫不之獲。今茲頌曰。

昔爲豫章。故有循良。黃門之善。于今不忘。爰及丞相。亦有烈光。我君戾止。是爲三張。立廉寶儉。無怨無傷。郵亭之下。賓旅其康。四封之內。望歲千箱。自春徂夏。兮人相慶。慶未畢兮。聞後命。朱幡玉節兮。向蕃禺。彼願適兮。我望孤。君乎君乎。若歲大旱。其誰見濡。

右見唐文粹二十一

固安文獻志卷二十目錄

耆舊碑誌

大遼故忠順軍節度副使甯君 鑒 墓志銘

金劉公佐墓幢誌銘

元崑山州判官邊承事 守禮 遺愛碑

固安縣西關王氏祖塋記

明都察院右副都御史東玉高公 澄 墓誌銘

明固安縣大辛莊楊氏祖德碑銘

明太常寺少卿提督四夷館欽降山西廣昌縣典史約齋

傳公 好禮 墓表

清故誥贈修職郎顯考曹府君墓碑

皇清邑庠生式九劉公敬躋墓公紀

清蘇州府海防同知署江寧府知府閩仙楊府君承墓

誌銘

清故太學生劉公燦墓誌銘

皇清誥授奉政大夫紀府君士彥墓碑

清誥封朝議大夫文府君明元墓碑銘

皇清誥授武義都尉振溪王公德成墓碑銘

皇清誥授昭武都尉梅生王公萬春墓碑

固安縣渠溝鎮高氏阡表

高氏新阡表

清博野縣教諭張仲岐先生樹基墓碑銘

清故增廣生月塘賈君光明墓表孫男廷琳敬錄

清故處士瑞符賈君芳芝墓表男廷琳敬錄

皇清敕贈徵仕郎增廣生錦堂呂公廷琮墓碑

清故廩膳生伯清呂君濯墓碑銘

固安文獻志卷二十

天津徐世昌鑒定

縣人賈廷琳謹編

耆舊碑誌

大遼故少府少監忠順軍節度副使甯君墓志銘

中大夫太常少卿前史館修撰虞仲文撰

仲文浹日病臥。湯液鑿石莫入。家奴云。故忠順軍副使仲子福惠至。出其兄手書。且言先君葬有日。來請銘。讀未盡紙。忽不覺疾已。仲文始識君於馬城。一見固已相奇。及同年登科。又俱宦江北。定生死交。後十餘年。先我物故。兒女細弱。使孤骨客他土。不得歸葬。每一思之。涕與血下。書來喜可知也。能不銘。君諱鑒。

固安文獻志
字晦之。固安人。曾祖諱貞。祖諱可。一父諱的。明經登第。終於鄴陽縣主簿。子孫因家焉。娶隴西李氏女生君。望君之形與色。雖千萬人雜處。標然見其君子。况得味辭氣。伺動履者。寧不心醉神悅。初舉進士。同輩有吟風雪夜縱酒詩。君獨有天下餒寒弃我意之句。虱在布衣。其志亦已遠矣。由著作佐郎。順州軍事判官。大理評事。中京內省判官。秘書郎。秦州樂康令。平州掌書記。樞密院試驗。以老母不願違顏色。除朔州觀察判官。改授敦睦弘義延昌宮判官。加太子洗馬。因上奏。道宗特噐之。改授西京留守推官。加殿中丞。命出未拜。特旨樞密院令史。丁太君憂。尋起復。加尙書戶部郎中。今上卽位。詔覆張孝傑獄。流議中君深

文。其實根株之外。一切湔浣。以能授樞密戶房主事。遷左司郎中。俄轉兵房承旨。加少府少監。明年冬。接伴南宋人使。以小心得過。出爲忠順軍節度副使。不數月。蔚羅民無貴賤貧富。皆以爲神明。常在屋隅閒。出入動息。不敢枝梧。其人心畏服如此。乾統四年春。以疾終於官署。年四十七。娶太子洗馬廣陵高冲女。封本縣君。溫惠貞苦。撫諸孤。有母道。後君以九年春卒。年四十九。以十年五月二十八日合葬于北鄉東石里西南。生子男三人。長曰奎孫。舉進士。次曰福惠。左班祚候。季曰鄭九。亦進士。君素鍾愛。惜哉。未見頭角。女二人。長曰遇哥。許適彭城劉穹。俟良月。季曰會哥。尙幼。銘曰。

有益者祝。盈於人口。愷悌君子。胡不壽。物既忌芳。天不福仁。不悲甯君。悲吾人。

右見清繆荃孫遼文存又胡聘之山右石刻叢編

金劉公佐墓幢誌銘

公者諱公佐。涿郡西安禮讓人也。迺祖思永。父師正。皆有士君子之行。維公平日。綽有高尙之志。言爲人表。行爲士則。農桑爲業。而知其本務。田園適性。而□于末利。鄉鄰有道之士。以是多重。而□□僻巷。常有長者車轍。公之爲人。可□也。時泰和八年秋七月十五日終矣。□□六十有九。惜乏適嗣。承以猶子。□公之德。然不昭于今之日。而繼祭者。其有興乎。書爲此銘。庶傳

來葉銘曰。

不急富貴。安于耕耘。不趨利祿。怡其性情。戴白而老。不見甲兵。既仁且壽。永疾□生。哀酸霧蔽。痛斷雲行。白楊衰草。隴月空明。記之于石。遺譽千齡。

□和八年十月二十五日立石人妻咎氏 同立石人弟劉公

佶 姪企孫 企興 姪婦□氏 女師哥 女壻杜子真

外甥男八國醜 女懷容秀容 同里詞賦進士張節書并撰

〔清〕方陶齋藏石記。金取士之目。凡七。初有詞賦經義策試律科。經童之制。大定十一年。方陶設女直進士科。明昌初。又設制舉宏詞科。故有詞賦進士經義進士策

論進士之目。禮讓里名。涿州固安縣有禮讓里。見紀宗建經幢記。西安恐亦固安之誤。和上所泐乃秦字也。

右墓幢在北京東城五條衚衕天津徐氏退耕堂

廷琳按金史張天綱傳。天綱霸州人。至寧元年詞賦進士。今此幢之稱詞賦進士。亦同其例。而張節之名。舊志失載。應補入選舉卷中。至今禮讓店劉氏。族衆繁衍。稱爲舊家。當即公佐之後。其村多古碑碣。光緒中有一古碑。爲人盜去。村人共逐之。仍奪還。此幢當亦係盜去。售於溷陽端氏者。今歸余府主。張齋徐公。而同時碑碣之被盜。如縣西魏村等。更不知凡幾。今不知悉歸何所矣。又按公佐之妻咎氏。宋初咎居潤。曾官信安。子孫家焉。今該鎮猶多咎姓。禮讓去信安數十里。咎氏疑即信安人也。

元崑山州判官邊承事遺愛碑

睢水朱德潤撰

浙右之郡七。而平江之官賦尤重。平江所轄之州四。而崑山之徵輸尤艱。其故何哉。蓋大德以來。計其地畝之數。籍爲官田。貸爲僧產者。居三之二。民間役單賦重。每以私田一畝。包徵官賦三倍。由是農業之家。竭終歲之力。雖畚鍤具舉。墾闢至廣。有不能贍其生者。兼以州治瀕海。商颿旅泊。貨盈市集。民物繁夥。如通都大邑。其傍海居民。半皆航海往來。水陸之衝。出彼入此。爲尤難治。以故仕其州者。多鞅掌不能理。計其科徵調發。歲無虛日。蓋居官者。謹于法則。民無措手足。緩于政則。民慢其事也。至正元年夏。承事郎固安邊君守禮來爲州判官。凡賦役詞訟。一

皆賞之以寬而不擾。優而不迫。使民自盡其情。而州事亦以集。緣是民人樂之。亦君之優于治劇也歟。昔者子路治蒲。孔子稱其善者三。子貢問焉。孔子曰。入其境。田疇易。草萊闢。溝洫治。此其民盡力也。入其邑。牆屋完固。樹木甚茂。此其民不偷也。至其庭。庭甚清閑。諸下用命。此其政不擾也。今邊君佐州治。抑以是爲師乎。亦樂從於民乎。而民之趨事赴功者。抑亦樂其官之勸乎。抑迫于賦歛之重乎。是必有繇矣。嗟夫。判官州之佐貳也。上則抑于尹。下則藉於吏。有佐理之勤。而無專制之命。其平日苟無素蘊之能。無試劇之難。則一日臨民蒞政。豈不有勸法於民。而素餐於官者乎。邊君之任三年。而公私具舉。民人懷之。則其

所蘊者素矣。所試者熟矣。又烏有曠事彌文之累哉。故州人士於其秩滿將行。咸欲□其績而刊之石。而使歌之曰。

海邦之隅。關市如都。

原作關如都。市誤。今改。

民有貿易。農歸田廬。國賦三倍。

田民肯輸。惟此邊君。樂爲民趨。民懷其去。不遑啟居。可歌也夫。

右見元朱德潤存復齋續集

廷琳按邊承事事蹟。我縣舊志失載。按學宮西廡下。有元大德九年。剏建學院講堂碑。係賈庸貴撰。邊守禮書。久未曉邊爲何所人。今得涵芬樓祕笈所印元朱澤民遺集。閱之始知。即我縣人。且爲元代循良。將來我縣鄉賢祠中。宜請附祀。不勝狂喜。累日云。

固安縣西關王氏祖塋記

正德戊寅夏四月四日。固安王汝節來謂予曰。從兄大用任高密縣主簿。歲時祭掃。追憶先祖惠愛之在人者。協謀族人。爲圖不朽。乞執事爲之記。予忝居同榜。義不容辭。謹按王之家世。本隆慶州人。國朝初遷籍固安。叔曾祖復登正統七年進士。歷官工部尙書。太子少保。贈太子太保。諡莊簡。德善功烈。爲時名臣。有弟三人。俱能成名。子孫繁衍。咸登仕籍。曾祖徽娶邑人常氏。女生四子。鼓璫瑛玟。鼓字廷玉。別號怡庵。行一。六七歲時。有岐嶷狀。及長。學崇於習。業精於勤。有文名。以俊秀補邑庠生。英毅端方。有古之風烈。識者見其器宇不凡。咸謂科第不足□也。惜

乎爲造物者限。雖刻意場屋。竟不能遂其志。乃由胄監入銓曹。試列高等。天官卿重之。優以蕭縣尹。蕭在南都。邑大政繁。得以竟其所施。公以素志未信。乃悉其力於官。下車之日。首勸農桑。蕭有水患。爲濬河防。使不得病民田。而人獲足食。於學校時。加修葺。月給諸生楮筆。內有貧不能□□□。爲之備婚禮。蕭邑大化。而民知教。偶值飢饉。傍郡多坐視其民之流離。不加賙恤。公獨懇撫。按發倉賑貸。流民千餘□□□。全活。在縣九年。惠政溥及。民多感德。廉明四達。吏不敢欺。于時野有兩歧之麥。民有一乳而生三子者。又蝗不入境。黃河清。□□□。皆歸德公。謙讓不敢當。自歷仕以來。士夫咸以長者稱之。當道交薦。行將高擢。公

遠滌慮世故。懇求休致。民雖遮道留。其如□□□。迄今七十餘年。蕭人尤思之不忘。在官所獲俸祿。自供養外。餘則周戚儔之不足者。日用雖澹薄。恒冲冲然自得。四弟玟。□□□。父母公每承意撫厚。爲治產娶妻婦。以慰親心。處家居官。可爲人法者。類多如此。有祖若是。子孫可不記乎。公娶同邑大家李。□□□。慈惠。動中內則。養庶子若己出。又納河南陳氏。謙謹靜專。閨門雍睦。孀居三十餘年。內外無間言。子男四。長鳳。國子生。卒。次□□□。家授義官。次鵬。卒業成均。授鄒平縣丞。以稱職得名。次鸞。亦國子生。授沭陽縣簿。女一。適永清衛指揮呂英。孫男十有三。槃榦。棟。口。楫。棧。裴。楨。桓。机。祝。松。梓。棟。即大用。楫。注。選。吏。部。楨。邑。庠。

生。桓。以義官。松。即汝節。丙子科舉人。孫女十人。曾孫亦十有三。熠。默。煥。燁。□。焮。斫。烜。煜。燭。焯。焯。烜。□。燭。俱知名。燁。庠生。曾孫女十有八人。其將來之蕃衍者。蓋未艾也。嗟夫。王氏之業。自莊簡暨大尹公始盛。歷三世。故家風度。掬然在人。衣冠人物。爲時首稱。公庭訓之有在。而遺澤之遠也。有如是夫。予方嘉大用之義舉。又重同年之請。故敬述休德。記之如左。燕人張承恩撰。皆正德十四年歲在己卯夏五月望日。山東萊州府膠州高密縣主簿孝孫男王棟立。夷安散官海涯子郭銳書。邑人薛諒鐫。右碑在固安西關外王氏祖墓。縣人賈士魁訪錄。明都察院右副都御史東玉高公墓誌銘。

大學士高拱撰

嗚呼。此都察院右副都御史高公之墓。先是嘉靖壬子春。有來自南者云。以二月廿三日過大梁。見官士奔駭。氓賈噉噉市肆間。曰是日也。撫臺不祿。既柩還。將以次年月日葬。邑乾域祖塋之次。乃嗣子樞持都諫孟君廷相狀來徵銘。按孟廷相。霸州人。明嘉靖十七年進士。官河南

布政使。

惟公保釐我中土。鉅負弘施。拱實稔知焉。銘烏乎辭。叙曰。

公諱澄。字肅卿。別號東玉。世爲順天固安人。國初有諱某者。以武功授京衛。世襲百戶。某生全。全生文。以才幹選調景陵衛。文生琳。娶於胡。副室曰陳。生公。而後以公貴。父贈奉政大夫光祿寺少卿。二母封贈皆宜人。公幼岐嶷不犯。讀書日記數千餘言。

發爲文詞。超軼恒品。然刻心自樹。隆師遴友。切劘行業。卒成閎器。振聲於時。嘉靖乙酉舉於鄉。己丑登進士第。授行人。會琉球國王當封。慎簡使職。公實啣命。賜麟服玉帶以行。琉球去中國萬餘里。僻在海外。既越閩。航海行數日。值狂飈折檣楫。師咸戰慄。分必死。公撫諭僕旅。正襟危坐。神色自若。既震盪百餘里。風定獲免。人皆以爲神助。且服其雅量云。至則宣上威德。成禮而還。國王贖以兼金四十。不受。歸亦不以語人。及陪臣陞謝時。疏使臣遭險。暨却贖顛末。且持金請命甚懇。上嘉嘆曰。行人能不辱命若此乎。命受之。而人始知其事。晉尙寶司丞。歷光祿少卿。南太僕少卿。改太常。督譯館。晉光祿卿。光祿利叢弊藪。且貂璫

雜處動則怙勢相壓。公視己蒞事。惟慎惟公。謹出納。節浮費。識奸婪。平商賈。惟所行之。無敢撓者。至於汰權豪之占役。索度支之宿貸。尤人所難。晉右副都御史。奉璽書巡撫河南。時宗藩益盛。歲廩弗支。賦役增繁。民多逋徙。且募兵遠戍。符使旁午於道。公乃庀帑羨以贖匱乏。罷汜征以集流亡。廣措置以充軍實。已乃明約束。議興革。惟大體是敦。不牽細務。惟經遠是期。不右彌文。數月之內。上下改觀焉。會檢簿書。夜坐偶痰疾劇作以歿。惜哉。距生弘治甲寅六月十二日。享年五十有九。公厚重簡密。人莫窺其際。然寬裕樂康。不自岸異。故人樂從之。事親處兄弟。以孝友聞。蒞官翼翼小心。清白之操。罔間終始。遇事能斷。雖糾撻必解。盤錯必利。而實從容暇裕。不動聲色。遇寮案以敬信。有善輒推遜之。事或失當。必反覆直爭。妥而後已。雖若多忤。然出誠心善意。人自敬服焉。居鄉朴厚。稱長者。訃聞無問識不識。咸咨嗟痛惜。罔休。公娶於楊。再娶於張。贈封皆宜人。而生有三男子。長卽樞。邑庠生。次標。次格。女三。婿庠生齊以禮。太學生侯承勳。庠生林暉。嗟呼。生無牝行。沒無後言。若公者。可以瞑目九原矣。然壽不滿德。位非殫才。君子不能無憾焉。銘曰。

赳赳高侯。仗策樹勛。實肇厥祀。永延國恩。彌熾彌昌。爰自公始。績學植身。遂躋膺仕。居易思慎。履險如莊。廉稱海外。信服中璫。乃出保釐。中土允賴。德意甫覃。梁木遽壞。誰謂不壽。僅得乎中。

誰謂不貴。乃斬厥終。食報未盈。貽爾孫子。爲武爲文。世濟厥美。固城之陽。有封若堂。德輝夜明。君子此藏。

右見明高拱文襄公集

明固安縣大辛莊楊氏祖德碑銘

賜進士出身禮部儀制清吏司主事句章劉憲寵撰

萬曆二十有四年。今上爲榮昌公主相攸。於是固安縣楊春元得尙公主。制命爲駙馬都尉。春元籍固安。而係出河南彰德府林縣。代有聞人。根茂而實遂。膏沃而光輝。有以也都尉思始祖之塋。千里而遙。唯樵牧之是懼。乃以憲寵有一日之雅。據勝國時敦武校尉前彰德路同知林州事楊主孫名亨者所撰碑銘。

以請。爲紀豐碑於神道。曰唯是遠祖。爲識不忘。俾萬世子孫。得憑封樹。而霜露之爲愴。厥有嘉賴。憲按碑所紀楊氏昉自東晉。祖三。一名春。一名山。一名海。拓基於洛。顧以世遠不詳。林慮之派。則自宋宣和三年辛丑家於會山西之河濱。漸以成聚。卜兆茲土者凡若干塚。雲耳相承。蓋奉祀弗絕也。迄元至正間。盜賊蠡起。林爲驛驛。亨等聚族而謀。以勇敢先於鄉。鄉民萬餘。一呼而集。遂結壘於祖塋之西南。賊攻之。楊輒奮用爲前茅。賊屢潰。一境賴以全活。聞於朝。敕授亨以前職。而林楊之盛。始擬東京矣。逮我高皇帝起兵。北略燕趙。楊氏祖景和。以從軍扈駕。因徙家固安之大辛莊。刈萊墾土。世業于農。無載僞而陰行善。循至

都尉父名繼。補邑弟子員。性倜儻好學。質有其文。以都尉貴。欽授南城兵馬指揮司副指揮。蓋自景和以至春元。其寓籍固安者。凡七世云。夫隸固安七世矣。而猶林慮之眷眷者何。蓋禮不忘其所自始。歐陽永叔譜溯於少康。蘇明允譜叙于高陽。明知而明棄之。則反始之謂何。都尉父子可謂仁孝之周矣。於是爲之銘曰。

奕奕彰德。曜分室壁。林慮之區。邦之肘腋。崑崙蠹奇。葦泉曜碧。鍾靈揚裔。綿禩千百。於焉聚族。於焉窳窳。繫產神駒。馬眉之白。爰奉義旗。綠林遁跡。勝國嘉勛。光其祖祏。景和知興。攀鱗附翼。從戎燕邸。相土卜宅。鳴鳳其昌。化鷗奮翮。六世右文。矯然仗策。

七世尙主。雙列門戟。閑于修齊。欽承帝册。本本元元。歸于洛籍。鬱葱幽壤。厥唯一廡。爰額豐碑。光于古昔。雲仍繹思。百世無射。

右見方城楊氏族譜

明賜進士第前中憲大夫翰林院提督四譯館太常寺少卿欽降山西廣昌縣典史約齋傅公墓表

賜進士出身資善大夫戶部尙書前奉敕巡撫南贛汀韶等處地方提督軍務兵部右侍郎兼都察院右僉都御史吏科都給事中睢陽門生李汝華撰

賜進士出身資善大夫刑部尙書前吏部左右侍郎奉敕巡撫鳳陽等處兼海防提督軍務都察院右僉都御史廣西提

學副史括蒼舊治弟李銜篆

賜進士出身通議大夫刑部左侍郎前奉敕巡撫湖廣等處
地方提督軍務都察院右僉都御史禮科都給事中舊治生
張問達書

頃年上納採權之言。遣緹騎四出。海內騷。公時官太常。首疏
議罷。不報。異日補牘伏闕下者移時。左右持之不起。聖天子赫
然震怒。詔削公爵。謫公晉之廣昌尉。捐一身之顯榮。而急爲萬
姓請命。至櫻鱗履虎無難色。殊足術也。術疑常作迹生由虔撫遷少司
農。還朝方期。公旦夕召見殿庭。俾卒嚮用。而公竟溘然逝矣。公
之嗣子茂才商衡。持狀來謁。欲表公墓。生起家兗州理官。辱公

首推轂。更京邸去。公里不數舍。稔公世家具悉。義無可辭。謹按
公諱好禮。字伯恭。別號約齋。順天府固安縣人也。始居縣東馬
慶里。徙知子營。至今家焉。世祖諱宗魯者。有隱德。越六世傳至
諱永昌者。是爲公父。以公貴。累贈文林郎。山東道御史。娶於馮。
亦著姓。封太孺人。當贈公卒時。公年纔弱冠。爲諸生高等。有昆
弟四人。公最長。梱內外諸費悉倚公。河伯不仁。歲比儉。家計殫
如也。公喪葬未嘗廢禮。哀毀至骨立。其奉太孺人及撫諸孤。勉
佐朝夕。壹意下幃。而菽日益進。里中少年。爭北面師事之。京兆
名士多出其門者。婁困塲屋。今上御極之初。始舉於鄉。明年成
進士。遂令關中涇陽縣。涇陽故孔道。無傳置。供億一領於縣。吏

胥侵牟。車馬不具。令由此獲辜。公至自爲儲胥而手授之。自是無憂客使。十年當更閱民數。強有力者相率脫辟役貧。公按圖校戶。申嚴隱口之罰。占籍無不以實者。有羣盜數輩。賽禱神廟。陰約出關劫掠。公訶知爲計。禽之。置於理。郊圻宴然。邑故多士大夫。見禮至。莫能干以私。躬親勾校。老吏望影而卻步。五年之間。前政所素患掣肘者。公故咄嗟辦之也。無何以治行第一。徵侍御。旋以冢孫治繼王母之喪。喪畢。隨牒除前官。疏列六事。如通君臣之情。誅奸欺之罪。以及停戚爵。罷內操。止謁陵。節宮宴。諸事。蓋皆指斥乖輿。不啻齒馬投鼠之嫌而已。他如尙實杜漸。請御經筵。減削墳價。封事累進。日以忠君憂國爲念。尋治漕粟。

飛輓不愆。四百萬之儲。以時集焉。按浙。虎林橋李諸郡大祲。公請留漕運。萬金賑之。所全活飢民無算。繼按齊。還視禁旅。所至有廉直聲。時稱爲眞侍御云。以久次遷光祿。問寺卿貳。復以太孺人喪。讀禮廬次。哀毀一如贈公時。公階秩未甚。通顯而疊罹閔凶。朝廷恤之。晉公貳太常。主四譯館。人以爲獨彙祗祀。坦致餼。可從此弛負諫諍。而公不爲衰止。是年竟以請罷。權璫忤上意。遂謫縣幕。公生平慕義急難。故雖宦遊四方。偶得里居。一日之間。其於宗族鄉黨。無不以德施。聞豫章高士涂君精講誦。敦延佛寺中。設帳橫經。羣生嚮慕者往聽。而脩脯館穀。俱公主之。更購學田。剏書院。建聚奎樓。藏書尊經閣。以鬻文明而龔村具。

境內來學者甚衆。邑中寄養馬。視他郡邑獨偏困。公力陳於問寺均之。故事歲除京兆各贈炭有差。公廉其歛自里胥。而額賦無是也。詣令請罷。大木牽挽。縣民歲苦力役。公又詣令請罷。里閭物力稍裕。同里鄭公柱仕蜀。呂官卒。不能歸葬。子諸生世科。日夜悼慟。不欲生。公心憐之。予以資斧。櫬乃歸。祿君永食致政。貧病且死。公爲之給醫藥。具衾槨。且旌其墓。友人寧科張逢吉者。旣歿而貧甚。公衣食其妻子。視兩生存日加贍。而公不爲德也。每年春貸人以田。或以稻種。至秋取租息焉。人度公廉慈。給公歲禮乞免。公然之。併燔其券書。其好行仁義類如是。公數歷中外二十餘年。而家無華腴。或勸公爲子孫計。公曰。謂余以清

白遺子孫。余何敢。余有十畝餬口。數椽蔽風雨足矣。而不記余先君子初喪時邪。奈何復過求爲。棲遲衡泌者十餘年。日唯卻掃灌園爲事。好讀書。手經史不釋。因以督課子孫。間入市布袍徒步。與賈豎肩相摩也。人指數之曰。此奉常公邪。何簡約乃爾。好聚賓朋爲懽。酒後耳熱。歌武穆滿江紅詞。及陽明歸田曲。可想見其沈毅寧靜之槩。其於聲色貨利。澹然無營。更耻入公府居間。至邑中大利弊。復恣言極切中。丞直指高公誼。數登薦牘。銓地庭推公。疏凡十餘上。公若弗聞也者。尤善屬文。飛翰如雲流。而精深雋永。出人意外。每一脫稿。輒削去。故諫草雖多。至今鮮有存者。公平昔強筋力。老尚無恙。未卒前一月。即春王正月。

戚里各置酒高會爲公壽。公與周旋者彌月。因往弔所親。還由是稍覺疾。不二日而終於正寢。遠邇聞者。無不嗟訝。愴怛斯其令德孚於人者素也。嗟夫。公之出處進退。宅心緹躬。嶄然無愧於鄉評。朝論者如此。蓋棺始定。千古不朽。公其存順沒寧哉。卒無何。邑人請祠於鄉云。生卒葬祀世系歷履。具載誌中。因次其語。復於茂才。使鑿諸墓上。後有考德。庶幾識其大者。

大明萬曆四十四年歲次丙辰冬十月吉立

賜進士第文林郎順天府固安縣知縣陞南京吏部考功清吏司主事許下孫織錦立石孝男增廣生員商衡孝孫男奉祀生員國楨全立

甲子科舉人同里後學眷姻晚李超錄書

大清康熙二十六年歲次丁丑春三月吉日

二世孫之恡三世孫奉祀廩生培元重立

右碑在知子營傅氏祖墓

縣人王九德訪錄

清故誥贈修職郎顯考曹府君顯妣王侯孺人墓碑

顯考□□妣侯氏。繼妣王氏。其嘉言懿行。不可枚舉。謹約次梗

概。勒之瑱珉。□□考創立家業。皆自艱苦中來也。溯其初祖爲

邑庠廩生。祖妣楊氏生子二人。長□□。次即考也。同胞兄弟共

肄儒業。伯父十三歲入庠。考未遊泮。因經圈占。家業凋零。薪水

之資。常慮莫繼。考方十六歲。與伯父議欲棄儒爲謀生計。請命

於祖母含泪允之。於是竭力經營。寒暑不避。遠近不辭。因而衣食稍裕。妣與伯母以同胞姊妹。爲同室妯娌。同心合意。上事祖母。下撫子姪。凡家庭諸務。各有條理。繼而妣臥病。不孝江甫十二歲。每依依不忍去。妣命曰。汝父因貧棄儒。非本志也。汝其勉之。以成汝父之志。不孝唯唯。然年甚幼。未知此言之悲且慟也。未幾忽逝。一切衣衾棺槨。多以貧故殺禮。至今抱恨終天。踰年娶繼母王氏。孝慈兼全。善事祖母。撫不孝如親生焉。父與母每夜坐訓。不孝等曰。予與汝伯父備嘗艱苦。今俱鬚鬢斑白。始終相依。未嘗偶離。汝祖暨汝伯父。屢試棘闈。未獲登第。汝與弟業食廩祿。尙其勉旃。不孝與弟准將五經史記通鑑性理古文大

家墨卷傳稿。朝夕講究。晝夜不輟。不孝於丁卯科幸叨鄉薦。弟學業已成。屢試不中。遇科歲試必冠軍。至己卯科方中鄉試。不料於辛巳年病終。伯父痛哭異常。僅遺孫一人。甫十歲。父與母念孫痛姪。將第三子漢過房爲仲男。依姪孫同伴。方期頤養天和。永錫難老。胡昊天不弔。降此鞠凶也。乙酉繼妣卒。不二年考亦一疾不起。回憶生平無宿疾。耆年猶康健。豈前者貧困時常冒寒暑。飲食不調。少壯或不覺。今血氣衰故至此耶。不然胡爲棄不孝等而長逝耶。考生於順治二年閏六月初三日戌時。卒於康熙四十六年七月初五日寅時。妣侯氏。生於順治元年七月三十日寅時。卒於康熙十一年四月二十八日巳時。繼妣王

氏。生於順治十三年三月十四日巳時。卒於康熙四十四年十月初二日戌時。男四。長不孝江。丁卯科舉人。任滑縣教諭。按曹江字

岷源。康熙二十六年舉人。後官內閣中書。次河。邑庠生。降服子漢。增廣生。四洵。廩膳生。曹安

洵。雍正元年舉人。任山東魚臺知縣。姪淮。已卯科舉人。按曹淮字徐。康熙三十八年舉人。孫四。長述。監

生。次連。邑庠生。三迥。四迥。姪孫二。長運。甲午科舉人。按曹運字有謨。康熙五十

三年舉人。任懷安教諭。公安。漢川等縣知縣。次邁。曾孫一昌齡。約略始終。誌其梗概。俾奕

世而後。為兄弟者。法考之式好。為妯娌者。法妯之和平。同居共業。勿墜家聲。此則勒石壽世之本意也夫。

康熙四十七年三月十七日。男江河。洵率孫述。連迥。迥全立

右碑在固安城東呂家營曹氏祖墓。曹君硯齋錄示

廷琳按我縣曹氏。原居永定河北岸之曹辛莊。始祖名辛。夫人段氏。康

熙初。岷源先生祖父一支。遷居固安城內。至咸豐中。雲樵

先生。名飭。詳見着舊第十八卷。為岷源先生五世孫。又徙居縣西中公由村。即余同學

友曹君硯齋之祖父也。而與城內明進士曹主事濡一族。

主事之孫名夢麟。曾任陝西華亭知縣。實非同宗。又按岷源先生為先世立碑。原

以章顯其父。而於父之諱缺弗鐫刻。致使後人莫從考知

其名。案之古人臨文不諱。殊為不合。

皇清邑庠生式九劉公墓公紀

於戲。人之好善。誰不如我。竊觀於鄉評里謚。不禁皇然愧蹶。然

興也。歲丙申仲冬。余甫任方城。問俗採風。即耳公名。未謀面。嘗

想像於山高水長間。比諸生來謁。俄見有英奇磊落。翛然於世。故周旋之外者。詢之則劉公仲男。邑庠生名咸寧。字景嶷也。余器之。因成莫逆。以爲積善之家。必有餘慶。又語云。不於其身。必於其子孫。以公之德。應有此嗣君。嗣君之賢。應必肖公。蓋見嗣君。即不啻見公。餘韻流風。固依然未斬也。戊戌春。適庠生孫公應詔。率其闔鄉親友。爲公立碑銘。問敘於余。余不揣固陋。竟不得以吾不如衰之文也。而辭之。乃奮然作曰。是吾心也。公邑庠生。諱敬躋。字式九。孝友性成。感孚中外。生平大節。至今嘖嘖。人口勿衰。抑又聞之。善事親者。不敢怒於人。如公所爲。豈惟不怒。而所濟亦已多矣。如乾隆八年旱魃爲虐。十室九空。慼慼待斃。

公慨然出所積蓄。按戶分給。並不責息。全活者不下數百人。越二十四年。二十五年歲。又頻飢。鄉鄰無告。公於春冬時。日施米粥。俾涸轍頓甦。既更大散家倉。凡不足者。皆給之。務期家無啼飢。略無德色。於戲。活千人者。子孫有封。若公者。前後二十年間。三救凶荒。所活者。更不止千人矣。異日桂折五枝。門興駟馬。其在斯乎。余故勉從衆請。聊爲之序。以誌公之梗概。並傳鄉人之不忘德云。岢

大清乾隆四十三年歲次戊戌三月闔村鄉友立石

持授固安縣教諭辛酉科舉人觀州年家眷弟周瑋頓首拜

撰文

特簡山西樂平縣知縣已卯科舉人加三級觀津年家眷弟
李早榮頓首拜書丹

萬壽壬申恩科副舉人候選直隸州州判觀州年家眷晚學
生周麟鳳頓首拜篆額

右碑在中公由村西南劉氏祖墓

縣人賈士魁訪錄

皇清誥授奉政大夫晉封朝議大夫蘇州府海防同知署江寧
府知府閔仙楊府君墓誌銘

出嗣長男靖謹撰并書

道光二十有六年丙午八月。我本生顯考閔仙府君卒於蘇海
防同知任明年秋。孤子靖奉喪歸。與我本生顯妣汪太恭人戈

太恭人合葬於保定縣西城外新阡。道遠期迫。不及鐫志墓之
石。越二十六年壬申。我本生顯繼妣祝太恭人卒於靖江蘇寓
所。明年保定水患。不克營窀穸。又明年甲戌始得祔葬於府君
之墓。於是小子靖泣思先德。追而誌之。府君諱承湛。字閔仙。系
出宏農。籍隸固安縣。曾祖諱煊。封中憲大夫。祖諱國翰。乾隆甲
子舉人。山西霍州直隸州知州。署平陽府知府。考諱賡颺。議敘
鹽提舉。皆封奉政大夫。我曾王考之乞病歸也。固安大水。遂卜
居保定縣。歿卽營葬焉。府君幼聰穎。十七歲入邑庠。益刻苦於
學。家貧授徒。藉脩脯以奉甘旨。夕就帳中然鐙自課。頂爲之墨。
嘉慶甲子登賢書。辛未成進士。府君素工書。廷試前。咸以鼎足

相期待。偶舉重傷指。握管輒痛。勉入對。猶二甲前列。引見以知縣簽分江蘇。相知皆惋惜。而府君無所欣戚。羣服其器量之宏焉。壬申補靖江縣。以母憂歸。服闋再補靖江縣。道光三年癸未。調補南匯縣。南匯濱海。西連申江。榦河最要者。曰閘港。潮汐往來。每易淤墊。自乾隆四十年。文水成公疏導後。民賴其利。歲久復淤。宰斯土者。憚其費鉅。役重。旋浚旋塞。壬午夏旱。江潮不至。浸以成災。府君下車。親蒞各鄉。訪問疾苦。周覽形勢。知旱澇之備。實係於此。慨然曰。地方首務。其在斯乎。力請上官。籌資興工。辰餐而出。日入而歸。徒步數十里。賞勤懲惰。百弊胥蠲。歷五十餘日。浚河三千數百丈。深廣逾昔。而民忘其勞。工既竣。海水盛

漲。七月初颶風大作。民居賴是獲免漂沒。於是鄉人忭舞相慶。謂侯活我。設長生位。尸祝之。又私樹碑。工次。禁之不可。戊子調補元和縣。元和首劇。政務殷繁。府君處之裕如。庚寅擢海門同知。未赴。遭父喪。奉諱北歸。於時去南匯數年矣。邑人思之愈篤。遇府君誕辰。士民麕集長生位下。設酒祈祝。紳士李吟香繪鶴南飛圖。賦詩賡和。哀然成冊。泊府君南旋。始以爲贈。府君和韻。有北向哀鴻。方戢影。南飛孤鶴。尙祈年之句。迄今垂五十年。邑人之子若孫。若曾孫。述其祖若父之言。未嘗不唏噓而嚮慕也。服闋再補海門同知。調蘇州府海防同知。青浦民因漕聚鬩。洶洶數千人。圍縣署。邑令飛文告變。大吏議遣員彈治。羣僚相顧

聘貽莫敢應。以府君有德於南淮。而青浦其接壤也。共推以往。府君攜兩僕。棹舟行。肩輿入城。令一僕排衆呼曰。撫軍委員來。衆擁輿不得進。問委員爲誰。曰姓楊。是前宰南淮之楊邑侯耶。曰然。衆謹呼曰。楊侯來。吾曹事得白。相率散去。府君察其情。爲乞恩上官。而治其倡首者數人。皆翁服。歷攝川沙同知。兩攝常州知府。兩攝松江知府。一攝江寧知府。道光辛巳壬午。連充江南鄉試同考官。得士稱盛。而上元羅君鳳儀由進士爲河南滎陽令。亦以清廉爲士民愛戴云。府君寬仁厚重。無急言遽色。遇僚友以誠遜。而介然不可干以私事。親能養志。敬愛兄弟。老而彌篤。親族交友以急難告。稱貸周恤。無吝意。無德色。喜讀書。暇

手一編。未嘗厭倦。善八法。求者輒應。道光二十六年八月十四日卒。生於乾隆四十七年九月十八日。春秋六十有五。府君兄弟五人。長芟田公。按名承候選知縣。次早卒。府君序三。次鴻甫公。

承治名咸豐辛酉舉人。大挑河南知縣。次洪士公。按名承河南襄城等知縣。

同治甲子舉人。元配我母汪太恭人。繼配我母戈太恭人。祝太恭人。側室張孺人。子男三。長靖。道光癸卯舉人。咸豐癸丑特試。內閣中書。國史館分校。本衙門撰文。協辦侍讀。前署蘇州府。江蘇候補知府。賞戴花翎。戈太恭人出。出嗣芟田公。後次翊。兩淮候補鹽巡檢。張孺人出。次昱。祝太恭人出。女四。孫男六。寶書。改名

澤鴻書。改名憲金靖出。肇書麟。改名武書翊出。貽書。改名武嗣書。改名武

昱出吾宗自順治以來科第簪纓綿延不替至我祖父益以仁厚著稱靖少依乾陰讀書外不問他事翊生也晚六歲而孤昱之生也府君見背已六閱月故於善政皆不知其詳謹識所知者數端以詔後裔而系之以銘曰

清河之濱鬱鬱佳城寅山申向實兼艮坤穆啟兆域用妥先靈泐石紀實質而不文弗敢渝美昭示後昆紹述祖德永保家聲

右墓誌楊君淑臬錄示又見順天府志句多刪節

清故太學生劉公墓誌銘

蓋聞勤能補拙儉以養廉勤儉之爲美德昭昭矣第世之勤儉持家者每少恢廓之度難望慷慨之施雖勤儉奚貴焉求勤儉

而著美德者其惟太學劉公平公諱燦字煥章世居固安之南小營村其先世有隱德公考諱□□妣□氏潔清自好恬淡居心家計蕭索寡如也公生而穎異長多智略時時以克家自勵於是操心積慮倍致綢繆沐雨櫛風所宵罔間歷數十年之勤勞而家道以裕及察其所自奉也衣未嘗求華食未嘗兼味惟儉德本於性成故後先如一致晚年家計益豐尤樂施與於貧乏多資給之有長者風每至捐輸靡不踴躍咸豐九年勦修方城書院公慨然捐銀百兩此其尤著者其餘義舉不勝縷指又辦差務一事里人□□□蓋差徭等項生監例應減半公雖名列成均仍與闔村攤辦所出不減他□□□存心忠厚於此

可見矣。於戲。公勤儉持家。而又能恢廓其度。慷慨而施。則勤儉之為美德。公誠行之而盡善哉。公又生平不涉詞訟。遇事能忍。與物無爭。恬於進取。以涉田園課子孫為樂。豈非天爵自尊者歟。於戲賢矣。公之行如是。其□□□□□□焉者矣。詰嗣學貴。早歲掇芹。已揚名於庠序。孫□英年勵學。更足□□□楣。公之後豈可量哉。易曰。積善之家。必有餘慶。其公之謂乎。公生於嘉慶五年某月日。卒於同治二年七月七日。年六十有四。銘曰。其品兮玉溫。其德兮金輝。輝字不叶疑訛樂推解兮古道敦。望重梓里兮謙彌尊。先生歿世兮。令譽則長存。天道福善兮。嘉祥恒集於德門。不於其身兮。必於其子孫。

固安縣教諭道光甲午科舉人東陽吳三峯撰文

同邑已卯科舉人韓皎如書丹

同邑歲進士劉文煥篆額

同治三年三月

右碑在南小營村

縣人李君輯五錄示

皇清誥授奉政大夫紀府君墓碑

府君諱士彥。號碩甫。由始祖龍江公。世居於固安縣西之義尚村。碩甫公幼席祖業。僅小康。而家世讀書。以不遇。遂務農。公幼聰敏。長端明。急公慕義。樂施好輸。而家日豐。財日裕。復有賢內助。李恭人以佐之。更有賢德配王恭人以繼之。而公益遂其利。

濟之心矣。故當公在時。縣令吳贈急公樂輸額。至捐館後。以孫星燦由戊午科舉人。授□部郎中。覃恩誥授奉政大夫。以此見積功累德。允符餘慶之休。行義修仁。遂獲吉人之佑。方冀銘鐘勒鼎。垂裕後昆。乃先刻石鐫碑。昭茲來許。俾後世忠厚傳家淵源有自。使將來子孫衍慶。永保無疆。至公之行述。已入誌書。烈祖之生平。早登家乘。因知世荷國恩。而木本水源。象賢即以繩武。用是道揚烈祖。而賦綿椒衍。不朽於以垂文也。云爾。皆大清同治四年歲在乙丑仲春穀旦。

右碑在大義尚紀氏祖墓

紀振東錄示

清誥封朝議大夫文府君墓碑銘

府君諱明元。字墨卿。生而樸毅。早年失怙。惟慈母是依。頗敦孝行。宗族稱焉。及壯。爲永定河道署吏。執事公平。署中陋規。一無資取。是以廉爲本也。時廳汎各官及河兵人等。咸知其廉而敬服之。而同事之人。往往生忌。讒言中傷。遂有褫差之事。先府君雖鬱鬱不自得。而究未嘗與外人道。其寬讓以處世也如此。適鑄由孝廉官比部。先府君欣然喜曰。爾若能盡心王事。亦邦家之光。不僅閭里榮也。勝乃父多多矣。爾其勉之。先府君性尤仁厚。買魚放生。至鄉黨鄰里有不能自給者。周濟之。效救蟻之舉。仿分粟之爲。愛人愛物。發於性生。樂善好施。概可想見。羣相推重。一時傳爲美談。咸豐之末。髮逆猖狂。擾及畿甸。鑄隨桑大人

在順屬辦理團練。

按桑侍郎春榮曾督辦順天直隸團練

彼時固邑土匪亦乘隙而起。

人心洶洶。先府君不憚勤勞。防閑亟密。晝夜梭巡。力除土匪。境內爲之肅然。郡民相率拜於前。泣曰。公活我。又私相慶曰。微公吾屬無噍類矣。即在婦孺。亦目之爲文善人。是雖不同將帥出軍禦寇克敵。而義聲先路。實有功於里閭。至今固邑猶盛稱之。而弗衰也。同治十一年正月二十七日卒。春秋七十有二。初娶於姚。生子二。長慶榮。國學生。次慶祥。改名鏞。己酉拔貢。乙卯舉人。由御史放湖南岳州府知府。嗣因丁憂服闋。改官江西。試用道。署理鹽法道。繼娶高。生子二。慶銳。縣學生。慶純。國學生。孫八人。長承穆。五品頂戴。河工効力。次藻翔。廩膳生。同知銜。候選知

縣。女二。長適王。次適殷。爲之銘曰。

孝行爲本。賦性最純。清廉守己。寬讓接人。胞與同量。和煦如春。澤及魚鳥。情洽鄉鄰。宛同挾纊。不吝指困。安良除暴。奏功乃神。勒石誌美。頌德詠仁。茲墳永式。俎豆常新。

孝男慶榮慶祥慶銳慶純立石

光緒二十五年 月 日

右碑在固安東關文氏祖墓

縣人賈士魁訪錄

皇清誥授武義都尉振溪王公墓碑銘

夫先王之制祭禮也。法施於民則祀之。以死勤事則祀之。能禦大災則祀之。能捍大患則祀之。祀之者。祀其功德於民也。吾鄉

王公者。以嘉慶己卯科武進士。家居三十餘年。未嘗出仕。治家而外。樂爲人排難解紛。一時里中無涉訟者。故里人咸以善人目之。迨咸豐元年。始選補浙江嘉興府紹興衛守備。運濟糧饌。代理民詞。在任四年。無曠厥職。旋於五年正月。蒙漕運總督那由簡調繁。補杭嚴衛守備。蒞任年餘。連陞都司。及鎮守會龍山遊擊。未到任竟以病終。天之報施善人。其何如哉。迄今五十餘年。其長孫秉鈞等。恐生平歷官事蹟。與事親居鄉之大略。日久湮沒。將與其先君行狀。並銘諸石。以垂久遠。且曰。先君碑記。出自妹夫劉君柱臣手。公年長。先大父在時。當記憶。相知當深。謹以狀上。幸賜之誌。予不獲辭。謹按公狀。公諱德成。字振溪。順天

固安人。曾祖琢。祖者佐。父化平。武生。以公貴。俱贈宣武大夫。曾祖妣氏楊。祖妣氏潘。妣氏趙。生母氏張。俱贈恭人。公善事考妣。先意承志。里無間言。尤好施與。居恆躬自約。而厚待於人。種種善舉。筆難盡述。茲姑舉其昭昭在耳目一二端。已足以信。今而傳後。初公之未出仕也。邑人煤車汎馬諸雜役。每歲本縣令吾鄉數十村出煤車多輛。汎馬數匹。否則攤捐車馬價。有司盤剝於上。胥役需索於下。務滿其慾壑而後已。吾鄉人之苦此苛法久矣。公憤然率邑紳某某。稟懇大府直隸總督琦。准予蠲除此役。并將縣令杜良謙革職。而吾鄉免此大役。如出水火。如解倒懸。公議於石佛院村勒石以誌盛德。倘所謂有功德於民。是耶

非耶。後之人雖百世祀之可也。元配馬。繼配劉。俱贈恭人。子四。長萬春。道光庚子科武舉。次毓春。由軍功獎六品頂戴。三壽春。四澤春。俱武生。女三。長適同邑板材劉君諱珏。太學生。次適霸州臺山韓君諱應乾。例貢。三適霸州萬家營張君。早卒。孫十人。不容盡敘。爰爲之銘曰。

猗歟畿輔。寔挺天民。矯矯王公。接物以仁。既登仕版。首勵清操。蒞官五載。冰蘖允昭。子孫翼翼。因果不撓。

光緒三十三年春月吉日立

按此文張子昭撰

右碑在門鐵營王氏墓

王兩農錄示

皇清誥授昭武都尉梅生王公墓碑

竊維先正典型。固足留芳奕世。名人功德。亦堪昭示來茲。吾鄉梅生王公者。生平事蹟。多有可傳。捐館後。令公子四人。追念前徽。思垂久遠。以示不忘。爰於墓前建立碑碣。屬予作文以記之。予聞公之先君。以嘉慶己卯科武進士。原任浙江嘉興府守備。由科甲而登仕版。所謂後難爲繼者非耶。而公乃發憤有爲。思承先志。年未及冠。即中道光庚子科武舉人。厥後投効省垣。得署左備營守備。旋辭職回籍。與同鄉文孝廉張君仲岐者。協辦團練。修築壕塹。以資捍衛。製造銃砲。以備攻剿。寇盜於以遁藏。鄉民因之安堵。所難者國事既勤。家政尤善。長子冠卿。名秉鈞中光緒庚寅武舉。補東昌衛千總。三子密臣。名秉樞中光緒戊子武

舉補兵部差官。次子子貞。名秉四子黻臣。名秉亦入武庠武監。於戲慕義急公。堪稱國彥。承先啟後。不墜家聲。爲人若公者。誠吾鄉之不可多覩者也。爰爲之贊曰。

惟日有曜。惟月有光。乃公之風。日引月長。

光緒三十三年春月穀旦立

按此文劉柱臣撰

右碑在門鐵營王氏墓

王雨農錄示

固安縣渠溝鎮高氏阡表

粵稽我高氏始祖。自明永樂間。由山左以教讀至京師。儲侍累年。館穀及晚歲。乃置薄產於畿南之固安縣。二世祖鑒於讀書之艱苦。因棄儒業農。終明世無復言學問者。故譜系闕焉弗詳。

至本朝康雍間。近世祖超然公。始奉二親。奠居縣西南之渠溝鎮。竝卜塋域於鎮東之莽牛河側。遂家焉。是時家漸裕。妣氏王又士族女。謀恢復儒業。延師教我高祖俊卿公讀。所以期望者甚厚。而卒困於學使試。不獲青一衿。逮我曾祖伯翔公。始以邑庠生列紳籍。復性不喜文弱。慷慨好義。讀史記游俠貨殖傳。輒心慕之。是時田益闢。家益饒。交遊亦益廣。乃命三子分業。士農商三途。我祖教諭公齒居長。性尤極好學。故獨業儒。時又值高郵王懷祖先生念孫。兩次觀察永定河。提倡儒術。學者多聞風興起。我渠鎮學塾。又最多。有穆君寶巖寶華兄弟。及崔君庭鳳。皆與我祖爲夙契。乃共結學社。我祖研經子學。穆習史學。崔治

文詞學。厥後穆崔皆以鄉貢終。我祖特以道光二十九年拔萃科。秉鐸於正定府之贊皇縣。贊皇故僻陋。諸生除制藝試帖外。無所知。我祖與講經史及詩古文辭。皆竊笑爲迂。不置對。我祖知教無可施。鬱鬱不自得。未及任滿。卒於官。我父與我叔父扶櫬歸。我祖妣丁淑人。命仍分任耕讀。而躬節儉。以持內政。終其身衣不重帛。食無兼饑。用是田園得無恙。我父主政公。自弱冠已蜚聲譽序。至是益肆力於訓詁聲音之學。尤服膺者。爲高郵王氏父子之廣雅疏證經義述聞。又嘗謂顧氏音學五書。江氏古韻標準。爲學者必不可不讀之書。旣味經腴。竝獵詞藻。茹古涵今。一舉兩得。莫便於此。蓋生平枕藉經史。故爲文皆古茂淵。

懿。沈博絕麗。應京兆試者凡二次。初試薦而未售。再試則三場皆中式。已擬魁選。及拆卷。硃墨互勘。見春秋題下。漏書某公某年字樣。典試者謂此績學能文之士。棄置殊可惜。欲取筆代爲填寫。而監試御史持不可。以時值柏浦大獄後。科場條例特嚴也。旣報罷。公領遺卷。謁分校某君。聞其故。喟然曰。人言科名得失。均有命。其信然矣。自是不復應舉。且曰。吾弟以耕而勞。吾奈何。竟以讀而逸乎。遂亦輟讀而學耕。未幾遭母喪。泣血三年。盡哀盡禮。鄉人以學行聞之。學使舉孝廉方正。堅辭不就。試乃具題獎訓導銜。時捻孽未靖。梟匪蠡起。各鄉鎮皆奉檄辦團練。衆推公爲練長。公慨捐鉅款。修防禦。購器械。旋獎五品頂戴。公辭。

不受。且以成勞讓同事。同事咸感說。協力籌防。故鎮屬諸鄉得無擾。會大旱。歲洊饑。公前後出穀數百石。倡義振並。設粥廠於鎮之通衢。近鎮十數。卹貧困老弱。朝夕皆就食。凡兩載。全活者無算。時爲同治六年丁卯歲。其秋大雨雹。郡司馬勘災過境。忽停輿。趣召鄉保問之曰。吾巡行逾百里。田中禾稼皆童禿如敗草。獨此鄉一田。互數十畝。穎粟特茂。無少損。田主何人。操何術爲防。乃能若此。鄉保遽應曰。官不知邪。此吾鄉高貢生田也。郡司馬於是瞿然而驚。既而躍然喜曰。高公名吾聞之久矣。特不謂雹不傷稼之事。古有其語。今乃實有其徵也。遂趨旅舍。索紙筆。手書爲善獲福四大字。並細書百數十字於下。爲詳敘其事。

命召工刊刻曰。以此旌高公門。且以示世人。天道福善之說。爲不誣也。越日。郡司馬還輿過縣城。語之縣令。縣令亦瞿然。先是令以公多義舉。且倡振捐。傾慕之甚。屢造訪致殷勤。並刊推食芳徽匾額。具儀仗親送之門。行將列公善行。請旌獎。及是聞郡司馬語。乃合詞疏公前後諸善狀白大府。大府遂上其事於朝。時朝士亦多慕公名。因聯銜奏保。得旨以主事用。公仍欲辭。保者皆曰。此君恩。不可負也。乃就職。籤分戶部浙江司。時長戶部同官或微諷之。則曰。吾書生不曉時務。甫得一官。敢冒進乎。退乃語家人曰。吾以京曹事簡。可理讀書舊業。且藉避鄉俗官紳。

之擾。故勉而就。此若聲華標榜。非吾志也。宦京數年。無徵逐。無奔走。公餘之暇。惟課子讀書。齋前種竹數十竿。榜其門曰癖竹。以示淡於宦情。且志在避俗意。由是同官以爲傲。多不樂與游。惟粵西蔣君英元。慕公學行。每與公相誦唱。有多君直節。眞如竹。媿我衰姿。竟似蒲之句。蓋蔣故寒士。又以庶常散館分部。不得志。且多病。澹泊寧靜。與公同。故特相契。蔣嘗以醫藥乏資。病瀕殆。公慨然出數十金。畀之。蔣請署券。公笑曰。朋友有通財誼。何券爲。蔣乃泣受。厥後蔣卒。仍厚賻之。其待友熱誠類如此。然公性忼爽。遇拂意事。輒不耐。嘗拍案語潤生曰。古言通經致用。學問之道。本大有爲。惟一爲司員。則俯仰隨人。不能逕行己

志。尙不如鄉居作事。可以獨斷獨行也。爾日後慎勿爲此。又曰。吾家累世清德。爾異日或登仕版。須擇清要。可自立者爲之。勿復如我今日。旅進旅退。少自異。即騰笑竦譙也。因成詠懷詩數章。有志士悲櫪驥。壯夫恥轅駒。何如脫羈鞵。常羊還故吾等語。蓋公一生剛介。勇於任事。而恥於趨勢。此詩已情見乎辭矣。十一年春夏間。將引疾歸。與家人言者屢矣。以侍郎高陽李文正公固畱。不得去。會端午節。李公託鄉誼。餽角黍。公食之。對家人曰。此亦可謂得一知己矣。吾其爲若畱乎。因一笑而罷。翼日遲明。則振衣起。呼役具盥漱。索茶並索沸水。沖薄粉一盃。飲之。乃出至中庭。整襟危坐。久之。無聲息。僮僕候問。均不應。於是家人

皆驚起。環呼亦不應。迫視之。則瞑目端跏。容色肅然。氣沈寂。撫之口鼻皆冰冷。始知公已委化而去。雖家人不及一訣。若惟恐塵網之難脫也。烏虜異矣。初公之入京也。鄉人皆以爲荷殊遇。將不時騰達。至是聞凶耗。咸震駭悲悼。乃集貲備靈輿。鹵部於喪歸時。北迎四十里外。麇聚永定河干。焚香羅拜。縣令且爲除旅館於城南關。於是衆爭前執紼。擁至館。持香花紙帛祭品以來者。逾時仍絡繹不絕。乃停一日。翼晨始相將送歸里。及葬時。盛況復然。於此見公之惠澤。入人者深且久。故身歿而德益彰。名益遠云。配我母畢淑人。同邑耆紳立齋公女。生有淑德。性溫。和。嫻禮教。于歸後。我曾祖母尙在堂。淑人婉容愉色。曲得歡心。

與家人處。竝謙謹和平。諸如人意。自祖姑君舅君姑下。羣從姒娣。咸欣慕焉。旋隨任贊皇。及奉喪歸。淑人以冢婦理家政。事姑尤謹。姑歿後。又隨主政公宦京寓。日與顯貴者鄰。淑人樸素如鄉居。未嘗染宦家氣。主政公逝世時。變出倉皇。內外驚駭。淑人獨以禮持情。呼子女。集僕媪。視含殮畢。乃就次哭。隨命急足。齋凶問告於家。及家人至。諸事已集。旋里後。我叔母趙淑人以家政讓。淑人謝不受。而陰以勤儉相佐理。時潤生年十三。蚩蚩無所知。叔父爲延師教讀。淑人每誡之曰。汝父在時。責汝嚴。汝尙時恣肆。今父歿矣。叔憐汝孤幼。斷不忍深責汝。然家聲不可墜。汝務自奮勵。毋負汝叔父心。旣而服闋。潤生得遊於庠。時爲光

緒二年。隨應京兆試不售。五年應試又不售。八年則中副車。鄉丈某或規之曰。子家三世讀書。而不諳制舉文程式。今子仍讀書不讀文。長此不改。恐終無發迹日矣。淑人聞之。則私戒曰。昔汝父嘗言多讀書無不能文者。若但於時文中討生活。雖微幸成名。亦一沒字碑爾。此語我習聞之。今長者教汝學爲文。意誠善。然慎勿以學文故。遂置父書於高閣。致成沒字碑。亦殊可鄙也。潤生於是讀如恆。十一年幸獲售。十五年又捷禮闈。明年叨館選。十八年散館。以一等留院授職。由是鄉里間不復以讀書相詬病。越歲淑人壽辰。潤生先期乞假歸。攜新得俸金。將爲母製衣一襲。甫上請。淑人輒太息曰。汝讀書應舉。耗家貲。瘁汝叔

父心力者幾二十年。今乍得此區區者。不奉之叔父。而驟爲吾製衣。吾服之安乎。向聞汝父言。養親貴養志。汝奈何不知我志邪。潤生於是悚然退。以母言白叔父。叔父又太息曰。賢哉嫂也。我亦不可違嫂志。乃收金而亟思所以爲嫂壽者。旣而張盛筵。召戚儔。屆期乃親奉卮。稱祝。淑人遽引起曰。叔此舉太逾量。吾何敢承。叔則曰。嫂來時我甫五歲。飲食縫紉。惟嫂是賴。且時時爲我理饋沐。拭污穢。今事嫂如母。禮宜然分亦宜然也。於是拜答各如儀。戚儔皆嘆羨不置。又潤生時。淑人年已三十七。珍惜之甚。及就傅。則勉循主政公意。不敢少姑息。每夜雞甫唱。必喚之醒。親爲挑燈。置書於枕側。令熟記。以免遺忘。以是入塾背誦

無少誤。平明必趣之起。親爲整衣帶。飯時備肴餌。必豫爲之。自塾歸。即命之食。食時爲理髮。食已呼水爲盥沃。各事畢急趣之出。不使少耽閣。訖入庠後。每日暮罷課歸。必諄諄問今日讀何書。且申之曰。汝父手勘卷冊。乃先人心血所寄。不可忽也。烏摩潤生中下才耳。然竟得卒讀先世書。復弋科名。列清秩。蓋得於嚴訓者半。得於慈訓者亦半。至椒衍瓜繇。其來有自。則又我祖我宗。數百年來。詩書之澤。稼穡之基。涵養滋培。匪一朝一夕之故。願異日子孫之登我阡。讀我表者。敬之慎之。勿替引之。烏摩庶幾知所觀法矣。大清光緒三十有四年歲次戊申秋九月。固安高氏奠居渠溝鎮之第七世男潤生謹表。

附世系略

近世祖超然公諱越。高祖俊卿公諱士秀。皆敕贈文林郎。妣氏王氏。張皆贈孺人。曾祖伯翔公諱大鵬。誥贈中憲大夫。前妣氏閻。妣氏郭皆贈恭人。祖教諭公諱瑞和。字玉音。誥贈中憲大夫。晉贈通議大夫。妣氏丁。贈恭人。晉贈淑人。父主政公諱釗。字小鋒。誥授奉政大夫。中憲大夫。晉贈通議大夫。母氏畢。封宜人。恭人。晉贈淑人。

伯翔公有子三。長即教諭公。次諱瑞亨。字文通。太學生。三諱瑞昌。字啓明。邑庠生。女一。適同邑鄭氏。教諭公子二。長即主政公。次諱鑑。字寶光。太學生。地封奉政大夫。贈通議大夫。女三。長

適同邑董氏。次適楊氏。三適尹氏。皆士族。主政公子一。即潤生。女二。長適新城張氏。以夫死減食致疾殉。次適保定宋氏。以夫貴封宜人。前翰林院檢討國史館纂修監察御史現官給事中男潤生謹記。五品銜候選教職拔貢生壻宋紹祺填諱。

右阡表高公墓坡錄示

高氏新阡表

烏庠潤生少孤。自幼學以至成人。飲食教誨。惟我叔父是賴。每念叔父一生孝友。惓惓父兄。暮年嬰末疾。卽謂舊阡無隙地。死恐不能葬父兄之側。大漸前。仍力疾攜子姪周視先塋。扶持跪拜。瞻顧裴回。至泣下不可仰。且淒然曰。吾何辜。乃不入先人之

邱壠乎。蓋卜新阡。備別祖。本非我叔父所願。而卒以格於形勢。竟不得不如此焉。烏庠痛矣。叔父姓高氏。諱鑑。字寶光。髫齡誦讀。極聰敏。爲我祖教諭。公所鍾愛。年十一。失怙。我父主政公仍教之讀。至十七歲娶。乃慨然曰。兄讀弟耕。我家自有成法。一家皆坐食。恐後難爲繼也。我祖母丁淑人。謹其言。遂商之我父主政公。爲援例入太學。因輟讀就耕焉。及主政公官京師。公歲時往省。秋成後。竝輸送米梁豆麥。下逮醯醢菹脯瓜瓠饘糕之屬。纖悉畢具。主政公嘗謂之曰。吾以避紛擾勉而就此。顧令弟勞勞賦畝。爲我籌供億。累弟已甚。願無復煩瑣如此。公則曰。弟幼鞠於兄。受兄教養多矣。此何足酬萬一。逾時輸至者益靡密。又

嘗值輸送期。適桑乾溢。平地水數尺。車牛運載不能通。公慮用度之無資也。乃出重值募壯夫。橐金於腰。泅水達京師。函告道塗阻滯。並自陳歉仄意。主政公持函涕出。示家人曰。吾弟愛我至此。念我至此。吾何以堪。爲之欷歔不懌者累日。蓋兄弟友愛類如此。後主政公卒於京。公聞耗且驚且痛。衣不及整。履不及納。哭且奔。家人趣駕以隨。出十餘里始追及。公已失一履。跣足而趨矣。越日至京師。凭棺大慟。僕媼悽感。及喪歸。路遇阪險。橋梁必躬引紼。左右端詳以防欹側。且叩棺而呼曰。過某阪某橋矣。弟在此。毋驚也。於是家人皆痛哭失聲。久之然後進。至家治喪畢。乃延師課潤生讀。免喪後。即命應學使試。補縣學生員。隨

命應鄉舉。再試皆報罷。繼又中副車。意慙甚。公則慰之曰。吾齒未衰。尙能供汝十年讀書。無需汝豫家計。勉之。毋自懈。由是潤生益媿勵。越三載舉於鄉。又三載捷春官。逾年入詞館。公乃喜曰。吾責任今稍盡矣。潤生既受職。母畢淑人以京秩俸微。不能遽就養。仍撫婦及孫居於家。越歲。淑人以母家弟病。擬往視。又適值桑乾溢。數十里內。車轍皆沒於水。非迂路循莽牛河舟行不能達。是時淑人春秋高。潤生在家時。每有所往。皆親隨侍。且數年內未嘗一出里閭也。公躊躇久之。請躬自隨而往。淑人固謝。公則曰。老嫂如母。何謝爲。竟同往。並攜食品茶具於舟。途中親進奉。往返者凡數日。無少怠。及潤生歸。淑人至涕泣告之曰。

汝叔父敬我多過禮。我不安之甚。今又代汝盡侍奉職。汝何以報。須念念勿忘也。時潤生宦於京。雖獨居。俸糈恆不給。公仍以時接濟。然力已漸不支。會歲饑。鄉里復嗷嗷待哺。公曰。吾兄慈善業。吾不可無以繼之也。乃盡出其倉中所有粟。依故事設粥廠以食貧民。不足。更稱貸而訖其事。由是家漸落。而家中食指復日繁。公年且益高。食衆生寡。用度益支絀。公獨力楛柱。時仰屋興嗟。適我母畢淑人又逝世。喪葬費不貲。而公於嫂氏。又嘗以昌黎自况者。至是悲不自勝。形神益委頓。越一年亦嬰疾卒。卒之前數日。猶以嫂明忌期。親拜奠於墓。公一生盡禮兄嫂。至是終矣。是時潤生年已三十有六七。學與宦均無所成就。且無

自養力。事畜皆仰給於公。卒致公以力竭神疲。抑鬱憂傷以歿。烏庠。潤生童時。侍父主政公居京師。年十一始讀史。至張釋之傳。主政公因示戒曰。釋之恐以久宦減兄產。今吾乃以宦故而減弟產。殊自媿。汝應早自立。勿俟父歿後。又復累叔父也。噫。潤生不肖。竟無以慰父志。負父言。辜叔父德。而叔父乃以是千古矣。配我叔母趙淑人。性情和厚。治家勤儉。躬操作。明禮讓。伯主政公居京師。家中輸送米麪。必擇其精者以進。而留其粗者自食之。與我母畢淑人處。尤和好無閒。娣姊相敬。戚鄰見之者。咸歎爲鍾郝復生也。又篤愛潤生。幼時飲食提攜。恩逾已出。後潤生通籍。宦於京。母歿後。仍不時歸省。淑人食必與同案。坐必

與同堂。縷述家中瑣事爲笑樂。歡暢逾平時。及拜別則意慘澹形於色。臨行睠戀。雖母子無以過之。又女公適董氏姊。以孤寡終身依弟以居。淑人敬事之。數十年如一日。又舊戚郭翁者。瞽於目。亦貧老相依。淑人卹養周至。供衣食者幾二十年。無少閒。郭得以壽終。其篤厚類如此。年七十三。無疾而逝。人皆以爲慈善之報云。叔父太學生。馳封奉政大夫。晉贈通議大夫。叔母氏趙。馳封宜人。晉贈淑人。子一名潤民。廩貢生。鴻臚寺序班。女三。長適同邑劉氏。次適姚氏。三適新安張氏。皆紳衿舊族。大清宣統元年歲次己酉。姪給事中潤生謹表。姪壻拔貢生宋紹祺填諱。

右新阡表高公墓錄示

清博野縣教諭張仲岐先生墓碑銘

竊維師道之立。先器識而後文藝。往聖先賢。守先待後。成已成人者。胥本此意以行之。尙已。吾師仲岐夫子。道光丙午。孝廉也。品端學粹。士論翕然。以故遠近從遊。爭附門牆之內。而夫子循循善誘。施教因材。無論質之賢愚。家之豐嗇。罔不各有造就焉。不但此也。夫子教人。雖以時藝常講習。而讀書務求根柢。課功之暇。亟以砥節勵名修身立行諸語。諄諄告誡曰。三代之學。所以明人倫。人既有志上進。即當不愧爲人。夫豈沾沾撫拾浮詞。倖弋科第。即爲讀書也哉。所尤不可幾者。夫子天性肫篤。庭幃

孝友人無間言。至處世則又冲和闡淡。聲色不驚人。即素行有愆。亦惟忠告善道。初無厲色疾言。所謂在家無怨。在邦無怨者。其庶幾乎。光緒丁丑。以大挑二等司鐸博陵。到任後諸多善舉。因此邑人感激。爭爲執鞭。當時紀功則惟學憲。保舉亦有邑侯。鄰學趙公爲之贊曰。滿城桃李。合學諸生。匾於堂曰。滿座春風。非夫子功德之隆。何上下交孚之甚歟。六年俸滿。亦思解組歸田。頤養暮歲。奈肄業諸人既慕道而爭先。遂攀轅而恐後。而且增修學署。以爲日講之區。冀收月益之效。夫子不忍重違其意。遂安其所而不辭焉。不意二甲方周。老成頓謝。門人向哭後爭先執紼。引櫬還鄉。博野人焚香奠於路者。數十里不絕。及至靈

近桑梓。故里生徒。哭迎道左。幾至不起。戚友迎柩而哭者。亦不計其數。夫子至德感孚。其親疏一致。遐邇一體者。固切摯如斯哉。凡我同人。生既無以報德。沒當有以盡心。爰集同窗。購工勒石。俾夫子栽培之德。教育之恩。與日月爭光焉。至若贊成縣志。董修書院。辦團練。以衛閭閻。捐貲財。以贍鄉里。皆官紳父老所宜道及。非門人所敢知也。又何贅乎。謹追其風而爲之銘。虛懷若谷。和而不流。行芳志潔。無怨無尤。振聳發矇。罕與爲儔。風規可仰。落落千秋。

邑人歲貢生尙廷賢撰文

舉人高潤生篆額

文庠生王澤均書丹

文庠生姜德璜鳩工

受業人

劉瀛 劉玉璋 尹維商 宋廣文 嚴紹陵 孫啟賢

史炳文 劉兆清 袁啟敬 貫鐘 姜寶璜 董振

賀存真 劉立德 柏世本 姜鴻文 劉澤 趙蘭

李徵輝 楊霽江 劉建侯 尙廷賢 姜鴻謨 張嵐

高取憲 劉洪 田建基 趙景雲 王仁鏡 劉瑞春

田書年 張全德 劉煦春 彭國謨 趙國璧 劉煥春

劉裕海 袁汝舟 王永哲 李瑞林 袁汝翼 趙國瑛

董信 趙以仁 孫培續 劉泮林 高潤生 張秩清

魏占芳 □□亭 張曛 畢玉和 張慎輿 鮑齡春

王鑑 陳世昌 張振宗 謝霖泉 丁耀 楊在山

王承訓 于躍淵 張維新 崔玉樓 王泰祥 張景棠

麻向榮 劉家駒 紀灼修 滑振名 楊毓堃 紀振興

紀淑修 馬繼垣 曹國賓 高用三 □□新 施玉崑

孫大安 王澤濡 劉家駒 王杏春 郭樹椿 溫世瑞

羅瑞清 王建中

光緒十二年三月穀旦

立

石工郭順

右碑在門鐵營張氏墓

賈錫琛訪錄

清故增廣生月塘賈君墓表

天津徐世昌撰并書

民國十年秋。武強賀君性存。推轂其父松坡先生舊日弟子固安賈君君玉。績學砥行士也。因延致公府中。課余姪及兩孫讀。翌年余退隱來析津。君玉仍假館寓廬。閱今已八九年。因得漸聞其家世之詳。一日君玉以其王父表墓之文請。且泣然陳曰。廷琳家世寒賤。先王父月塘公制行剛方。學術閎達。行坊言表。無愧耆儒。乃逝世已四十年。而墓碑闕如。潛德弗曜。廷琳竊所恫焉。且我府主於廷琳。雖未有師弟子之名。而十年來。廷琳蚤夜敬聆訓誨。於在三之誼實具。倘更有以章顯其先世。則賈氏

子孫。感戴有同覆幬。已。余義不獲辭。則爲之撰述。懿行。以聲於其阡。君姓賈氏。諱光明。字月塘。順天府固安縣人。先世居霸州之香營。明季其遠祖有諱三奇三典三遷三立等名者。與固安王龍賈氏諱三槐。以孝行著名天壤者。爲族昆弟行。三槐受業鹿忠節孫夏峯兩先生之門。稱高足弟子。余前撰大清畿輔先哲傳。列傳師儒。所稱正卿賈公者也。賈氏累世以耕讀詩禮著稱。清乾隆中有諱宗文者。由香營遷居於固安屬之南趙莊。至今爲里中著姓。即君之曾祖考也。祖諱成章。父諱輯五。皆以義行稱。君賦性嚴重。正色寡言。終歲不見嬉戲容。讀書時正襟危坐。如與聖賢對越。手所置足所履。皆有定處。於玉藻九容。殆無

一不合。而胸懷則恬適愉懌。任乎自然。不假矯飾。與人莊而不苛。介而不褊。故人莫不畏愛而親敬之也。生平取與之界最嚴。無一毫之苟取。亦無一毫之苟與。以爲苟與者。即苟取之媒也。年十九。赴霸州原籍考試。即入州學。迨後歲科試。屢列異等。君於制舉文。精研力討。上自明之歸唐。金黃。以及清之熊氏。劉氏。方氏。諸大家之文。靡不錄爲專冊。精選評識。其他各家文之。不純於理與義法者。不憚手爲改削。丹黃燦列。至數十冊之多。然茹古既深。所自爲文。不復存時俗面貌。以故應秋試。屢薦而屢擯焉。某年歲試名第一。應食廩餼。而學使者忽染疫卒。君歸未能遽還。新學使者因傳未到。遂改補他人。君于是嘆區區者尙

有命存。遂絕意進取。僅以增廣生終。當是時。士子之掇科第。負聲稱者。往往於制義外。不復寓目他書。君自弱冠後。以課徒爲衣食計。所至於館課之暇。大覃思羣籍。而於史漢及溫公通鑑。好之尤篤。提要鉤玄。手纂成冊。以及諸子百家古今稗官雜記。宋元人詞曲。清初漁洋王氏諸家之詩。莫不精選別鈔。示人軌轍。每日爲諸生講解。自朝至暮。無倦容。故從遊有相依二三年。而終身基礎已確立者。弟子如萬孝廉。執樞。萬選拔。煦。劉職貢。鳳池。其尤著也。君於子平星命諸書。無不兼通。而於醫術。竭生平力以精研之。故所詣尤邃。全活之人。不可計數。又於脈候證治方劑鍼灸各門。刺取古今醫學要語。及畢生所閱歷。與夫同

時著名各醫專擅之奇劑。分類纂成醫學精要十許鉅冊。存以待梓。厥後君之子芳芝。傳君鍼灸一門。以神效著名里黨。應手奏功。然君生平實未嘗爲人鍼砭一次。蓋因心慈不忍刺人肌膚故也。又君所手輯諸書。君第三孫廷琳幼年頗喜讀之。遂以洽聞著名于時。實不過稍稍傳衍君各學之緒餘耳。而君之淹雅閎通。更可知已。君生於嘉慶二十年八月十四日。故於光緒十四年十二月十七日。春秋七十有四。夫人張氏。霸州馬辛莊人。祖父以貲雄于里。及夫人稍長。張氏業遽衰。年十七來歸。上事舅姑。下撫諸姪。孝與慈兩盡其道。及君假館四方。歷數十年。夫人儉嗇持家。以一身兼任內外事。禮法秩然。家業漸致康裕。

夫人之力居多。生於嘉慶十九年八月十三日。故於光緒二十二年四月二十七日。年八十有三。子一芳芝。女一適同縣岳家府周玉林。孫三。長廷魁。次廷掄。三廷琳。廷琳光緒丙午科優貢生。君之學雖弗顯於世。然似續有人。克開厥後。君可謂貽謀之善者矣。吾觀詩書禮義之家。累世相承。勿替。大抵皆由前人茹其艱。而後人食其報。若君之碩學醇修。終艱一第。生平可謂困阨極矣。夫積之厚者流自光。德之隱者施彌遠。天其或者將昌熾君後於無窮乎。吾且以是語爲左券也。

中華民國十有七年歲次戊辰夏六月

右先祖父月塘公墓表孫男 廷琳 敬錄

清故處士瑞符賈君墓表

天津徐世昌撰并書

今年夏。固安賈君君玉。既屬余爲文表其祖墓。未幾君玉再以其家傳相示。并乞余文表其父之遺阡。遂不辭而爲之。聲述如右。按狀。君諱芳芝。字瑞符。幼有至性。事父母極誠孝。婉容愉色。時時能博兩親之懽。君父既以碩學醇修。終身不得志於有司。窮年假館他鄉。以資事畜。君又終鮮兄弟。家業漸裕。事務紛雜。遂棄學專理家政。少嘗竭力農畝。年稍長。獨傳君父醫學中鍼灸一科。神明其術。應手沈疴立起。遠近延致者。無論貧富。率即時往。而夜晚叩門呼治者尤多。蓋日中君每他出。故相率以夜

來。往往數夕不得交睫焉。光緒二十九年。畿南霍亂之證盛行。染者死亡枕藉。君每爲人診治。施鍼後。並投以清涼之劑。無不隨手立愈。甚有奄臥於牀。氣息微屬。經君手診。不半日而霍然者。他醫狃於故常。多雜投桂附等品。飲者皆不救。是年死於醫者大半。獨君所手治。無一不得全活者。君性嗜飲。每酩酊大醉歸。路逢里中儕偶。或嘑號痛毆之。然一聞父母來呼聲。則酒頓醒。起敬起孝。和婉逾平時。若未嘗飲者。雖君之舅張翁來呼。亦然。光緒十四年。丁父憂。厝遺櫬於荒園中。君席藁於旁。哀至則哭。敬上食飲如平時。百日內未嘗離柩側。跣步其篤孝。蓋天性然也。君有從兄諱芳芸者。家貧不能自給。君招之同居。食飲與

共且爲嫁其女。並爲其子廷揚納婦。後家稍能自立。始爲之營屋俾其異居。君生平寡言說。慎唯諾。旣諾則終身不踰。待人極誠慤。與人同食飲。凡所費一切必由已出。而後心乃安。每里中有婚葬事。多邀君爲之襄辦。雖半米寸薪。規畫精審。往往事後不差累黍。費無冗而禮無缺。里黨翕然稱之。光緒十六年畿輔大水。災情奇重。爲數十年所未有。里人多乏食。或比戶無炊煙。君惻然。爲人仔肩鉅債。購粱數百石散之各家。逾年食粱者率無力能償。而息重期迫。索者相率逼君。君代各家受窘迫。不得已罄已產代償之。坐是家有田二百餘畝。率質之他姓。君由此拮据終其身。歷二十年而舊業迄未能復。當是時他富室爲人

轉貸者。多乘勢以賤值得善地。非惟無所累。且益富焉。而君反以此自陷。則以君貸錢而不索其抵品故。論者或笑其拙於謀。然而君德之厚。於此益可見矣。君自少即以義俠聞于鄉里。故遠近率以五爺相呼。而名字轉隱。以君有從兄四人。於次爲五故也。嘗與里人駕數車購菘於新城縣之白溝鎮。及歸前行數車爲回賊多人所圍。將肆劫掠。倏見君車自後來。賊衆有識君者。驚告曰。五爺車至矣。吾輩不可犯也。各散去。蓋君之名雖鼠竊輩亦知欽重云。生於道光二十三年正月十九日。故於宣統二年九月二十一日。春秋六十有八。妻原配霸州馬坊村陳氏。生於道光二十二年二月初五日。故於同治九年七月初二日。

年二十有九。生子二。廷魁。廷掄。女一。適霸州沈家營韓福元。繼配霸州坨里村朱氏。有淑德。謙和敬畏。撫諸孤有恩。生於咸豐元年九月初一日。故於民國元年八月二十九日。年六十有二。生子一。廷琳。女三。適永清王家莊石玉。同縣林城張國藩。霸州姜家營張鏡。孫七人。錫珏。廷魁出。錫琪。錫瑜。錫琨。錫璋。廷掄出。錫瑜。年二十七亡。錫琛。錫珪。錫珊。廷琳出。孫女四人。曾孫三人。君藝精於身。行成於里。名重於鄉。今距君之卒。已歷十八九年。而余爲之章顯其遺墓焉。則以君之有後也。左氏傳曰。救災卹鄰。道也。行道有福。君可謂篤於行道者矣。至於天之降福如何。彼蒼蒼者自有權衡。夫何待余言之喋喋爲哉。

中華民國十有七年歲次戊辰秋七月

右先府君瑞符公墓表男 廷琳 敬錄

皇清敕贈徵仕郎增廣生錦堂呂公墓碑

吾家自前明世居固安城南四十里之麟窩店。今稱牛坨鎮云。鎮之西北約數十武。土脈隆起。望之蔚然。邱塚纍纍。吾呂氏先塋也。族人叢葬於此。凡數百年。支分派別。塋無隙地。府君乃改卜於太平河東。牯牛河北。距余家數里。先妣張太孺人歿。奉府君命安葬於此。從形家言。癸山丁向。兼子午之分。越十有一年。府君歿。遂合葬焉。府君昆仲四人。伯父諱廷琛。仲諱廷珍。出嗣二胞叔品亭公諱評。叔父諱廷珊。出嗣三胞叔次雲公諱謹。後

官永定河守備改名漢秀。吾父次居季諱廷琮字錦堂伯仲叔俱出先祖妣劉。府君乃繼配先祖妣韓出也。王考解人公歿。府君始八歲年十五而先祖妣韓又逝世。府君零丁孤苦。惟兄嫂是依。後與兒女談及往事。未嘗不歔歔流涕焉。府君自幼嗜學甚篤。弱冠入庠。及長理家務。每有餘閒。手不釋卷。先儒語錄以及陰陽卜筮之書。星命之學。無不披覽。又常以詩書訓兒輩。外而接人與物。鄉人稱厚德焉。張太孺人爲霸州邑庠生藹如公女。來嬪呂門數十年。佐理家政。教養子女。事無不舉。歿於光緒二十三年正月十五日。春秋六十有三。府君歿於光緒三十四年八月初一日。春秋七十有三。男二人。女四人。長適同邑萬君

執權。早世。次適新城宋君莊。三適涿州蕭君培宗。四適同邑高君樹桐。孫三人。長昌第。係長男濯所出。次銘第。鴻第。次男翮出也。於是略述梗概。以示後人。俾有考焉。長男優廩生濯謹撰。

大清宣統二年孟夏男濯翮謹立

右碑在牛坨鎮西北呂氏墓

賈錫琛訪錄

清故廩膳生伯清呂君墓碑銘

余生平寡交游。惟與同邑呂君伯清友善。祖若父累世夙好。又係姻婭。時時過內家相從也。二人相識於總角之年。以嬉以遊。追思多可笑者。長而知學。乃相商以文藝。君謹守繩墨。余則好爲高論。往往議論不合。各執己見。既而釋然。未嘗不啞然笑也。

曾日月之幾何。而君奄然物化。再求如昔之啜茗論文。何可得耶。噫。可哀也已。君諱濯。伯清字也。弱冠應童子試。冠其軍。繼食廩餼。蜚聲黌序間。五應京兆試。不售。性孝友。品學爲士林所推重。君循循儒者。若無他能。而因時應變。其智有足稱者。吾鄉自經改革。宵小乘閒竊發。盜賊屢警。君糾合同人。捐貲辦理保衛社。村鎮賴之以安。君子在下則靖一方之難。在上則息萬物之囂。其道一耳。君沒之日。鄉里聞之。有流涕者。蓋恩義之感人深也。夫上有以繼先人之緒。下有以啟後人之謀。在君自可無憾。而朋輩遊從。莫不惜之以爲善人君子。欲使幸而久在於世。亦不可得。爲可悲也。曾祖自楷。祖詮。父廷琮。世有清德。有弟曰翊。

配曹氏。生子昌第。君卒於中華民國三年陰曆閏五月十一日。享年四十有九。君沒之明年。其孤以墓碑之文來請。余自思學旣荒落。又無名位。其何能表章君之善。而交情夙誼。有宜見於余文者。詞之工拙。所不計也。因書其大略如此。遺其孤俾揭諸墓。以慰君靈。而昭來許云。銘曰。

考君譜牒。係出子牙。家道亨泰。門戶風華。子孫濟美。蘭茁其芽。嗚呼君乎。已於斯邪。

襄宸萬執樞撰

季峰劉幽書

中華民國四年孟夏四月穀旦

右碑在牛坨鎮西北呂氏墓

縣人賈光前寄示拓本

縣人賈士魁覆校

固安文獻志後序

吾宗君玉先生纂我縣文獻志都數十卷茲由同人釀貲先印成二十卷不以士魁爲譏陋委以校讐之役士魁因詳加披覽魯魚亥豕之訛尙所不免其有顯然錯誤則多係印局臨時修改字體所致逐一簽出還以質之先生列爲勘誤表載之卷末旣畢役士魁乃僭書其後曰甚矣先生居今稽古尙友千載之量何其閔耶在古人懷抱道義或樹偉績於當年祇以文字鬱湮未免名字翳如終古無人省錄埋光鏟采安必千百世之復有子雲先生則與古爲徒辛勤蚤夜汎覽古今墳典奚啻惠施五車博採窮探俾古人已湮之事跡瞭然復炳煥於千秋非

先生稽古之勤居心之厚曷由致是哉卷中如元之邊承事守禮明之高中丞澄等皆吾縣有數賢哲宜附祀於鄉賢者而舊志或姓名未載或功業未詳又如明蘇中丞志皋所著益智錄數百卷稿歸楊都尉家楚人文安之驚歎以爲勝於文獻通考高陽孫文正求之不獲內中兵機纂數卷孫夏峰先生之弟借鈔復失去夏峰所歎爲鬼神或忌其洩造化之秘而故護惜之者今先生則訪聞江蘇圖書館藏有此書雖爲我縣郭中丞光復所補訂而蘇公兵機纂之原著猶幸存於其中則先生表章鄉先正之功其加惠我桑梓爲何如耶回憶民國十四年秋與先生初相識於馮君劍秋所以姓氏同故一見尤相愛慕遂結深交自後書札往還獲益匪淺年來士魁搜訪

我縣金石諸刻聊相貢獻方自慚所獲之尠先生則尤矜異之以爲多方相助者莫士魁若也遂附賤名於册首同鄉諸公之末士魁誠自愧其學識之過淺與年齒之尙少然先生與人爲善取人爲善之懷於此益可見矣千秋者人與人相續而成焉者也古人已往之德業必賴後人之表著而姓字始彰今人待纂之鴻編尤賴衆人之贊襄而大業始就今先生雖以獨力擬爲此書然平日代木嚶鳴將伯求友之意每見於言表倘吾縣諸同志鑒其至誠合羣策羣力共事搜討時時有所贊助於先生續纂修終成吾縣第一完著尤士魁所代爲拜禱以求之者也至於續醵印資此書前二十卷之印行爲先生年友王公喻齋之力居多而各區區董諸公亦與有勞焉再刊行

七											六				
十五	十	九	四	三	二十四	二十二	二十一	十九	十四	九	八	七			
十三	十二	十一	七	四	二	十七	十二至十六	十一	十八	十五	二	十六			
五	六	八	十六	十七	十五	十八	四	四	七	十五	十二	十一			
駝	党	彩	職	藉	汽	昇	恒	籍	唐睿宗制已見前第六頁引舊唐書本傳此應刪	效	髮字下衍之字	弋			
党	駝	綵	賊	籍	汔	升	桓	藉	世字下脫三字	効	作字下脫佐字	戈			

八											九				十		
十六	十九	二	十二	十四	二十	九	十二	十五	十	十二	十九						
六	十五	十六	三	十七	五	十七	三	六	十七	六	十四	九					
九	四	十八	二十三	四	四	二十六	二十	十八	八	十六	二	十六					
祚	丞字下脫相字	員字下脫外字	天使二句惜陰軒本唐語林作天使馬悲敬滕公之室人看鶴舞閉王母之墳此用明刊本有訛字	誦已當依惜陰軒本作已誦	封字上脫小字	勿謂無傷句下脫匹婦含怨三年亢陽二句	肯	由	廟	常	波	石					
祈							旨	田	朝	嘗	坡	右					

勸誤表

以上全部連像共計六百七十頁										二十		
三十三		二十一	十六	十五	十三		十二	九	二十二	十八	十二	六
八	十二	十	十三	十二	十六	十九	八	十四	二十	二	十八	一
十五	八	十三	二十四	十五	二十	七	七	共三十行	三	十六	十一	二十一
時字上脫生字	陰	改名光武四小字當印在書字下	安	室	寔按當作甯	乖	幃	明楊氏祖德碑銘應附錄楊都尉事彙後誤列於此	喜	之	諂	鶴
	蔭		按	堂		乘	帷		善	名	諂	鶴

天津東馬路六吉里內華新印刷局承印

原件收藏

湖北省图书馆

原件书号

地 19

原件状况

原件完好

固安文獻志二十卷

賈廷琳修 徐世昌纂

民國十七年鉛印本

八冊

本部书共摄制 **2** 卷

2:1 卷首~卷18

2:2 卷19~卷20

版权所有 不准复印

本部书完

本片卷含： 卷19～卷20